





明宣宗實錄

卷三十四至七十四  
宣德二年十二月至  
五年閏十二月

大明宣宗皇帝實錄卷之三十四

宣德<sup>二</sup>年十二月甲寅朔 上省郊祀牲○乙卯行在禮部上冊  
立 皇太子儀注一先日昭告 天地 宗廟 社稷一前期  
鴻臚寺設節冊寶案于奉天殿中冊象寶西節居中設絳輿于  
丹陛之東尚寶司設寶案教坊司設中和韶樂及大樂是日早  
錦衣衛設鹵簿大駕 上服皮弁服御華蓋殿執事官行五拜  
叩頭禮畢鴻臚寺官請陞殿導駕官前導 上陞座尚寶司以  
寶置于案鳴鞭文武百官具朝服行叩頭禮左右侍班引禮引  
正副使入就拜位贊四拜傳制官跪奏傳制俯伏興執事官舉  
節冊寶案由殿左門出置御道中傳制官由左門出稱有制贊  
正副使跪制曰宣德三年二月初六日冊立長子祁鎮為皇太  
子命卿等持節行禮贊俯伏興又四拜禮畢執事官舉節冊寶

置于綵輿中黃蓋送至左順門外正副使朝北而立內官捧節冊寶由正門入至文華門內侍引皇太子出迎至文華殿內官以節冊寶置于案內贊四拜贊宣冊贊詣冊案前贊跪宣冊內官立宣訖贊受冊捧冊內官以冊授皇太子受訖以冊授內侍內侍跪受立于西簷授寶捧寶內官授寶如授冊之儀贊俯伏興平身復位贊四拜禮畢內官持節由正門出至左順門外以節授正副使報禮畢正副使得報持節復命一須詔候冊命行鴻臚寺官即設詔案于奉天殿中唱須詔翰林院官以詔授禮部官置于案奉迎至承天門開讀如常儀一謁告禮是日皇太子受冊寶畢內侍引詣奉先殿謁告如常儀一謝恩禮是日皇太子謁告畢內侍引皇太子詣皇太后前行八拜禮次詣上前皇后前行八拜禮又詣貴妃前行

八拜禮畢回宮一次日文武百官具朝服上表賀陳設如常儀  
上具袞冕御華蓋殿親王先行八拜禮賀次執事官行五拜  
叩頭禮畢鴻臚寺奏請升殿導駕官前導進表行禮如正旦儀  
一親王於上前行賀禮畢次詣內殿皇太后前賀行八拜  
禮畢詣皇后前賀行八拜禮又詣貴妃前賀行四拜禮一  
皇太后禮服陞內殿受內外命婦賀禮外命婦進表陳設如  
常儀皇后禮服陞內殿受內外命婦賀禮外命婦進箋陳設  
如常儀貴妃禮服於宮中受內外命婦賀禮外命婦進箋陳設  
如常儀一文武百官進箋賀皇太子陳設如常儀上覽之  
謂尚書胡濙曰皇子尚幼冊使奉冊寶至左順門授內臣捧入  
其免群臣賀禮○侍臣進講貞觀政要上曰唐太宗致治之  
美庶幾成康實本乎此予嘗反覆是書謂安天下必須先正其

身未有身止而影曲上理而下亂者請治國猶栽樹根本不搖則枝葉茂盛君道清靜則百姓安樂皆要語也○丙辰命武進伯朱冕行在禮部尚書兼華蓋殿大學士張瑛為正副使持節開西城兵馬指揮周義之女為荆王妃○丁巳賜鎮平王有燬宜陽王有沛冠服儀仗○朵顏等衛指揮僉事阿失帖木兒等未朝貢馬 上問行在吏部尚書蹇義今貪贓官遇赦者例罷為民對曰是 上曰罪狀明白者如例若微未具虛實未明改用之使自新○徙永寧荆子村東墩於東北山頂自鎮南口至寧川墩增置二墩又置長生口墩從指揮呂信所奏也○戊午遷鎮遠侯顧興祖至行在十四道監察御史吳啓先等六科給事中賈諒等劾奏興祖自鎮守廣西以來暴虐貪婪怠慢廢事不接交趾致失地喪師盜賊猖獗又斬從賊首詭奏首賊隱匿

賊屬請彼逃散上欺朝廷下失違人心請正國法 上命執於  
午門外三法司同公侯伯都督訊之興祖承伏還奏 上命僕  
王通等至通論其罪○己未 上諭行在戶部尚書夏原吉日  
都督存信自遠未歸非有資產可仰給自今月俸給全未○陞  
錦衣衛指揮僉事喜刺兒丁為都指揮僉事諭其使亦刀把里  
之勞也○寧夏總兵官寧陽侯陳懋言寧夏邊城重兵鎮戍宜  
廣儲蓄而軍士糧餉皆仰陝西有司餽運道途險遠民力艱難  
常以不足為憂請如岷洮事例令河南山西罪囚納米於寧夏  
贖罪以實還儲從之○庚申賜瓦剌使臣把把的尋陸拾殺人  
及遠東自在州指揮僉事亦領哈等鈔絲幣表裏縮執襪有差  
○貴州普定衛西堡長官司蠻賊阿昔阿哈等為亂底寨長官  
司蠻賊干炒聚眾殺人劫財都勻衛豐寧長官司蠻賊羅父蕩



燒毀爵宇破土官家屬平越澗谷旺苗賊甲宸甲恕清平長官  
司平若等寨蠻賊阿夜谷祀寨苗賊華子裸普安州蠻賊魯華  
各聚衆造亂搜殺招撫百戶張福等附近四川筠連縣諸處蠻  
賊群聚劫掠巡按監祭御史貴州三司以聞 上勅都督蕭授  
及三司御史先遣人招撫如其不從別調軍勦捕○辛酉臘節  
賜文武郡臣宴○賜亦力把里歪思王使臣滿勒法黑兒者罕  
等二百五十九人及陝西洮州衛僧綱司都綱管着藏卜疊州  
番僧頭目失勞星等八十八人銀鈔絲幣表裏紗羅綾綉絹有差  
仍賜滿刺法黑兒者罕鈔絹酬其馬直○壬戌賜琉球國使臣  
魏古渥制等鈔絲幣表裏靴襪有差○大同總兵官武安侯鄭  
亨奏高山等衛軍士今調陽和等處備禦所帶原牧官馬計二  
千六百三十餘疋緣陽和極邊無官給草料馬多瘦死請均派

大同八衛有力之家孳牧從之。○癸亥陝西臨洮府普覺妙濟國師領占藏卜遣僧劄石監藏四川東川軍民府故土官和府阿得妻插免遣叔阿圭等貢馬。○永昌等衛土韃軍滿刺亦刺思例刺沙馬黑木等逃出境獲還滿刺亦刺思奏願居京自效。馬黑木願於天津衛隨營居住各賜襲衣鈔布仍命有司給房屋器皿等物如例。○賜亦力把里歪思王等慶使臣滿刺法黑兒者罕等宴。○行在戶部郎中王良奉命於宣府諸衛埋糧芻勅奏總兵官都督譚廣拜進表箋不於公辭而就私家陳設龍亭儀仗於禮有違當遂聞。上諭行在禮部臣曰邊將但能嚴守備以副任使可矣不必一一繩以禮法。○內官張善伏誅善往銃川監造磁器貪黷酷虐下人不堪所造御用器多以分賄其同列事聞。上命斬於都市梟首以徇。○夜有流星大如

碗色青赤光燭地起奎西北行至天津炸散○乙丑起陝西行都司致仕指彈僉事呂均視事均舊總步兵二千操備後以年老就閒致是本都司言均雖老然在邊日久熟知地理險要請令總原操步兵備邊 上從之○丙寅朝鮮國王李禔遣陪臣李興發等奉表貢金銀器皿及方物賀 萬壽聖節至○丁卯陝西岷州等衛國師班丹領占遣刺麻失勞訖西寧衛大國師三丹藏遣其徒失刺監藏及疊州升朵簇故干戶恰卜子板的肖督吾等簇番僧簇頭本卜節等貢馬○陞行在工部營繕清吏司郎中黎澄為本部右侍郎食祿免不視事○戊辰陞曲先衛指揮使散即思為都指揮同知其下指揮千百戶鎮撫頭目陞職有差年老及已故者命其子弟襲代皆給誥命○以招撫曲先功陞安定衛指揮同知阿刺乞巴為都指揮僉事其下千

百戶鎮撫頭目陞職有差皆給誥命○己巳陞行在山西道監察御史俞萬為行在大理寺右寺丞右寺丞楊復為左寺丞○陞貴州右叅政王敏為右布政大敏任職九年考績赴京諸長官司以其寬恕公平奏請留之 上謂行在吏部臣曰蠻夷不易懷服彼既與之相安即為稱職其陞為右布政使調四川按察副使胡永成為陝西按察副使擢進士繆謙黃成劉伯大為行在監察御史諫福建道成湖廣道伯大江西道以前北京留守行在後軍都督府都事張昇行在左軍都督府都事朱禮江西按察司檢校衛鎮灤州民王頤為行在監察御史昇禮山東道鎮陝西道順江西道西安府檢校李謙順德府檢校孫冕為行在給事中諫禮科冕戶科皆以永賢舉也行在鴻臚寺右少卿趙泉親喪服闋至命復職復張政山西按察使雷春廣東潮州

府知府政初坐擅縱罪囚還至以情自陳 上宥之俾復任召  
按察使鄭辰還京春在潮州九年任滿赴京當陞民奏留之故  
命復任而陞正三品祿改通政司右叅議孫瑛為湖廣德安府  
同知以山西道監察御史楊禮不明憲綱改江西瑞州府推官  
○設西寧衛儒學雲南姚安軍民府大姚縣僧會司置僧會一  
員○增置廣西宣化縣那南寨巡檢司土官副巡檢一員○庚  
午朝鮮國王李禔遣陪臣文貴等奉表及方物賀明年正旦至  
○命故府軍後衛指揮同知黃斌姓孫英羽林前衛指揮僉事  
王貴弟聚襲職以旗手衛指揮僉事楊安老疾命其姓清代○  
行在禮部奏永樂十六年 太宗皇帝定制凡願出家為僧道  
者府不過四十人州不過三十人縣不過二十人額外不許濫  
收俟五年後考試如果精通經典給與度牒今天下僧道行童

赴京請給度牒者多係額外濫收且不通經典者多請如例悉遣歸若係額內之數亦待五年考試給與從之○交趾總兵官成山侯王通等既與黎利盟又聽利以陳高表入奏是日通不俟朝命遂率師出交趾由陸路還廣西太監山壽與陳智等由水路還欽州凡交趾三司文武官員旗軍吏典承差人等及家屬還者八萬六千六百四十人然亦有為黎利閉留不遣者○辛未昏刻有流星大如雞彈色赤有光起須女西北行至游氣○壬申罷行在通政司右通政秦川陝西布政司左叅議潘私為民因行在吏部言川等皆犯贓經赦用否請自上裁上曰犯贓豈可復用故悉罷之○癸酉賜朵顏衛指揮僉事阿失帖木兒臨洮府僧剎石監藏等及四川東川軍民府土官知府叔阿圭等鈔綵幣襲衣靴襪有差○直隸淮安府淮陰驛及淮

安邊連所奏舊設衙門皆在淮安新城東門外今開清江關河使容經過相隔十餘里應接不便請移置於舊城西門外從之

○甲戌福餘衛韃靼速昇哈來歸奏願居京自效命為所鎮撫賜金織襲衣綵幣銀鈔綿布鞍馬仍命有司給房屋器皿等物如例

○釋山東按察使虞信僉事韓壘李涵復職初壘奏信涵不應事法司逮問壘涉虛應徒信等不奉行鈔法應杖 上以其經赦俱釋之

○行在大理寺右少卿王文貴等奏乞請決重囚欵道 聖諭再審錄今犯者伏辜遂上其情罪 上親閱之命文貴等曰其中情重者決如律情可矜者發戍遼東如重罪臨決復有稱寃者再鞫實以聞若敗壞倫理鞠得實雖經赦不宥

○山西解州秦漢壽亭侯關羽廟在祀典歲久損壞俟農隙具材修葺從之

○長隨內使喜安坐誹謗伏誅

○夜月生交暈

隨主左右珥又生白虹貫兩珥色皆蒼白○乙亥賜朝鮮國使  
臣李思儉等鈔絲幣表裏有差○丙子陝西河州衛國師端竹  
領占違其徒鎖南領占烏思藏禪師羅兀刺遣刺麻速丹等貢  
馬及方物○復舉行捕盜法行在兵部言曩者霸州固安盜賊  
為患 皇上命御史監錦衣衛官巡捕今所在軍民編為什伍  
置巡警鋪嚴察慎防盜用屏息此首通州等處盜賊復作請如  
故事遣官巡捕申明其禁從之○丁丑 上御奉天門謂行在  
戶部尚書夏原吉等曰今年陝西亢旱秋田無收其軍屯子粒  
民間秋糧俱已蠲免比聞軍民之中多因缺食流離豈可不恤  
其令有司開倉賑濟仍於南京運絹五萬匹綿布十萬疋令隆  
平侯等用心拯救勿令失所○宥喃哈監剉死罪喃哈監剉者  
烏思藏怕木竹巴灌頂國師闡化王所遣使也初歸至西寧與



驛丞子鬪爭殺其子事聞 上以其遠人特宥之遣還仍勅闡  
化王諭令改過○行在戶部奏近召商於遼東廣寧衛中納鹽  
糧淮浙鹽每引納米三斗五升道里險遠轉運甚艱越中者少  
請如萬全右衛例每引納米三斗從之○己卯勅少師隆平侯  
張信尚書郭敦曰聞陝西軍民困於旱傷衣食窘乏流離轉徙  
朕甚憫焉已勅行在戶部於南京運絹五萬匹綿布十萬匹來  
賑濟可即與三司預計其尤艱難者均給之其一切科徵及不  
急之務皆停止凡軍民事有不便者悉具以聞○庚辰釋松潘  
衛指揮吳璋罪令復職勅之曰曩遣都指揮蔣貴等同爾招撫  
番蠻而四川三司及巡按御史皆言爾失機於威州朕續聞之  
非爾之咎今復爾原職聽總兵官都督陳懷等調遣惟爾於番  
夷情偽山川要害能諳之宜負勇輸忠贊輔主將以道寇盜以

安邊民如不感恩思報而違朕命罪不可逭矣。○壬午陞廣西  
丘溫衛土官指揮僉事黃瑛為廣西都指揮僉事。○上語行在  
戶部尚書夏原吉曰：昨聞閩中飢甚，已命有司發廩，又命卿出  
京庫布帛往賑之。是而自思，此皆朝政闕失所致，因作詩書愧  
卿，亦當與朕同憂也。詩曰：閩中歲屢歉，民食無所資。郡縣既上  
言，能不軫恤之。周禮十二政，散貨首所宜。給帛遣使者，發廩飭  
有司。臨軒戒將命，適往毋遲遲。命下苟或後，施濟安可期。吾聞  
有道世，民免寒與飢。循己不違寧，因情書愧辭。○癸未歲暮享  
太廟。○以明日正旦遣鄭王賸竣謁告。長陵 獻陵。○遣  
官祭五祀及旗纛之神。○是歲天下戶口戶九百九十九萬九千  
九百六十五千二百七萬八千八百八十五田地三百九十四萬三  
千三百四十三頃二十二畝田賦米麥三千一百二十五萬一

百一十石有奇綠一十七萬九千一百四十四斤綿二十三萬  
三百七十八斤絹九萬一千一百七十九匹布一十二萬九千  
七百二十四匹綿花二十三萬七千九百六十八斤折色鈔七萬  
七千一百三十三錠有奇雜課鈔一千六百九十八萬八千六  
百三十八錠米麥七萬三千九百五十一石銀四千四百二兩  
銅二千一百二十九斤鐵四十八萬八千五百九十八斤有奇  
布二百七十六匹鹽課鹽三百五十六萬三千二百七十七引  
折色鈔二千二百二十一萬八千四百三錠米六十七萬七千  
八百一十五石綿布七萬一千五百二十九匹有奇茶課茶六  
十三萬二千四百三十五斤折色鈔一萬五千一百六十四錠  
七田子粒四百六十萬九十二石採納金四百八十三兩銀十  
八萬五千七百三十八兩水銀三千四百四十七斤硃砂五百

九十八斤石綠二千四百六十八斤有奇雄黃一百四十七斤  
漕運北京米豆三百六十八萬三千四百三十六石減免天下  
官田等項稅糧計米麥一十萬四千八百七十九石有奇

此項撥庫  
本抱本補

大明宣宗皇帝實錄卷之三十四

卷尾據原書  
補誌其無

明宣宗章皇帝實錄卷之三十五

宣德三年春正月甲申朔上御正朝受朝賀大宴文武群臣及四夷朝使。文武群臣命婦朝皇太后皇后。乙酉命行在工部右侍郎黎澄月俸支全米澄前安南僞主黎蒼之兄俘獲至京太宗皇帝祿而用之初授工部主事上即位陞郎中內臣有言其貧者遂陞侍郎至是復命月俸給全米云。丁亥命都指揮僉事黃瑛張貴鎮守龍州憑祥坡壘等處聽總兵官都督山雲節制初命總兵官都督蕭授守備坡壘至是黎利請罷兵息民復陳氏之嗣遂命授回貴州防禦而命瑛等守龍州勅瑛曰爾忠事朝廷盡心邊務多効勞勩朕甚嘉之故既陞爾之職今命爾專領土軍與張貴鎮守龍州憑祥坡壘等處往來備禦仍聽都督山雲節制爾等其益德忠悃撫恤軍民慎

因遣備以副朝廷眷任之重勅授曰前命卿率領官軍備禦坡壘丘溫等處今允黎利之請復陳氏之嗣罷兵息民已命都指揮僉事黃瑄張貴等率兵守龍州於憑祥坡壘往來備禦卿即率所領官軍仍回貴州防禦。己丑享太廟。遣中官祭司戶之神。庚寅勅緣邊守將各嚴守備。迤北和寧王阿魯台所遣都指揮把克兀思答里等陞辭遣指揮曹者赤帖木兒與之偕行齋壘書諭阿魯台曰朕恭膺天命承祖宗大位主宰生靈改元宣德大赦天下咸與維新一切往事悉真不問念四海萬邦之人皆天所生故上體天心一視同仁皆欲使之安生樂業王今遣人朝貢陳詞誠懇深用嘉之夫上天之心惟在愛人人能順天天必佑之王宜益堅至誠以共享太平之福於無窮今遣指揮曹者赤帖木兒等賜王絲幣表裏各五十匹

至可領也。以密志順王卜答失里尚幼未能勝事遣使立  
故忠義王免力帖木兒之子脫歡帖木兒嗣爲忠義王俾同忠  
順王綏撫部屬遂賜二人綵幣表裏并賜其母妻及都督都指  
揮木納以下有差。命都指揮康旺王肇舟佟荅剌哈住奴兒  
干之地建立奴兒干都指揮使司并賜都司銀印一經歷司銅  
印一。夜分流星大如雞彈色青白有光起張東南行至翼。  
辛卯以大祀南郊上御正朝文武群臣受誓戒。壬辰上  
以歲事更新命自正月初一日以前文武群臣凡有過名悉除  
之俾圖自新。遣內官亦失哈都指揮金聲白倫等齎勅及文  
綺表裏往奴兒干都司及海西弗提等衛賜勞頭目達達奴丑  
禿及野人哥只苦阿等嘉其遣人朝貢也。癸巳遣內官李信  
林春李貴郭泰等齎勅及金織文綺表裏往亦力把里別失把



里亦昔闊哈烈馬綽兒八剌黑城把答失罕撒馬兒罕賽藍城  
掃郎城達失干城失剌思亦思弗罕及坤城等處賜其王及頭  
目蓋嘉其遣使朝貢也以信等道過沙州赤斤蒙古二衛併賜  
掌衛事都指揮僉事因即來指揮薛迭古等金織文綺絲幣有  
差○夜有流星大如雞彈色青白有光起軫東南行至庫樓○  
甲午大祀 天地于南郊 上還謁 皇太后畢出御正朝文  
武群臣行慶成禮○夜有流星大如雞彈色青白有光起角東  
南行至游氣○乙未立春順天府官進春 上御正朝文武群  
臣行賀禮○以大祀慶成大宴文武群臣及四夷朝使○丙申  
勅總兵官都督山雲曰凡廣西軍務一以委卿卿宜夙夜盡心  
嚴固邊備撫綏得宜俾軍民相安於無事用稱朕任使之意欽  
哉○四川總兵官都督同知陳懷等奏松潘叛蠻已招撫復業

遂勅懷等曰茲聞蠻寇已靖卿等協謀盡力攻討撫綏咸得其  
宜朕甚嘉之然此寇叛服不常雖由邊將失於撫綏激其爲亂  
亦由其素蓄逆心遂託此聚衆攻陷州縣殺傷官軍肆行虜掠  
今既撫捕已定須盡索其搶去人口軍器等物給還宥司及被  
虜之家庶可宥其叛逆之罪若其不悛仍恃頑據險不還所掠  
之物可乘此特督遣官軍與土軍蠻人併力摧殄使不復萌異  
心然後邊方可以寧靜軍民可以久安卿等功名亦垂於永遠  
須夙夜盡心善爲區畫又勅懷等曰卿奏欲將松潘等衛所原  
屯旗軍取回操守可更斟酌只取正軍其餘丁仍令屯田庶幾  
兩不妨悅調到四川都司官軍准奏於內量存各處守備事平  
之日令仍還原衛所缺能幹都指揮指揮及千百戶鎮撫已令  
兵部銓選成都中衛指揮郭靖茂州衛千戶章恕陝西臨洮衛

百戶艾貴初與吳玉皆失機今俱有無罪令復原職靖仍令守  
疊溪千戶所待事平回衛恕仍守茂州衛左所貴待寇平仍回  
臨洮凡四川陝西從征軍旗於四川官庫內每人給與綿布二  
匹卿等所領官軍但出力征戰有功及畏怯退縮誤事者皆具  
名聞用憑賞罰。丁酉陞行在通政使司通政使李嘉爲北京  
行部左侍郎初嘉當 太宗皇帝靖內難時有守城功自序班  
累陞至通政使至是 上念其老且久於任特優待之。以太  
嶽太和山玄天玉虛宮提點任自垣爲太常寺丞仍掌玉虛宮  
事。賜陝西岷州衛刺麻失勞乂西寧衛刺麻失刺監藏及疊  
州升朶簇故千戶恰卜子板的肖督吾等簇蕃僧簇頭本卜節  
等鈔綵幣表裏襲衣絹布有差。戊戌上元節賜文武群臣宴  
。命通州衛指揮僉事夏春掌茂州衛陸慶左衛指揮僉事吳

迪掌威州守禁十戶所馳驛以往先是總兵官都督陳懷奏威茂松臺四處皆臨邊要害請遣都指揮指揮四人提督守備松潘時有指揮使吳埜疊溪有成都中衛指揮僉事郭靖掌之故惟遣春迪云。今亦力把里遣來使臣法黑兒者罕爲都指揮僉事別帖木兒爲指揮僉事尾刺使臣把把的爲都指揮僉事哈只兒火郎吉爲指揮僉事合密遣來使臣滿刺亦蠻捨黑馬黑麻馬指揮僉事其下授官有差悉賜冠帶。已亥朝鮮國王李洵遣陪臣韓承順等進方物。賜朝鮮國使臣文貴等鈔絲幣表裏紵絲襲衣有差。雙城衛指揮僉事兀丁哥阿剌山衛舍人阿剌孫等來朝貢馬皆奏願居遼東自在州賜金織襲衣絲幣鈔布仍命遼東都司給房屋器皿等物如例。甘肅總兵崇信伯費獻有疾上言臣祖思洪武初爲燕府左相後革相府

改授燕山中護衛指揮使臣父肅襲職臣繼之從 太宗皇帝  
征伐得備戎伍效微勞累陞至左都督 陛下即位封臣伯爵  
俾鎮邊城恩厚任重不能圖報而臣以衰老之年近得喘疾恐  
在旦夕如臣不起還葬故鄉跋涉遠道甚勞人力乞就葬甘州  
令男鉉守墓仍乞存房屋田地以供養贍 上謂尚書夏原吉  
曰獻事 皇祖 皇考效勞久矣其從之仍命太醫院遣良醫  
馳往視療。貴州總兵官都督蕭授奏獲平浪長官司蠻賊紀  
那等鞠治死於獄先是紀那等假稱土官聚黨據本司副長官  
阿查故地劫殺諸寨授遣兵捕之至是以獲聞。日生左右  
珥黃赤鮮明。庚子女直野人頭目女隆加安威哥等來朝貢  
馬。賜陝西河州衛刺麻鎖南領占曲先衛都指揮同知散即  
思所遣指揮公事失刺罕等及烏思藏刺麻遠丹等鈔綵幣表

裏紵綠襲衣靴。淺有差。遣初撫諭卜里牙愛馬王知院慌哈刺賜綵幣四表裏。慌哈刺在卜刺之地嘗遣使哈里爾馬山來進馬中途爲瓦刺所掠。哈里爾馬山得脫。至京師言慌哈刺歸向之誠。上嘉而撫之。至是遣歸。故有是賜。○辛丑四川夔州府萬縣儒學訓導李鐸言各處從祀先賢名位多有差訛。且先次序若不考正實乖祀典。上謂行在禮部尚書胡濙曰。昔我太祖皇帝斷自聖心。大正神祇名號。惟於先聖先賢悉從其舊。將以垂憲萬世。豈可差謬其達考正。頒示天下。○直隸蘇州府奏知府同知通判俱缺。上諭行在吏部。臣曰蘇州大郡公務繁劇。急選廉公有才幹者任之。貪暴厲民者不可用。○行在工部奏淮安修改漕運船所費不少。上諭之曰漕運國大事。修船豈可惜費。昔劉晏於江淮造船皆豐其資。船成經久不壞。

其後有司慳吝減損大半船遂脆薄漕運竟廢此事足爲監戒  
○癸卯建州左衛都督僉事猛哥帖木兒遣千戶答答忍等同  
三萬衛百戶趙鑽古奴等來朝貢馬○直隸徽州府黟縣奏去  
年七月初旬民食艱甚已發預備倉官穀二千六百五十四石  
有奇給貸飢民二千一百一十一戶俟秋熟償官○夜有流星  
大如盃色青白有光起天廚西北行至濁○甲辰爪哇國王揚  
惟西沙遣通事亞烈張顯文等來朝貢方物○陞行在府軍前  
衛指揮僉事呂俊爲都指揮僉事於府軍前衛帶俸○賜福餘  
等衛都指揮安出弟李齋等及原差招諭官軍千戶黃照化等  
一百一十人鈔絹絲幣表裏紵綠衣服等物有差以李齋等招  
諭初至也○日生背氣一道色青赤鮮明○乙巳亦力把里歪  
思王遣使臣法虎兒丁等貢駝馬○丙午遼東劄童衛指揮阿

里哥來朝貢馬。陞儀真衛正千戶黃照化爲指揮僉事。賜安定等衛指揮同知果脫卜花及公差回還都指揮同知陳通等三十五人鈔絹綵幣表裏有差。丁未行在兵部尚書張本裏前遣廷臣清理軍伍其間猶有未明白者請再遣官分行清理。上從之。勅六科都給事中各道掌道監察御史曰軍政國之所重。今欲遣朝臣周行天下清理軍伍必得公廉幹濟之人。庶稱委任。勅至爾等各推舉給事中監察御史十有四人具名來聞。用分理茲事。若所舉之人貪濁無能有悞軍務必併罪舉者。○邊將奏兀良哈之人往往於灤河牧馬請掩擊之。上曰虜犯邊當正其罪。今未有犯姑遣人諭之。於是遣指揮僉事黃照化等齎勅諭曰爾等歸心朝廷恭修職貢往來生理有如一家。蓋已久矣。比聞爾之部屬逼近灤河兩岸牧馬邊將致疑。已



嚴兵以俟。今特遣人齎勅往諭。其遵守法度約束部伍。不許纖毫侵越。而朝貢如故。庶爾等父母妻子安居無事。永享太平之福。○戊申。賜朝鮮國使臣韓承順等鈔綵幣表。褒有差。○行在兵部奏請選武官。上曰。是皆因父祖有功。故錄用之。比年以來。軍官子弟。安於養。養浮蕩成風。試其武藝。百無一能用之。管軍不能撫恤。有司但知循例銓除。一旦有警。何以得人。祖宗時。置武學教之。書且俾習騎射。當襲職之時。嚴加比試。賞罰之法。載在典章。爾其申明之。務求實效。庶幾人知勸懲。國家亦有賴焉。又曰。其中果有奇才異能者。宜甄別之。毋俾沉屈。○朔州知州張復奏。舉軍中子弟楊鑑等二人。有志操。堪任使行。在吏部言舊無舉武人子弟例。上曰。古人出貧賤中。任大事。成大功者。多有之。吾知軍伍中無才能者。其召至京考察之。○河東

陝西都轉運鹽使司奏鹽池長樂等二堰損壞請役民修築  
上命俟春種畢用工。山東兗州府費縣奏本縣多山不通舟  
楫民輸糧草員荷甚艱近本府令發民一千八百餘人各備材  
木至寧陽縣等處修築圩塘疏浚河道遞接往來緣去寧陽五  
百餘里山路崎嶇實難致力乞免其役從之。已西鞏昌府會  
寧縣里長老人三十三人詣闕言本縣知縣郭完廉潔正直愛  
民勤事今為姦民誣告其罪緣告者之家曾被責罰所言悉非  
實事乞留本官庶幾民不失望行在通政司以聞 上謂都御  
史劉觀曰孔子云衆好之必察衆惡之必察今一人言其惡而衆  
人稱其善其令陝西按察司特與辯明毋為所罔。庚戌行在  
刑部吏楊斌等言臣先充生員巡按御史考試時患病昏怠措  
詞有舛例發充吏乞再考 上命行在吏部曰疾病人之所有

但姦偽亦不可不察宜嚴考之以杜僥倖。辛亥直隸蘇州府  
吳縣巡檢譚復奏舉宋范文正公十二世孫范希正端敏誠篤  
才堪撫民 上命行在吏部召用之因爲侍臣曰范仲淹嘗言  
士當先天下之憂而憂後天下之樂而樂士君子皆當以此存  
心

大明宣宗憲天崇道共明神聖欽文昭武宣仁純孝章皇帝實錄卷之三十五

明宣宗章皇帝實錄卷之三十六

宣德三年二月癸丑朔。甲寅。行在都察院各道及六科具所舉清理軍伍監察御史給事中姓名以聞。於是命御史彭謙給事中高舉往四川。御史連均給事中楊鼎往順天。順德等八府。御史趙儼給事中李蕃往河南。御史羅亨信給事中李錫往山西。御史王璉給事中李庸往浙江。御史汪景明給事中彭璟往江西。御史李立給事中孫確往鎮江。常州。蘇州。松江。御史劉信給事中武達往應天。太平。池州。徽州。寧國。安慶。廣德等府。州。御史姚震給事中吳信往廣西。御史裴俊給事中李應庚往廣東。御史陳貞豫給事中楊中往揚州。淮安。鳳陽。廬州。和州。滁州。徐州等府。州。御史賀敬給事中車遜往湖廣。御史王俊德給事中丁銑往山東。御史尹崇高給事中吳澤往福建。賜勅諭之曰。比以

兵伍多闕特命廷臣分詣清理尚有未盡今命爾等往覓其事夫兵之不清其弊匪一有匿情以苟免有無因而濫加必廉公勤明乃克有濟爾等皆朕近臣其殫乃心恭乃命俾兵無欺隱之弊民免非辜之撓朕則汝嘉汝或不恭命怠慢貪贖棄公務私廢事而屬民必罰不貸欵哉復以新定清理事例十一條通前八條榜示天下其增定十一例一曰軍逃還鄉有詐爲死者有更名充吏卒貼書倚官害民者有爲僧道生員者有投豪勢官民爲家人佃戶行財生理者有隱其丁口寄於別戶并於外境立民籍者並許自告改正違者并其鄰里及容隱之人俱如前例論罪二曰逃軍有詐稱還鄉等名目寄往他所及兩京并軍衛屯營人煙輳集處隱蔽影射以致原籍原衛兩無挨尋者清理官員宜督令所在官司委官挨勘得獲及本軍能自輸情

者俱寄本處衛所收役仍將鄉貫及原衛所官旗見在人口年  
甲備冊繳報如委官不盡心挨勘逃軍頑不自首權勢之家欺  
隱如故他人發覺追銀十兩以充賞資本軍及容隱之家與不  
盡心官員鄰里俱如前例問罪其例後逃者首於一月之內仍  
送原衛還者依律罪之三日軍戶有恃豪強因充糧里長老每  
遇取丁輒賄賂官吏及勾丁之人挾制小民細戶朦朧保勘亦  
有里老俱係軍籍逐年互相欺隱不以實報者俱令自告改正  
如仍前非事覺本軍發原衛各家罰充附近衛所軍四曰山西  
各處抽丁等軍原選續解本皆丁壯往往賄賂官旗以其幼弱  
私自輪替以致軍伍不精若仍前弊令原籍官司里老充捕及  
同伍人等指實以陳并其事內為弊之人俱如例論罪五曰軍  
戶有全家逃竄逐年取丁其里老鄰佑明知其處受賂容隱者

俱限半年之內獲解或自首免罪若過期事覺其軍調發邊  
衛里老部人罰充附近衛所軍六日因充及調衛旗軍有更易  
姓名鄉貫<sup>又</sup>隱其原籍衛所丁口不以實報其後或逃或故衛  
所憑其原報坐取有司回無名籍似此迷失者多皆許自首以  
免本罪容其三月備資裝赴伍若不自首被人發覺者其軍調  
煙瘴衛所仍選戶丁以補原伍鄰里容情者如前例問斷七日  
紀錄軍丁年應赴伍而衛所離鄉千里之外者於附近衛所收  
役有司申達本部轉行原衛所除豁其伍八日軍士如戶絕有  
司及鄰里從實保勘類兩具奏即為除豁免致勾擾胎害平民  
若徇私欺隱以有作無如例問罪九日逃伍旗軍已三犯者所  
在官司捕審明白解京奏聞處決如律先選其戶內丁壯補伍  
能自首者免罪令赴原伍十日有司官吏取軍官旗有費放正

軍擾害良民者清理官及巡按御史布政按察二司捕問明白  
送京定罪十一日各州縣勾解逃軍及補役軍丁多於所在官  
司冒給家人文引供送其家人不行隨送及到衛所不一二月  
即將文引照身逃回原籍及影射各處潛住或經商受雇於人  
者有之若此等者許三月內赴官出首與免本罪仍赴原衛所  
着役故違不首或事發揆究得出本犯發邊遠充軍戶下別選  
壯丁一人補原伍兩鄰里甲并有司虛出文引官吏一體問罪  
○賜爪哇國通事亞烈張顯文等鈔絲幣表裏有差○行在道  
政使司奏雲南大姚縣知縣高榮童考滿至京言中途遇風壞  
舟奏贖牌冊多爲水汚然無所在官司文憑照證當正以不謹  
之罪 上曰雲南至京水陸萬里風濤之險出於不測豈人力  
所能制此不必罪○直隸河間府寧津縣民陳諒妻孔氏一產



二男一女行在禮部以聞命如例給賜。乙卯賜 今上皇帝名且以置書諭之曰朕爲天下之君爾爲朕長子所以正國家之大本承萬年之天序皆在於爾今賜爾名爲邦鎮夫邦者至大之義鎮者安重撫定之道 宗社之尊海宇之廣民庶之繫所係甚重必有至大之德用能膺之惟誠惟敬永奉 宗廟社稷惟寬惟仁弘福海宇民庶道德功用斯爲至大而上天之眷祐下民之歸戴皆本於斯爾其敬之服膺惟永。丙辰勅湖廣都司布政司按察司及巡按監察御史凡征進交趾在逃官軍俱宥其罪限兩月內各回原衙所如仍逃不出禽獲至者必依軍法處治。湖廣布政司按察司及巡按監察御史奏叛寇盤伯孫等遁入鄴境廣西富川縣糾合僮賊韋父黎等聚衆劫掠出沒不常勅總兵官都督蕭授等遣人諭以禍福悉令復業如

其頑獷不服即量調官軍勦之。行在兵部奏今遣御史給事中往各處清理軍伍給事近侍之臣御史耳目之官嚮嘗有同行而爭坐位者請正其序。上命以品級爲序。丁巳以明日立。今上皇帝爲皇太子。上親告天地宗廟社稷。遣北京國監祭酒貝泰釋奠先師孔子。朝鮮國王李祔遣陪臣韓生等來朝貢方物。賜女直野人頭目女隆加安成哥等鈔綵幣表裏有差。戊午祭大社大稷。遣官祭先農。遣太師英國公張輔少師行在吏部尚書蹇義爲正副使持節冊立。今上皇帝爲皇太子。冊文曰朕荷天地之眷佑嗣祖宗之鴻業撫御天下祇懷永圖重惟承國家之統條華夷之心必建元良以隆大本長子祁鎮日表英明天資端重宜爲儲副正位東宮今特授金冊金寶立爲皇太子惟敬以立德

惟仁以興理親正人以務正學體天心以得人心存之以至誠持之以無逸用尤紹我宗社于萬萬年爾惟敬之。詔天下曰朕承天序祇奉寶圖惟祖宗積慶之隆衍本支於至盛惟帝王統理之道建儲副以爲先長子祁鎮日表英明天資端重比者親王文武群臣合誠奉表請立東宮于再于三言之切至恭承皇太后聖訓國家大經宜循衆議今以冊寶立祁鎮爲皇太子夫崇建元良所以重萬年之統豫定國本所以係天下之心詔告臣民咸使知悉。遣使詔告朝鮮諸國。賜建州左等衛千戶答答忽并原遣招諭回還百戶趙鎖古奴等鈔絲幣表裏并紵絲襲衣有差趙鎖古奴本三萬衛百戶先隨楊木荅兀等叛去宣德元年同千戶楊滿皮來歸遂遣二人同齎勅招諭楊木荅兀等而楊木荅兀同楊滿皮俱往古州惟趙鎖古奴

同舍人逯古等來貢馬荅荅忽等送之。至京故併賞之。乙未  
文武群臣上表賀立皇太子即上箋賀皇太子。慶王櫛  
奏欲移居韋州其地田養馬軍士請仍留寧夏遇有聲息聽總  
兵官調用又奏有告護衛指揮千百戶鎮撫軍校九十五人占  
種田土今總兵官及御史追問皆是永樂中佃種上以韋州  
王舊所居復書令居韋州仍勅寧陽侯陳懋及巡按御史釋所  
問之人土田悉如永樂故事從護衛官軍耕種自今不得輒聽  
下人妄告以失朝廷親親之意。賜亦力把里等處使臣法虎  
兒丁遼東扎童衛指揮阿里哥等鈔絲幣表裏有差。夜有流  
星大如雞彈色青白有光起東井西南行至玉井。庚申以明  
日萬壽聖節遣鄭王出謁告長陵獻陵。交趾總兵  
官成山侯王通等遣人馳奏言去年黎利攻圍交趾臣率師與

戰屢捷斬偽司徒黎彥等生擒偽司空丁禮等并從賊以萬計  
追至富良江溺死者無算賊懼不敢復戰迨又集土人反取偽  
王以堅衆心不時渡江侵掠臣等急望大軍來援又聞安遠侯  
柳升至鎮夷關戰沒保定伯梁銘尚書李慶等皆病死都督崔  
聚領軍進至昌江爲賊掩襲黔國公新寧伯進至歸化等處亦  
爲賊阻隔不得進臣督衆日夜攻擊黎利恐朝廷再調大軍討  
捕遂遣人奉書請降又率大小頭目日詣軍門請罪又同偽王  
陳嵩遣人奉表陳情謝罪貢代身金人銀人等物并送都督蔡  
福都指揮魯曾等一萬三千三百九十一人馬騾一千二百匹  
先還京請乞班師繼又遣其子姪赴軍門送款願歸順朝廷臣  
切思奉命討賊當輸忠効死再待援兵但城中官軍數少人情  
驚懼無有固志又賊衆狂狡過於曩昔水陸要害俱爲所據雖

有援兵亦難猝至城池終恐陷沒不免再興師旅以一隅之地而勞天下之衆致君父之憂非臣子忠君之心臣與衆計議以爲不如乘此機會整率師旅出至生地再圖後舉臣已率交趾屬衛官軍還至廣西南寧伏望 皇上以陳嵩是否陳氏子孫爲名遣使往來覘伺若有虛冒然後量添軍馬水陸分路進討如再不効臣等甘受誅戮謹俯伏俟命 上覽奏諭侍臣曰總兵官在外擅與賊通不俟朝命輒棄城歸無復人臣之禮矣。辛巳 萬壽聖節 上詣 奉先殿行禮 皇太后前上壽畢出御正朝受賀大晏文武群臣及四夷朝使。壬戌行在禮部左侍郎李琦工部右侍郎羅汝敬等奏成山候王通不俟朝命擅率官軍棄城而回臣等至南寧遇之遁力止臣行欲待奏請臣不敢從已馳赴龍州俟交人迎接，凡者等衛指揮僉事木

答兀等罕東衛密落族國師端岳監截逆僧却兒失加等來朝  
貢馬。賜朝鮮國貢使李興發等宴。夜日流星大如斗色赤  
光燭地起右攝提有聲如雷後有五小星隨之至近濁炸散。  
癸亥勅成山侯王通都督馬瑛得奏知官軍已回至廣西南寧  
前聞安遠侯柳升都督崔聚敗績朕以爾等竭忠奮力戰鬪未  
己生靈何辜肝腦塗地欲保全之蓋朕素志初得陳嵩表及黎  
利與總兵者書請立陳氏之後深契朕心即遣禮部左侍郎李  
琦等齎詔赦交趾官員軍民之罪令具陳氏子孫來聞遣使冊  
封并勅爾等率領官軍及鎮守內官并三司官吏人等回還蓋  
此舉非爲叛賊猖獗朝廷不能調兵勦滅但不忍赤子久罹塗  
炭爾等正宜堅守城池以待朕命乃輒與賊通棄城徑回爾等  
雖急爲自全之計其如國體何且失臣子之禮豈不爲蠻夷所

笑勅至即令所領軍馬并黎利等送出潰散官軍各回原衛所爾等領在京官軍回還其陳喬黎利所遣赴京之人悉聽其來仍勅內官山壽馬騏等與通同赴京。寧王權奏欲令護衛此軍爲臨川等王造居第今年暫免屯種從之。寧國大長公主遣子梅景福進御用袍服。上賜公主鞠衣二雲肩袍二鈔一萬貫。以鎮守涼州都指揮僉事丁剛有疾命其子武爲涼州衛指揮僉事代領馬隊不爲例。甲子徙置靈州千戶所於城東先是寧夏總兵官寧陽侯陳懋奏河水衝決至城下請徙於城東命俟來春用工至是城成遂徙之。乙丑宣府總兵官都督譚廣奏萬全右衛臨邊重地往往聲息不絕其鎮守都指揮黃真不務嚴謹近有邊卒言真數擅出軍圍獵招致虜使飲於私家請逮鞫之。上謂行在兵部尚書張本等曰圍獵之事有



之招致虜使則未必然爲邊將當晝夜嚴備不可須臾怠忽真輕率僥幸無虞姑紀其過爾其移文切戒之再爾必重罰雖悔不及○巡撫陝西隆平侯張信等奏昨文縣守禦千戶楊瑛言馬兒潘闖等簇生番拒命請軍勦捕欽奉璽書令臣等招諭已遣指揮劉瑛往彼撫諭隨得瑛報諸簇生番本皆安業未嘗爲非近楊瑛領兵至境逼令納糧充軍需索非一以此拒命今道路梗塞不能前進楊瑛生事激變番民宜正典刑 上曰治蠻夷宜簡易靜以鎮之自然順服今生事激之使叛不可寬貸命行在都察院逮瑛治之○行在都察院左都御史劉觀言擒獲強盜已有陞賞之例然捕盜之法貴嚴嚴則人不敢爲盜捕者亦皆盡力自今強盜劫掠地方軍衛有司官吏并里鄰俱發充軍仍令緝捕兩月得獲者免罪限外不獲依例發遣其強盜已

獲者鞠問是何衛所州縣若軍則罪其管軍者民則罪其官吏  
里老四鄰如此則人知所警畏 上曰此令不無大嚴更與群  
臣議之○甘肅總兵官崇信伯費獻卒獻鳳陽定遠人祖愚洪  
武初為燕府左相後革相府授燕山中護衛指揮使愚卒獻父  
爾襲職肅卒獻襲從 太宗皇帝靖內難陞都指揮同知鎮守  
山海永樂五年召還陞後軍都督府都督僉事六年命充副總  
兵巡海備倭七年率兵捕湖廣叛寇八年充總兵官鎮守寧夏  
甘肅等處討叛虜亦令真巴等平之十年奉命甘肅備禦 仁  
宗皇帝嗣位命充總兵官佩平羌將軍印鎮甘肅尋陞右軍都  
督府左都督宣德元年七月入朝 上念其久勞封崇信伯賜  
誥券子孫世襲復鎮甘肅獻為人和易能撫士卒在邊幾二十  
年境內寧靜至是卒遣官賜祭賜賻贈命有司營喪葬○夜有

流星大如雞彈色赤有七起天廟西南行至天相炸散，丙寅  
勅總兵官文傳黔國公沐晟令交趾陳氏孫嵩及頭目黎利等  
遣人進表貢方物謝罪并送還潰散官軍馬匹已至廣西其成  
山候王道等率領官軍及鎮守內外官并三司官吏人等俱已  
回還勅至即令興安伯徐亨新寧伯譚忠俱回京師卿等所領  
官軍悉令各回衛所卿尤宜夙夜盡心謹飭邊防以副委任之  
重。勅總兵官都督山雲前命都指揮張貴同土官都指揮黃  
瑛鎮守龍州憑祥坡疊往來哨備并勅都指揮陳全等體實交  
趾事情及收集在逃漫散官軍於有禮之處操備今交趾事朝  
廷區畫已定卿可相度龍州憑祥坡壘事勢或仍令張貴黃瑛  
率土兵鎮守或止令黃瑛領本衛官軍守備何者爲便陳全所  
領官軍俱令各回原衛所全或留南寧操備或令回廣西都司

理事何者爲使卿皆審度得宜就爲處置仍具奏來。丁卯

上奏 皇太后遊西苑自 上即大位尊事 皇太后極其孝

敬每旦暮詣西宮朝謁愉色奉承惟恐弗及 皇太后慈仁隆

至每見 上則忻然從容詢及政事及所平決 上數陳明達

皇太后喜動顏色凡軍國大政必稟命而行四方貢獻雖瓜

果之物必先以奉 皇太后 皇太后或時召 上雖有急務

必促駕而往至是恭請 皇太后遊西苑皇太后皇妃皆侍行

上親掖 皇太后與登萬歲山奉觴上壽獻詩頌 聖德 皇

太后悅酌酒賜 上且諭曰今天下無事吾母子得同此樂皆

天與 祖宗之賜也天下百姓皆 天與 祖宗之赤子爲

人君但在保安百姓使不至於饑寒則吾母子斯樂可永遠矣

上拜稽首曰謹受教是日甚樂將晚 上及皇后皇妃送

皇太后還宮。戊辰復書趙王高燧曰：王友悖慢，已降勅切責之。令其改過如復不悛，必處之重法。所云養馬小廝得受等來京，恐妄言生事，惟叔國家至親，小人之言，決不能聞。蓋時掌彰德衛事都指揮王友出入盛陳兵衛，又日夜以兵圍王府，不令護衛軍出入。人皆驚恐，而趙府養馬小廝得受等潛遁友執送至京。趙王恐懼，以奏故復書解之。勅諭三法司：朕惟聖人制刑罰，用昭天討，以弼治化。刑罰當則天道協和，人心悅服。家國天下并受其福，否則感傷和氣，災沴百出。是以古昔帝王必皆慎簡刑官，我國家稽古為制，建三法司，刑部掌邦憲，都察院兼理刑名，大理寺審允輕重。自祖宗以來，慎重人命，務存欽恤。朕嗣承大統，祇奉舊章，不敢以喜怒為法，重輕期與天下同躋仁壽。比聞刑罰失當，無辜者銜冤有罪者<sub>法</sub>免，朕為惻然不

違寧處咨爾法司夫儉邪者利口柔良者寡納惟言是稽情偽  
不辨此其可乎玩愒歲月溺於安逸囚繫瘦死恬不爲意此其  
可乎不諳律意不察人情移情就獄苟具文書此其可乎或畏  
權勢徇其請託或念恩怨從而報復或措弄刀筆輕重任情或  
恣肆捶楚鍛鍊成獄甚至貪圖賄賂略無畏憚此何心哉一夫  
不獲時予之辜一人稱冤百姓驚駭朕惟慎刑罰簡爾賢良爾  
惟體朕心用諧厥職 天地神明昭鑒在上善惡之報捷於影  
響爾惟恭朕命惕然警省追改前愆以公道爲心以愛人爲本  
庶以持身勤以從事不惟國家有賴爾亦永保祿位貽福子孫  
爾不恭命明有國法幽有神譴爾其欵哉勿貽後悔 賜誥命  
封建平伯高遠母爲太夫人妻爲夫人 曲先衛故指揮同知  
失判罕子阿脫力遣人來朝貢馬命阿脫力襲其父職賜誥命

冠帶。賜朝鮮國陪臣李興發等鈔練幣表裏有差。遼東總兵官都督僉事王凱奏各處馬驛皆與遞運所相鄰人力相等獨黑林莊遞運所置在高平盤山二驛之間地遠勢孤遞送艱難往時義州衛帶管大寧驛路嘗置馬驛於牛心山今大寧之路不通馬驛虛設若移於盤山驛添作遞運所而以黑林莊遞運所移置高平驛庶幾得宜從之

大明宣宗憲天崇道英明神聖代文昭武寬仁純孝皇帝實錄卷之三十六

明宣宗章皇帝實錄卷之三十七

宣德三年二月己巳勅遼東總兵官都督僉事巫凱及遼東都司凡諸衛所正軍餘丁先被寇虜掠後得馬回還見在京充勇士者察係正軍開豁原伍餘丁開豁本房軍伍不動若因避征差逃出外境得馬回還收充勇士者已有逃避之罪軍伍不開仍須審覆永樂二十年以前去者人馬皆送北京二十年以後者復原役馬送北京。瀋王摸秦子女俱長欲行婚禮而房屋未備今欲創建七所以居武鄉王兄弟七人又有女四人欲選本府護衛及儀衛司官之家房屋四所以居從之。勅戶部歲贈賜成寧長公主鈔五萬貫自宣德三年始就南京官庫支給。移置浙江平陽縣井門巡檢司於龜峰白沙灣巡檢司於肥體斗門黃岩縣溫嶺巡檢司於三山鄞縣大嵩巡檢司於太平



嶼定海縣崎頭巡檢司於霞嶼嶼初建各司皆傍海後緣海居民盡入內地而巡檢司皆孤立奏請移置上命浙江三司覈勘至是三司奏移置爲宜從之。上嘗以馬政國之所重雖領於太僕而兵部實總其事孳牧調習之制歲久廢弛勅令修飭至是尚書張本奏兩京并陝西等處太僕寺苑馬寺軍民牧養至今遠則三二十年近且十餘年丁力消長不一馬有增損不同其積年虧欠賠償未及者屢蒙宥免而愚頑得計見在之馬養之多不如法自今宜令諸司各將見有馬重別均派孳牧調習之法一如舊制令所司嚴督之庶幾馬可蕃息人不重困上曰此事正屬卿卿當留意必使官民兩便乃爲得宜。巡撫陝西隆平侯張信等奏陝西西安府永豐南北二倉相去二里年深傾圮不克宜撤北倉以其料併修南倉爲便從之。山

東濟南府德州奏貧民一千一百五十二戶因歲旱饑已勸富民貸粟濟之。上以示行在戶部臣曰富民能恤貧食祿者豈當坐視民窮而不恤爾等更須加意。庚午行在戶部尚書夏原吉奏今河冰已解去年秋糧多運至通州詢知無損軍民及官攢斗級或邀截攬納或令堆積近倉留難不收相與盜竊請遣官巡察。上曰江南軍民運糧至此艱難已極而小人爲害如此其令侍郎李昶及監察御史主事各二人亟往巡視糧未收者卽收姦人偷盜及攬納者擒之。上視朝罷御左順門召行在工部尚書吳中諭之曰昨日卿奏欲於陝西起取民夫赴京用工朕思之用民力須就近地則供費不難陝西去京師遠且比年旱荒自給不暇而又欲役之此豈說以便民之意其卽停止。造御用監作房於西上北門之外。南京戶部尚書

古朴卒朴字文質陳州人洪武中爲太學生隸五軍斷事司理刑奏家貧願任冀得祿養母 太祖皇帝嘉之除工部營繕主事迎母就養京師居無幾母歿官給舟歸葬服闋改兵部主事陞武選員外郎再陞郎中遂陞兵部右侍郎 太宗皇帝入正大統轉左侍郎 車駕巡狩北京侍 仁宗皇帝監國嘗奉命權禮部兵部及詹事府洪熙元年改通政使未幾陞戶部尚書先是主事劉良素行不檢滿三載朴考其績下良叩 上之左右求朴最考朴曰貪侈之人幸今未覺露不改行終當敗最考不可得良遂誣奏朴罪既就逮 太宗皇帝燭其誣竟釋朴他日吏部奏授良誥命 仁宗皇帝曰此人素亡行且嘗誣奏大臣罪若與良誥卽爲善者急遂不與誥良後果以賊敗朴在朝三十餘年自郎署至卿確然守廉人不得干以私家無餘資然

兢兢畏慎避事如處女執一不遁坐視弊事不能革徒有愛民之心云。辛未行在兵部奏昨總兵官都督僉事山雲以廣西缺兵備禦請益兵擬以湖廣諸衛征進交趾回還官軍益之上命已還至廣西者皆留之未至者令還原衛所。貴州布政司新化府通判鞠彬奏永樂十一年置府暫於新化亮寨所鎮撫空宅內視事迨今廳署未建乞發湖廣附近銅鼓等衛所軍匠備材營建從之。守河州衛都指揮僉事劉永奏河州官軍及使臣往來月用糧料七千餘石每歲西安等府運糧供給今皆折鈔本衛缺糧又奏河州所屬地方多是土韃番人比年天旱薄收所欠洪熙元年至宣德二年糧一萬六千八百四十一石乞賜蠲免。上諭行在戶部臣曰邊衛糧儲爲急其速遣官往陝西經理別運糧給之邊民素貧歲又不熟所欠糧俱免徵

○壬申賜朝鮮國使臣韓乞生等鈔綵幣有差。癸酉藩王模  
奏武鄉王婚期在近缺內使女使 上遣賜內使五人女使七  
人。命故指揮叅事帖木兒子谷台副千戶乃兒卜花子伯顏  
答里襲職於錦衣衛帶俸皆忠勇王金忠故部屬也。行在工  
部尚書吳中奏修理內府房屋及京師庫廠橋梁請遣官往山  
西督民採木 上曰民方務農姑緩之。 上退朝御文華殿  
翰林儒臣講舜典竟 上曰觀二典三謨則知萬世君臣爲治  
之道不出乎此曆象日月星辰以閏月定四時天道以明平治  
水土奠高山大川分別九州任土作貢地道以成克明峻德以  
至協和萬邦人道以建九官十二牧所掌禮樂刑政及養民之  
道後世建官繫簡雖不同大要不出乎此當時君臣都俞吁咈  
更相告戒用圖治功氣象藹然何後世之不能及也侍臣對曰

明良相逢故其治化之盛如此 上曰是盖天生聖人爲後世

法程孔子剛書斷自唐虞使人知有堯舜誠所謂萬世帝王之師也。甲戌賜兀者等衛指揮僉事木荅兀等罕東衛密落簇僧却兒失加等鈔綵幣表裏有差。降順天府尹曹曾爲廣東布政司右叅政曾奏事舉止失措 上諭行在吏部臣曰京尹豈可不擇違禮度者且聞此人於民事未熟宜降出外自今必慎選授無但取充位而已遂降曾爲叅政。乙亥命阿剌山衛故指揮僉事乃馬荅子阿剌孫襲職時阿剌孫進馬奏請襲職且乞居自在州皆從之。賜安定曲先等衛指揮同知果脫不花等官五十三人誥命。湖廣湘陰縣知縣宋綸奏先奉詔書凡欠諸色課程并倒死馬駝牛羊盡行蠲免而縣民養官牛百五十頭歲納租米三百餘石牛死已久而租未免乞除之 上

謂尚書夏原吉曰詔令已免何爲復徵租朝廷布寬大之政而民不被澤此有司之過也其即蠲除。上退朝御文華殿謂侍臣曰朕觀先王治民有本有末制田里以給衣食設學校以明教化不幸而有頑惡者然後刑之盖非得已不然則無以安善良然觀肉刑亦過於慘侍臣曰古人用肉刑故人自愛而重犯法至漢文帝除之自是人輕冒法上曰古人教民之道周備故犯法者少後世教民之道不至故犯法者多未必係於肉刑之存否舜法有流宥金贖而四凶之罪止於流放竄殛可見當時被肉刑者必皆重罪況漢承秦敝挾書有律若槩用肉刑民受傷殘者多矣以不教之民而遽斷其支體刻其肌膚亦所不忍隋唐以後以笞杖徒流死爲五刑亦良法也又曰文帝除肉刑唐太宗觀明堂鉞爰圖禁鞭背皆後世仁政文帝培植

漢之國脉太宗肇啟唐祚享國長久有以哉。丙子 上御奉  
天門謂左都御史劉觀等曰自昔功臣子孫安於養養雖承祖  
父爵位少有文武才能一旦委用多致狼狽今公侯伯新襲者  
眾朝廷念其前人之功豈徒使之長享富貴亦欲成其才器庶  
幾克紹前烈已令更番操習武事然人情惡勞喜安若稍寬縱  
必至怠惰卿宜違剛正御史二人察視之有慢令不至者具以  
名聞。命故大興左衛指揮使劉興子亮金吾左衛指揮使劉  
江弟清燕山右衛指揮僉事王義子信俱襲職。行在吏部奏  
監察御史尹崇高舉儒士劉嘉會堪任教官召至自陳年八十  
餘不堪任事 上笑曰伏生九十傳經八十爲教官何不可又  
曰孔子云老者安之國家興學擇師豈少此一人聰還鄉自便  
。行在兵部奏故南陽衛百戶黃敏楚雄衛百戶徐瑛皆無應



襲之人敏有父老疾宜養以全俸瑛有老母宜月給米五百皆終其身 上曰此 祖宗所以優待功臣亦悉如例○丁丑陞上林苑監正康壽為南京太常寺少卿行在鴻臚寺司賓署丞焦循為本寺右寺丞行在欽天監監副黃愷為監正江西按察司副使郭良為順天府尹安吉縣儒學訓導徐備德平縣儒學訓導年富為行在吏科給事中鄆陵縣儒學訓導王賢淑縣儒學訓導郭麟為行在戶科給事中太平府儒學訓導吳獻為行在工科給事中行在兵科左給事中許侃禮科給事中劉芾刑科給事中張謹山東都轉運鹽使白琛俱以親喪服闋命芾謹復舊職調侃為行在戶科左給事中琛為兩淮都轉運鹽使廣西梧州府北流縣知縣李禧考績當陞令復任陞正六品祿以其民奏乞留也改湖廣按察司副使鄭進善為知府於遼東總

兵官都督巫凱處治軍機文書吏科給事中徐永潛爲六安州判官行在刑科給事中劉薰爲揚州府通州判官永潛以奏對失措蓋以有罪經赦故改用之降行在廣東道監察御史劉安定爲河南光州學正以憂制居家不安禮分也。增置廣西柳州府柳城縣東泉鎮巡檢司土官副巡檢一員。遣都指揮陳通等齎勅往西番賜弘妙廣濟大國師叱思巴兒監藏安定王亦罕丹等金織絮裘禪衣白金文綺表裏及紵絲襲衣有差。行在吏部奏貴州雲南土民張暹楊名等充吏考滿至京違限二年三年之上例當發在京諸司再辦事三年方許敘用上曰夷民不必悉拘中土之例貸之。行在禮部奏爪哇國使臣亞烈張顯文等言率家屬來朝至廣東惠州暴風壞舟母妻等四人皆溺死權瘞海濱乞官爲造墳。上惻然曰不憚險遠舉

家來朝其誠可嘉而死於風濤情又可憫其令惠州府致祭又治喪葬。戊寅給靖江府奉國將軍佐忠等十一人歲祿時行在戶部言佐忠等俱已婚歲祿未給。上曰歲祿已有定例宗室子孫所仰者此豈他有所營即令有司歲給之如例。復劉道成浙江黃岩知縣道成九年考滿例應陞用而縣民奏其為政公勤善於撫字乞令復任行在吏部為之言。上曰既得民心宜從所奏令復職而增其祿。上語尚書夏原吉曰書云民罔常懷懷于有仁蓋以能養己也北虜不納失里自遠來歸亦欲求養於此今己死其妻非能耕桑何以自給宜計其家口優養之母令失所原吉計議請月給米十四石從之。昏刻有流星大如盃色赤有尾光照地起郎位東北行至梗河。己卯上御奉天門諭尚書憲義等曰比下詔求賢欲得實才為用

而所舉多非其人自今召至者引於內廷六部都察院翰林院堂上官命題考試六科給事中監察御史錦衣衛官監視明辭違者用之否則罰其舉主義奏各部辦事官以人材吏員出身者十餘人應正從八品敘用自陳才短願就雜職上曰人才識固有高下然能自知不足甘就卑位者亦難其悉從之○斬松潘衛千戶錢宏謫都指揮高隆爲事官韓整鄧鑑等充軍廣西先是宏激變番人容兒結等作亂上命行在錦衣衛指揮任啟監察御史李珏究問其實至是啟等奏番蠻之叛實千戶錢宏所激初松潘當發官軍戍交趾衆懼不肯行謀於宏宏曰惟有言番人叛則都司必奏奏則必發松潘兵討之而交趾之行必止遂於衛誣告蠻人容兒結等反叛衛星馳報都司果止交趾之役而遣指揮陳傑等以兵撫捕然容兒結等實不叛

宏見都司官軍至潛率其衆入寨以言脅之曰朝廷以爾叛出大軍征討能遺我牛馬財物或可止容兒結歛牛馬與之然聞兵已壓境遂驚懼奔走約黑水諸生番烏亂殺掠軍民陳傑等爲賊所害者兵大擾韓整高隆駐兵宿留不進惟事貪淫邊民苦之而賊勢猖獗殺掠愈甚具有實跡 上曰蠻寇之叛朕固疑有激之者韓整貪淫玩寇重貽邊民之患厥罪何逃遂勅陟等斬宏於松潘梟首徇衆籍沒其家從宏者二十人俱宥死充軍整等悉發戍廣西。庚辰四川播川宣慰使楊昇遣正長官鄭釗等貢馬。復劉猶行在刑部照磨時行在吏部奏照磨等官得代回部者四十餘人皆無缺例應辦事 上從之因問其中亦有才能出衆者否對曰皆中才有一劉猶者洪武初誠意伯劉伯溫曾孫 上曰伯溫事 太祖皇帝爲開國明臣今尚

有後昔蕭何魏徵之後皆見顯用亦以前人之故朕于爾豈惜  
一官處之即令復職畧才能顯者後當進用之○陞監察御史  
王靜鍾旭塗克欽劉祺皆為知府時靜等皆九年考最行在吏  
部引奏欲循例授方面 上曰今所急在郡守一郡得良守則  
一郡蒙福彼能為御史為知府無難矣不必拘例遂悉陞知府  
葡漢陽府旭與化府克欽惠州府祺南康府○行在吏部尚書  
蹇我等奏陝西階州學正陳珍九年考滿科貢不及數例應降  
除而階州生員奏乞復任 上曰為師不能教降用如例又奏  
請司文典四百五十餘人皆三考滿例應從七正八正九品出  
身當冠帶科事月支半俸 上曰每一次選官吏之冠帶者三  
四百人何如是之多况七品八品官皆州縣之職豈可驟授自  
今必煩揀擇庶幾冗監可以漸革○ 上曰朝紳左順門語及

祭祀謂行在工部尚書吳中等曰南京造制卑祀神最為重事  
洪武中常選無過犯惡疾工匠更衣沐浴焚香浣手然後用工  
其人專供此役更無別差 祖宗禮賢之意謹嚴如此卿宜中  
明舊制務令指專毋有褻慢○壬午降福建按察使朱應祖為  
常州府江陰縣知縣時應祖及所屬府縣官二十餘人悉為起  
按御史考不稱職吏部以聞 上曰按察使典方面憲綱其任  
甚重何可不稱此輩有賊否對曰無賊 上曰無賊可降七品  
州縣官餘府縣官皆降祿職○浙江臨海縣民奏本縣舊有胡  
澆諸閘積水灌田比因大水壞閘而金鰲大浦湖涇來嶼等河  
遂皆壅塞或遇天旱禾稼不收糧稅多欠乞為開築 上曰水  
利為政急務使民自訴于朝此守令不行人爾工部即下郡縣  
令秋收發民用工仍行天下凡水利當興者命有司即行不許  
坐視不理

大明宣宗憲天崇道英明神聖欽天昭武憲仁純孝章皇帝實錄  
珠卷之三十七

明宣宗章皇帝實錄卷之三十七





明宣宗章皇帝實錄卷之三十八

宣德三年二月是月御製帝訓成序曰朕惟天心仁愛下民爰命君以王之君德如天之包含覆育使天下之人咸遂生息無不足之歎而後有以稱天之所命然其道至大其事至繁非可一言盡也蓋君量必如天之廣心必如天之仁施必如天之溥行必如天之健必明如日月必信如四時而所以為治者規模之弘遠條理之精密必皆極其至而後有以盡君之德稽古堯舜禹湯文武其為君皆能體天心行天道斯其治為甚盛漢唐宋雖間有賢君不逮于古矣我國家自太祖高皇帝肇膺天命奄有萬邦太宗皇帝再安宗社仁宗皇帝繼志守成三聖相承心天之心道堯舜禹湯文武之道以綏撫天下爰暨朕躬獲續鴻緒臨御以來夙夜兢兢惟三聖之心之道不敢

息寧荷 天地 宗廟之佑四境無虞百姓安業幾于小康永  
惟 祖宗開創之孔艱守成之不易而欲後之嗣君皆將敬承  
于無窮也問于幾務之餘迷帝王要道而類析之將永詔于子  
孫夫人君之行惟德為本有德斯天命存焉人心歸焉苟無其  
德天命去之人心畔之從古國家興衰理亂皆由于此故首之  
以君德夫君位者 天之所命 祖宗之所傳也惟 天惟  
祖宗是崇是敬體其心而不遺循其道而不倍君德之大也故  
行之自奉 天法 祖始德之及人也自內以及外自適以及  
遠孔子論治平必先齊家文王之德化本于閨門故次之以正  
家家人有整齊嚴肅之道必有恩愛悖厚之意故睦親次正家  
焉一家之親吾同氣也天下之人吾同類也人君代天子民一  
視而同仁萬道而舉遠故仁民次睦親焉國家政事有體本末

有序與夫綱紀維持之方皆當謀慮審度使咸有條理故繼之以經國以一人而御天下一心而應萬機如一民失所吾之仁未能徧也一令未當吾之政未盡善也當自彊不息使靡有闕違故繼之以勤政修己者宜崇德而去欲恭敬節儉則善德日進戒慎愼惕則私欲日消故繼之以恭儉成儆焉有君必有臣君總攬其綱臣分治其職如歲必有春夏秋冬而後成化工若必用賢智者才能而後成治效故用賢繼之人之賢不肖未易知也固有貌愚而心道象恭而內詐者必驗其所存之正觀其所由之善斯用之而績成故知人繼之誠知其人之非正也必去之良農必去稂莠恐傷嘉穀明君必去讒佞恐傷正人讒佞去而後君子安善治興故去邪繼之事必有幾幾者動之微也燭于微而防之為力易及其著而去之為功難是以大易慎履

霜之戒春秋嚴無將之法故防微繼之政之所大患古路不通也蓋上之過欲聞焉民之隱欲聞焉是以隆古設諫諍之官聖人有芻蕘之問故求言繼之事神莫嚴于祭也所以致精誠微福惠而敬為本能敬者致福不能者速禍神人感應之際明矣故祭祀繼之治民莫急于養與教也耕歛以時可以厚民生而資國用化導有方可以善風俗而成賢才故重農興學繼之公賞罰明黜陟所以懲勸也賞一人而天下務于善罰一人而天下警于罪陛一賢能人皆思奮功黜一不肖人皆思革過施約而效博故賞罰黜陟又繼之刑者聖人不得已以輔治非恃以為治也一或夫中傷人之生于天地之和關係至重故恤刑又繼之文者綱常禮樂之事所以化成天下武者禁暴戢亂之器所以安內攘外不可一日無者故文治武備又繼之有中國必有夷

狄如陰陽晝夜不能無者善爲天下亦在制馭之有道耳故馭  
夷又繼之人君保生自有要道而前代之君有恣其情欲服餌  
丹藥以致喪敗者不可不戒故以是終焉凡二十五篇名曰帝  
訓言質事實皆爲理之大要蓋自古君國子民未有不循此而  
治不違此而亂者誠能於此深體力行可永保天祿吾子孫懋  
之哉由此而進唐虞夏授受之中成周先王積累之仁允念茲  
在茲宗社可以永安生民可以咸遂天下可以長治吾子孫  
尚敬之哉尚敬之哉君德篇人之至貴者德有德衆歸之不  
德衆離之故君天下者必以德爲本君之德明於己達於天下  
而後可以愜天下之望古帝王有德者莫盛於堯舜禹湯文武  
故天下皆歸之不德者莫甚於桀紂幽厲故天下皆畔之所謂  
有德易以興無德易以亡君德之大者曰孝曰敬曰仁孝以事

親敬以事天仁以臨民而仁民又所以事親與天也一於表裏  
始終而行之辟諸日月之明天下萬物皆仰其臨照故德者人  
君之首務而德尤本於學易論君德必由學聚問辨又曰多識  
前言往行以蓄其德君德明斯萬事理矣 奉天篇若者天之  
所立也萬物皆天所生天立君俾代之養民故君之位曰天位  
君之民曰天民君之事曰天事皆代天爲之也故人君一言一  
動一政一令不可違天不違天即所以奉天也而奉天之尤者  
在養民書曰天佑下民又云惟帝不畀惟下民秉爲蓋民者天  
之所愛而以命我吾能愛其所愛是能敬其命則天將錫福於  
我矣如虐其所愛是違其命而可望福乎書云天難謀命靡常  
又云皇天無親克敬惟親亦猶君之民而命有司撫字之如有  
司不能撫字而又虐之君必黜罰之矣故有司能愛民所以事

君君能愛民所以事天其理一也 法祖篇自昔創業垂統之君其更事也多其致慮也深其始得之也甚難其欲後世保之也甚遠故建一法制一令相與謀之非一人審之非一日必適中而不偏歷久而無弊然後著於典章傳之子孫爲永安長治之道書曰監于先王成憲其永無愆詩曰不愆不忘率由舊章言子孫當永世爲法也朕承 三聖之緒夙夜兢兢政無 小一遵 祖宗之典而行之以 祖宗之心不敢違越吾子孫尤當敬慎於此蓋人君初非有意更改祖法多由所用輕佻小人導之蓋小人希寵求進日以譎詐之說浸漬其君謂行之則功高於前人其君喜而從之而卒至於壞亂如漢武帝宋神宗聽用小人之言不循祖宗之舊紛紛多事卒皆至於毒生民亂天下此萬世之鑒戒也若因時之宜不可不損益者亦不可不體



祖宗之心采賢相李沆嘗言吾爲相無他善惟有不改祖法一事耳故爲君用人常得老成忠厚如沆之流豈有壞亂之憂正家篇家者天下之本一家之間尊卑之序正內外之辨嚴愛威之道明然後家可得而正家正然後天下可得而正蓋近者遠之表上者下之準也正家之道莫大於父子莫切于夫婦其幾尤不可不謹也蓋父子相愛本皆天性所有但父之愛子當於幼稚之時早教之與之處者雖乳媪及備使令者必皆擇老成正人則自然習成性情之美稍長就學簡有德行學問正直謹厚之士爲之師日從容講說正道開發聰明使邪妄之言無自而入則德器成矣然父子須恒相親使情意孚洽子或有過不可輒聽左右便佞之言有所詰問須自審察果其有過則召至委曲溫言曉諭使改亦不可遣人往諭蓋小人離間父子

自古有之雖漢武帝隋高祖皆不免墮小人姦計以害大事可不戒哉至於宮闈后妃尤當嚴密古禮嫡庶之分截然不逾而為宮室辨內外深宮固門閤寺守之男不入女不出女不言外事至我朝祖訓內外尤嚴蓋聖明遠慮厥有深意前世若漢高祖唐高宗不能正內呂氏武氏幾危宗社可不戒哉父子夫婦各得其正則家道正家道正於上則風化美於下此太平之本也睦親篇帝王之政在厚天下之生而行之必自近始近者九族之親也其中有吾祖考之親焉有吾母之親焉有吾后妃及子孫之親焉帝堯明已德之外便親此九族凡祖考之親則推吾重祖考之心以厚之母之親則推吾重母之心以厚之后妃及子孫之親亦以后妃子孫之愛而及之待之以恩使不失其富貴訓之以義使不愆于禮法保全永久斯盡敦睦之

道 仁民篇天命人君爲生民之主人君奉天命以主生民其  
職惟在養民而已禹曰德惟善政政在養民故聖君皆以愛民  
爲務誠以民心之從違即天命之去留也古語撫我則后虐我  
則讎又云民猶水也水能載舟亦能覆舟其幾如此故人君理  
天下者不週欲民不失所也禹曰民惟邦本本固邦寧夫食則  
思民稼穡之艱衣則思民蠶桑之勞飽則思民之饑暖則思民  
之寒賦歛<sup>以</sup>時役調有節寬厚以容之簡靜以休之俾農工商  
賈各力於生業水旱疾疫皆爲之賑卹無失所之憂有生遂之  
樂則民心永安而天命永固矣 經國篇帝王統御天下於政  
治經營謀畫當謹始慮忠爲宏遠之規毋扭于淺近溺於流俗  
苟徇目前而已夫四海之廣兆民之衆非簡無以御煩非靜無  
以制動非寬不足以有容非剛不足以聽斷必仁覆乎四海智

周乎萬物親賢貴德簡用才能養老慈幼卹念無告重農務本  
興學立教求言納諫信賞必罰輕徭薄賦考核名實哀矜庶獄  
修飭武備崇節義勵廉恥辨忠佞審好惡抑強扶弱禁暴誅亂  
皆君國之重務宜夙夜在念持之以誠處之以義務合大公至  
正之道使國家庶事綱舉目張靡有闕失斯君安於上民安于  
下由是陰陽調風雨時群生和萬物遂國家長治而永安矣

勤政篇帝王代天理物必躬勤政事在己弗勤則百功曠而庶  
事隳矣故虞舜兢兢業萬幾大禹克勤於邦成湯昧爽丕顯文王  
不遑暇食此皆古聖人之勤也後之爲君其可以弗勤乎勤則  
心專志愨無厭無致以慮事則不至於率畧以慮事則不至於  
壅滯而庶政理矣一或弗勤將氣昏志惰玩時愒日苟且因循  
政弊而罔知民困而罔聞而庶事隳矣政事理則國家興亡之

幾可不戒哉夫天常行故健日月常行故明水久停蓄必腐人  
久不動作必病民墮於生業則有凍餒之憂况天下之主宰億  
兆所仰望豈可不自勵乎是以古之帝王深以懈惰荒寧爲懼  
勤勵不息自強而周公無逸之訓萬世帝王所當欽服 恭儉  
篇恭儉者帝王之美德恭則敬謹而不怠儉則省約而無擾古  
聖帝明王由此道所以國家清寧令聞長世故曰德行廣大  
而守以恭者榮土地博裕而守以儉者安逮其季世之君有不  
能然志驕氣溢傲忽不恭窮奢極欲泛濫無節而流毒四海底  
於喪敗既往可鑒矣蓋責爲天子富有四海非約之於身心施  
之於家國則志不期驕而自驕用不期侈而自侈是以明主不  
忘恭己非惡逸也防驕怠也不去儉德非憎美也慮侈汰也驕  
怠侈汰收德之斧斤恭敬節儉崇德之梯階其可不慎所由哉

儆戒篇人君宰制萬物統攝億兆本諸其身者當常存修省  
戒謹之心蓋患生於未形禍萌於所忽若忽細行而不究速禍  
萌而慎亂作而防蓋無及矣故曰一念不謹或貽四海之憂一  
事之失或致千載之患是以古之帝王兢兢業業居安慮危處  
存慮亡凜乎若蹈虎尾惴乎若涉春冰弗敢有一息之或怠一  
毫之或忘故能制治於未亂銷禍於未萌後世為君能取法前  
王國罔不興不然肆情縱欲無所顧忌以小惡為無傷以細事  
為可忽不謹履霜堅冰之戒而晏安鴆毒日銷月鏖駸駸焉若  
持斧自戕豈不危哉慎之戒之用賢篇賢才者相與共理天  
下之利器天下非賢才罔與共理稽之於古堯舜禹有稷契皋  
陶后夔伯益商有伊傅文武有周召太公之徒蓋雖聖人未嘗  
自賢必求賢者為己助益誠以天下之務重且大也如汝巨川

非一楫可濟爲大厦必衆材乃成大抵賢者其心公其智端雖  
器量不齊譬猶木之小大長短各有所宜在用之何如耳用之  
稱其才智可建功自古君天下者用賢則興不用賢則亡用賢  
則治不用賢則亂善用賢者待之以誠任之以專不以小人間  
之如使與小人並立必爲小人所排蓋小人浸潤之言人主易  
惑也易內君子外小人所以致秦人君不可不審若賢者或有  
細過亦當略之古人不以寸朽棄合抱易所謂扶陽抑陰此用  
賢之道也然得賢亦難蓋賢者以道德自重若懷寶韜玉恥於  
求售爲君必旁求博訪招之以禮承之以謙勿以卑辱而有嫌  
勿以崇高而自重則才俊之士皆有願仕之心矣此又得賢之  
道也 知人篇以鑑辨物可以知妍媸以權定物可以知輕重  
以德監人可以知賢否自昔聖帝明王恒以知人爲難然必已

之德明而後人之賢否可知光明正大仁厚剛毅此君子也依阿澆忍狡獪刻薄此小人也小人以諛悅爲心其言甘而易從君子以忠愛爲心其言直而難受人君察其存心觀其言行果君子也則親之信之如芝蘭之不可棄果小人也則疎之斥之如蛇蝎之不可近惟如是則君子進而得以行其志小人退而不得肆其惡天下國家其有不治平者哉然非吾心至公無私真知人之邪正而進退之未必有所裨益國家生民者矣所謂公生明偏生闇則人君明德又知人之衡鑑也 去邪篇自古小人爲天下國家之患故明主皆深惡而痛絕之蓋小人之心儉邪險側能變亂黑白蠱惑人心也夫國家用忠言諫論以裨治小人務爲諂諛之說以勝之國家用賢人君子以興邦小人肆其媚疾之心以去之國家省刑務德以全民命輕徭薄歛以



厚民主小人則以酷虐爲能事以培克爲無傷壅弊視聰濁亂政經皆其所爲人君不察而用之以至失人心召禍亂爲患深矣故書云去邪勿疑易曰開國承家小人勿用昔四凶去而虞廷清少正卯誅而魯國治然小人未易去也彼譖詐巧佞善伺人主之意奉人主之欲非明足以燭之勇足以去之未有不墮其術中者故理以養心義以制欲則君子小人克知灼見是非取舍合乎至公而後儉邪無所容矣 防微篇燎原之火起於星星滔天之流始於涓涓天下國家之患未有不始於微也故舜察邇言防壅蔽也禹惡旨酒防沉湎也斯須苟安毋曰何害怠惰荒寧之所自也豪髮不戒毋曰無傷驕奢縱恣之所由也古之聖人戒慎恐懼先事豫防圖大於細圖難於易由是天下又安禍亂不作非存心之明慮事之豫其孰能與於斯人君靜

以養智正以格物隨事精察絕其蔽惑庶能防患於微矣若乃  
謀慮淺近不能炳於幾先厲階既成悔將何及故有天下國家  
者凡事當謹之於未然防之於初萌易曰由辯之不早辯書曰  
不見是圖皆此意也爲人君者尚監之哉 求言篇古者明王  
治世廣開言路明目達聰以通上下之情防壅塞之弊不以崇  
高而自賢不以微賤爲可忽所謂嘉言罔攸伏詢于芻蕘者是  
也人君所以夙夜孳孳惟求直言何也天下之事至繁豈能盡  
處合中有不合中而吾聞之必改以就中天下之人至衆豈能  
盡使得所有不得所而吾聞之必使之得所直言有益於人君  
如此然聽言之際不可不慎蓋忠直之言逆耳難受而用之則  
有利於國家讒佞之語順意易入而從之則有損於君德所謂  
苦藥足以愈疾甘言足以喪身昔商高宗命傅說曰朝夕納誨

以輔台德周芮伯刺厲王曰匪言不能胡斯畏忌此理亂所由分也故臣下有言當虛己聽之而察其心之忠邪蓋人之常情皆欲得君之愛豈欲犯君之怒哉但忠臣之心常在於利國而不在於利己邪人之心常在於利己而不顧於誤國察其言所向即見其心之忠邪若人主自持才智拒絕諫諍又臨之以威懲之以刑忠諫之言既塞國家之勢日危自古季世皆蹈此禍可不戒哉 祭祀篇帝王主祀天地宗社以及百神而祭祀之禮所以報本而徵福於天下也祭不專貴於物必貴於誠誠者事神之本是以先事致齋凝神定志邪慮不萌於心惰容不見於體無所不致其誠及將事之際則對越有嚴升降俯仰洞洞屬屬而若將見之致誠如此庶幾神享其祀感召靈貺陰陽和寒暑時百穀豐登天下和平苟或不誠氣志昏惰不檢於禮法

不謹於思慮雖侈其牲牲豐其粢盛猶不祭也如此而欲動天地感鬼神致福應者未之有矣書曰黍稷非馨明德惟馨又曰鬼神無常享享於克誠然君子之事神也豈必臨祭一特之誠敬哉要其平素存心行己齊莊中正常如對越未嘗有怠固己合於神明矣故人君之敬尤當常存於心重農篇農者國家之本生民所資以生者也民不可一日無食是以帝王躬耕爲天下勸洪範八政以食爲首豳風之詩備陳稼穡之艱皆重農之意也後世爲君法古人重農之意者當勸導有方遊惰有禁而不違其時時者春耕夏耘秋穫之時也古者使民常以冬隙使及時而耕及時而耘及時而穫無事以妨之則農不失業而衣食足給矣又禁末作遏奢靡使皆務本歸農然後地利日廣而在上尤當輕徭薄賦省費節用庶幾公私足給而人康俗阜

教化興行可臻於治昔孟子論王政必以不違農時首言之蓋  
聖賢之言萬世帝王所當取法 興學篇學校者教化之本賢  
才之所自出禮曰王者建國君民教學爲先在昔五帝建成均  
之學下至三代其學益備皆本於明人倫而有詩書禮樂之教  
其教導有法涵養有素士之出於是者皆有用之器足以輔世  
長民故治化隆盛人才衆多風俗淳美由興學之功也漢唐宋  
學校不逮於古故人才治化亦所不逮大抵興學必自上之人  
振起作新之學校興而後風俗可厚風俗厚而後人才不乏雖  
人之生固有美質非資學問亦無以擴大其才智也故興學必  
謹擇師儒以嚴表率養之厚而責之專庶幾有成不然模範不  
端學者無所取正亦徒名焉而已教化何由而興人才何由而  
成故興學必務責實勿徒虛名焉耳然原其本則又存乎人君

之躬行人君躬行於上公卿大夫躬行於下學校未有不興者矣隆古興學之効蓋皆本於此後世人主所宜務也 賞罰篇  
夫治田者必資耒耜治木者必資斧斤理天下者必用賞罰賞罰人主所以勸懲之具也然賞不以厚薄惟其公罰不以輕重惟其當故賞一人而天下莫不悅罰一人而天下莫不懼者惟其公且當也古之帝王不以私愛而加賞不以私惡而加罰私愛而賞爲濫恩私惡而罰爲濫刑恩濫民不貴而無所勸刑濫民必寬而無所措由是不知與於善而有離畔之心矣故人君賞罰必存大公至正之道不可不察也 黜陟篇爲治本於任官任官貴乎責實考課黜陟之法所謂責實也蓋天下機務人君一身勢不能獨理必資於群才然其賢否或殊勤怠亦異非考察以驗其功過黜陟以示夫觀懲未可以幾於治也故爲人上

者虛己以用人執簡以御煩體要以制衆行之以至公至明之心守之以大中至正之道而後約以歲月稽其事功果賢焉陟之果否焉黜之果勤焉進之果怠焉退之平若持衡明若懸鏡如是則衆之賢且勤者皆悅而益奮不賢而怠者皆懼而改行而治效可望矣昔唐虞三考黜陟成周三歲大計群吏而賞罰之皆此道也後世苟簡爲治不務責實用人之際考課無法黜陟不明如有愛憎之私於是有賢而勤者見屈不肖而惰者獲伸如此尚何望治效之幾於古哉故用人致治必以唐虞成周爲法而以後世苟簡爲戒若考課黜陟之法既明尤當擇乎中正之人任之不然徒法而已此國家致治之要務不可不謹卹刑篇聖人親民猶子而以刑法加之者不得已也足衣食以養民明禮義以教民此聖人之心也如是而不從然後刑以威

之刑實輔教焉耳教養不至徒恃刑以爲治是謂厲民非聖人之政也故聖人之政刑一人足以戒萬人昭天討也過誤不辜從而赦之原人情也親故賢能若功若勤若貴若賔從而議之全恩禮也不殺不辜寧失不經厚之至也折獄惟良慎任人也五者備至而刑有不省民有不化者必無之理也四凶之罪止於沆放竄誣三代之治專用德教深仁厚德上承天休昭譽萬世若漢文帝除肉刑及誹謗法唐太宗禁鞭背死刑至五覆奏二君忠厚之澤庶幾三代子孫享國長久此其效也秦愾以刑立威曾不再傳而遂失之斯可監矣 文治篇天下之治必斯世斯民咸歸於善而後爲至盛體諸天道觀乎人文以維持天下曲成萬類者文治也文治禮樂之謂聖人以身之所履正天下以心之所樂和天下綱常倫理極其和順典章文物合乎大



同而天下父子君臣夫婦長幼生有養死  
有葬強有制弱有立鰥寡孤獨咸得其所極其至天地定位鬼  
神莫安草木鳥獸皆適其性而家國天下無異政無殊俗此禮  
樂之化也然非人君至誠之德足以經綸大經參贊化育其孰  
能之是故正天下有本身之謂也和天下有則心之謂也人君  
正心修身以立政教以化成天下是之謂至治 武備篇善為  
國家者安不忘危治不忘亂蓋禍亂之機起於不測不戒不虞  
何以保邦是故聖人致嚴於武備為之城郭為之闔防嚴甲兵  
以守其國規畫精密訓練有方強禦以遏兆民以寧天下久安  
長治之道也不然狃於晏安忘忽大計禍亂猝興何以禦之武  
備之要有三一曰儲將二曰養士三曰廣儲蓄簡拔勇智優加  
祿秩所以儲將也息保愛以特訓練所以養士也重農節用

所以廣儲蓄也三者具備足以安內而攘外矣故克詰戎兵張  
皇六師成康之世永底寧謐晉武平吳罷州郡兵唐玄宗以承  
平弛軍政馴致禍亂不能復制有國家者可不深爲戒哉 馭  
夷篇四夷非可以中國槩論天地爲之區別夷狄固自爲類矣  
夷狄非有詩書之教禮義之習好則人怒則獸其氣習素然故  
聖人亦不以中國治之若中國又安肇教暢達彼知崇義而來  
王斯爲善矣然非我族類故其心叛服不常防閑之道不可不  
謹故國家置邊圉簡將帥勵兵甲嚴守備使不能爲中國患而  
已蓋聖人以天下爲家中國猶堂宇四夷則藩垣之外也堂宇  
人所居有禮樂育上下藩垣之外草木昆蟲從而生長之亦天  
道也夷狄爲患必乘中國之弊使朝廷之上君臣同德法度昭  
明中國安兵食足邊圉固彼雖桀驁何患之能爲是故能安中

國者未有不能馭夷者也。馭夷之道，守備爲上，春秋之法，來者不拒，去者不追。蓋來則懷之以恩，畔而去者不窮追之，誠慮耗弊中國者大也。詩曰：薄伐玁狁，至於太原，可爲帝王馭夷之法。藥師高人稟陰陽五行之氣，以生得氣長者壽，短者夭，能清心寡欲者可以保天和，可以終天年。若肆情縱欲，斯敗其天和而傷其天年，此必然之理也。夫藥以愈疾，非旦夕常餌之物，況金石酷烈有毒，又益以火氣，誠非五臟所能勝。或者求以濟欲，不知遠至喪身，不可不戒。蓋前代帝王皆因富貴崇極，志得意滿，無所顧忌，故妖人方士得進其邪說，而乃不察是非，以身試之。漢武至老始悔，若唐之憲宗、武宗、宣宗，號稱英明之主，而皆以服丹藥不克保終，豈可不戒。大抵人主之務善也，以敬天仁民爲致福之本，以清淨寡欲爲延壽之本，自古聖帝明王率由

斯道吾子孫必慎之哉是書既成 上又題其後曰朕幾務之  
暇覽觀載籍究知前代盛衰之由上惟 祖宗創守之難下惟  
子孫永遠之圖夙夜精思以爲此書蓋人之至親莫親於父子  
任之至大莫大於爲天下朕將以大任付至親其可以不重乎  
朕嗣承 太祖皇帝 太宗皇帝 仁宗皇帝大位以奉 宗  
社御天下而德薄識鮮孜孜焉惟 三聖之大經大訓敬守而  
允蹈是書之旨蓋亦本於 三聖之心也雖二十五類其詞簡  
其義明修身齊家治國平天下之道大要具矣誠能守而行之  
由此而進於聖賢之微奧將功用之成閭且遠矣其勗之哉然  
自古便嬖習近慮人主親逢掖披典冊而壅遏之以騁其盡惑  
之術具有明鑒斯之弗察或復蹈之則雖有是編靡之克由矧  
古聖賢之經訓乎欽哉欽哉永服無斁

大明宣宗憲天崇道英明神聖欽文昭武寬仁純孝章皇帝實  
錄卷之三十八

明宣宗章皇帝實錄卷之三十八終

宣宗章皇帝實錄卷之三十九

宣德三年三月癸未朔命駙馬都尉西寧侯宋瑛太子少傅工部尚書兼謹身殿大學士楊榮為正副使持節冊封孫氏為皇后初皇后胡氏為皇太子妃上即位立為后踰年嬰疾久弗瘳請於上曰中宮之位以上承至尊奉宗廟之祀致聖母之養而下理宮闈之政所係甚重妾久病致宗廟之祀聖母之養皆皇上獨任其勞中壺之事又無所統妾夙夜心不自安自忖薄福不可忝斯位惟大恩賜之間居別選賢德以位中宮妾餘生庶延永久上驚愕曰皇后何為出此言人病有愈時豈當妾思及此其勿緩言數日后復申前請上慰諭再三曰皇后安意養疾近聞醫者言疾漸向安勿妾思也一日皇太后視后疾后請辭位就閒如請於上者皇太后

曰媳婦何至出此言慎勿妄思他日又請於上及皇太后如前語且曰皇上春秋三十未有子嗣是妾所累也余既有疾不忤分引退宗廟神靈豈祐之遂上表請不聽自是屢請會貴妃生子后喜請於上立為皇太子文武羣臣亦三上表請而立后力贊上早定國本貴妃固辭曰皇后病瘡當有子上以白皇太后皇太后曰其順輿情既為皇太子后遂請立貴妃為皇后外度寢閣后遜位意文武羣臣亦上表請立貴妃為皇后貴妃固辭言皇后在余敢干大分乎羣臣復上表請上手詔答曰夫婦人倫之本恩義兼厚方慤辭遜之誠遽聞建立之請豈朕心所安哉不允外廷皆聞貴妃固辭公侯文武羣臣命婦合詞啓貴妃謂聖子之生是天命有在天命不可違皇太后之命不可違皇上之命不可違宜抑私己之謙早正

中宮之位此國家大事也貴妃又懇辭曰吾荷國恩寵榮過矣非所願也 上以衆人之請聞於 皇太后 皇太后謂 上曰既有子焉儲其從衆請 上善勅禮部曰比皇后胡氏自惟多疾不能躬承祭養重以無子固懷謙退上表請聞朕念夫婦之義非之不從而陳辭再三益加憐切已從所志就開別宮其稱號服食侍從悉如舊貴妃孫氏昔 皇祖太宗文皇帝選嬪于朕十有餘年德義之茂冠於後宮實生長子已立為皇太子羣臣咸謂春秋之義母以子貴宜正位中宮屢陳表奏 聖母垂訓命從衆請今冊貴妃孫氏為皇后爾禮部具儀擇日以聞至是以金冊金寶立貴妃為皇后冊曰朕惟帝王之致理皆資內輔之得人成周之隆有太妣之助貞觀之盛有文德之賢是以國本在家訓章典冊母貴以子義著春秋有國常規其來尚



矣朕躬膺大寶統御萬方曠言化理之所先用正尋倫之大分  
咨爾貴妃孫氏天賦柔順躬履純和言循圖史之箴動中玕璣  
之節昔 皇祖之臨御以妙選而嬪予有靜貞恭慎之心有儆  
戒相成之益儉而能勤有葛覃之德惠以逮下有樛木之仁奉  
上篤敬受之誠率衆形肅雍之化暨予嗣位之初爰升衆妃之  
長好德無數益貴而謙是生長嗣之良己正儲副之位特循公  
義進位中宮今以金冊金寶立爾為皇后以配宸嚴以承  
宗祀以奉 慈闈之養以弘九族之恩以表正於宮闈以母儀  
於邦國其任甚重汝惟欽哉惟誠惟敬為百行之原惟儉惟慈  
為萬福之本惟善德以翼予治惟寬厚以得衆心懋隆芳譽永  
膺天祿汝惟欽哉 己既拜受命退顧謂左右歎曰天恩過矣吾  
心豈能安哉后山東鄒平縣人父忠自太學生權永城縣主簿

永樂八年 太宗皇帝豫為 上擇配彭城伯夫人永城人令  
皇太后母也言於 太宗曰孫氏有賢女遂選入宮命 皇太  
后育之時十餘歲天性貞靜孝敬恭順宮中皆稱其賢 上已  
長 太宗皇帝選濟寧胡氏配 上又以孫氏賢命嬪于 上  
在宮中與胡氏相親如同產姊妹 仁宗皇帝臨御立 上為  
皇太子冊胡氏為皇太子妃并賜孫氏以妃之冠服 上即大  
位冊胡氏為皇后孫氏為貴妃胡氏之疾貴妃視之尤厚故胡  
氏之退讓孫后之不居皆其誠心云○夜有流星大如雞彈色  
赤尾跡有光起文昌南行至太微西垣外○甲申文武群臣命  
婦進箋賀 皇后上遣羅國王三賴波摩刺扎賴遣使臣奈注  
德事刺等來朝貢方物○行在吏部尚書寔義等引奏擇退吏  
典人品鄙悞及曾犯賊私并不諳文移者二百餘人當罷為民

上曰甄別賢否為治之要此輩無益於用汰去誠是但慮今次所當汰者未必止此顯聞外間言古人戒用吏今日多用吏民之不安率由於此卿等不可不慎擇○乙酉夜有流星大如雞彈色青白有光出參西行入參旗○丙戌勅諭行在吏部曰朕惟人君主宰天下民生之衆政務之繁必簡賢才與之共理其銓選之法殿最之方必屬有司以盡至公我祖宗稽古建官選任賢良厥有成憲朕詞大歷服率由典章不以私昵干名爵不以小人間君子招徠善類以安兆民庶幾革城之效比隆前古咨爾吏部實典銓衡夫官不必備責在得人諸司官員舊有定額今事不加多而額外添注紛紛俸位苟祿偷安其可不革正乎吏員出身雖有定格性時選用嚴慎授官者少比年吏典考滿歲以千計不分淑慝一槩收用廉能幾何貪鄙塞路其可

不精擇乎數詔求賢期得實才與共興理而各司所舉不論才德或以親故或苟貨利徇私濫舉假公濟欲其可不覈實乎官之考滿績最者陞有貪汙無耻或罷軟無能苟積歲月均得超用何以辨清濁職之大小必量才稱任或以權貴之言或緣親舊之故不量所能悉授美職何以別賢否惟明惟公用人之道書曰舉能其官惟爾之能稱非其人惟爾不任爾其愷哉庶官賢否係政治之盛衰關生民之休戚朕既付爾以銓選之任所選者君子斯庶政久安民受其福有利於國家所選者小人則庶事隳廢民受其殃歛怨於朝廷爾其慎哉君以得賢為本臣以進賢為忠敬之敬之庶幾明良相與共致太平之盛○論行在戶部曰朕惟國以民為本以財為用也官御實掌之夫民之本食本乎農桑種藝以時則地無遺利游食有禁則務本者

多庶幾家給人足禮教可興比者野不加闢民或流亡爾當明夫休養生息之道財賦資國之用出入有節則國不至於空虛調度有方則民不疲於轉輸京師充實足以馭四方郡邑充實足以備饑歉邊境充實足以禦外侮比年遠近困於輓運而京師歲計不足爾當審於措置之宜倉廩所儲為姦人盜竊常數萬計豈無關防之術爾其審之遣官催糧往往在外貪濁豈無廉公可使爾其審之商販之徒阻滯鈔法累累禁約或通或塞而歛散之方何者為宜爾其審之朕嗣承大統董正治官富民足國尤為切要書曰政在養民傳曰生之者衆食之者寡為之者疾用之者舒則財恒足矣爾惟謹率其屬以倡民收俾吾民家有餘貧人尚廉恥以弼予雍熙之治庶幾明良相成之美欽哉○諭行在禮部曰朕惟聖人興禮樂以昭神化以正民彛致

治之道於斯為盛朕以菲德仰承 祖宗付畀之重主典神天  
表正萬邦而禮樂尤為切要尚體予懷以諧爾職惟至教可以  
格天地享鬼神爾樹成之天下國家之本在身正心以正朝廷  
百官萬民爾樹成之期於明德至治洞達幽明天地以位萬物  
以育九有寧謐四夷咸賓則我國家祚隆萬世爾亦有間於永  
久至若學校之政所以立教興賢必求其實效旌表孝節所以  
激厲民俗必求其實行尚率乃勗夙夜匪懈用圖成績以昭我  
國家文明之盛毋循習故弊廢事瘵官以負朕寵任之意欽哉

○諭行在兵部曰朕惟兵部掌天下之軍政其大要有三選任  
軍官覈實軍伍修飾馬政在京諸衛及在外都司衛所舊管選  
任得人所以舉無廢事人得其安比年衛所官不恤軍士誅求  
剝剝甚於豺虎以致亡逸軍伍多缺城池隳圯屯田徒有虛名

邊境亦或無備其為都司者控制無法紀律不嚴每遇征調所  
至騷擾民受其害是皆所任非其人也今後都司及衛所正官  
必擇老成歷練足為表率者而後任之然人智愚賢否未易遽  
知惟公惟明乃可得人爾其審之天下軍伍已嘗分遣廷臣清  
理然有司有起解之名衛所無實在之數爾當明其覈實之法  
馬政領於太僕兵部實總其事孳牧調習舊制詳備歷歲既久  
不無廢弛爾當致夫修飾之勤蓋為國之道不以安而忘危故  
禦侮防姦貴備於無事之日謹斯三者其餘承襲優給關津印  
傳皆有定制尤須嚴飭屬吏遵奉行之必廉必勤革舊弊習使  
政清而務通允光汝績豈不偉哉朕志惓惓於武備汝深體之  
見諸實效庶幾明良相成之美欽哉○論行在工部曰朕惟工  
部學百工山澤之政令度民力固地利順天時以成國家之務

夫天地生人雖有貴賤之分而好逸惡勞情無不同過用人力則不堪命惟以身體人用人之力如己力斯民不病焉國家用度皆出於民過用於上必過取於下財匱民貧何以為國惟以身體國用民之財如己出斯財不竭焉凡所興作審度緩急為之節制以息民力以紓國用斯惟良哉古者役民於農隙當思用之以待古者山林川澤有厲禁當思取之有制今天下工匠數倍祖宗之世而畏避亡逸者日多當思撫綏愛民之道至若屯田水利之政皆有成法比年因循廢弛罔聞實效當思興舉作新之方爾其懋哉夫侈用傷財培剋之端厲民徇欲歛怨之階書曰民惟邦本本固邦寧節財所以愛民愛民所以愛國大臣之職以道事君尚率爾焉惟公惟清輔予于治庶幾明良相成之美欽哉○勅諭行在五軍都督府及北京行後軍都督府



曰自昔聖帝明王御天下所以治亂禦侮安內攘外為久安之計者必在嚴飭武備修明軍政朕恭膺天命嗣守鴻圖夙夜究心拳拳於此今兵政之本係於五軍五軍能修其政令以表率天下都司衛所使各理其職則武備充實足以壯中國服四裔天下國家永永安靖爾等皆先朝舊人託任匪輕而比年以來軍政不修中外一轍為將帥者不愛恤軍士為軍士者率怨苦將帥蓋由剝削不已虐使無厭致其衣食窘乏骨肉不得逃亡皆其所迫而隊伍空虛器械損敝城池頽圯邊備不固也種徒擁虛名兵食常不給足猝有警急何以措應此皆將帥怠慢縱恣之所致也夫衛者所之表都司者衛之表都督府者都司之表表正則影正源潔則流清可不慎哉自今宜勉思國家所以委任之重戒因循苟且之失革宴安玩愒之弊端乃心敬

乃職勤乃事實軍伍輯士卒足兵儲理邊務完固城池繕修器械精訓練務也種深思其方必臻成效勿為貪刻以失士心勿為欺罔以失臣節必庶必公無慢無怠庶幾武備不弛軍政修明保邦衛民得其實用非徒國家有賴爾等亦永膺祿位延及子孫不然溺於積習之陋不圖煥革非徒無益國家天譴人罰於汝不貸汝惟欽哉○諭行在錦木諸衛親軍指揮使司曰我國家置親軍指揮蓋從腹心之任甚不輕也自太祖皇帝太宗皇帝仁宗皇帝聖相承親軍更番宿直具有條制訓練恤養著之成規而比年掌衛事者不知所重玩愒苟且漸習成風軍士逃亡者不補器械散壞者不修隊伍十虛六七軍容無可觀以此守衛防閑何由振作警肅推究所由蓋是指揮千百戶務私背公剝削不已下不堪命乃至亡逸又取強壯者役於

私家老弱者令其輸直積弊如此既往姑容繼今宜革心易慮改過自新為指揮千百戶者必愛恤士卒如父兄之於子弟察其饑寒念其勞苦訓練有方統馭有法守衛必謹關防必嚴夙夜之間亮髮無怠鎧胄衣甲一應兵器悉須鮮明堅利幼弱老疾之人不許以備宿衛如此則居守有桓桓之固扈從皆赴赴之才庶不負朕所任苟或不悛舊習而徇私玩法怠廢厥職則國有明憲朕不爾貸爾其欽哉○戊子封張懋丞為正一嗣教崇修至道葆素演法真人領道教事懋丞故真人宇清之姪宇清無子以懋丞嗣行在禮部為之請封故從之○逮掌彰德衛都指揮王友友在彰德狠戾貪虐所為多不法 上數遣勅戒諭之友不悛至是河南按察司奏友及彰德衛指揮千百戶不出郊迎詔書閱讀之際又不隨班行禮 上曰此皆王友所為

非指揮等之過特命赦指揮以下罪遣人城友赴京○己丑陛  
行在錦衣衛正千戶岳謙為指揮僉事○宥行在鴻臚寺御楊  
善少卿劉順賈庠寺丞焦循罪蓋所引謝恩之人衝突御仗為  
監察御史所劾上命錦衣衛執之己而宥之○庚寅日生交  
暈及左右珥背氣戟氣色青赤交暈色黃赤皆鮮明○辛卯命  
周思得為履和養素崇教高士○哈密忠順王卜答失里遣使  
臣滿剌亦蠻忠義王脫歡帖木兒遣使臣捨黑馬黑麻等貢方  
物○壬辰勅諭北京行部曰朕惟京畿國家根本所係興理之  
道養民為先朕嗣承大統仰惟祖宗子育之心夙夜拳拳爾  
北京行部實總畿內之郡邑以宣政化以共國用比者所司每  
緣公務急於科差貧富困於買辦下中之民服役連年公家所  
用十不二三民間費耗常十數倍加以郡邑官鮮得人吏肆為

茲徵收不時科歛無度假公營私弊不勝紀以致吾民衣食不給轉徙逃亡凡百應輸年年通欠國家倉庾月計不足爾惟行移文書以應故事民之休戚不在心為臣如此朕何賴焉自今應有差科爾宜審度緩急無一槩逼迫務以舒民力裕民生為心郡邑官吏有廉能愛民或貪汙不律爾宜詢察覈實以憑黜陟或權豪勢要玩視公法肆為民患者爾宜具以實聞以憑處治朕為天下主思與四海同樂雍熙而况畿甸之內乎爾惟體朕斯意謹率乃屬輔子于治若徂於弊習瘵官廢事殃吾民者國有常憲朕不食言○朝鮮國王李禔遣陪臣李純等四川東川軍民府故土官知府阿得妻攝克等來朝貢馬及方物○行在吏部左侍郎郭璉等奏尚寶司丞蹇荃少師蹇義之子初奉先朝命食祿不視事今三年考滿無事蹟考其稱否 上

曰此 皇考特恩但令獲任不必考亦與勅命示警飭之意○  
上聞行在三法司所上繫囚罪狀論之曰凡人命及情罪重者  
如律其謀逆知情故縱及謀叛家屬皆宥死發戍遼東婦人有  
夫與子者隨往無者送浣衣局盜內府財物與監守自盜常人  
盜倉庫錢糧官馬等物追所盜物俱宥死發戍口外受財枉法  
及犯榜例死罪宥死并徒流以下論輕重如例罰輸作凡工匠  
派徒罪以下各論年限輸作是日決遣四百餘人○夜有流星  
大如碗色青白光燭地起即將旁東北行至貫索

大明宣宗憲元崇道英明神聖欽文昭武寬仁純孝章皇帝實  
錄卷之三十九



明宣宗章皇帝實錄卷之四十

宣德三年三月癸巳行在禮部尚書胡濙言天下嶽鎮海濱社稷山川風雲雷雨城隍旗毒等神及歷代帝王陵寢先聖先賢忠臣烈士有功德及民載在祀典者每歲春秋致祭所以崇德報功為民祈福今各處廟宇壇壝頽毀不修祭器損壞不備有虧事神之道宜令天下有司於農隙修理依期舉行祀禮又言在外府州縣舊設惠民藥局洪武間官置藥材令醫官醫者在局凡軍民之貧而病者給醫藥今雖有醫官醫者而無局舍藥材宜令有司亦於農隙修葺藥局遵洪武之法行之庶不負朝廷惠恤軍民之意從之仍命監察御史按察司官巡視○代王桂奏承運殿及廚庫火勅武安侯鄭亨以軍衛有司於農閒時月斟酌興造不可過用人力惟適中而已○迤北和寧王阿魯台



遣使臣脫赤等四百六十人來朝貢馬及方物○上諭行在工部曰畿內百姓採運柴薪聞甚艱難自今止發軍夫於白河渾河上流山中採伐順流運至通州及蘆溝橋積貯以供用可少蘇民力又曰闕光祿寺散麥令民作麪麪少責償民不勝擾其令侍郎蔡信相度皇城外河及西湖作水磨三所付光祿寺庶免勞民○甲午周王有燉奏欲建本府宗廟請廟式祭祀等儀及母妃馮氏封謚 上謂行在禮部尚書胡濙曰此皆於禮不可闕者廟制及禮儀爾須詳考制度封謚令翰林院定擬○嗣靖江王佐敬暨弟奉國將軍佐敏奏生母耿氏李氏未有封號乞降恩命 上曰宗室能崇孝道是美事命行在吏部給誥命皆封為靖江悼僖王夫人○行在戶部奏木邦故宣慰使罕線法從子罕門法道人進宣德元年歲納差發銀至京違期請

罪之。上曰鑿矣不必以中國之法律之其勿問所遺頭目令禮部賜春遣還。○定陝西西安府納米贖罪例初隆平侯張信等奏近因岷州洮州河州臨洮四衛軍儲不足行在戶部奏准以陝西都司布政司按察司并所屬軍衛有司雜犯死罪及徒流以下罪囚自備糧米運赴岷洮等衛輸納贖罪比陝西三司間發囚人五百一十四名通運米三十一百五十九石五斗已經三月無一人至者究其所自陝西去岷洮等衛路遠崎嶇車牛艱難又况無官監督以致囚徒延緩乞勅法司比舊加增米數令原問衙門監收追徵於西安府永豐倉納足照例發遣上命法司議至是行在刑部尚書金純等請如所言加米之例元罪十六石派罪十三石徒罪十石杖罪八石笞罪五石從之

○貴州按察使致仕胡器卒器字士璉江西新金縣人洪武中

由國學生授普安軍民府通判練子寧為其賢陞泉州府知府  
時郡積弊政器一切革之而興利於民父老翺望謁見必使誨  
子弟還善遠罪郡中翕然從化每判死刑反徒配案輒悄然心  
憂曰吾為民父母不能導之善是吾過也郡諸生久廢學器申  
教養之令而躬督之諸生駸駸有成召修永樂大典民耆老有  
號泣送之者泉後更數守其民思器不已蓋其治民撫恤如子  
養之教之惟恐或傷陞貴州按察使治尚寬簡而法不可原者  
亦不貸民喪咸敬愛之三載入覲年七十一乞致仕從之歸未  
幾卒器為人和厚簡重言必循禮而持行有恒云〇乙未寧化  
王濟煥奏婚期在近而器用未備乞以晉府舊所貯者分賜之  
上勅鎮守山西都督李謙及山西三司官同閱晉府舊造轎乘帳  
幔相樽林榻及諸什器凡郡王所當用者與之以足用為度〇

鎮守定州等處都督僉事馮興奏真定衛北門城樓頽塌及保  
定城門四隅俱無樓鋪乞勅二處衛府量撥軍民繕治上命  
秋成後用工○丙申以明日清明節遣鄭王瞻埈祭長陵  
獻陵○丁酉成山侯王通遣送交趾頭目黎少頴等進表至京  
其詞曰安南國先陳王臣頴三世燭孫臣陳嵩及頭目臣黎利  
奏竊惟普天之下莫非王土率土之濱莫非王臣昔當太祖  
高皇帝龍飛之初臣祖日煇首先入貢特蒙褒寵錫以王爵自  
是世守封疆朝貢罔缺頃因黎氏篡逆太宗文皇帝興師問  
罪克平之後詔求陳氏子孫以奉宗祀蓋陳氏子孫先為黎賊  
殺戮殆盡其有存者皆奔散遠徙是以當時詔求未得遂建郡  
縣以撫人民臣屬其時竄在老樞不過苟延殘息豈意國人追  
思臣之先世逼臣還國不得已強而從之臣以宣德元年還至

故土本國之人以先臣之故多見順附臣昨遣人奉表及黎利等具書詣總兵官安遠侯柳升處乞轉達 天聽陳情請命又遣黎利父子率大小頭目恭詣總兵官成山侯王通軍門陳訴請乞退師以全小國生靈蒙准所請擬於本年十二月初一日班師臣自知負罪深重進退兩難然臣竊自思惟 天地之於萬物雖有雷霆之怒而生生之意常行於中父母之於衆子雖有笞朴之教而鞠育之恩實存其內是以人有疾痛則未嘗不呼天呼父母此臣所以不能不瀝懇陳詞以伸哀籲者也伏望皇上依 太宗文皇帝訪求陳氏子孫之詔念臣祖宗首先入貢之誠故臣丘山之罪寬臣斧鉞之誅使臣得以嗣服南荒輸貢 天闕非獨臣一身一家之幸實一國生靈之幸非獨一國生靈之幸而臣之祖宗亦霑 天恩於地下矣臣惟銘心刻骨

效順輸忠恭修職貢永萬無已今將代身金人銀人齋捧謝罪表文及方物遺頭目黎少頤等齋捧謹昧死奏聞○日生暈隨生交暈黃赤鮮明及戰氣二道○戊戌土魯番城十戶他力麻敏何克等來朝瓦剌部屬忽打罕等來歸皆奏願居京自效命為指揮僉事所鎮撫等官賜冠帶金織製衣綵幣銀鈔絹布鞍馬有差仍命有司給與房屋器皿牛羊等物如例○賜暹羅國使臣李注德事刺等四十二人鈔綵幣及絹布有差賜李注德事刺等冠帶金織製衣仍命齋勅及紵絲紗羅絨錦等物歸賜其國王及妃命行在禮部遣人護送至廣東布政司遣歸○行在禮部尚書胡濙言近奉勅諭學校之官所以立教興賢必求其實效臣欽遵 聖諭以近時學校之弊言之天下郡縣學廡貢生員多是記誦文詞不能通經兼以資質鄙猥不堪用者亦

多此皆有司不精選擇教官不勤教誨是以學業無成徒費廉  
饌今擬移文各處巡按監察御史同布政司按察司并提調官  
教官將生員公同考試食廩膳七年以上學無成效者發附近  
布政司直隸發附近府州充吏六年以下鄙猥無學者追還給  
過廩米罷黜為民其增廣生員在京府學六十名在外府學四  
十名州學三十名縣學二十名若民少之處不拘此例凡存留  
者必選聰敏俊秀能通文理者充數其才質魯鈍容貌鄙陋不  
通文理并額外多餘俱黜為民不許循私將有學者黜退無學  
者濫收其選留在學者務遵洪武中卧碑從師勤學有司一休  
洪武舊例優免差徭若學舍傾頽即為修理提調官教官必躬  
親激勸嚴加訓誨務在成材以備貢舉庶不負朝廷建學育才  
之意從之○掌彰德衛事都指揮王友奏於西門外濠上得失

上繫祥符王與趙王舊約為不軌初友在彰德嘗以兵圍趙王  
府阻遏府中人不得出入王奏之 上降勅切責友會友以不  
逆詔被劾乃遣人械繫以來友尚未知也及得此奏 上疑友  
樹趙王故為此以間之促命法司執而罪之又曰書既云自祥  
符來必得祥符面詢事乃可明遂錄友所得書示周王有燬而  
召祥符王有燬○文武羣臣合奏成山侯王通等不應擅與叛  
首黎利議和棄城退師當差人呈馳執赴京師明正其罪黎利  
亦不應寬宥宜發兵討之 上曰通等旦夕至矣不必差人朕  
非為宥利但憫念一方生靈故曲從寬貸耳○免四川瀘州戶  
絕四糧三十七百七十七石有奇○己亥遂平王妃李氏薨遣  
中官賜祭命有司治喪塋○是夜東嶽泰山神廟災○庚子靖  
江王佐敬奏先鎮遠侯顧興祖嘗調護衛官軍從征後奏取回



修理山川等壇尋復調從征今都督山雲又索補亡沒軍士之數錄護衛軍少乞免補從之○行在戶部尚書夏原吉奏趙王高燧歲賜鈔十萬貫今當如例 上曰當遣內官一人送去不可慢也○賜四川播州宣慰使楊昇所遣長官鄭釗等鈔絲幣表裏釗等未賀 萬壽聖節後期行在禮部援例奏減半賜之 上曰邊方道遠不足與較不可減○辛丑命金吾左衛都指揮同知錢義仍守荊州關口濟州衛指揮使李林仍守綏德俱以有罪遇赦復職也○賜和寧王使臣脫脫赤等四百六十人鈔絲幣及絹有差○夜有流星大如雞彈色赤尾跡有光出天市東垣西行至雲中○壬寅命行在禮部尚書兼華蓋殿大學士張瑄即中陳敬為正副使持節封秦懷王庶長弟富平王志堦為秦王妃陳氏為秦王妃以懷王無嗣故令弟襲其爵命行在吏

部右侍郎黃宗載鴻臚寺丞焦循為正副使持節封唐定王嫡  
次子瓊烜為唐王庶次子瓊燁為新野王豐城侯李賢通政使  
司右叅議何棟燁為正副使持節封潘王模第四子信燭為黎  
城王第五子信焯為稷山王第六子信煜為沁水王第八子信  
焯為沁源王罔南城兵馬副指揮韓學女為武鄉王妃永康侯  
徐安吏部郎中畢昌為正副使持節封楚昭王第十子孟炬為  
江夏王楚王孟焯庶長子李坭為武陵王命崇陽王孟燁第二  
子名李填永安王孟炯第二子名李塾通山王孟燿庶長子名  
李烱第二子名李塗道城王孟燦庶長子名李堂及周王有燾  
弟汝南王有勳庶次子子欄俱為鎮國將軍汝南王庶長子鎮  
國將軍子燿妻谷氏子欄妻王氏皆封夫人給以誥命冠服封  
楚王孟焯長女為新化郡主配金吾後衛指揮劉勳弟獻命獻

為儀賓賜之誥命行在都察院左僉都御史李璿大理寺左寺丞楊復為正副使持節冊太原左護衛指揮王玠女為寧化王妃○癸卯給楚府新化郡主及儀賓劉獻歲祿共八百石於湖廣稅糧內支米五百石小麥三百石○頒選武臣條式 上嘗論行在兵部曰典兵之職所繫甚重自今凡都司官及衛所正官必擇老誠歷練足為表率者任之然人之智愚賢否未易遽知惟公惟明乃可得人宜盡心於此至是尚書張本言內外軍職不下九萬餘人有見任者有多餘者有老疾優給者有操備未經任事者有犯罪立功或調除者有親屬襲替者必加清理庶知其詳今擬定選條式付與各官其條式一脚色二狀貌三才行四封贈五襲廢令各具年甲狀貌及初從軍來歷所建勳勞得官之詳及今有無殘疾仍從親管官及同僚同隊并首領

官保勘回報取其歷練有才智者擢用之庶幾得人 上從之  
曰此但可稽其履歷若選擇任賢尤當詢察其實○行在戶部  
尚書夏原吉言欽奉勅旨倉廩之糧為姦人盜竊常數萬計當  
加關防之術謹遵 聖諭究其作弊之端皆亡賴者私通官攢  
人等偷盜又或攬納虛收亦或冒支倍出所以虧耗為數不少  
犯者雖皆問罪不愆者仍蹈作非而北京各倉尤甚今擬內外  
衛所倉各就一處各築垣墻每倉各置一門榜曰某衛倉屋三  
間為一廩廩獲置一門榜曰某衛某字號廩若收支之際驗是  
納戶及應關糧之人許入餘人不許其半斛準洪武中制度官  
為較勘印烙木籌於上刊年月及提調官姓名上青下紅亦用印  
烙凡半斛籌非官印烙者不用私造者問罪京倉每季以監察  
御史戶部屬官錦衣衛千戶各一員往來巡察各倉門以致

仕武官二員率老幼軍丁十人守把倉垣牆外置冷鋪以軍丁  
三人提鈴巡警其致仕官半年而更外倉令都司布政司按察  
司設法關防巡按御史常加點視凡內外倉軍民偷盜官吏十  
級通同者被人首告得實正犯處斬仍追所盜糧全家徙戍邊  
衛給其家產一半賞首告者嘗同盜後能首者免本罪亦給被  
首者家產之半充賞其攬納虛收及虛出通關者罪同偷盜  
上從原吉言命揭榜中外戒約○賜裕密忠順王使臣滿刺亦  
璧忠義王使臣拾黑馬黑麻等鈔絲帶表裏紵絲襲衣有差又  
遣中官齎勅及綵帶金織文綺往賜二王并王子頭目人等○  
古里河等衛指揮僉事鬼迷等來朝奏願居遼東自在州賜金  
織襲衣絲帶鈔布仍命遼東都司給房屋器皿等物如例○巡  
撫陝西少師隆平侯張信等奏請令戶部召商於陝西布政司

納米中鹽以廣儲蓄淮浙鹽每引三斗五升四川鹽每引二斗  
上命尚書夏原吉議擬以聞又命之曰忠勇王金忠部屬隸官  
都指揮把罕等七十七員南京應支俸米非其便外夷來歸者  
當優之其米皆於北京支給應折鈔者亦於順天府課程內支  
○免山西被災處夫役時行在工部尚書吳中言山西人夫在  
京用工者令當更代 上曰山西去年旱人民艱食者多自給  
未能安可役之凡被災之處一切停止見役於京者即皆遣還  
○神武前衛衛鎮撫夏尚忠盜倉糧嘗斬令母奏乞充軍贖罪  
上諭行在三法司曰罪既不寬豈可苟免此輩肆無忌憚不斬  
之則犯者愈衆其處決如律○甲辰賜四川東川軍民府故土  
官知府阿得妻攝克及把事人等鈔有差○行在兵部尚書張  
本言應天等府宣德元年孳牧馬駒及所賠償一萬四千五百

六十一匹宜與直隸淮安等府州縣新編人丁并未領馬市民  
及已死種馬之家孳牧餘有牡駒則與在京各衛所官軍騎操  
病馬悉與各衛餘丁牧養其順天等七府人民見養種馬并宣  
德元年以前孳生馬駒一十九萬七千四百八十四匹而原編  
養馬止有二十一萬二千六百三十九丁今考其中有馬已他  
給及已死未補又有新出幼之人堪養馬者共二十三萬五千  
七百八十三丁俱未闕馬宜從新編排及時孳牧除遷民及謫  
發為民者如舊各養牡馬一其初土民二丁養牝馬一今於多  
餘人丁內仍添一丁助之請即委官搭配印烙給與餘有牡駒  
仍付原養之人今後應俵者如例分打山東河南附近州縣又  
言牡馬有病合令同群之家共治死則同償若因走失及別故  
致死養者自償 上悉從之 〇乙巳長安郡王薨 主秦愍王之

女嫁儀賓茹鑑計聞遣中官賜祭命有司營葬事○賜朝鮮國貢使李純等宴○行在戶部辦事官劉誠工部辦事官李春以公差齋奏贖復命僥越班次舉止失指為糾儀御史所劾錦衣衛執之 上問何官行在吏部臣對曰辦事官吏之冠帶未檢職者 上曰彼何嘗趨朝識奏對之序命宥之○守黃崖等關都指揮錢義因求姦逼人死事覺行在都察院請逮問 上曰以都指揮為此事是無耻人也罪之如律○丁未選用致仕武臣任各衛所事先是行在兵部尚書張本言各處衛所缺官 上曰武臣致仕及以疾去職者皆老將屢經戰伐有智識今雖年邁然其中堪任事者尚多終非年少可及其與英國公及五府六部都察院官公同選用至是得營州中屯等衛指揮使戴英等七百四人堪任職務其不堪任事者一百四人以聞 上



命堪用者注各衛任事不堪者令於南京及原籍給俸優養○  
調武德衛指揮同知韓敬任彭城衛○放免老幼殘疾軍民匠  
九百九十二人先是有言工匠多老幼殘疾不堪役者 上謂  
行在工部尚書吳中等曰老幼殘疾不堪役者屢命爾放免而  
仍一槩拘役有仁心者不如此其速閱驗放遣之至是始以名  
聞遂悉免之○夜有流星大如碗色青白光燭地起勾陳東北  
行至八穀○戊申命故金吾左衛指揮使王貴保子智濟州衛  
指揮僉事孫成子頌燕山左衛指揮僉事杜貴子能俱襲職金  
吾右衛指揮使徐順濟陽衛指揮使劉興俱老疾命順子貴興  
子深代之○賜朝鮮國使臣李純等鈔綵幣有差○行在禮部  
尚書胡濙奏南北兩京國子監齋舍庖庫皆敝教官怠慢學規  
廢弛請加飭勵 上曰齋舍廚庫即令工部修葺師生怠弛朕

當有以督勵之○行在戶部奏開平糧料不足請發在京軍民於宣府運二萬石接濟從之○行在兵部引奏軍官比試武藝不中者請加之罪上曰此輩不思前人立功艱難平居懶惰不習所以臨事失措凡人立軍功皆由勤於武藝懶惰未有能成者且定限令回習熟若再試不中皆罪之○庚戌遣使以

皇明祖訓及勅符底簿送代府先是代府火宮字冕服譜系祖訓勅符底簿俱焚代王桂奏請頒賜於是先以祖訓勅符底簿給之命行在工部製冕弁袍服別遣人齎送○辛亥行在禮部奏昨周王有燬奏請廟制及祭祀禮儀請令工部從宜修建先具圖式以聞俟曩隙興工○陞行在羽林前衛指揮同知失刺班為指揮使○給開平備禦官軍信砲○壬子少傅兵部尚書兼華蓋殿大學士楊士奇請以南京月支學士俸太子少傅工

部尚書兼謹身殿大學士楊榮請以太子少傅俸太子少保禮部尚書兼武英殿大學士金幼孜請以太子少保俸戶部尚書兼謹身殿大學士陳山請以尚書俸俱於本貫官倉關支以給其家皆從之

大明宣宗憲天崇道英明神聖欽文昭武寬仁純孝章皇帝實錄卷之四十

明宣宗章皇帝實錄卷之四十一

宣德三年夏四月癸丑朔享太廟○遣中官祭司寇之神○

遼東東寧衛女直指揮僉事木荅哈等來朝貢馬○交趾所遣頭目黎少頴等陛辭賜文綺衣及鈔賜勅諭頭目黎利曰去年十月軍中以爾等所陳書并表來奏請立陳氏之後朕仰體

天地之心與太宗文皇帝初意俯從所請特遣禮部侍郎李琦等齎詔大赦交趾令爾及國中頭目耆老具陳氏嫡孫之實來聞爾宜恭俟朝廷之命乃中懷譎詐輒與王通等議和誘退官軍入據城池借慢無禮有非一端今雖陳詞謝罪而文武廷臣合奏誦罪不可以宥朕以恩命既頒姑從寬貸但立後事重須合國人之心非爾所得獨擅勅至即同交趾頭目耆老具前安南王陳氏嫡孫之實奏來以憑頒詔回封爾仍以所拘留人

口及一應兵器送京庶幾一方永底綏定羣臣奏章就付黎少  
穎等示爾爾其省之○昏刻有流星大如盃色黃赤尾跡有光  
出闕丘南行入孤矢○甲寅封岳陽悼惠王第二子李埏為鎮  
國將軍選九溪衛千戶喬成女為李埏夫人選永定衛百戶周  
英女為鎮國將軍李埏夫人命通城王孟瓌第二女為羅田縣  
主配寧遠衛指揮郭瑛子成命成為儀賓賜之誥命○勅諭兩  
京國子監曰太學者教化之本賢才之所自出帝王之政必先  
於斯我國家奄有天下 太祖皇帝 太宗皇帝 仁宗皇帝  
致理興化率由學政簡道德以為師明條制以立教勸勵勤至  
廉養豐厚士之成才畢效於用而比歲以來士習庫陋有不事  
學問蒙昧罔知有不飭容儀猥瑣自棄甚者貪穢冥無慙心雜  
居俊秀之群深孤教養之意考其馴致之故亦由師道未善太

學之官本皆茂選人之難識心有不同中懷端厚者恒守道以  
範物所志險僻者率違理而騫私有懶慢縱肆累日不赴公座  
有撮拾過誤動輒把持官長習為媮薄之風何望教成之効監  
生無成者比已澄汰學官未善者尚資訓勵其祭酒司業以下  
必秉道義以博俗化必勤教導以成賢才如博士助教學正學  
錄有學行端正教訓不倦者祭酒司業必以禮待或仍媮薄不  
悛前過者從祭酒司業具名來聞厥罰匪輕監丞學之司直其  
務嚴肅整齊舊制學規申飭無怠諸生宜立志遠大勉勵進修  
以昔賢自期以勲業自奮毋負朝廷作養之意監中一應錢糧  
悉為養賢而設此年典簿掌饌姦弊百出祭酒司業監丞宜嚴  
加督察如仍踵前弊輕即量情責罰重則奏聞區處朕孜孜夙  
夜興學育賢其勉遵承庶臻明効欽哉○新作公主府三所於

諸王卹之南 上諭尚書吳中曰居室不必大多不可過為華侈但令堅壯可永安耳○雲南老撾軍民宣慰司等衙門土官宣慰使刀線達遣頭目招掃等貢馬及金銀器皿方物○罷南京諸司修造夫匠先是襄城伯李隆言內府庫及光祿寺常起人夫修理近又增工匠數千人俱是江寧上元二縣坊廂用錢雇募不免艱難 上曰南京有何興造而勞民如此遣監察御史陳搏往察之至是搏奏其弊遂悉罷之○乙卯雲南木邦軍民宣慰司故土官宣慰使罕緣法從子罕門法遣頭目陶孟刀葉放孟定府頭目刀悅曼等來朝貢象馬及金銀器皿方物○丙辰太師英國公張輔奏在京各衛優給出幼并應襲子孫及襲替多餘不在隊伍幼官令皆年少不宜閒逸請令兵部錄其姓名委官統領練習弓馬以備用 上從之因謂輔等曰射

乃軍中長技古人多以此為務大抵操習勤則自精御等教練  
當使熟於此蓋 上自少善騎射 太宗皇帝時嘗於端午日  
命將臣射御苑中諸王悉與以次至 上三發矢皆中的諸王  
羣臣皆駭服左右皆叩頭賀○少師吏部尚書蹇義等奏比者  
伏蒙 聖諭戒飭臣等有曰官不必備貴在得人諸司官員舊  
有定額今事不加多而額外添注紛紛俸位苟祿偷安是皆臣  
等之過然近年以來內外各衙門官因營造催辦夫匠收運糧  
儲整理農務採取木植在內添設郎中主事在外布政司樸察  
司府州縣添設叅政叅議副使同知道判縣丞等官本部欲行  
考察而彼以職事出入無常今擬在外除馬政農務外其餘依  
舊制裁減在京從堂上官量事繁簡斟酌去留不許冗濫其在  
內存各監庫郎中員外郎主事亦非額設俱宜裁革 聖諭又



曰吏員出身雖有定格徃時選用嚴慎授官者少比年吏典考滿歲以千計不分淑慝一槩收用貪鄙塞路廉能罕聞誠亦臣等之過然近年以來見彼并辦事吏典已嘗考驗罷黜為民而來者益多若不精擇實為淑慝混淆況今內外官少有缺員其冠帶月支半俸待次者日月既久廉祿虛糜今欲擇其年五十以下堪用者存留年五十以上人物鄙猥不諳文移者俱罷為民有赦前在逃能自首者仍令為民隱而不首事覺者發隆慶州為民又內外官先因不能守己奉公故違法律坐罪罰投逃避遇赦當還職者 仁宗皇帝時臣等具奏若此之徒行止有虧難以任用 仁宗皇帝命改授他職令徃交趾其後有到者臣等奏擬調用 皇上特加寬宥命歷事南京一年銓用之然其中或有換取年久至今未到者有到部聽候未發落者亦有先送

南京歷事已滿授職者臣等以為是皆處心不臧不知廉恥雖授之職無益於用俱宜罷黜以勵將來 上皆從之○設四川天全六蕃招討司陰陽學置陰陽正術一員從招討使楊欽所奏也○命行在戶部徵天下稅糧悉依詔書時本部奏去年十一月頒降詔書宣德三年稅糧鹽糧以十分為率蠲免三分而今年郡縣實徵糧數未報擬差官催促并督糧稅之當徵者 上曰免糧以寬恤百姓比間有司多違詔書但用舊額徵糧不顧失信於民今徵糧必依詔書使民受惠遣官催辦亦當擇人庶不擾民○上視朝罷御奉天門行在兵部尚書張本等侍語及操練事 上曰凡人學業須及早年若或過時終難成就況軍官子孫尤宜諳練乃能保守祿位不廢前人之功朕已命優給出幼及襲替多餘幼官操練重念官下應襲子弟亦須預為訓

教宜皆令赴教場操練須要精熟勿致其惰逸也○故兵部尚書金忠子達奏首蒙 仁宗皇帝厚恩授翰林檢討以年知令遠寧波府學支俸讀書比因母喪有司停俸臣達實蒙恩優養非見任雜職之比 上命行在戶部給俸如故○丁巳周王有嫩道長史鄭義等進綵幣等物賀立中宮賜義等鈔各三百貫命行在禮部自今王府再有來賀者悉準此例○遼東東寧衛韃官指揮僉事者龍牙等來朝貢馬○行在兵部尚書張本言伏覩 聖訓戒諭五軍嚴飭武備完固城池繕修器械精訓練務比種此數事於兵政最為切要於今行之必有專任其事然後可責成功若城池器械則委都司掌印都指揮督所屬衛所正官以時巡視務在修飭堅完其訓練軍士選委智勇都指揮量為衛士馬衆寡摘選精銳者多至一二十人少則八九百人或

五七百人令能幹指揮千百戶管領就於原衛所專一操備聽  
調仍屬所委都指揮往來提督其屯種則委老疾堪任都指揮  
專管常加勸戒所屬軍餘及時興作勿致怠惰凡此三事如有  
總兵鎮守官之處就令考較如無從巡按監察御史按察司考較  
勤謹廉能者種之怠弛貪鄙者罪之如是則兵政嚴明不負  
皇上拳切之意 上可之○定折收稅糧例時行在戶部奏今  
年天下稅糧俱免三分其該徵七分夏稅麥并額徵絲綿量存  
本色於各處織染局織造段匹餘請折徵布花等物運納京師  
倉庫其折收例縣布每匹准小麥一石二斗布每匹准七斗  
細絲每斤准一石二斗大麥二石准一石絲花五斤准一石其  
米豆紅花子皆抵斗紅花依各處時值折收絲綿二十兩折絹  
一匹從之○戊午民有建言朝政當以重農為首務者 上頗

謂侍臣曰此言有理國家重農則百姓得盡力天下富庶古之重農莫如周后稷以教民稼穡開國公劉克篤前烈文王時耕者九一武王重民食周公述豳風以戒成王備言農事當時民用阜成治協泰和周以下莫如西漢高帝因賈人以抑其末文帝二十餘年勤勤以勸農免租詔有司武帝雖以土木兵戈勞民至其末平亦知勸農作以休息民至於元成之間朝政固有乖闕而百姓安業自若天下富庶幾二百年成周享國過於夏商王莽篡漢終以民心不忘而復之養民之功大矣朕於斯事蓋寢食未嘗忘也○執掌彰德衛事都指揮王友全 上疑友造偽書離間親王命法司窮治之友被考掠不服○夜月犯五諸侯○己未 皇太后聖節 上率親王上壽宗室諸王各遣人奉表賀文武群臣命婦行慶賀禮○以瓦剌順寧王脫歡亦

力把里王歪思哈密忠順王卜荅失里忠義王脫歡帖木兒各遣人朝貢遣行在羽林前等衛指揮僉事昌英等使哈密及亦力把里都指揮毛哈刺指揮使孫觀指揮僉事岳謙等使瓦剌齋勒囊諭其王及賜金織文綺綵絹有差加賜歪思盧甲弓刀○庚申廣東按察使喻良奏比者欽州如昔都崗寇黃祿受誘引交賊劫虜民人一十餘家掠去男婦八十餘口廣東都指揮僉事程瑒不能嚴備請正其罪上諭行在都察院臣曰瑒實有罪但在赦前姑不問若赦後不捕獲亦不宥爾即移文督瑒往捕仍戒瑒不得託此擾害良善○以遣都指揮毛哈刺指揮使孫觀指揮僉事岳謙等使瓦剌命戶部如舊差徃迤西官例增與絹匹仍全支俸一歲以贖其家○辛酉給楚府永安壽昌崇陽通山通城景陵江夏武陵八王歲祿各二千石永安王庶

長子鎮國將軍孝埒歲祿一十石○行在戶部尚書夏原吉等奏內府洪用庫歲用青臘銀珠等物凡三萬餘斤當下郡縣支官錢買辦上曰所買太多所用大侈其會計可省者省之且間買物支官錢近時為有司剋減屢有乞許者必令從公毋蹈前弊○又諭原吉等曰各處逃徙人民已有招諭復業近聞不復業者尚多爾戶部宜榜諭之限五月內復業凡前所負稅糧悉與蠲免其有久居於彼產業已成者許令占籍仍令有司善加撫綏原吉等對曰頑民屢逃深負朝廷寬恤之意請自今限內不復業者并其容匿之人各杖一百全家發充邊衛軍官吏里老縱其逃及所在有司軍民容隱者俱坐重罪其於逃所入籍者令有司編成里甲仍以戶口姓名及原籍鄉貫書兩送部上曰逃民入籍者當書兩不復業者連坐容隱及官吏里老俱

受重譴過矣宜寬之○壬戌雲南鎮康州土官頭目刀門淵等  
未朝貢馬及方物○陞行在禮科給事中劉芾為行在通政司  
右參議○上諭行在兵部侍郎王驥等曰南北兩京官船絡繹  
往來須當愛惜人力近聞南京運送諸物來者每船所裝皆未  
及半而經過之處一體添撥軍夫接送虛勞人力宜如舊例令  
襄城伯李隆及南京工部都察院錦衣衛各委官監視凡有運  
送務令滿載若仍踵前弊具奏罪之○癸亥行在禮部奏官民  
建言請同六部尚書都御史六科給事中會議以聞 上曰致  
理之道莫先於廣言路蓋天下之大吏治得失民生休戚人不  
言朝廷何由悉知古人謂明主視天下猶一堂滿堂飲酒一人  
對隅而泣則一座之不樂若令天下有匹夫匹婦不得其所  
實為君德之累凡有建言民瘼者卿等勿諱言或激切亦其心



發於忠若以其言激切而棄之孰肯進言卿等宜悉此意凡言之善者即以聞庶幾有補於治又曰大臣輔君為治貴有以來天下之善而不恃一己之能卿等勉之○陝西河州衛故土官都指揮僉事康壽孫濟等來朝貢馬○禁軍官虐害軍士特行在都察院奏大寧中衛百戶劉勉管軍操練受軍士賂縱遣還家又冒支其馬料又毆病軍求財不得而誣奏其避操於律當斬上曰朕常戒約軍官謂古之良將能愛恤士卒所以能成功名令其用意撫綏無橫加害今七輩縱惡又復而護豈可寬也令械置教場榜以示眾然後處決如律都察院仍榜示中外管軍官員俾皆知警○四川叅政李衡奏戶部勘合令民運河州茶馬司茶六十萬斤赴陝西北因松潘等處番寇作亂發兵勒捕其旁近州縣民皆驚潰而發成都等府民六十餘萬往運

軍餽民力不足已暫停運 上謂尚書夏原吉曰蜀地險民貧  
今方用兵供給實難安可復以不急之務擾之民擾則不安不  
安則怨怨則為非宜從衛所言止勿運凡諸司有買辦於板者  
悉令停止○甲子賜正一副教崇修空道葆素演法真人張懋  
丞及履和養素崇教高士周思得誥命○命濟陽等衛帶俸都  
指揮王捌光麻等九十員俸給俱於北京支王捌光麻等俱山  
後人而俸給在南京無人闕領至是恭順伯吳克忠為之言  
上命行在戶部於北京倉庫給之○行在戶部奏保走河間二  
府祁州唐縣等二十四州縣人戶二萬七千八百八十餘戶被  
水災田地一萬二千五百九十八頃八十餘畝應納洪熙元年  
糧六萬八千五百五十餘石草一百二十三萬八千四百餘束  
乞除豁以蘇民窮命除之○乙丑四川灌縣陰陽學訓術嚴亨

奏本縣都江等四十四堰洪武間築以障水灌溉民田比因江漲衝決乞仍發民修築為便 上命行在工部移文有司令農隙用工○丙寅以午遣成國公朱勇祭大小青龍之神文曰今夏氣已屆農務正殷自冬歷春雨澤不降百姓嗷嗷憂在艱食朕為民主夙夜靡寧惟神早霽甘霖遐邇沾足庶幾下土永戴神功○行在都察院左都御史劉觀等劾奏山西布政使白思謙叅議魯瑤按察使張政副使魏清等蒙蔽汙怠慢不敬罪上命逮鞠之○山西解州潞州奏天旱民饑多流移他境者上覽奏惻然謂尚書夏原吉曰比聞山西久不雨朕心不安今果奏至其即遣人賑濟且撫綏其民無令失所又曰聞旱災之地頗聞預災之要修者在朕卿亦當敬謹勉盡乃職○上罷朝謂少傅楊士奇太子少傅楊榮等曰朕近著一論以曹參為說

卿等試觀之論曰漢世賢相稱蕭何曹參何之相業著矣參惟守何之法以清靜寧民後世謂之以為不事事朕意不然嗣世之君當守祖法為輔相者固當以清靜處之書曰監于先王成憲其永無愆詩曰不愆不忘率由舊章參親見秦政紛更以亂天下又親見高祖立國之不易則以鎮靜輔嗣君固老成之士也觀其居齊用蓋公清靜氏自定之言及屬後相無擾獄市至為相務掩人細過擇謹厚長者為丞相史史刻深者輒斥去此其意固有在豈誠耽於酒而塊然不事事者哉吾故曰參國之老成人也後世有老成如李沆相宋真宗務守祖法不變一切浮薄新進喜事之人不用君子論宋名相得大體者惟沆第一則亦參之心也有不為參者如王安石呂惠卿輩相神宗以弊天下之人其効可見矣嗟乎安石輩動引經誼述三代非參所

能與知也然國家用參未至乎病民參其未可深誦哉士奇等  
觀畢上問卿等以為何如士奇等對曰此誠確論自古創業  
之君輔運之臣皆老於人情熟於世故立法盡憲至精至密子  
孫奉而行之足以為治若變亂紛更必致禍敗往事昭然可為  
明鑒 陛下所論非惟得參之心實萬世繼體圖治者所當取  
法○戊辰湖廣意利尚蠻夷長官司故長官羅可爾孫友忠貢馬奏請襲  
職○行在吏部奏京官給假省親祭祖違限者計往回程期外  
許居家兩月違一年之上罰俸五月或經赦仍違限者下法司  
治罪 上曰以省親祭祖違限送法司亦過但依例罰俸可矣  
○庚午貽書周王有燬召新安王有燾先是彰德守將王友奏  
得祥符玉有燾與趙王高燧同謀不執之書 上疑友所為及  
逮友並不服罪而有燾至京亦言實不為此但素與有燾不協其

性兇悍殘忍必其下人所為欲以見禍 上以事須明白故召之○辛未增置直隸大名府通判開州判官及內黃長垣南樂滑清豐元城濬魏大名九縣佐貳官各一員專督馬政○賜遼東東寧衛女直指揮無事木谷吟者龍哥雲南老撾軍民宣慰使刀線達所遺頭目招掃等鈔線帶表裏有差遣內官楊琳齋勅及文錦紵絲紗羅往賜刀線達等○行在戶科給事中宋徵言洪武中所羅郡縣預備倉穀歲歉則散秋熟則還數年未有司官吏與守倉之民或假為己有或私借與人俱不還官倉厥頽廢宜令戶部下郡縣修倉徵收以備荒歉 上謂行在戶部臣曰七 太祖皇帝備荒良策當百世行之今廢弛如此皆有司之過宜即遣官巡視整理有慢及反欺弊者皆罪之○海川中千戶所小旗王興妻黃氏一產三男事聞令行在禮部給賜

如例○壬申行在禮部尚書胡濙等奏近磁州判官張傑等反  
者民四十人各言郡縣官吏軍民利病凡二百餘事有旨令臣  
等會議臣等詳其所言有益於民可行者八十事乞賜施行其  
間有告訐人罪及奏牘不書名不稱臣并錯誤者請逮治之  
上謂濙曰民之休戚朕所欲聞其假建言為名告訐者付法司  
治不謹及錯誤者皆不足較較之即言者不至矣○免竈戶夫  
役時山東壽光縣竈戶訴每丁辦鹽俱有定數戶無閒丁今又  
以民夫起赴京供役有誤鹽課道政司以聞上諭行在戶部  
尚書夏原吉曰素聞竈戶驗丁煎鹽歲辦不給豈可別役即為  
蠲其夫役○巡按江西監察御史許勝奏江西南昌府所轄之  
地有瑞河一道兩岸低窪多良田洪武間有言於朝者遣官按  
視發民修築隄岸水不為患比年洪水泛溢岸之頽圯者二十

餘處又壘城縣安沙繩灣圩岸計三十六百一十丈永樂間因水衝決改修一百三十餘丈於氏甚便比因久雨江漲隄壞其受利之氏雖並力修築恐不能集事乞勅所轄上司委官於農隙之時發民協力修理從之○癸酉上諭行在吏部臣曰唐堯用人猶曰試可乃已况於後世更當詳慎朕下詔求賢四方薦舉來者甚衆卿等未嘗考察豈能知其賢否而輒授以官欲官皆得人難矣今未受者必會官考試取其可者用之已授官者俟考滿至日試之如例試不中者黜之○賜雲南木邦軍民宣慰司罕門法所遺頭目陶孟刀葉放孟定府頭目刀挽慶等鈔帶有差○行在兵部奏今清理軍伍凡雲南兩廣福建四川湖廣所屬及緣海州縣應解軍士已蒙聖恩就留本處附近衛所帶管操備若江西貴州等布政司南海等府應解遼東甘



肅等處山西等布政司大同等府應解雲南兩廣等處計程亦有萬里及七八十里者勞費艱難宜如前例為便 上從之因

論之曰國家用人彼此則一若使交互往來道遠無貨必致逃亡終不得用若腹裏地方應充軍者離原衛二千里以下仍赴原衛二千里以上者亦留附近衛所收操庶幾兩便○山西按察使張政奏近發山西河南所問罪囚於寧夏納米贖罪緣山路崎嶇艱於運輸今擬將平陽一府澤潞二州與陝西相近車牛可行者如例送納若太原大同汾沁諸州縣山路險遠負載艱難者乞令於雲川衛輸納道路既便邊儲可充 上謂行在戶部曰彼此皆是邊餉輸納必須便民其從所言○甲戌 上諭太子少傅楊榮曰洪武永樂中宗室有王牒今本支繁盛當增修諸王已多有具報者至今尚未紀載此必翰林委官任之

榮請令修撰苗東與宗人府經歷張珂從之。○納刺吉河等衛  
女直指揮僉事沙隆葛等來朝貢馬及方物。○雲南三司奏麓  
川宣慰使思任發占奪南甸州等處屬地請發兵問罪。上曰  
蠻夷讎殺自古有之但遣人撫諭遂勅總兵官黔國公沐晟并  
雲南三司巡按監察御史計議差人齎勅撫諭令思任發還其  
土地人民安分守法各守疆界如其怙終其實以聞又勅思任  
發曰朕膺天命主宰天下無間遠邇皆欲使之安生樂業有能  
敬順天道據誠向化者必獲福還逆天道拒命梗化者禍必及  
之爾父思倫發昔在洪武中為刀千益等所害赴京訴告我  
太祖高皇帝矜憫特命四川雲南官軍送回麓川仍為宣慰擒  
刀千益等斬以警衆爾父既死命爾兄思行發繼承能保土安  
民朝貢以時爾兄又歿命爾承襲朝廷待爾父子恩至厚矣今

爾不感恩思報安分循理乃敢恣肆侵奪南甸騰衝潞江等處之地殺虐人民劫掠尊畜財物又強執頭目班道罕等逼脅朕從似此所為豈保身全家之道今雲南三司奏請發兵討罪朕以鋒鏑之下或傷善良故未允所請茲特遣人齎勅諭爾如能改悔前非據誠服罪恙還所侵土地所虜人民自今各守疆界遵奉朝廷法度則可以保爾身家於長遠若執迷不悛必發兵誅戮父母妻子俱不能保雖悔無及爾其省之○四川總兵官都督陳懷等奏松潘叛蠻招撫復業者萬二千二百六十九戶歸所俘軍民男婦二千二百六十一人其所掠印信兵器驛馬屯牛皆進入官 上命行在禮部兵部議陞賞以聞○乙亥運北韃靼脫火脫來歸奏願居京自効命為副千戶賜冠帶金織龍衣綵帶銀鈔綿布鞍馬仍命有司給房屋器皿等物如例○

永平及山西民張簡等自虜中逸歸 上謂行在戶部曰此皆  
身陷虜中數年艱苦多矣今獲來歸可憫也其令充御馬監勇  
士給衣糧以優之仍免其原籍之家差役著為令○丙子遼東  
兀者等衛指揮僉事剗判等來朝貢馬○命故山西都司都指  
揮使張源孫成襲為指揮使於金吾左衛帶俸羽林前衛指揮  
同知薛敬子政金吾右衛指揮僉事張銘弟昇襲職以羽林左  
衛指揮僉事雷春燕山前衛指揮僉事包賢俱老疾命春子清  
賢短信代○直隸清河縣知縣李信奎奏本縣地廣人稀路當  
要衝南北二京直隸浙江等十布政司及諸藩國運送官物俱  
經本縣發民挽舟初無定數部運之官挾勢多索逼迫無厭仕  
丁盡行役及老幼妨廢生理不得休息宣德元年兵部嘗移文  
有司公事急者每船與民夫五人緩者不與二年以來官船往

來愈多民夫不限名數管運官旗軍校任意需索一船或二十  
五人或三十人甚至四五十人完歲所加莫敢誰何本船軍士  
日給行糧坐卧自得或遇風順民夫步追不及則盡取所齎衣  
糧伴受寒餓且本縣南至山陽縣北至桃源縣皆六十里總百  
二十里視前途桃源縣至宿遷縣宿遷縣至邳州俱百二十里  
其道里適均乞以清河安東沭陽三縣民更番附桃源縣助役  
為便仍乞申明元年定例量事緩急定與人數庶得少寬民力  
上命行在兵部如例處置○丁丑總兵官都督諱廣奏天下郡  
縣俱設風雲雷雨山川社稷壇春秋祭祀為民祈福宣府久置  
軍衛而無壇所近年風雨不調人多疾病請如郡縣立壇致祭  
行在禮部言有司祭山川等神宣府邊衛似難比例 上曰奉  
祀神明為人祈福軍衛獨非吾人乎其准所言令於農隙之時

為之○湖廣按察司僉事劉紹奏臣父簡今年七十五願停應  
給臣本身之誥先給臣父翰林編修周叙自陳 聖朝之制婦  
人因夫與子封贈而夫子兩有官則從一高者洪熙初授朝臣  
誥命時臣父岐鳳為國子博士比臣官卑臣父母應得從臣職  
事受封臣方以此請給而臣父陞除兵部職方員外郎比臣官  
高例應考滿然後給授切思臣父考滿之日尚遠而臣母王氏  
年老久病危在朝夕願得早賜恩封 上命行在吏部皆從之  
○命雲南木邦軍民宣慰司故土官宣慰使罕線法從子罕門  
法襲職初罕線法卒罕門法尚幼至是遣人朝貢且請襲職遂  
以命之遣中官徐亮齎勅及文綺表裏往賜罕門法并其祖母  
母及益定府土官知府罕顏法等有差○廣西總兵官都督僉  
事山雲奏蠻寇出沒欲於秋冬征勦取湖廣貴州二都司原發

回聽調官軍八千三百八十人隨征從之。○交趾土吏黎宗補等十五人考滿在京。上念其有父母妻子命行在吏部送遣歸仍勅都督山雲遣人護送至交趾境。○巳卯貴州宣慰使安中遣把事蔣貴林湖廣施州衛忠孝安撫司土官安撫田大興登東東寧衛指揮僉事牙塔等來朝貢馬及方物。○庚辰復陳銜余思寬張嘉會行在監察御史三人先以冗員罷歸吏部改除。至是行在都察院奏御史多缺遂復之。銜陝西道思寬湖廣道嘉會廣東道擢推官王豫知縣李灝閩擘張鉉周能進士薛瑄趙琰張善方鼎陳祥周弘章信宗監生張鵬趙勵李序陳斌繅鳳王恭蕭全戴謙楊茂潘綱陳恕陳琮顏文林俱為監察御史信宗能陝西道瑄善廣東道豫琰序貴州道灝斌交趾道擘福建道鉉鼎廣西道祥山西道弘雲南道鵬浙江道勵四川道

皆行在都察院。鳳、陝、西、道、恭、江、西、道、全、琮、雲、南、道、謙、茂、湖、廣、道、  
綱、恕、四、川、道、文、林、文、陞、道、皆、南、京、都、察、院。○上、退、朝、御、左、順、門、  
謂、行、在、工、部、尚、書、吳、中、曰、昨、日、都、督、李、英、奏、求、故、都、指、揮、何、清、  
南、京、居、宅、朕、已、許、之、今、聞、清、陞、陝、西、之、時、太、宗、皇、帝、有、命、  
其、居、聽、留、家、人、在、內、守、墳、而、英、朦、朧、請、之、今、雖、不、罪、英、亦、不、與、  
之。○昇、已、遷、平、陽、衛、中、左、所、太、原、左、右、二、衛、中、左、中、右、所、印、先、  
是、太、原、三、護、衛、內、五、千、戶、所、官、軍、隨、侍、平、陽、廣、昌、永、和、寧、化、慶、  
成、五、王、後、革、各、護、衛、而、各、所、仍、用、舊、印、至、是、以、五、所、隸、平、陽、等、  
衛、遂、改、造、新、印、給、之。○宣、府、總、兵、官、都、督、譚、廣、奏、野、狐、嶺、虞、臺、  
嶺、皆、有、煙、墩、相、距、十、里、中、有、深、溝、三、道、俱、通、人、馬、而、瞭、望、不、見、  
請、於、萬、全、小、尖、山、西、增、設、煙、墩、一、所、置、軍、守、備、從、之。○北、京、順、  
德、府、邢、臺、縣、奏、去、歲、天、旱、五、穀、薄、收、民、多、缺、食、已、開、倉、給、貸、俟、



秋成還官

大明宣宗憲元崇道英明神聖欽文昭武寬仁純孝章皇帝實

錄卷之四十一

大明宣宗憲天崇道英明神聖欽文昭武寬仁純孝章皇帝實

錄卷之四十二

監修官奉天靖難雜誠宣力嗣運武臣特進光祿大夫左柱國太師英國公臣張輔

總裁官光祿大夫柱國少傅兵部尚書兼華蓋殿大學士臣楊士奇光祿大夫柱國少傅工部尚

書兼謹身殿大學士臣楊榮資政大夫禮部尚書兼翰林院學士臣楊溥中議大夫贊治戶

詹事府少詹事兼翰林院侍講學士臣王直中議大夫贊治戶詹事府少詹事兼翰林

院侍講學士臣王英等奉

勅修

明宣宗章皇帝實錄卷之四十一終

明宣宗章皇帝實錄卷之四十二

宣德三年閏四月壬午朔命少師吏部尚書蹇義禮部尚書胡濙為正副使持節冊南城兵馬指揮吳昇女為越王瞻墉妃賜皇妹嘉興公主冊命行在禮科給事中井田子源為駙馬都尉賜之誥命○以平松潘番蠻功陞都督同知陳懷為右軍都督府右都督賞銀一百兩綵幣十表裏都督僉事劉昭為右軍都督府都督同知銀九十兩綵幣八表裏都指揮同知趙安為左軍都督府都督僉事銀八十兩綵幣七表裏都指揮僉事蔣貴為都指揮同知銀八十兩綵幣七表裏勅懷等曰前命卿等勦捕叛蠻能竭心效力征勦撫諭悉得其宜今叛寇順服邊境寧靜朕深嘉悅特舉陞賞以旌功能凡隨征官軍有功慢功皆從實具奏蓋賞罰國之大柄必至公無私乃協衆情又諭懷等曰

所奏叛寇已服欲領陝西官軍仍從洮州還區畫固善但四川險遠番寇出沒不常必得練達重臣以鎮之庶幾事妥民安今發去制諭一道命爾懷仍充總兵官鎮守四川訓練兵馬遇寇生發相機勦捕其四川都司所屬衛所官軍悉聽節制昭仍守河州安仍掌臨洮衛事責回京其立功指揮等官李琛等七員俱令管軍操守○賜湖廣意利峒蠻夷長官司舍人單友忠等鈔有差○癸未賜雲南鎮康州土官頭目刀門淵陝西河州衛舍人康濟等鈔絲幣表裏有差○少師吏部尚書蹇義等奏近本部放回官吏監生人材與記名致仕侍親養病及為民官員多違禮法有出入公門結交官吏囑託公務妄與告許挾制官司暴橫鄉里蠹政害民者今後許諸人陳告提問明白併家屬發口北充軍逃者擬重罪 上曰不教而殺古謂之虐先移文

示之俾知做戒若復不戒而罪之彼亦無悔○命鴻臚寺右少  
卿嚴朝貴致仕朝貴四川邛縣人自序班累陞鴻臚寺丞又陞  
少卿朝貴喜撮拾人小過為己功上下厭之至是年七十餘斥  
之致仕○乙酉賜行在戶部右侍郎王佐行在都察院右僉都  
御史凌晏如并其父誥命先是佐等陞職當授本身誥命各陳  
有父平老乞停所應得誥命先賜其父 上曰孝子之志命行  
在吏部并授之○詔以羽林等衛征進交趾官軍復歸原伍仍  
屬太師英國公張輔總率操練○以西安左衛為陝西都指揮  
使司治所永樂中以都司為永興王府第移治於西安後衛至  
是都司請以西安左衛為治所從之○雲南總兵官太傅黔國  
公沐晟奏麓川宣慰使思任發侵奪南甸騰衝等處地方請發  
雲南貴州四川官軍五萬人及各處土兵討之 上勅諭晟曰

麓川之事前已命卿等計議撫諭雖蠻夷作過必當威服但念數年來征交趾討四川番寇軍民勞弊未甦今莫若且遣勅諭之卿即同雲南三司巡按監察御史再遣人招撫如能順服不必用兵果執迷不悛止調雲南官軍土軍及木邦宣慰司等處募兵勦之卿國家勲戚久鎮邊隅老成練達其於益國利民之事講究有素不待朕言與兵動衆勞擾實多不可不熟思遠慮卿又奏老搃宣慰刀線歹及寧遠州土官刀吉罕協助交趾罪不可容今已赦宥交趾老搃寧遠亦不必深究○丙戌命陝西河州衛故都指揮僉事康壽孫濟襲為必力衛指揮僉事賜之詰命○鎮守西寧都督僉事史昭奏西寧地臨極邊當嚴守禦在衛軍士三千五百六十人各有差違不暇屯種切慮缺食今征進屯軍家屬自願力田者七百七十餘人乞令如舊耕種依

例收其子粒俟征進軍回內選精銳者五百人專操練以備調遣餘丁復其雜役悉俾耕種庶軍食不缺亦不妨操備從之○夜有流星大如盃色青白尾跡有光起紫微垣內東北行至濁○丁亥陞行在錦衣衛正千戶宋義為本衛指揮僉事○賜貴州宣慰司把事蔣貴林等湖廣施州衛忠孝安撫司土官田大興遼東東寧衛指揮僉事牙塔等鈔紵絲襲衣綿布有差○戊子乞塔河衛指揮同知脫因不花也河衛舍人木禿納等來朝貢馬及方物○賜納剌吉河等衛野人女直指僉事沙隆葛等及原差招諭指揮僉事施者因帖木兒等一百人鈔緡絲幣表裏等物有差以沙隆葛等招諭初至也○裁減遼東苑馬寺官吏永樂中設苑馬寺於遼東置卿少卿寺丞及監正等官至是本寺卿方圓等言遼東有行太僕寺又有苑馬寺又所屬監

苑今孳牧馬止九百餘匹而吏官繁乞革苑馬寺其所畜馬令  
行太僕寺領之則官無虛曠事且歸一 上命行在吏部會議  
可否以聞尚書蹇義行在兵部侍郎王驥等議苑馬寺之設乃  
是舊制難遽裁革今孳牧馬少除清河灤河二苑團長及吏仍  
舊類其苑馬寺留卿丞主簿各一員吏二人永寧等監止留監  
正錄事各一員吏一人餘令赴部改用俊馬蓄息仍舊設置  
上從之○己丑賜遼東兀者衛指揮僉事劉利等鈔綵帶絹紵  
絲襲衣有差○庚寅貴州金筑安撫司土官安撫得住遣頭目  
徐貳等貢馬○行在通政司言南京國子監歲用柴薪請給勅  
合支用 上曰國家育才豈比其他費用令即給之○辛卯永  
安王庶長子鎮國將軍季埈卒遣官賜祭命有司治葬事○整  
治神機營部伍先是陽武侯薛祿言舊制神機營設左哨右哨

左掖右掖中軍十五司及隨駕馬隊官軍共七萬五千七十一人其後調口外守備征進及亡故者衆各司軍數多寡不均請選內地衛所軍士補之其守備口外官軍亦宜均派各司庶多寡相等布營設陣無厚薄之失 上命行在兵部尚書張本會英國公張輔計議整治○廣西總兵官都督僉事山雲奏忻城縣蠻寇譚圓等一千餘人出劫臣親督軍追至橫州永淳縣斬賊首二百九十餘級收回被掠人口緣橫州地方舊調馴象衛指揮張玘等哨守玘等畏避退縮不能防禦遂使良民受害請治其罪 上謂尚書張本曰兵以衛民今臨寇畏縮使百姓受禍於法何可容其令雲嚴治之○命南京都察院右都御史兼詹事府詹事向寶致仕勅曰古有七十致仕之典亦有不及七十而聽著蓋衰倦之早或疾疢之加其君圖安佚之固體下之



仁優賢之義也卿以儒術事我 太祖皇帝歷任繁劇十有餘

年清白勤慎之行如一日繼事 皇祖 皇考及輔朕於春宮

所以形諸躬行得諸官政益脩而不懈可謂好德君子者矣朕

方勵精圖治資老成之毗輔卿雖未及謝事之期然病至而氣

衰動作之際艱難可念不欲勞以政務今命以本官致仕歸鄉

里尚其親醫藥強飲食清心怡神以安餘年用副朕優待之意

欽哉時寶以考績來朝而已有疾雖年未及致仕 上見其步

趨拜起皆須人扶掖故有是命○遣交趾監主及土官土吏阮

智武希運等一百六十八人還鄉命都督山雲遣人護至交趾境

○壬辰貴州都指揮同知焦得奏嘗領軍征勦廣西叛蠻有軍

人臨陣而逃既獲執之四十付斷事司鞫之後死於獄其子訴

臣殺其父緣臣因公執之非有他故 上曰軍律不嚴何以一

衆心軍逃而杖之雖死不為過其宥之○癸巳勅行在三法司  
及北京行部曰今天氣已熱獄中繫囚豈無可矜者即其所犯  
輕重朕將親觀之○行在戶部奏近甘肅守將言商人有告已  
運米麥至甘肅中鹽初例淮浙鹽每引一斗五升今願納米三  
斗於淮浙不徇次支鹽緣甘肅邊境軍馬浩繁糧料用多請不  
為常例准令加納仍給榜召商中納從之○昏刻有流星大如  
雞彈色青白有光出辰東南行至濁○甲午少保行在工部尚  
書吳中奏諸色工匠多有逃逸當追捕問罪上曰工匠赴役  
皆與糧賞朝廷非是不恤但管工之人貪虐害之致其逃逸凡  
事當究其本即出榜禁約管工匠官及作頭有虐害工匠者治  
以重罪逃者許兩月內自首免罪赴工仍與糧賞○乙未雲南  
八百大甸軍民宣慰司及各長官司土官宣慰使刀招散哥遣

頭目扳弄等來朝貢象馬及金銀器皿方物○掌河南彰德衛事都指揮僉事王友有罪降指揮同知友先守彰德驕縱貪虐會趙王府中有妄言王陰事友聞之不以奏輒發官軍火器攻具園王府縱騎士馳驟城中及於城北門放礮人民驚駭河南三司官亦奏友不法遂執至京命御史訊之論罪當杖羅職戍邊 上省之左遷指揮同知令往宣府備禦○丙申遣羅國王三額波摩利扎額遣使者奈勾等來朝貢方物○行在都察院左都御史劉觀奏抽分場材木等料抽分悉有定例比來內外官員軍民不循禮法恃其豪橫凡物料當抽分者或私隱匿或妄稱奏免請悉禁止違者罪之場局官吏受賄縱容者罪同上從觀言命揭榜曉示○丁酉湖廣宙皮軍民安撫司故土官子田大重什用等來朝貢馬奏請襲職○戊戌命湯武侯辭祿

充總兵官清平伯吳成爲副總兵率領官軍防護糧餉赴開平  
○庚子以久旱復遣成國公朱勇祭大小青龍神祝曰自冬不  
雪春亦無雨四郊嗷嗷咸以爲憂蓋於今不雨民之歲計無所  
仰給朕爲民上深用弗寧惟神著靈于斯其來已久數降霈澤  
神之能事旱勢倏焚何忍坐觀茲再懇祈必垂矜卹早施甘霖  
遠邇之田咸得霑足民遂所養神亦有依○復傳啓讓河南按  
察司僉事陞正四品祿啓讓九年考最河南民二百餘人言啓  
讓公直勤慎有守有爲開封城東河水爲患啓讓躬率民築堤  
百五十餘丈捍禦田得耕種民免流移又開歸德州鳳池口以  
泄河流民受其利乞賜本官復任上諭行在吏部臣曰僉事  
可謂能典刑除患其民愛之當從所欲令復任而加其祿○雲  
南總兵官黔國公沐晟言麓川宣慰思任發侵奪南甸路江哥

處封寨議調軍勦捕於金齒各處預備糧餉而所屬州縣皆係  
極邊別無倉儲黑白安寧五井四鹽課提舉司歲辦鹽三萬九  
千引請不拘常例暫將上年所中商鹽住支一年召商於金齒  
司中納依永樂間例安寧井每引納米二石黑白井每引一石  
五斗五升每引一石三斗以到井日為始依次支鹽計足一年  
鹽課仍依原次放支 上謂行在戶部臣曰蠻夷雖殺常事豈  
可輕用兵但守邊不可無備姑如所奏行之○山東東昌府館  
陶縣民秦同里逃民戶內挖糧四百六十五石官令代輸乞賜  
除豁從之○禁採番禺縣鉛沙先是廣東都司奏縣民有私取  
鉛沙者門卒獲之究其所出在番禺縣西取沙烹煉可得白金  
鉛錫當罪私取者并請官開冶 上曰山澤之利民取之勿問  
治不可遽開命巡按御史勸視其實以聞至是御史何善奏同

三司官發工匠民丁等深入岩洞取沙礪每百斤煉銀止四錢鉛二十斤計所得不償所費上謂尚書夏原吉曰朕料鉛沙之烹所得無幾若米有銀利置冶烹煉豈待今日彼小民或竊取以求毫末之利無足怪朕已宥之不問其令有司悉填坑洞國家之利不藉此民亦免逐末之弊○辛丑陞岷州衛指揮使后能為陝西都司都指揮僉事掌岷州衛事○行在禮部尚書胡濙言昨太醫院奏尚衣監當用辟虫香請令本部遣人往福建等處支給官鈔收買樟腦甘松等藥二萬斤製用上曰此非急務止移文不必遣人且香藥安用許多可減其十之七○壬寅寧王權奏乞賜南昌府附近灌城一鄉田土俾衆子耕種為自給之計上諭行在戶部臣曰古人云王者當食租衣稅今有歲祿足天一鄉之田民所衣食奪以與王民將謂何且王

居國江西固當恤民豈可奪民以自養宜遣人往勘灌域一鄉果皆闕田否待報處置○陞南京翰林院檢討陳用為本院修撰行在工部也田清吏司郎中趙濟為順天府丞行在陝西道監察御史李素為福建按察司副使行在江西道監察御史劉英為廣東按察司副使行在福建道監察御史張康為陝西按察司僉事湖廣布政司左叅政黃澤為浙江布政司左布政使皆以九載考最也復孟驥貴州左布政使陞正二品祿享蕃湖廣德安府同知陞正四品祿皆以考績當陞民奏乞留故有是命改南京大理寺右少卿嚴升為都察院右僉都御史降山東布政司左叅議趙良為宜興縣知縣以監察御史言其不勝任也點河南道監察御史呂杲為順德府推官行在山西道監察御史張愷為肇慶府推官以都御史言其不諳刑名也○山西布

政司奏平陽府蒲解隰絳吉霍澤潞八州臨汾河津翼城曲沃  
太平萬泉岳陽鄉寧浮山絳襄陵趙城聞喜芮城石樓蒙河汾  
西猗氏蒲洪洞垣曲臨晉稷山大寧安邑平陸永扣靈石夏沁  
水陽城陵川黎城三十三縣自去年九月不雨至今年三月麥  
豆焦枯人民缺食雖令有司賑恤尚不聊生 上命行在戶部  
遣官按視蠲其租稅仍命二司如意撫恤凡他處有糧悉移賑  
之○上聞行在三法司所建繫囚罪狀諭之曰凡謀逆強盜人  
命妖言偽造印信強盜窩主造意分贓悉依律餘死罪杖一百  
發戍邊東邊衛工匠鐵鍊終身輸作徒流依年限輸作杖亦如  
例輸作苦罪官更罰俸糧一月軍民聽賄凡決遣六百餘人○  
癸卯乞賜塔河衛指揮同知脫因不花屯河衛舍人木老納等  
紗紵線襲衣綿布有差○復行在刑部右侍郎樊敬都察院右



副都御史胡翼官初敬等督兩廣糧餉赴交趾給軍器賦勢器  
振畏縮不進為都察院所劾下獄至是命宥其罪復其官○山  
山平陽府襄陵縣典史李志奏蒙布政司差運秋糧五千石輸  
雲川衛倉已納三千四百石餘一千六百石歲旱民貧無從做  
納乞賜除免從之○修南京聚寶門城垣○甲辰行在工部郎  
中李新自河南還言山西饑民流徙至南陽諸郡不下十萬餘  
口有司軍衛及巡檢司各遣人捕逐民愈窮困死亡者多乞遣  
官撫輯候其原籍豐收則令還鄉 上謂行在戶部尚書夏原  
吉等曰民饑流移豈其得已仁人君子所宜矜念昔富弼知青  
州存恤流民飲食居處醫藥皆為區畫山林河泊之利聽流民  
取之不禁所活至五十餘萬人今乃驅逐使之失所不仁甚矣  
其即遣官往同布政司及府縣官加意撫綏發廩給之隨所至

居住敢有捕逐者罪之○盧龍衛指揮使李端奏本衛官軍俸糧折鈔於京庫支給今衛所追獲馬價等鈔十五萬餘錠在庫乞令按月給與庶免遺官至京上從之諭行在戶部臣曰盧龍官軍正當守備關隘若令往來支俸則曠廢職守凡邊衛俸糧折鈔者悉準此例○乙巳命故都指揮僉事王福弟慶襲為金吾右衛指揮使羽林前衛指揮使揚貴子忠毛貴子俊羽林右衛指揮同知張榮子英府軍衛指揮僉事紀鐸子貴俱襲職燕山右衛指揮使王正金吾右衛指揮使楊璟濟川衛指揮同知劉勉指揮僉事孟真江淮衛指揮僉事張林羽林右衛指揮僉事舒敏俱陳老疾命正子亮璟子榮勉子斌真子斌林子勝敏子勝代之○大同總兵官武安侯鄭亨奏昨奉勅旨令臣酌量造代王宮室厨庫臣周視王府正殿門廊之外別有間屋尚

多足以備用請視舊稍加修葺庶省勞費從之○丁未賜雲南八百大甸軍民宣慰司等衙門宣慰使刀招散所遺頭目投弄等貴州今筑安撫司頭目徐貳等湖廣宙皮軍民安撫司故工官子田大重什用等鈔綵帶表裏有差仍給賜刀招散等十人紗羅錦綺○戊申交趾總兵官成山侯王道等還至京師文武羣臣劾奏道及都督馬瑛為事官陳智李安方政布政使弋謙等內官山壽馬騏等違命擅與賊和棄城旋師之罪 上命公侯伯行在五府六部都察院等衙門官同鞠之○己酉朝鮮國王李裨遣陪臣李種善等貢馬及方物○賜慶府等府差來奏事千戶湯盤等鈔○賜奉使迤北回還廣寧前屯等衙門官軍張成兒等一百二十七人金織素紵絲紵衣及絹布有差○晚刻歲星犯壘辟陣西方第六星歲星在上○庚戌湖廣施州衛前

懷德軍民宣慰司故土官孫向墨古送前鎮邊忠義安撫司故  
土官子惹添旺等貢馬奏請襲職○賜朝鮮國并八百車里貢  
便宴○賜中兵馬指揮何瑄并四川新繁縣學訓導趙鈔各  
一千二百錠二人俱因婚禮貢馬謝恩也○公侯伯五府六部  
都察院等衙門奏王通陳智馬瑛方政弋謙等上違朝命擅與  
賊和棄城來歸山壽庇護叛賊馬騏激變一方皆已伏罪寘寘  
重典命悉下錦衣衛獄法司又奏通等於律皆應籍沒其家從  
之○下鎮遠侯顏興祖行在錦衣衛獄初監察御史劾奏興祖  
貪財好色失地喪師等罪上命逮至法司同公侯伯等訊之  
興祖引伏命侯王道等還論其罪至是通還左都御史劉觀請  
併罪之遂下錦衣衛獄遣祥符王有燭還國先是召新安王  
有燾至言所送彰德書非出有燭乃已與汝南王為之於是遣

有增還遂召汝南王有敷赴京○夜有流星大如鷄彈色赤  
尾跡有光起瓢瓜西南行至心

以上三十四字係  
清華地書補

大明宣宗章皇帝實錄卷之四十二

大明宣宗章皇帝實錄卷之四十三

宣德三年五月壬子朔行在禮部右侍郎李琦工部右侍郎羅汝敬等使交趾還黎利遣頭目黎器何甫等隨琦等奉表謝恩且告陳氏孫嵩於今年正月初十日卒陳氏子孫並絕國人推利謹守其國以俟朝命○亦力把里使臣打刺罕馬黑麻等以馬來鬻有司定價中馬每匹鈔三千貫下馬每匹二千五百貫下下馬每匹二千貫騾駒一千貫請於陝西行都司官鈔內給與從之○甲寅湖廣前都路府故土官萬戶牟阿海子酋蠻前西泮軍民府等衙門故土官知府秦方子萬山前隆奉安撫司故土官同知向得顯子均昇前東流安撫司故土官安撫田可住子銘雲南劍川州故土官百夫長成子壽等貢馬及方物奏請襲職○命行在後軍都督府都督僉事沈清總兵民運糧往

宣府初命陽武侯薛祿等率兵護運宣府倉糧二萬石以給開平軍祿至宣府而糧不足事聞乃命清率京衛軍士及順天等府民丁共二萬餘人運京倉糧赴宣府以足開平之運清行

上諭之曰軍民輓運道路險艱總其事者當加意撫恤使人不知勞而事易集可也若橫加冒濫逼取財物人必懷怨己亦不

安爾宜自慎及禁戒下人俾知朕意○鎮守大同總兵官武安

侯鄭亨奏恭將都指揮曹儉率軍運糧赴開平而山西行都司

都指揮盛全張銑王能皆老病惟都指揮使羅文守護神機銃

砲文近以事連運當赴都都院祭今塞外烽火時作或有緊急無

人可任舊例凡訟連方面正佐官則先追餘人鞫問果有干涉

則速之乞如例暫文蒞事庶不妨邊務 上謂都察院臣曰邊

務為重且文事虛實未可知况又有舊例邪姑止勿違○夜有

流星大如雞擘色青白有光起亢西南行至濁○乙卯置雲南  
車里靖安宣慰使司鹽井巡檢司時宣慰使言其所轄境土數  
被逃軍逃民又境外夷人往來劫奪民不安業請於鹽井置巡  
檢司且請以通事王敬為巡檢悉從之○夜有流星大如盂色  
赤光燭地起大角西南行至濁○丙辰端午節賜文武羣臣扇  
及宴○巡撫蘇松等處大理寺卿胡榮奏浙江嘉湖抗三府人  
民蓄多稅糧浩大府縣有治農官理辦稅糧宜增布政司官一  
員以總之庶農務以時種稅不欠 上謂行在吏部臣曰稅糧  
自是常賦國初以來徵歛輸送已有定制朕方裁抑冗濫豈得  
復設古語省事不如省官所奏不允○丁巳賜朝鮮國陪臣李  
種善暹羅國使臣奈勾等四十五人朵顏等衛指揮僉事猛哥  
禿等并原差招撫指揮僉事黃照化等九十人鈔絲幣表裏紗



羅全織襲衣等物有差并賜奈勾等七人冠帶仍命奈勾肅勅  
及綵幣紗羅歸還羅國王及妃○行在工部奏直隸安慶府望  
江縣雷港驛為水所壞今移置於江口其材料工刀請令望江  
太湖宿松三縣措置從之○戊午勅總兵官陽武侯薛祿副總  
兵清平伯吳成待糧至開平上倉後仍令軍士於近城多採薪  
芻付城內官軍用軍還遇道路損壞量加修理○陞雲南大候  
長官司為大候州以上官刀奉罕為知州時刀奉罕奏大候蠻  
民復業者多歲納差發銀二百五十兩而濠甸鎮康二長官司  
民少歲納銀各百兩永樂中俱陞為州乞復二州之例 上諭  
行在吏部臣曰大候民多復業亦其長官善撫綏也宜增秩以  
旌之故有是命○行在禮部尚書胡濙奏秦王志潔進賀立  
中宮表文詞簡略怠慢不敬其長史等當罪之 上曰此誤表

者拙於詞也若青王官爲王豈自安其長史等俱宥之但移文令知免後來之失○己未勅召少師隆平侯張信戶部尚書郭敦還京○陞行在刑部主事黃察爲江西按察司僉事工部主事顏侃爲四川按察司僉事陽紹侯興爲湖廣按察司僉事俱以九載考最也行在禮科給事中井田爲行在大理寺左評事食祿不視事時田子源爲駙馬都尉故優侍之復沈友發山西襄垣縣丞陞正七品祿友發九年考最當陞以其民奏乞留之故有是命○南京刑部奏先奉勅書凡雜犯死罪及流徒杖笞俱令納米贖罪而軍卒工匠犯法者多遁逃負欠今後官吏請依例納米軍匠力能納者如官吏例若家遠不能者宜行原籍追納就彼官倉收貯若非存留操備上工者送回納米納畢就寧家 上曰初令納米贖罪本欲寬貸之可准所奏○廣中行

在刑部尚書金純有罪下錦衣衛頌繫之純初有疾 上命太醫院官視療稍間免朝參俾調理至是 上以天氣炎熱勅法司疏決滯囚純不加意而屢從朝貴宴飲為御史給事中所劾 上曰大臣固當如是耶遂有是命○辛酉 上親閱法司所上繫囚罪狀諭之曰強盜殺人及應死者皆如律其非真犯死罪者杖一百發戍邊流以下悉罰輸作律應贖者宥之凡工匠犯死罪者輸作終身流徒者論年限輸作凡決遣五百七人○行在兵部奏諸衛軍士多有逃亡所管官例應降罰兩蒙恩宥定限期使勾完造冊回報今天津等衛仍多不完其忠義等衛所報之數又與前不合皆當逮問 上曰凡所管軍逃在赦前者免其罪仍令勾完赦後逃者如例降罰○壬戌勅順聖川牧馬內官撒英奴選馬放水草便利之處牧放約束養馬官軍毋侵

占軍民田地及生事擾人違者治罪○癸亥置泰州全家竈港  
西煙墩初以瞭望海寇置墩於海濱四竈港口至是為潮水衝  
決移置之○甲子賜湖廣前都路府故土官萬戶子牟首蠻前  
懷德軍民宣慰司故土官孫尚墨古送前鎮遠忠義安撫司故  
土官子惹添旺前隆奉安撫司故土官同知向得顯子均昇前  
東流安撫司故土官安撫田可住子銘前西平軍民府故土官  
知府秦方子萬山雲南劔川州故土官百天長段成子章鈔有  
差○行在戶部奏大寧等衛倉糧被火焦灼者多應棄之 上  
曰朕嘗聞洪武中京倉火擇米之可饒者送光祿寺不可者  
與屯軍糞田其再遣人視驗果不堪用送上林苑監為種植用  
可者送光祿寺○乙丑置山西行都司玉林衛高山衛鎮虜衛  
雲川衛倉副使各一員攢典各一名○蠲保定府安州逃亡戶

糧芻時本州里長詣闕言州民逃者一千一十九戶官府令代輸逃戶挖糧三千七百餘石絹一百八十四匹草一萬一千四百餘束綿花一千一百餘斤追督急迫不勝艱苦上顏行在戶部臣款曰有司不能撫卹致民逃徙又虐民使代輸糧草等物民莫以堪速移文悉蠲之○丙寅雲南威遠州土官知州刀慶罕遣頭目招剛刀等中等來朝貢方物○命行在工部尚書李友直刑部左侍郎樊敬都察院右副都御史胡璜往四川吏部右侍郎黃宗載刑部右侍郎吳廷用往湖廣採宮殿材○湖廣寶慶府邵陽縣及武崗州長沙府湘鄉縣皆暴風雨七晝夜山水驟漲平地高六七尺淹沒廬舍田稼漂溺人民○丁卯陞福餘衛指揮僉事安出爲都指揮同知頭目古木乃牙都字齊弗列牙四人爲都指揮僉事各賜文綺襲衣以皆遣人朝貢也

南京留守左衛百戶郭玘等上剗鴻門外所植漆桐搜樹之數二百萬有奇。上諭之曰：祖宗以此資國用者，民力今繁盛如此，其謹培護。○公侯伯及五府六部都察院大理寺錦衣衛勅奏大傅黔國公沐晟與安伯徐亨、新寧伯譚忠比者交趾餘孽不靖，命晟等總兵同安遠侯柳升分道並進，共圍殄滅。皇上屢賜戒勅，伴之期會相為犄角，賊必成擒。晟等不遵。上命乃迨，迨畏縮，所至稽留。三月有餘，方臨賊境，竟與柳升等聲不相聞，以致賊得專力抗拒。工師及閩升被陷，晟等不奮勵前進，為交趾聲援，乃引兵退回。遂為賊所乘，殺傷官軍拋棄鎧仗，賊勢愈橫。城池失守，晟等背違君命，辱國喪師，必須明正其罪。用彰天討。上曰：沐晟置不問，都察院封章示之，亨忠姑俟其歸。○夜有流星大如盂，色赤光燭地，起危東北，行至雷電炸散。

○戊辰伊王顯煥奏今建父厲王享堂及修葺宮宇止有洛陽中護衛左右二所軍旗供役嘗奏暫免下也工完仍舊今都司慮虧屯種子粒坐取軍旗下屯乞仍留以畢工 上謂行在工部曰伊府軍士朕已免其下屯虧種子粒與虧宗親之恩孰重軍官不識大體將使朝廷失信於王其速移文止之○監察御史嚴暄方昂吳傑行在兵部郎中揚威刑部郎中胡珏主事鄭述朱勤戶部主事汪潤等有罪 上命枷項以徇暄等耽溺酒色曠廢職務又不朝恭事覺 上命三法司錦衣衛同鞠之皆引伏法司奏罪當杖降秩三等 上曰禮以待君子刑以治小人彼既放蕩無庶耻豈可復以禮待遂有是命○巡按山西監察御史沈福泰山西平陽府蒲解臨汾等州縣自去年九月至今年三月不雨二麥皆搗人民乏食盡室逃徙河南州縣就食者

十萬餘口宜令布政司按察司委官招撫復業 上謂尚書夏原吉曰山西旱饑如此既流河南招之豈能遽復昨有言者已令賑濟存恤宜再下所在有司如倉儲不足則勸諭富民分貸濟之母令失所俟秋成招撫復業○己巳命行在工部右侍郎羅汝敬鴻臚寺卿徐永達復齋勅往交趾諭黎利及耆老軍民勅曰朕體 天道以御邦順民心以興理薄海內外一視同仁間以交趾之人不忘陳氏請立其後用率一方朕志在恤民俯從所欲赦其既往之罪召還征討之師特詔頭目耆老具陳氏子孫之實來聞用憑建立今黎利等奏陳氏之孫名嵩者正月病死並無子孫數月之間言詞頓異夫陳氏世得國人必其後嗣尚衆昔王師初平交趾詔求陳氏子孫立之國人咸謂爲黎李孽屠滅已盡是以郡縣其地然今二十餘年尚有如嵩者在



何至爲死頓云盡無此必頭目耆老未及徧訪其有存者不敢  
自言爲臣子之道宜盡誠心毫末未盡不可謂忠勅至爾頭目  
耆老軍民宜悉心咨訪陳氏子孫奏來用頌繼絕之命以寧一  
方以副朕體 天愛人之心既敦曠蕩之德遠邇之人均宜蒙  
福其交趾所留朝廷官吏軍技人等及其家口遠皆遣歸以慰  
其父母妻子之望所留軍器亦悉送納庶幾求福之道朕以至  
誠待人母或蓄疑自詔伊戚賜汝敬等鈔爲道里費併賜交趾  
遺來頭目黎器等鈔及文綺襲衣命與汝敬等同行○直隸廣  
平府成安永年二縣河間府吳橋縣大名府滑縣山西平陽府  
吉州各奏民人乏食已借官倉穀麥給之俟秋成償官○庚午  
總兵官都督蕭授及貴州都司布政司按察司巡按監察御史  
奏昨奉勅招撫蠻寇今西堡長官司蠻人阿骨阿哈平越衛谷

旺苗人甲農甲恕清平長官司平若等寨蠻人阿夜底寨長官司蠻人干炒普安州火頭魯革四川筠連縣蠻賊爲亂者俱嚮化惟都勻衛豐寧等長官司賊首羅文蕩貴州宣慰司谷把寨苗人革子裸仍逃竄深險上遣勅諭曰蠻人已附宜善撫之未附者再遣人諭以禍福蠻性雖悍亦必惡死好生不敢終不服也○設江西高安縣陰崗巡檢司先是高安縣奏陰崗山深路僻盜賊出沒去縣遙遠辛難制馭請立巡檢司鎮之事下江西三司覆勘至是奏以爲宜故設焉○湖廣永寧衛奏大水壞城四 百丈 上命俟農務畢修理○辛未福建建寧府儒學教授彭昂言堯舜禹湯文武周公之道非孔子無以傳所謂集群聖之大成濂洛關蜀之學非朱子無以明所謂集群賢之大成孔子刪述六經垂憲萬世實後學之所法朱子註釋六經折衷

群言乃後學之所宗。天主聖賢扶植綱常，傳續斯道，莫有盛於孔子。朱子者也。洪惟我朝繼天立極，聖聖相承，崇尚儒道。內自太學外，及府州縣學，咸立廟祀先聖先賢。又於先聖孔子闕里立廟，皆以春秋致祭。設教授以訓其子孫，建公爵以貴其嫡嗣。尊崇之典，無以復加。聖恩廣大，萬方共戴。且如唐張九齡、宋余靖輩，有功德於當時者，至今尚蒙朝廷於其故址立祠，祭以特牲，著之祀典。切見先賢朱子雖列從祀，而建寧府故宅舊有祠堂，未蒙春秋特祭。今已頽壞，子孫身服徭役，致令廢學。少齒士派乞勅大臣定議，葺其祠廟，以時致祭。教其子孫，稍蠲徭役，俾天下後世咸稱我朝崇報之盛典，而垂光於無窮不勝幸甚。上奉行在禮部議之。○四川雜谷安撫司土官阿漂等來朝貢，又馬謝襲職。恩○交趾鎮夷衛等衙門土官指彈同知武孝

先等九十五人奏頌在京居住 上命行在禮部循迤北來降人例賜金織蓑衣綠帶銀鈔絹布綿花鞍馬等物仍命所司給房屋器皿等物如例○贈交趾死節遼東都司都指揮同知李任爲都督同知燕山前衛指揮使顧福昌江衛指揮使劉順廣西桂林中衛指揮使徐騏爲都指揮同知交趾前衛指揮僉事周安爲指揮同知南寧衛正千戶蔡顯爲指揮僉事燕山左衛副千戶桂勝爲正千戶諒江府知府劉子輔諒山府知府易先爲布政司叅政政平州知州何忠爲府同知內官馮智爲內官監太監俱賜誥命遣人致祭給米布且召任等子孫承襲子輔先忠皆復其家先是交趾布政使弋謙以任等死節事聞 上惻然曰大丈夫爲國當殺身成仁舍主取義任等可謂無愧矣至是有褒贈之命惟指揮陳麟亦設賊自刎而死有司言其

嘗同朱廣開門納賊雖死不足掩過故思不及李任金華永康人洪武中襲父爵為燕山右衛指揮僉事從太宗皇帝起兵靖難以功累陞遼東都司都指揮同知鎮守彰德宣德元年從征叛賊黎利守昌江賊既獲都督蔡福逼令福至昌江城下呼任等運降任於城上唾罵福曰汝為大臣不能殺賊反為賊用狗彘不若用銃擊之賊懼擁福去賊以昌江為官軍出入咽喉之地大集兵象用烏龜芭呂公車雲梯來攻任與顧福等留老幼婦女守城率精銳出擊賊燒其攻具賊又築壘射城中任福夜出襲破賊營賊掘地洞欲潛入城任開溝溝用礮軍石擊之入者輒死城中士卒初有二千餘人前後三十餘戰至是死亡過半賊益兵象攻圍日急相拒凡九閱月人力疲困芻糧匱乏而賊益衆以雲梯登城奪其門任復率死士三戰三敗之賊擁

象益兵而入任與福不能支皆自刎死內官馮智指揮劉順知府劉子輔俱自縊死城中軍民婦女不受屈辱自死者數千人劉子輔廬陵人自太學生擢監察御史持身謹行儉約如布衣時而用法公平嘗按臨浙江者三年不見聲色而浙江之人善者愛之橫者畏之憲使周新持風裁不苟許與獨稱子輔為賢御史陞廣東憲使坐累左遷交趾諒江府知府撫卹其民如子民愛戴之黎利攻圍諒江城時寇勢猖獗他郡縣城多已陷子輔與守將倡兵民効死守寇增衆攻城城中食且盡而人心益固相拒九閱月寇攻甚力遂破城城中兵民盡闕以死無一人降者子輔知事不支曰郡亡吾亡義不可汙賊手即自經死一子一妾皆先子輔死何忠字廷臣江陵人舉進士為監察御史有能名永樂中以言事陞政平州知州忠聰敏有政事才居官廉

慎不妄交。慮爲御史持正論，莫敢干以私。當言事時，忠以疾家居。衆御史以所言事示之，忠爲增損，皆切於事情。烏州民心翕然安其政。雖深谷蠻酋，素頑犢者，亦樂於趨事。後以計事，至布政司寧橋，之敗賊，乘勝進逼城下，人心惶懼。成山侯王通、詭謀與賊和，爲書遣山壽家人道賊謂朝廷宥其罪，賊果信，引兵退。先是，密遣人奏事，俱被賊遮留。至是，賊以朝廷宥罪，遣頭目陳渭老等奉表謝恩，通遂遣忠及千戶桂勝，託以奏還。地方與渭老同入朝。寶欽上達賊情，諸益兵征勦。至昌江內，使徐訓泄其謀。忠等遂被拘留。賊素聞忠剛介，有學識，數以甘言美職誘令從。已，忠不聽。後以刀鋸臨忠，曰：「從則生，不從則死。」忠瞋目視賊，大罵曰：「我天朝臣子，恨不斬汝，以歸報朝廷。肯從汝反求活也。」罵不絕口。又以刀逼勝，勝亦不屈。忠父子及勝同日俱遇害。忠

初被拘即賦詩以死自誓徐麒與千戶蔡顯守丘溫賊攻圍已久城中糧盡官軍多棄城奔道麒等猶率罷卒固守賊急攻城陷城中人無一降者賊屠城麒顯皆自縊死易先湘陰人初以園子生授諒山府知府在郡有善政蠻人信服任滿還朝郡民相率詣巡按御史保留御史以聞特命復其職而進至正三品祿還諒山至是陷城自縊死周安由振武衛指揮僉事從征黎賊改任交趾前衛指揮僉事守備乂安列寇黎利勢猖獗都督蔡福召諸將議曰今在此等糧實艱不可據守收拾回東關眾皆諾千戶包宣獨領兵百餘人徑奔賊營安率眾與滿州衛軍民還東關行至富良江遇賊寡弱不敵為賊所拘福被賊逼令往各處誘守將出降安憤悅與眾謀曰官軍必未討賊各潛購竹鎗斫刀伺官軍至為內應破賊必矣宣覺其謀以告利利



怒盡殺之利將殺安安曰吾天朝臣豈死賊手與指彈陳麟香  
躍而起奪賊刀殺數人乃昏自刎○直隸揚州府通泰高郵等  
州及鳳陽府壽州霍丘縣江西九江府德化瑞昌二縣各奏人  
民缺食已借官倉米賑濟俟秋成運官悉以其數上○壬申賜  
廣昌悼平王之子名曰美堅○直隸真定府趙定冀三州真定  
平山獲鹿井陘阜平樂城藁城靈壽無極元氏曲陽行唐新河  
隆平高邑贊皇臨城新樂一十八縣及順德府平鄉內丘唐山  
沙河鉅鹿五縣廣平府肥鄉邯鄲永平三縣各奏自去年十月  
至今年夏不雨麥苗枯死無收今徵夏稅艱於辦納 上謂行  
在戶部臣曰旱無麥而欲徵稅民何從出今郡縣言者甚衆其  
悉免徵且思所以寬貸之母令失所○癸酉四川岳希蓬等長  
官司長官血只湖廣散毛宣撫司前判別長官司故土官田大

旺送子興靜州長官司土故長官崖濟子原保隴木頭長官司  
土官長官原保子血保雲南之雲南驛故土官驛丞素思聰妻  
李氏等來朝貢馬○行在禮部尚書胡濙奏近金吾左衛指揮  
使潘諒等三十三人病故例應賜祭 上曰此皆事 先朝嘗  
從征討者生能效勞死當祔恤賜祭如例若有當褒贈者亦須  
舉行○甲戌汝南王有勲新安王有素有罪俱免為庶人先是  
掌彰德衛事都指揮王友奏比於彰德城外得一矢上繫書發  
視之乃祥符王與趙王通謀為逆者謹以上聞 上覽之書辭  
悖逆皆忿怒朝廷指斥乘輿且約連兵犯闕以復高煦之讎書  
內外皆有祥符王印識 上曰此姦人造詐欲禍趙叔及祥符耳  
豈王友所自造乎蓋友前為趙王奏其暴慢無禮故 上疑之  
即追友及捕其左右所親信皆至鞠之且遣書周王有燬告之

故并錄書示之曰此必祥符王恣家所爲但祥符一來面詢之恣家即得吳叔亦宜遣人密察如得實即馳報於是遣勅召祥符王有燭王友先至鞠訊無所得及祥符王既至以書示之祥符王言此非外人臣愚不能事弟新安王彼素惡臣或其下人爲此然不敢必上遣書與周王言前事祥符王疑新安王所爲須令新安來京回質之事可明并勅召新安王有燾有燾未至周王遣人馳奏言密訪得新安王曾遣人往彰德至彼速還考其日月與書合上曰是矣命中官以錦衣衛官校馳詣河南潛執所遣者又得新安王所使造僞書僞印之人皆執之至京鞠之皆引伏并追得新安所賞白金瓊寶綵帶等物新安王至言此謀實汝南王有勲主之非獨臣也遂厚賚祥符王命中官送歸河南且遣書諭周王言誣祥符之事新安王及所使造僞

書偽印送書之人皆已承報但新安執言與汝南王同爲此謀更宜遣汝南王來面與辨明遂勅召汝南王有勲有勲至命京師親王及皇親文武大臣詢之且出書及造偽之人與賞物示汝南新安兩人皆嘿無言有頃新安王言皆出汝南王計策汝南王亦言作偽書偽印皆在新安府中何謂獨我有勲遂發有勲謀害周王有燬數十事有勲亦發有勲殺人而食之事其作偽書偽印之人又言書詞印文皆汝南殿下所教而威逼我等爲之則新安殿下所與賞物皆出兩殿下又言汝南殿下曾好言諭我此事成即再有大用汝者汝功不小矣我初皆不敢從新安殿下怒我顏我言不從即日下斬汝頭不得出此門矣今日致我等殺身者兩殿下也尚何言有勲有勲皆面如死灰閉目俛首汗流浹體群臣問汝南新安復有何言兩人共對不肯

簿祐罪應萬萬死何言惟 陛下矜憐於是還奏兩人皆已承  
服無異詞 上曰於法何如對曰律凡投隱匿姓名文書告言  
人罪者絞又誣告親重者加所誣三等今有勲有素所詐爲  
祥符王與趙王通謀書干係反逆大罪兩人於律應死無疑  
上遣書并有勲等所造祥符王偽書及造謀本未悉錄示趙王高  
燧書曰人之至親莫切於父子兄弟前年岷世子徽坡不友其  
弟鎮南王欲濟之死地不告其父私與火者二三人謀中夜逃  
出赴京誣告鎮南王謗毀 皇祖 皇考呪詛朝廷陰養軍師  
募兵謀反等事又誣其父愛妾姦事穢惡不可聞後召鎮南王  
至京面對並無分毫實跡悉是虛誕之言汝南王有勲新安王  
有素皆素惡祥符王近有勲有素合謀僞刻祥符王圖書及作  
祥符王與叔書一道騰謗毀之詞寓不測之意置彰德城外道

傳其意欲嫁禍叔父及祥符王都指揮王友得書以聞初疑友爲此以離間至親執友及其左右至京詰問皆無實跡乃召祥符王至以書示之祥符即言此必出有燾具言有燾平日所爲兇悖虛妄謗毀同氣數事遂捕得有燾所令僞造圖書及寫書送書之人皆吐實無隱乃召有燾面質之詭謀實跡彰彰明白有燾即引有勳實與同謀蓋計慮委曲多出有勳召有勳至不能隱即皆承伏因并發露其兩人平日姦謀欲害周王而奪其位具有徵驗觀徽坡有勳有燾三人包藏禍心上欺天地鬼神所爲不孝不忠不仁不弟稍有一毫人心者肯爲此哉同氣相殘人倫之變言之可愧亦可痛傷其徽坡前已遣歸其父令自治之有勳有燾今遵祖訓俱降爲庶人取其家屬皆至同居北京庶其省躬悔過予即位以來恭體宗祖之心恒務睦親

而徵煖有勲有素實自作尊慮叔未知其由特用奉告惟叔與予心腹相照明於皎日豈彼姦克小人之所能間觀之不必介意也并以書徧告諸王遂免有勲有素爲庶人處之北京遣中官齎書諭周王有燉悉送其妻子家人赴北京同處勅法司以所造僞書僞印及送書彰德與凡同謀之人戮於市家屬給功臣之家預聞其謀不首者從違有勲者周定王第二子有素第五子有勲志慮不減自少與高煦善建文中有勲嘗告其父定王不軌父被割奪囚繫至太宗皇帝臨御其父始釋復爵遂奉乞誅有勲太宗委曲解之遣有勲居雲南大理以釋其父憾後以定王老始命歸河南有勲同世子有燉嫡出有燉無子有勲庶長子于堽生數月定王命爲有燉後有燉甚愛之年幾壯矣定王薨世子嗣封時多病有勲意嗣王有不幸而無子即

己當嗣遂百計欲奪子瑾歸不得則形之忿詈嗣王不獲己竟  
遣子瑾歸有勲所有勲仍日夜謀害嗣王不已至是命子瑾皆  
免爲庶人有素天性狠毒常手刃殺人爲橫恣諸兄莫敢片  
語正之獨有勲好爲邪謀則與之合有素嗜生食人腦及肝膽  
常以薄暮伺有過其門者誘入殺而食之以是其府第前日未  
曉即斷行跡及是削奪居京師汴人稱快云○鎮守廣西總兵  
官都督山雲奏交趾黎利以兵迫脇廣源州土官知州閉色新  
從己色新父子不從分守山寨潛遣人來言緩急乞以兵援  
上降勅報雲曰閉色新嚮慕朝廷忠義可嘉然朕不欲以土地  
之故至於殺人卿宜審勢度力可援則援不可則已若其父子  
果歸即收入內地加意撫綏勿令失所○順天府霸州保定縣  
老人奏民死徙者一百餘戶其宣德二年該納夏稅小麥七十



三石八升秋糧米一百七十六石草二千九百五束并丁口鹽鈔等項無從徵納乞爲除豁從之○乙亥命故河南都司都指揮僉事趙原弟銘襲爲羽林前衛指揮同知羽林前衛指揮同知韋福子興指揮僉事李齡兄義俱襲職以府軍右衛指揮使馬俊合吾左衛指揮同知張英府軍後衛指揮同知馬隆旗手衛指揮僉事或得老疾命俊子忠英子正隆子旺得姪敏代○以陝西都司都指揮使張麟老疾命致仕以其子泰爲寧夏左屯衛指揮使領馬操練仍命麟往訓督之 上因謂侍臣曰古謂將門出將蓋子孫親見祖父所爲自然諳練麟雖老素有材識使泰能似之固於國有用於家亦可長保富貴○賜交趾新安府所屬來朝土官主簿鄭吳等并土僧智深等二十人銀鈔綵幣表裏紵絲衣服布絹等物有差○掌行在後軍都督府成

國公未勇奏本府治歲久朽腐請用軍修治從之○丙子以訓導李鳴鶴爲駙馬井源家學錄 上命行在吏部臣曰駙馬不務詩書通古今脫忠孝仁義之道必至怠惰驕縱何以保富貴須使之親近儒主 先朝駙馬家有學錄今可擇端重儒者一人與井源至是吏部言鳴鶴可用遂命之○廣東布政司左叅議李守中以疾乞致仕守中湖廣寧鄉縣人由戶部員外郎陞叅議遣從鎮遠侯叅贊軍務至是引疾懇辭遂命致仕○丁丑賜皇姑咸寧長公主銀五百兩鈔一萬貫文綺綵幣一十五疋上御左順門諭行在兵部尚書張本曰昨日有總小旗子孫併鎗不勝者十餘人奏乞再併狀已許之蓋此皆有志之人能念祖父辛苦得之故雖小名分亦思繼承不墜今有祖若父爲大官而子孫安於養不習武藝臨事失措墮廢前人之功豈不

爲此人所笑爾宜諭勉之○旌表節婦孫氏等十三人孫氏淮安山陽縣民韓寧妻夫亡年二十五遺腹生一子辛勤育孤養姑盡孝誓不再適吳氏蘇州吳縣民戴勝保妻早喪夫家貧子幼勤儉紡績以奉舅姑誓不更嫁邵氏淮安山陽縣民梁貴妻孫氏儀真衛軍張彥銘妻鄭氏徽州婺源縣民方剛妻俱夫亡年少撫孤子躬勤紡績以養舅姑守節至老張氏儀真衛總旗王子忠妻夫亡一子纔三月守節不嫁陳氏安慶懷寧縣民許福受妻蚤喪夫無子誓不他適取族子爲嗣撫育成立程氏亦懷寧縣人父益爲歸善縣丞以嫁惠州百戶之子揚宗禮夫亡一子亦卒程年二十三誓不更嫁孝養舅姑舅姑亦沒喪葬畢以母老弟幼而家甚貧乃歸與弟同居以奉母年逾七十揚氏神策衛軍劉受妻徐氏應天府六合縣民鄭盟妻謝氏順天府

大興縣民王受二妻尹氏撫州樂安縣民傅良王妻張氏武昌  
江夏縣民陳得顯妻俱年少喪夫誓不再嫁撫育孤子家貧躬  
女事奉舅姑志操潔白事聞俱旌其門曰貞節○戊寅設湖廣  
劔南長官司以牟苗蠻為長官譚鎮蠻牟蠻政為副長官隸忠  
路安撫司徭把峒長官司以向墨古送為長官冉豪虎向星祖  
為副長官在上愛茶峒長官司以向惡送為長官汪得良為副  
長官在下愛茶峒長官司以譚成或送為長官向貊送為副長  
官鎮邊蠻夷官司以譚惹添旺為長官向仁送為副長官隆奉  
蠻夷官司以田友最為長官向平均冉桂真為副長官皆隸東  
鄉五路安撫司東流蠻夷官司以田銘為長官黃帝譚實為副  
長官臘壁峒蠻夷官司以田典為長官劉斌為副長官皆隸散  
毛宣撫司西泮蠻夷官司以秦萬山為長官黃成珊向政旭譚

忠信為副長官隸金峒宣撫司先是施州衛忠路安撫司等衙

門各奏前元故土官子孫年齒蠻等各擁蠻民久據溪峒今就

招撫請開設衙門授以職事行在兵部以聞 上曰馭蠻夷固

當順其情所設衙門亦宜有等級其議以聞於是兵部請以四

百戶以上者設長官司四百戶以下者設蠻夷官司元故土官

子孫量授以職從所招衙門管屬 上從之故有是命○賜雲

南威遠州知州刀慶罕所遺頭目招剛刀著中等鈔帶有差就

令齎勅及金織紵絲紗羅賜刀慶罕仍給信符勘合底簿○己

卯禮官營中雷之神○庚辰上出酒諭示百官時即官御史以

酣酒相繼敗或請遂禁酒 上不從故作酒諭其文曰天生穀

麥黍稷所以養人人以趨藥投之為酒周官有酒正以式法授

酒材辨五齊之名三酒之物以供國用書拒魯二直曰明禮詩

既載清醑饗我思成以享祀神明也厥父母慶洗腆致用酒以  
事親也豈樂飲酒以燕臣下也酒醴雖醕酌以大斗醴酒有衍  
邇且有踐燕父兄及朋友故舊也皆用之大者酒曷可廢手而  
後世耽嗜於酒大者亡國喪身小者敗德廢事酒其可有乎自  
大禹疏儀狄戒甘酒成湯至帝乙罔敢崇飲文王武王戒臣下曰  
無彝酒曰德將無醉曰剛制于酒孔子言不為酒困又禮有一  
獻百拜然則酒曷為不可有哉夫非酒無以成禮非酒無以合  
、惟謹聖人之戒而禮之率焉庶乎其可也○辛巳賜四川雜  
谷安撫司土官阿漂岳希蓬等長官司長官血只等靜州長官  
司土官長官崖濟子原保等隴木頭長官司土官長官原保子  
血保等雲南之雲南驛故土官驛丞袁思聰妻李氏等湖廣前  
判別長官司司故土官長官田大旺送子興等鈔有差○祭福朱

廣薛聚于瓚魯貴李忠伏誅福為都督廣聚瓚皆都指揮貴為  
指揮忠千戶福等初在交趾鎮守乂安為賊所圍福不與戰而  
率廣等降賊且教賊造攻具以攻東關時有官軍九千餘人欲  
焚賊營福等令百戶牟英告賊賊盡殺九千餘人遂攻昌江等  
城而福歷說各城之人出降嘗至清化馳馬城下大呼曰守城  
者見幾則可保生不然肝腦塗地為知州羅通等大罵而去至  
是利送福等歸京師命公侯伯五府六部都察院及京衛官三  
四鞠之皆伏罪覆奏命悉棄市而籍其家

大明宣宗憲天崇道英明神聖欽明文昭武寬仁純孝章皇帝  
實錄卷之四十三

明宣宗章皇帝實錄卷之四十三終

大明宣宗章皇帝實錄卷之四十四

宣德三年六月壬午朔○甲申命定國公徐景昌行在鴻臚寺  
左少卿劉順爲正副使持節冊涿州衛百戶韓福女爲陵川王  
妃南城女馬副指揮王克智女爲平遙王妃○命瀋簡王第二  
女渾源郡主配涿州倉副使張喚子儒第三女翼城郡主配本  
府典膳所典膳副袁廣子通第五女河津郡主配本府儀衛司  
典仗田春子傑唐定王長女魯山郡主配開平衛指揮同知郭  
崇年岩第二女河內郡主配南陽衛士張旺子弦命儒等皆爲  
儀賓賜之誥命○行在工部奏北京渾河水溢衝決蘆溝河堤  
百餘丈今水勢日增傷民田稼請令北京行部行都督府役軍  
民兼修 上曰此不可緩令晝夜併力用工○乙酉梁王膳垣  
妃紀氏薨遣使賜祭命有司治喪葬○夜有流星大如盃色赤



光燭地起羽林軍南行至近濁炸散○丙戌四川播州宣慰使  
楊昇遣年欽壘溪等長官司土官長官郁書華鬱即長官司土  
官長官翁布來朝貢馬○陝西布政司奏西安府同州耀州蒲  
城郃陽韓城澄城白水高陵涇陽縣延安府鄜州中部甘泉宜  
川宜君膚施洛川保安縣鞏昌府秦州自正月至五月不雨且  
麥旱傷命行在戶部勅實除稅○戊子四川長河西魚通寧遠  
軍民宣慰司刺底冷真星吉印都長官等司土官長官阿喬遣  
把事李侍喬前中里縣土官知縣古做遣把事張阿直貢馬及  
方物湖廣施南宣撫司等衙門故土官副使譚攀安子錄无馬  
攔安撫司故土官安撫向必子英尖嶺長官司故土官副使黃  
黑用子巴備等貢馬奏乞襲職○命掌陝西行都司事右軍都  
督府都督僉事劉廣佩平羌將軍印克總兵官鎮守甘肅○命

守涼州陝西行都司都指揮使吳昇歸掌行都司事○庚寅給  
遼府興山松滋二王<sub>王</sub>歲祿各二千石江陵郡主及儀賓趙慶歲  
祿共八百石皆米畝中半無支○上諭行在工部臣曰綠河  
堤岸每歲多是預防今平雨多潦水泛溢必傷曰木宜遣官督  
軍衛有司巡視稍有潰決即用修築其他卑薄之處亦令增高  
培厚庶不爲患○辛卯代世孫仕堙嫡母胡氏卒遣使賜祭命  
有司營葬○遼王貴烺奏舉前荊州府學教授陳紹先端重有  
學乞除本府祀善永興王志璞奏舉隴西縣學教諭馮益通經  
乞除教授上諭行在吏部臣曰王欲親近儒者講論經史以  
資輔導此意良嘉其從之吏部言選才授官出自朝廷王豈可  
自擇上曰朕推誠以待宗室不必校此○廣靈王遜焮奏舍  
官王本庫官白順中輕慢無禮嘗口發穢言詈及祖宗上

致書王曰晉及 祖宗罪當死已執法司會治果實必殺不赦  
祇慮下人交構託此告訐則或有未明蓋政若府中其無理毀  
晉必非親聞凡有聞者見者及來啟者望皆發來證驗明白則  
彼死不寬矣○ 上諭行在工部尚書吳中曰今天氣炎熱工  
作未休軍民勞苦其必不可已者略加繕完也不急之役皆罷  
之○ 總兵官平江伯陳瑄奏初選武職能幹者運糧近都司衛  
所別以小弱老病者代之又截限正月起運今有稽遲至三四  
月未至者操船軍有故亦不撥補乞令各都司衛所皆委能幹  
官造冊記名專令督運不許別差操船軍缺即為撥補庶免漕  
運稽遲 上諭行在戶部臣曰北京仰給漕運用非其人則事  
隳矣今後敢有不差原委官及軍缺不補都司衛所正官首領  
官俱罰俸半年仍勅瑄漕運或別有長策足使公私兩利者計

謀以聞○巡按監察御史王豫奏密雲中衛所屬斤連口及石塘嶺口關垣十一處皆邊防切要之地因山水衝決守備軍少請令附近軍衛有司修築仍令鎮守都督陳景先等督工從之

○順天府武清固安二縣言霖雨連旬洪水衝決河西務及當渠里秦家口堤岸傷民田禾 上命二縣民及屯軍合力亟修

○夜有流星大如雞彈色赤有光出吳仲南行入天桴○癸巳上諭行在戶部臣曰霖雨久不止水潦泛溢今城中薪芻湧貴凡有運載入城者悉免抽分違者罪之○甲午以保兼行在工部尚書吳中下獄先是中私以官木磚瓦遺太監楊慶作私第甚弘壯 上登皇城樓遙望見之問左右得其實遂下中獄

○山西布政司奏太原府石平定忻保德代苛嵐六州交城祈文水清源掣榔樂平太谷臨嵐徐溝太原榆次興陽曲壽陽定

襄靜樂孟崑五臺河曲繁峙二十二縣大同府朔州馬邑懷仁  
山陰三縣澤州高平縣潞州潞城屯留壺關長子襄垣五縣遼  
州并和順榆社二縣沁州并武鄉縣沁州并孝義平遙介休三  
縣春夏不兩麥穀早死人民乏食 上謂行在戶部臣曰今諸  
郡縣告饑者衆朕朝夕拳拳卿等亦當與朕同慮即遣官馳往  
發粟勸分以濟之凡有可以救荒之術熟議以聞○丁酉賜四  
川壘溪長官司土官長官都書華等辭即長官司土官長官翁  
布長河西魚通寧遠等處軍民宣慰司判取冷真呈吉等叩部  
長官司祀事李侍喬等前中里縣祀事張阿直等播州宣慰使  
楊昇第欽等湖廣施南宣撫司故土官舍人譚銘等元馬攔安  
撫司故土官舍人向英等尖嶺長官司故土官舍人黃巴備等  
鈔錄幣表裏有差○行在禮部奏比者天下僧道行童至京詣

給度祿動以千計而神樂觀太和山五臺山爲多 上曰祖宗之制度僧道有定額今神樂觀太和山五臺山或不及額數宜當其不違例者給之餘皆勿給○南京大報恩寺成命應天府常以民夫五十人及留工匠五十人備洒掃修理○下內官裴宗漢行在錦衣衛獄初宗漢管木廠坐盜市官木又賄太監楊慶求免罪事覺付法司治奏宗漢盜官物應斬 上命付錦衣衛獄抵繫之○霖兩通州河溢水及城趾深一丈餘城壞者一百三十餘丈○己亥 上諭都御史劉觀等曰北京各廠庫局所貯木石甃瓦等料皆勞苦軍民以積於此而工部及主守之人略不念其所自視同己物私以與人不可勝計比來事覺已真諸法爾即揭榜曉諭各廠庫局所蓄之物皆其實數收支務令明白不許纖毫侵欺如仍舊弊不悛者犯人處死全家發戍

口外○復行在工部尚書吳中官而罷其少保之職中生私取  
官本等物以道太監楊慶錦衣衛指揮王裕知而不奏事覺命  
法司及羣臣鞠問有驗法司論中監守盜官物結文內官當斬  
裕不奏當連坐 上曰中 皇祖舊臣姑宥之但罷其少保職  
仍罰尚書俸一年下裕於獄已而有之○貴州都指揮同知焦  
得等奏前奉勅以廣西遣回官軍六千五百人仍赴都督山雲  
處操備今貴州都司兵已調二千征松潘其萬五千從都督蕭  
授調用今都司守禦兵火已以山雲操備者還貴州 上勅得  
等曰廣西方用兵今命都督蕭授還兵五千松潘還二千足以  
備禦前奏蠻民作梗者已撫定六處惟二處未靖可再遣人招  
撫毋輕動兵以傷良善○夜有流星大如盃色青白有光起即  
位西北行至濁○庚子貴州安順州土官同知阿寵遣把事阿

關鎮寧州遣把事阿宗西堡長官司故土官長官溫林子阿健  
遣把事阿者十二營長官司副長官蕭賢遣把事揚保寧谷寨  
長官司長官阿艾遣通事李得慕役長官司土官長官李福海  
遣寨長楊得頂營長官司副長官程受遣把事趙陸康佐長官  
司副長官余鑑遣把事的比福餘衛指揮同知把克遣千戶那  
該等貢馬及方物○修懷來岔道新店等處橋梁二十一所○  
辛丑造平陽王府與仗所印○遣使召山東布政司左叅政段  
氏四川布政司右叅政李衡江西布政司右叅議劉中敷福建  
按察使邵玘山西按察使鄭辰浙江按察司副使魏源四川按  
察司僉事柴震河南按察司僉事傅啓讓時上以侍郎副都  
御史大理卿佐多缺命廷臣察舉堪任者以聞少師吏部尚書  
蹇義等以氏等名聞遂召之○遣內官洪仔生徐亮等齎勅往



孟璉及八百大甸木邦等處賂土官刀懷罕等金織文綺綵緙  
有差時刀懷罕等各遣人來朝貢象馬方物改答之○置隆慶  
州捧撻峪山巡檢司初巡檢司置於長安嶺巡按監察御史邵  
宗言長安嶺有官軍守禦其西北六十里東南四十里又有難  
鳴山土墓二巡檢司而口外軍民往往從捧撻峪逃逸乞移置  
於彼從之○宥副象衛指揮僉事張玘等罪俾隨都督山雲討  
寇先是雲奏蠻寇掠橫州玘及千戶徐禮百戶周俊願兵哨守  
畏縮不進致民被害 上命雲嚴治之玘等皆坐失誤軍機當  
斬械至行在兵部尚書張本以聞 上曰用功不若用過始宥  
之俾隨雲討寇自效如有功復職無功仍生前罪○行在戶部  
尚書夏原吉奏主事孫冕自浙江還言蘇松嘉湖抗諸郡今夏  
苦兩江水泛溢田稼多淹沒 上命即遣人往與大理卿胡榮

周視水災之虞以聞又謂原吉曰水旱爲災所係甚大卿有所聞當悉爲朕言之○夜有流星大如盃色赤有光出五車西北行東蕃西行入文昌又有流星大如盃色赤有光出五車西北行至雲中○壬寅增置富峪等衛經歷內外衛所倉皆置副使初各倉俱以鎮撫監臨收支至是尚書夏原吉極陳武官監臨收支之弊上曰武人不習書算不曉文移不能閱防故多欺弊自今止令衛所首領官同倉官收支在京軍衛事繁者宜添設經歷一員內外衛所倉儲糧多者添設倉副使 員於是京富峪衛寬河衛神武前衛神武後衛武成左衛武成前衛武成中衛武城後衛義勇中衛義勇後衛忠義左衛忠義右衛忠義前衛忠義後衛蔚州衛會州衛大寧中衛大寧前衛金吾左衛金吾右衛羽林前衛燕山左衛燕山右衛大興左衛濟州衛永

清左衛永清右衛通州衛經歷司增置經歷各一員其餘內外衛所皆置舍副使一員南京戶部奏浙江河南及直隸寧國等府歲辦桑穰累年不足乞令巡按御史督之 上謂尚書夏原吉曰賦稅徭役皆民所供豈但辦桑穰一物今歲雨水為災若令御史追問則擾動郡縣姑緩之其年久不完者免之○癸卯行在都察院左都御史劉觀奏今欽法阻滯兵馬司及里老旗甲俱不戒諭軍民比其有犯又不舉覺當嚴禁治自今有阻滯者許諸人首發犯人枷令一月其不用欽一貫罰納千貫親隣里老旗甲知情不首依犯者一貫罰百貫能首發者免之其闌閉舖店潛自貿易及擡高物價之人亦令枷一月罰欽萬貫親隣里老旗甲知而不首者罰千貫若強買人物者量其物價每一貫罰千貫里老旗甲不嚴戒約仍前懈怠者俱治以罪 上

曰罰銀不過欲致通耳。抑令一月太嚴，但揭報示之，使知所做。○清理軍政監察御史劉信奏兵部委太平府同知克廉同理廉懷姦託故不行請罪之。上曰：古人言致身以事君，今理軍伍必命所在親民之官者，庶得下人之實，不為所欺。食五品祿，乃不肯任事，將焉用之？遂命信治之。如律。○徙威州治所時松潘蠻寇焚州治，總兵官都督同知陳懷奏州治去千戶所十餘里，又隔大河索橋，緩急官軍不能救，授請徙州治於千戶所對岸保子關。上從之。○免山東萊州府高密縣逃民二百四十三戶。自洪熙元年至宣德二年，逋負稅糧二千一百五十石有奇。○夜有流星大如盃，色青白，尾跡有光，出天市東垣，復有五小星隨之北行，入紫微東蕃外。○甲辰巡按北直隸監察御史張瑩奏五月六月連雨不已，河決堤岸溺死軍民，壞通州良鄉。

等處官民屋宇及湮沒宛平大興順義大城保定文安永清寶坻香河霸州并保定等府新城等縣田苗 上諭尚書夏原吉等曰災不虛至必有其咎宜勉思寬恤之道○乙巳命都指揮使宮得等任山西等都司先是 上謂太師英國公張輔等曰都指揮總制一道所任不輕聞多有老疾者卿等宜從公簡擇果當代者代之於在京都指揮內選用至是輔與公侯伯都督及兵部尚書會議以山西等處都指揮盧整等二十五人老疾請以所選在京都指揮使宮得等代從之於是命得任山西都司都指揮同知王貴任大寧都司李漢山西都司宮聚四川都司都指揮僉事呂整山西行都司石得魏清大寧都司李斌萬貴四川都司魏整岳貴四川行都司葛亮魏全江西都司何貴湖廣都司張凱福建行都司戴廣貴州都司吳迪雲南都司軒

或廣東都司霍讓廣西都司○命故虎賁左衛指揮同知李斌  
第廣府軍左衛指揮僉事王義塔魏昇襲職羽林右衛指揮同  
知朱斌老疾命其子賁代○金吾左衛指揮同知傅廣自宮願  
劾用內庭行在禮部以聞 上曰已有例禁止此人身爲指揮  
尚欲何求而勇於自殘求進若勇不畏死能立功名何患無高  
爵厚祿其付刑部治罪○丙午以九載考最陞行在尚寶司丞  
葛貞爲本司卿山西澤州儒學正趙冕爲禮科給事中行在廣  
東道監察御史李綸爲江西按察司副使山東道監察御史嚴  
孟衡爲浙江按察司副使江得爲河南按察司僉事雲南道監  
察御史稅昇爲四川按察司僉事北京道監察御史胡亨爲陝  
西按察司僉事貴州黎平府知府司祥爲兩浙鹽運使黜廣西  
道監察御史李復善爲新都縣知縣以都御史言其不諳刑名

也○直隸大名府滑縣民奏運官豆七千六百石至通州已輸  
倉者五千餘石餘皆在舟忽風雨暴至舟覆并拯舟者七人皆  
溺死乞免陪輸 上謂行在戶部臣曰人且溺死豆可問乎其  
免之○丁未命左都御史劉觀巡視河道勅諭之曰比年以來  
綠河提督官徇私滅公貪弊百出侍郎曹本催督秋糧所至諸  
閘作威肆虐唯己所督運者得度其他處運糧及軍民商賈皆  
不得行舟楫積滯兩水驟發傷壞者多今特命卿自北京直抵  
南京巡視凡河道淤淺閘壩損壞躬自提督修浚務俾舟楫順  
利輸運無阻公私兩便卿其夙夜盡心無怠所事庶稱委任○  
黜行在北京道監察御史張鶚馮良鄉縣知縣鶚嘗犯贓罪雖  
經赦猶黜之○ 上退朝御左順門召三法司官謂曰近來在  
外有司多以犯贓得罪此固小人重利輕身然其間亦有君子

奉公守法不徇私情姦究之徒惡其不便於己裝飾誣之法司  
昏懦不能辯理而自誣伏者亦有之矣凡人一被汙陷子孫皆  
以爲辱卿等切須詳慎是夫非非勿有所枉○戊申 上閱  
皇明祖訓終卷賴謂侍臣曰自古創業難守成不秀我 太祖  
皇帝起布衣與羣雄並驅將二十年乃悉平僭亂奄有中夏申  
明禮義之教而萬幾之暇復製 祖訓一編示法子孫蓋歷六  
年始克成書思慮之周防範之密至矣備矣後世子孫但謹守  
先訓每事遵用不敢違越豈有過舉哉侍臣對曰誠如 聖  
諭然以今日言之躬蹈當自 陛下始 上曰然亦賴卿等匡  
輔若一言一行或背 祖訓卿等須直言之書云監于先王成  
惡其永無愆亦賢臣以告其君者也卿等勉之○己酉停造新  
鈔時 上以鈔法不通謂尚書夏原吉等曰國家造鈔本以便



民交易何分新舊朕聞前者民間用鈔不問殘缺惟字貫稍可辨者皆通行無滯自戶部榜出示以鈔樣務要明白完全小民無知緣此便生好惡至今爲梗今卽停造新鈔在庫者亦勿支揀舊鈔堪用者備賞賚不堪者燒毀庶幾鈔法可通於是造鈔工匠皆令休息郡縣歲辦桑穰悉停止○湖廣前忠信軍民府故土官知府覃呂啼送孫隆前野王長官司土官長官田驢其什用子散魯前隆梁守鎮諸峒蠻夷宣撫司故土官宣撫卽應隆子文前鎮南大奴峒宣撫司故土官宣撫田黑用子統前鎮遠安撫司故土官安撫苟候驢子向世雄前順化安撫司故土官安撫旺躉子墨言送前九溪軍民宣慰司故土官宣慰使墨迪送子右珠前紅奉峒安撫司土官安撫景先子木豪忠路安撫司把事牟銘進等來朝貢馬及方物○命北京行部行都督

府修神武義勇武成永清錦衣金吾燕山諸衛倉皆以久兩類壞也○庚戌勅南京守備襄城伯李隆及戶部今朝廷所出鈔多以致民間阻滯新鈔可暫停造工匠聽其休息提舉司官吏不動各處買辦桑纒已起解者令送京收貯未解者停止內府見貯舊鈔甚多今發去鈔樣即委內官一員同戶部官御史給事中各二員選揀如樣者收貯於庫凡一應支給俱用此鈔不堪者悉燬之已造完新鈔悉收庫不許放支其各處解納鈔如舊收受不許選揀待入庫後如前例選揀支用勅南京太監鄭和王景弘等亦如之○日上生背氣一道色青赤隨生重半暈及生左右珥色黃赤皆鮮明

大明宣宗憲天崇道皇帝神聖欽文昭武寬仁純孝皇帝實

錄卷之四十四



宣宗章皇帝實錄卷之四

宣德三年秋七月辛亥朔享太廟○遣中官祭司門之神○  
選太原前衛千戶曹英孫女爲鎮國將軍美院夫人平陽衛指  
揮挂德孫女爲鎮國將軍美院夫人平陽府臨汾縣民賈整女  
爲鎮國將軍美院夫人○壬子賜貴州女順州把事阿闌鎮寧  
州把事阿宗西堡長官司把事阿者十二營長官司把事楊保  
寧谷寨長官司通事李得慕役長官司寨長楊得頂營長官司  
把事趙陸康佐長官司把事的比福餘衛千戶那該等鈔綵幣  
表裏有差○福建布政司及巡按監察御史奏浦城建陽二縣  
有強賊三百餘人劫殺人民焚廢舍勅福建都司行都司選精  
銳官軍委都指揮徐信率領捕之賊若越境則會浙江都司兵  
夾攻之須盡滅乃已毋遺民患別勅浙江都司委官率兵臨境

以俟且並戒其約束官軍嚴紀律毋擾平民違者并所管頭目  
悉處重法兩都司合攻之際毋執偏私毋相推諉以縱賊徒仍  
令榜諭所在官吏軍民有能導引官軍擒賊巢穴者陞賞如擒  
強盜例若賊中有能悔過歸正或自首或指引官軍擒捕或將  
賊赴官者不問人之多寡悉免本罪如例給賞○夜有流星大  
如雞彈色青白尾跡有光出北斗魁西北行至雲中○癸丑雲  
南總兵官太傅黔國公沐晟言雲南潞江千夫長刀不浪班叛  
歸麓川聚眾攻劫潞江安撫司逐土官安撫葉驊入全函殺招  
剛因達硬等七人劫奪財物焚毀民居又據潞江驛逐驛丞周  
禮立寨固守斷絕道路蒲焚阿昌諸蠻與之接境慮相扇亂  
請發兵討之 上曰邊兵重在守備豈可輕動勅晟與三司熟  
議或撫諭或征討必圖萬全○申寅 上以天氣炎熱命三法

司䟽決繫囚○泗州民泰州民養孳生馬者洪武十八年定養馬之例凡養壯馬一匹免糧二十五石牝馬一匹免糧三十石永樂中罷養馬仍徵稅糧近後令州民養馬無當別差稅糧已授洪武中例蠲免 上謂行在戶部曰孳牧勞民馬死又責其償朕恒憫之况泗州 祖陵所在免糧有例其准所言○乙卯修文明順承二門外橋梁○順天府三河縣奏本縣錯橋東通遼海西達京師今年五月霖雨山水暴漲壞橋斃石皆決驛使往來不便乞撥軍天工匠於華山石廠取石修砌庶幾可成從之○丙辰陞行在通政司通政使顧佐爲行在都察院右都御史○順天府豐潤玉田平峪昌平東安密雲懷柔七縣涿州房山縣通州薊三河二縣河間府河間靜海獻任丘肅寧五縣真定府深州及晉州饒陽元氏高邑三縣保定府新州及雄完蠡

定興清苑博野容城安肅滿城新城十縣安州新安縣易州涿水縣永平府灤州及盧龍昌黎遷安三縣大名府開州及長垣南樂濮清豐滑魏六縣廣平府成安縣湖廣岳州府華容縣及南直隸和州各奏今年五六月苦雨山水泛漲衝決堤堧滄浚田稼 上召六部尚書蹇義等以奏示之諭之曰天降災祥在德朕覽之凜然卿等皆當勉思恤民之道必在務實毋事虛文○戊午勅行在都察院右都御史顧佐曰都察院受朝廷耳目之寄掌國家紀綱之任用得其人則庶政清平群僚警肅用非其人則百職怠弛小人橫恣必盡公廉乃稱斯職近年以來在京諸司姦弊紛出其司風憲者非惟不能糾舉且實與之和同若此所為國何賴焉爾佐剛直廉正簡在朕心今特畀斯任其竭誠盡力必公必明恪恭夙夜毋憚勤勞彈劾愆謬毋避權要

母廷良善母縱姦兒庶幾人知警畏弊以清革副朕簡任之意  
其各道見任御史宜當擇之凡廉勤公正老成醇厚者俱留在  
職其不遵政體不諳文移貪淫無耻及曾犯贓罪者悉送吏部  
降黜公差給假丁憂者亦如之務盡至公之道所闕御史即行  
吏部慎選自今不許濫授爾其欽哉○總兵官都督譚廣奏宣  
府懷安懷來永寧萬全左右諸衛城垣并各廢臺整橋梁近因  
久雨傾頽請以各衛軍士修築從之○己未賜慶王世子秋燧  
安化王秋終真寧王秋燧冕服○勅大理寺卿胡禔曰前命爾  
往應天常鎮蘇松等五府及浙江所屬境內巡視軍民利病殄  
除兇惡以安良善爾能歛承朕命用心効力不負任使朕已知  
之故屢有小人誣構爾過悉斥不聽自今亦宜為志竭誠一遵  
前勅而行毋憚權要必使為惡者知警於公法為善者獲安於



田里惟廉勅明公慎終如始乃有以服人心而稱委任欽哉勿  
怠○福建福清縣耆民鄭外進瑞奏謁致遣歸○夜有流星大  
如盃色黃白光燭地起五車西北行至文昌○庚申 上諭行  
在吏部兵部臣曰今後凡中官傳旨除授官員不問職之大小  
有勅無勅俱要覆奏明白然後施行○行在工部奏太常寺言  
徐王噴祠及祠祭署周垣因兩傾塌祠內帳幔亦多損敵命如  
舊修製○辛酉行在兵部奏昨巡撫官布政使周幹言浙江海  
鹽縣地臨海岸每有倭寇洪武中設海寧衛及澉浦乍浦二千  
戶所陸置烟整水備戰船瞭望巡守因得無虞永樂七年盡抽  
軍船赴沈家門立水寨防守撤去烟整倭寇乘虛連年縱掠水  
寨相去海鹽千里不能救援民甚苦之請如洪武中防守分累  
覆勘皆以爲便 上曰古人云利者什不變法凡謀事須爲未

久之計其再令巡撫大理卿胡聚與三司計議果孰爲便然後  
廢置○行在工部奏北京文明等門城垣及永平遵化薊州密  
雲等處城池善峯等口闕牆皆因雨潦傾壞命軍衛有司修治  
永平諸處令都督僉事陳景先董其役○壬戌賜湖廣前忠信  
軍民府故土官知府覃呂啼送孫隆前野王長官司土官長官  
田驢其什用子散魯前隆渠守鎮諸尚蠻夷宣撫司故土官宣  
撫卽應隆子文前鎮南大奴尚宣撫司故土官宣撫田黑用子  
斌前鎮遠安撫司故土官安撫苟候驢子向世雅前順化安撫  
司故土官安撫旺踵子墨言送前九溪軍民宣慰司故土官宣  
慰使墨迪送子古珠前紅奉崗安撫司故土官安撫景先子木  
豪忠路安撫司把事牟銘進鈔絲帶表裏紵絲襲衣有差○亮  
判部屬猛可不剎求歸奏願君京自効命爲所鎮撫賜冠帶金

織襲衣綵幣銀鈔綿布鞍馬仍命有司給房屋器皿等物如例  
○廣西總兵官都督僉事山雲奏今年五月淫雨江漲柳州衛  
城壞五十九丈守禦融縣左千戶所城壞二百八十七丈城門  
城樓亦皆摧外皆臨賊境已督軍嚴備然修城重役非軍力所  
能獨完乞令有司以民夫協助從之○癸亥命行在工部修治  
都城外至若庸關橋梁道路之因雨傾塌者○甲子以明日中  
元節遣鄭王瞻埈祭長陵獻陵○勅通州神武定邊薊州  
等五十三衛指揮千百戶葛森等各領輪班放回神銃手官軍  
星馳赴京時上將以農隙出郊閱武故有是命○湖廣前歸  
德宣撫司等衙門故土官宣撫彭驢送子萬隆等進茶馬○泗  
州人戴瘦仔偽為御史行鈔法至清河知縣李信圭察其偽擒  
送京師上命三法司鞫治因謂必師史部尚書蹇義等曰御

史要官有志者能勤學勵行何患不至小人苟圖一時之利而  
設其身何其愚也○乙丑命行在戶部尚書兼護身殿大學士  
陳山禮部員外郎許敬軒為正副使持節封寧王第三子磐煥  
為宜春王太子少保禮部尚書兼武英殿大學士金幼孜吏部  
員外郎魏驥為正副使持節兩寧夏左衛指揮僉事趙壁女為  
慶世子妃寧夏左屯衛指揮僉事張銘妹為真寧王妃寧夏中  
護衛指揮同知倪昇女為安化王妃○中書舍人陳登卒登字  
思孝長樂人始以才薦授羅田縣丞再調蘭溪浮梁二縣皆有  
治績永樂初詔求四方能書者登以工篆隸舉入翰林登博究  
深考自三代秦漢以降鍾鼎金石山刻冢刻靡不熟識當時無  
出其右者擢中書舍人凡國家有大制作篆籀之文皆出其手  
登負直氣於所交游能面舉其過不肯諂媚依隨庶幾剛正之

士云○夜有流星大如盃色赤有光起紫微垣內東北行至東井炸散○丁卯寧王權遣人進扇且奏求鐵笛 上命工製鐵笛與之謂左右曰古人謂笛者滌也所以滌邪穢納之雅正寧王之意其在此乎鐵笛雖無當新製與之○免岷王擬華陽王悅耀每歲 聖節正旦冬至進賀表箋以王所少人差遣也○靖江王佐敬母夫人耿氏卒遣官勅祭命有司治葬事○陞鎮守河州都督僉事劉昭為都督同知往鎮西寧兼理河州事召守西寧都督史昭及會寧伯李英還京○召鎮守薊州等處都督陳景先還京○設雲南澂江府僧綱司○南京國子監司業陳敬宗奏在京各衙門歷事監生近因事簡比舊減半其辦事監生惟是急務差遣不拘常數祭則斟酌事務繁簡以次量撥宜以半年更代庶使均得肄業又本監所貯永樂年間散餘列

文傳三千本年又損壞請給投監生又本監膳夫原以應天府上元江寧二縣民充近以犯徒罪者充滿日更代類多逃亡况法司見問囚人皆納米贖罪滿者無人更代乞額設三百名如有事故令法司照名撥補從之○山西布政司奏造永和玉墳墾用民地一十五頃有奇地之稅糧未除上命行在戶部除之仍命行山西布政司令別撥贖閒田地與民使不失恒業○戊辰行在戶部奏寧王第三子宜春王磐姚歲祿二千石米鈔中半當以江西附近郡縣糧及官庫鈔給之上從之諭尚書夏原吉曰近有言王府收糧或留難或多取或暴虐需索民甚苦之此皆下人所爲王不能知可移文禁革違者繩之以法○上閱三法司所進繫囚罪狀諭之曰反逆人命僞造印信如律詐傳詔旨誣告人因而致死看死杖一百發戍遼東監守自

盜常人盜倉庫錢糧盜官畜產與受枉法財皆追贓論重輕請  
成違東邊衛及口外徒流者如例罰輸作杖以下準欽法榜例  
追致無罪者釋之凡決遣千六百三十五人○福建行都司拔  
送謀反罪人樓瀛等至京師瀛浙江奉化人建寧府稅課司官  
之子得罪於母逃至建陽民家詐爲劄書稱九府小齊王氏館  
穀之馮製王者冠服擇日起事建陽縣執送行都司遂送至京  
上命三法司訊之皆引伏 上曰小人無知不可不治令錦  
衣衛械繫其詞所連者悉捕之○已巳行在戶部奏廣昌王濟  
熛薨歲祿二千石當停支而王妃及幼男女頗衆擬依永樂間  
伊王薨例歲給米三百石 上曰王薨正當優恤其家三百石  
不足贍其加二百石令有司按歲給之○庚午朝鮮國王李禔  
遣陪臣元閔生等奉表箋貢方物賀立中宮○召鎮守彭德都

督李王還京○行在六科給事中引奏監生王倫等辦事半年例應給賞回監讀書上因諭倫等曰自古大賢君子通知古今然後能立功名垂久遠所以國家立法令爾等習詩書又令通政事宜各勉力不惟國家得人爲用爾亦能立身榮家顯祖宗矣倫等頓首而退○辛未命故山東都司都指揮僉事劉亨子得新襲金吾右衛指揮使羽林前衛指揮使高福海庶兄福襲其職金吾右衛指揮同知慕成老疾命其子瑛代○停開平運糧先是命陽武侯薛祿率軍運宣府糧赴開平至是上以積兩沈浮車行甚艱命止之仍命武安侯鄭亨等散遣軍士糧已支出者仍入倉召祿還京○壬申霸州民詣闕言兩潦傷田禾人民乏食有司坐買蒲草土硝等物乞暫停止上諭行在六部臣曰水災民饑又以此不急之物重困之可乎其一應科



辦悉停免○癸酉土魯嵩城都督僉事尹吉兒察子滿哥帖木  
兒湖廣唐崖長官司故土官長官黃晟子敬貢馬○行在戶部  
尚書夏原吉言北京文武官吏軍夫工匠糧餉所費不貲比來  
早澇賦稅多欠平江伯陳瑄歲運糧僅足支給倉無厚儲非經  
火計臣謹條陳籌節預備之策一中鹽米舊則太重商賈必有  
至者今更定淮浙鹽每引納米二斗五升河間三斗河東四川  
福建一斗五升不拘次支庶糞中納者可衆一法司問兗山東  
河南及北京八府雜犯絞斬以下罪囚俱令納米京倉贖罪一  
各衛所優給官舊於北京支糧宜悉處於南京就糧願於原籍  
支給者亦從其便一隨駕上直及架鷹等項馬凡八千餘匹月  
支料豆萬一千三百餘石宜減半給之一京官韃官俸糧舊皆  
均支米致除忠勇王如舊外其餘不拘品級月各與糧二石餘

令於南京倉附支銀支如舊一各衛調至操備官軍已有本等  
俸糧今又月支行糧四斗不無重複乞令陝西山西等都司各  
衛道遠者俱回原衛所操練聽調山東河南及附近者選留精  
壯在京訓練人月支糧三斗一軍匠民匠人夫在役者凡二十  
五萬九千餘人及管工官吏人月支口糧五斗賞銀五釐又月  
支食鹽今營造未興工程不急賞銀止給軍匠其管工官吏俱  
罷給民匠民夫月支糧四斗鹽銀如舊仍令工部審量多餘者  
悉皆放還一軍民匠及夫有逃故者所管之人多冒支糧賞請  
令工部查考有冒支者具奏追理一諸司辦事官辦事吏月支  
米三斗宜罷支米暫令支銀一各處總兵鎮守官隨行官軍人  
等本衛已支俸糧在外又日支廩米五升以一月計之通一石  
五斗宜每月支與米四斗五升庶不重費錢糧 上覽奏曰卿

所言大槩當朕意可令更與公侯伯六部都察院官會議既而皆言戶部所奏為當 上從之○甲戌 上御奉天門諭行在刑部侍郎施禮等曰京師人衆閭閻罵詈自是常事兵馬司擒獲皆送法司此等非有重罪宜即剴斷發遣今天氣炎熱豈可久淹或有因病而死即為枉殺無辜卿等宜深存惻隱之心毋枉人命○占城國王占巴的賴遣使臣逋沙怕濟加等奉金葉表箋來朝貢方物○免大興縣逃民宣德二年秋撞殺草鹽糧○乙亥青州府民劉中等奏永樂中因歲歉流徙至北京蒙矜縣凡二百餘戶若二十年已成家業今有司追還山東乞就附籍囊強 上謂尚書夏原吉曰彼此皆吾土但得民安即已又曰唐宇文融檢括流民過期不首者誦違州容庇者抵罪州縣承風勞擾百姓愈弊逃竄益多爾其申劾有司以此為戒○命

行在工部修通州白富二河橋梁。○昏刻有流星大如雞彈色青白尾跡有光出紫微垣東蕃外西北行至濁曉刻熒惑犯積尾。○丙子廣西泗城州女土官盧氏遣頭目韋阮等貢馬。○夜有流星大如盃色赤有尾光燭地起貫索西北行至雲中又有流星大如碗色赤光燭地起宗人西南行至濁。○丁丑造岷府江川王廣通王陽宗王覲全銀印各一。○給雲南曲靖軍民府土僧善清等二百人度牒初清等詣闕請度牒行在禮部言舊例五年後考試然後給。上曰彼來自萬里外可不拘常例與之。○戊寅賜土魯番城都督僉事尹吉兒察子滿哥帖木兒等全織紵絲紬絹襲衣及紗羅綾紬絹有差。○己卯命山東青州府知府陳永遷任永有疾詣闕自陳乞還鄉養病益都等縣著民數十人詣闕奏永蒞政公勤刑獄無滯有為有守吏民畏服

已留以惠民 上諭行在吏部臣曰郡守以疾求去民不忍令  
為政之善可知雖病豈不堪卧治其道還任○松潘衛指揮使  
吳瑋自陳平番蠻有功蓋瑋先以進貢至京而蠻寇叛 上命  
瑋馳還討之瑋還即率所部及龍州知州薛繼賢父子千戶于  
諒等兵先進至圪答堪寨頭葉宗閣諸處屢戰敗賊遂復松潘  
撫定祁命等十族酋民及都督陳懷至令瑋仍為前鋒攻奪未  
鎮等橋敗賊復壘溪懷因令瑋守壘溪又招降渴卓等二十餘  
寨後瑋還衛又降阿用諸寨首瑋又陳其前後施設方畧并陳  
繼賢等功且言巡按御史嚴孟衡按察使康郁賦初起時不撤  
兵救援又不奏都指揮韓整姦貪失律之罪 上諭行在兵部  
臣曰寇之平節制在懷瑋為松潘指揮雖有攻守之勞皆職所  
當為惟令錄繼賢等功以聞孟衡等皆置不問

大明宣宗章皇帝實錄卷之四十六

宣德三年八月庚辰朔○辛巳賜湖廣唐崖長官司故土官長官黃茂子敏前歸德宣撫司等衙門故土官宣撫彭驥送子萬隆等各美宣撫司通事向謹等欵綵帶表裏絹有差○上御武英殿問侍臣歷代戶口盛衰侍臣對曰禹平水土民莫厥若至桀而耗之湯始受命視禹時不及及紂淫虐武王得天下之初視湯時又不及成康致理遂多於禹時春秋戰國以至嬴秦所耗尤多漢高至文景民庶大增武帝征伐不息十數年間天下之衆亦減其半昭帝罷戰務農至成帝初戶口極盛東漢承王莽之後率土之民十總二三明章之後天下無事人口滋殖三國六朝疆宇分裂所存無幾隋文節儉大業之初戶口極盛煬帝荒淫役人以百萬計丁男不足役及婦人由是天下之人

聚而為盜。唐貞觀以後，及於永徽，戶口日增至開元，極盛。安史之亂，遂大耗矣。宋承五季之後，自太祖至神宗，戶口日盛。高宗南渡，中原板蕩，所存者東南之民。此歷代戶口之大槩也。上曰：戶口之盛衰，足以見國家之治忽，其盛也本於休養生息，其衰也必由土木兵戈。觀漢武承文景之餘，煬帝繼隋文之後，開元之盛，遂有安史之亂，豈非恃其富庶而不知儆戒乎？漢武末年，乃知悔過，煬帝遂以亡國。玄宗至於播遷，皆足為世之大戒。○壬午，皇子祁鈺生。上之第二子也。○賜占城國使臣通沙怕濟加等鈔絲帶表裏金織紵絲羅絹襲衣，有差命齋勅及紵絲紗羅絨錦歸賜其王及妃。○修君庸關城及水門，命行在工部侍郎許廓督之。○貴州興隆衛經歷陸昇言本衛官軍俸糧計二萬餘石，除收四川播州等處稅糧支給外，餘於重慶等府

支相去二十八驛皆高山峻嶺不通舟楫每歲差官總支變易  
物貨回衛給與官軍所得十不及一本衛去湖廣偏捨鎮遠二  
衛陸行止一百二十里即通舟楫下至沅州辰州纔十一驛保  
糧乞於彼支給爲使命行在戶部議行之○於未前晉王濟熾  
奏欲親詣晉恭園祭掃且訴濟熾之惡上復書曰恭園祭掃  
此伯王孝心亦禮所當然今親詣之後來歲可令平陽王兄弟  
代行蓋慮伯王春秋高道途跋涉非易也濟熾所爲不孝不忠  
不恭不仁負挽之行久而愈甚鬼神不容暴發其姦善惡之施  
其應如響可謂天理久而定矣因伯王言及猶使人不能無繫  
於心也○賜朝鮮國使臣元閔生等及奉使趙北回還官軍表  
亨等鈔紵絲絹衣等物有差○荊州守備都督僉事陳景先奏  
喜峯口等處守備官軍月糧俱於遵化衛林南倉支往後四百



餘里或時遇雨山溪水漲半月方可回營設有警急何以應接  
乞於秋成後發附近永平府屬縣民及東勝諸衛軍運林南倉  
糧於蓮化城內倉棧儲以備支給庶官軍得身守備 上從之  
命行在戶部遣官以九月終發軍民兼運糈以爲常○行在都  
察院左副都御史陳勉左僉都御史李濡右僉都御史凌晏如  
監察御史繆讓行在大理寺右少卿王文貴評事陳永祥諸呼  
坐失出死罪下獄先是龍驤衛千戶劉廣劉震王文坐寇軍糧  
以監守自盜論應死廣等懼死妄訴冤勉等遂改論杖罪 上  
謂三法司臣曰廣等從重入輕若今所擬是則前之所擬非亦  
不得無罪爾等再推究其實以聞至是三法司奏審其情實於  
法應死遂命下勉等於錦衣衛獄尋命宥之○北京東城兵馬  
司奏大寧前衛致仕指揮使把克駙馬過市馬驚蹄折人右足

請送法司問罪 上曰業馬傷人雖非故既傷肢體亦不得無罪令醫療平復則免之○南京都察院右都御史無營事府詹事致仕向寶卒寶字克終江西進賢人洪武乙丑進士初授兵部試員外郎九年無過特陞通政使以不善奏對力辭改應天府尹建文中坐累謫廣西 太宗文皇帝入正大統召復前職又坐累繫獄數年左遷兩浙鹽運司判官 仁宗皇帝在東宮知其廉既即位驛召還朝陞都察院右都御史翊日入謝命兼詹事府詹事給兩俸有詔求言寶陳八事其一曰錄用勲舊二曰設置諫官三曰選舉賢才四曰簡練將帥五曰貴重有司六曰考覈吏員七曰監生資格八曰流通鈔法言亦可采 上即位之初命蒞南京都察院秩滿入覲 上憫其老疾命致仕歸卒於道計聞違官賜祭命有司治葬寶儒者有文學究厚愛民

而持身清介累遭困阨未嘗易操平居言不及利蔬食水飲自處甚適歷仕四十餘年卒之日家具蕭然○甲申命遼東都指揮同知夏俊李信復視事先是有言俊等罷軟弗稱命致仕以其子襲舊職至是上察其尚可用故有是命○監察御史鄭道寧言四事其一宣德元年秋都察院右都御史王彰嘗奏京倉官吏人等收支作弊有旨命犯者即治之然後奏既又命戶部必奏然後治之近神策等衛倉官吏作弊事覺因俟奏請各官愈肆姦弊乞如彰所奉命庶使姦貪畏憚民不受害其二因入納米贖罪乃朝廷寬恤之典近見軍儲倉拘繫罪囚因貧無米輸納自去年十二月至今死者九十六人有負皇上好生之意比者刑部侍郎俞士吉嘗奏罪囚之貧無米者請追納於原籍匠仍輸作軍仍操備若非軍匠則皆遣還所隸州縣追之

乞舉此而行庶使刑法平恕人得全生其三犯姦婦女律當去衣受刑以勵風俗今法司亦聽納米贖罪其間無米輸納者拘繫於獄五縱淫穢有傷風化乞勅法司仍治之如律庶使人知懲戒其四在京各衛鎮撫倉官職專出納錢糧比見鎮撫每日早赴都督府書卯倉官三日一赴戶部五日一赴本衛謁見往來伺候虛糜日時遂使納者停積闕者稽留實爲誤事乞勅戶部禁止上皆從之惟千問軍職仍先具奏○遼東安樂州知州侯進奏臣奉命赴任剪家以行經山海關已給行後軍都督府出關勘合守關指揮葛昇等稽留不遣必索取賄賂始得放行凡經過者皆苦其貪暴請罪之上諭右都御史顏佐等曰朝廷設關本以禦暴今反爲暴其令巡按御史治之如律○丁亥遣太子少傅工部尚書兼謹身殿大學士楊榮釋奠先師孔

子○昏刻有泥星大如雞彈色青白有光起其西南行至雲中  
○戊子癸 大社 大稷○己丑蒲降監察御史嚴暄等先是  
上以御史多不稱職勅右都御史顧佐明慎簡擇凡貪汙及  
不諳政體與老疾者具以名聞佐奏監察御史嚴暄成林韓瑄  
繆讓張銜趙琰趙礪趙倫楊若正宋準張士貞司務段凱貪淫  
無耻汙名尤甚張觀王成雷恭王諭司鐸胡祥潘舉牟倫貪汙  
不律李孟瑄王順慈寧晏鐸張瑩林真張嘉會都事趙玘不達  
政體趙安不諳文移馮斌梁毅周瑞老疾俱宜黜降 上命貪  
淫不律者發遠東各衛充吏終身不達政體者降縣典吏老疾  
者罷爲民○夜有泥星大如雞彈色赤尾跡有光出天倉南行  
至濁○庚寅阿倫等衛女直指彈劾事亦省哥等來朝貢馬及  
方物○命都指揮使花英仍任廣東都司調廣東都司都指揮

使李龍任福建都司英舊任廣東有罪調交趾比還命守廉州  
至是官軍調廉州衛者皆歸原衛故英亦復舊任○命南京守  
備太監鄭和王景弘等以內府見貯大絹十萬匹綿布二十三  
萬匹令戶部遣官運赴北京○命故崇信伯賈瓖子劉襲晉○  
行在都察院右都御史顧佐奏監察御史多缺臣訪舉進士鄧  
榮等十四人監生程富等十一人聽選教官方瑞等二十人志  
操端謹堪任御史 上曰風憲固當用端謹者亦須有才猷方  
稱未可遽授此職俱令於各道歷政三月爾察其言行考其賢  
否第爲三等朕將選擇任之○行在禮部尚書胡濙奏交趾土  
官知州阮得馨百戶丁射及州判縣丞訓導史典等以公差考  
滿丁憂同妻子家人還交趾者中途聞王師已還而賊據城皆  
不願歸具告有司遍送來京願就京住 上命各與房屋依品

級支俸無俸者月給食米一石故官家人月給食米五斗漢又  
奏先次交陞土官指揮武孝先及知州等官願在京住者賜銀  
鈔線幣絹布 上命準此例○修荊州三河橋令守備都督陳  
景先以附近軍民工匠同修○湖廣常德府奏龍陽武陵二縣  
五月以來霖雨不止湖水漲漫衝決隄岸漂流民若湮沒田苗  
命布政司委官撫恤○辛卯革北京行後軍都督府及行部丞  
樂初建北京置行後軍都督府行部及遷都北京置五府六部  
皆如南京行都督府行部猶存凡五府六部文務合行北京直  
隸衛所府縣者及直隸衛所府縣申達五府六部者必經行都  
督府行部文務重復事或錯誤 上命公侯伯尚書都御史學  
士議於是英國公張輔吏部尚書蹇義等言北京既有五府六  
部大小衙門其行府行部宜革 上從之命掌行後軍都督府

事駙馬都尉廣平侯袁容掌行在後軍都督府事行部尚書李  
友直改行在工部侍郎李昶改行在戶部李嘉改行在禮部特  
命蘇瓚致仕凡首領官屬官及吏命吏部改調○行在刑部奏  
監察御史高昭犯贓罪應死然今恩例當運贖罪復職上  
曰犯贓豈可復任風憲其罷爲民○壬辰金吾右衛指揮僉事  
脫宅自陳年老命其子脫歡代職隨清平伯吳成巡邊○免山  
東萊州府掖縣逃徙充軍死亡等戶洪熙元年至宣德二年稅  
糧米麥一千二百八十五石○癸巳上御奉天門召公侯伯  
五軍都督府都督諭之曰胡虜每歲秋高馬肥必擾邊比來邊  
備不審何似東北諸關隘皆在畿內今農務將畢朕將因田獵  
親歷諸關警飭兵備卿等整齊士馬以俟○甲午進士魏浚言  
臣比因戶部遣徵松江府秋糧切見在京諸司每有公事輒差



官督辦紛紜交集一郡之間凡數百人謹恪者止於多費廩給貪酷者動輒虐害軍民府縣官吏因京師所差人衆視爲泛常公務稽遲往往違限乙初六部都察院等衙門惟巡視水旱觀察民風切要之事差官凡買辦催徵悉令移文府縣量立程限赴京輸納且令巡按監察御史按察司官以時校勘稽誤者罪之庶官事易集下人獲安命行在禮部會官計議行之○北京行部右侍郎蘇瓚致仕陞辭 上顧謂尚書蹇義曰瓚貪鄙以阿諂進不可以玷朝行故特罷之蓋瓚直隸河間縣人初爲縣丞陞工部主事再陞郎中洪熙初陞侍郎瓚頗有才幹不識廉耻巧於迎合諂事蹟交當道者薦之故得不次之擢及罷朝議皆服 上之明云○夜月食○乙未命英國公張輔陽武侯薛祿等簡閱京衛軍士○初畿內諸衛選精銳官軍扈從○初劉

州以東諸衛整備士馬以俟扈從○命成國公朱勇掌行在前  
軍都督府事○命故永清右衛指揮僉事李敬子瑄襲職○命  
行在刑部尚書兼太子賓客金純致仕落賓客之職純鳳陽泗  
州人洪武中爲吏部文選郎中後陞江西叅政入爲刑部侍郎  
轉禮部陞尚書轉刑部遂兼賓客純寬厚有容初無過舉比邁  
疾上賜醫藥稍愈入謝免朝謁令護疾視事時夏暑勅三法  
司疏決滯囚純不加意數從朝貴宴飲致獄淹滯爲御史給事  
中所劾命錦衣衛頌繫之至是上念其舊人且老特宥之命  
致仕○行在兵部尚書張本奏各處守關隘官軍及巡檢職在  
盤詰姦詐擒捕盜賊今皆怠惰近內使及軍囚逃者未嘗捕獲  
一人請揭榜戒諭自今凡軍民無文引及內官內使來歷不明  
有藏匿寺觀菴院者必執送官仍許諸人首告得實者給賞里

長隣人縱容不首者與犯人同罪從之。○給嘉興公主及駙馬井源歲祿共二千石給崇信伯費釗歲祿一千一百石於南京倉米麥兼支。○以九年考最陞行在山東道監察御史朱仲安為河南按察使戶部員外郎黎璠為四川布政司左叅議四川按察司僉事于庭順為山東按察司副使陝西道監察御史高翔廣東布政司左叅議汪淵俱以疾命冠帶閒居雲南太和縣學訓導楊智九年考滿自陳臣本雲南人任本土教官今當改除切念臣父母皆老乞復原任以祿為養。上憫其情命行在吏部從之。點雲南道監察御史霍莘為慶雲縣知縣降福建按察司僉事徐隆為沐陽縣知縣莘以受賂事覺未結正雖遇赦仍點之隆以巡按御史言其不任職故降之以交趾民陳汀為指揮僉事汀交趾古雷縣把魯里千夫長從都督方政及指揮

阮安榮戰守汀能效勤勞數敗黎利有奇功政信任之王通棄  
城汀憤恨北行爲賊所得賊壯其爲人投僞正督令率兵守交  
州東關汀義不事賊挈家九十餘口從間道出走利遣人追之  
家口爲賊所獲惟汀得至欽州都指揮程瑒遣送至京上謂  
尚書張本曰其人又在行伍效勞力又能舍賊歸朝誠悃可嘉  
宜有超擢其以爲指揮僉事於錦衣衛支俸令禮部依交趾土  
官居京師例給賜以遵化衛夜不收張大川爲本衛百戶初大  
川與守鮎魚石關巡至將軍樹石匣口猝遇虜騎四人與之敵  
虜被大川射傷俱棄馬走邊將以聞召大川至京師詢其實  
上嘉其勇敢有是命○丙申湖廣施州衛前鎮邊忠信宣撫司  
等衙門故土官同知黃阿什用子玩先等亦馬剌衛指揮僉事  
伯羊加兀者衛指揮僉事兀里著波羅河衛指揮僉事阿同哥

亦馬忽山衛指揮僉事卜得等來朝貢馬及方物○賜廣西泗城州頭目韋瓦等鈔絲帶表裏有差○丁酉太師英國公張輔等進扈從官軍之數 上曰朕此行豈爲田獵但以國家雖安不可忘武况邊境之民每及秋則憂虜患若在我有備虜何能爲患朕爲民故特因田獵閱武遂飭邊備耳又曰天氣漸寒雖往復多不踰月士卒須令溫飽遂命行在戶部每卒給一月行糧仍加麥三斗爲乾餼命行在工部給胖襖鞵鞋○交趾宣化府土官知府陶季容等來朝貢方物自陳其祖父世襲水尾縣土官永樂四年因交趾歸附授本縣知縣五年殺賊有功陞歸化州知州十八年陞宣化府同知以不從黎利叛逆陞宣化府知府黎利遣頭目黃磊招誘季容執磊携印趨雲南臨安府蒙自縣以磊送總兵官給賞鞍馬諸物調率民兵導前鋒官軍至

水尾與賊將阮午等戰斬首四級又蒙功賞今舊地陷沒無所  
於歸謹同土官王簿孔文塞土吏陳孝忠頭目陶佃采朝 上  
嘉念之命賜銀帶衣物如武孝先例俾若京師李容等又陳顧  
若附近雲南河達州從之仍令有司各給房屋田地時加存恤  
毋致失所○總督香河等縣屯種指揮同知李三等奏今年五  
月以來天雨連旬河水泛漲滄沒屯地二百六十八頃禾稼無  
收命行在戶部蠲其子粒○戊戌命行在兵部及太僕寺選民  
閒所畜官馬給騎卒○己亥遣官祭歷代帝王○庚子祭大嶽  
風雲雷雨嶽鎮海瀆山川等神○遣官祭撰壽之神○琉球國  
中山王尚巴志遣使臣鄭義才梁回等貢馬及方物謝賜皮弁  
服及海舟○命行在後軍都督府都督僉事張應任行在前軍  
都督府○壬寅命行在兵部凡寬從文武官及將軍悉隸永樂

中例給腳力馬驢及其僮從悉給行糧○勅通州三河薊州遵化軍衛有司諭以將親巡邊毋科擾軍民以爲進獻道路可通行足矣毋集民修治○勅都督陳景先修滌河橋且諭之曰朕此行爲保民也今可度軍馬而已既度撤之母多費以重困百姓○命行在戶部自通州至遵化諸驛各備一宿糧芻○命兵仗局給將士介冑兵器○湖廣容美宣撫司尚長向大焘及兀也吾等衛女直指揮僉事保同等來朝貢馬及方物○巡按直隸監察御史林文欽言蘇州府吳江常熟等縣松江府華亭縣久兩山水衝決圩岸滄沒田苗命行在戶部驗數蠲租○癸卯命以師吏部尚書蹇義以保無太子以傳戶部尚書夏原吉以傳兵部尚書兼華蓋殿大學士楊士奇太子以傳工部尚書兼謹身殿大學士楊榮行在禮部尚書胡濙兵部侍郎王驥刑部

侍郎施禮工部尚書吳中郡察院僉都御史凌晏如太常寺卿  
兼翰林院學士楊溥太常寺卿姚友直大理寺少卿王文貴等  
各率其屬扈從○勅駙馬都尉廣平侯袁容少師隆平侯張信  
行在兵部尚書張本禮部尚書兼華蓋殿大學士張瑛戶部尚  
書郭致邦察院右都御史顧佐等若守北京大小事須同計議  
措置得宜不可怠忽遇警急機務當即行仍遣人馳奏  
○賞御馬監勇士一千七百三十五人綠色綿布○修內府海  
子播○交趾土官指揮同知武孝先等自陳首討黎利以敢勇  
應募征哨寧播孝先就陣被奮守節不降仍脫走歸又領兵於  
西陽古烈播等處殺敗寇象生禽僞將黎善等斬黎牙等首級  
并追殺至江賊溺死者無算晝夜設伏攻寨堅守城柵累給奇  
功勅合及受銀錠銀牌等物今幸至京又荷恩賜襲衣銀幣然



切思孝先父母妻子俱被虜利殺害欲乞以加陞用仍圖復舉  
上以付行在兵部尚書執奏所言切狀莫稽虛實遂寢○甲  
辰命行在禮部左侍郎李嘉大理寺丞艾良為正副使持節冊  
東城兵馬指揮宋真女為唐王妃西城兵馬副指揮莊才女為  
新野王妃○上召扈從指揮諭曰師行須預嚴紀律申號令衣  
甲必鮮明兵器必鋒利軍容必整肅毋縱士卒擾百姓為將取  
卒須愛之如子弟即卒事將如父兄矣古者將皆與下同甘苦  
故能得其心汝曹勉之○行在禮部以 車駕將巡邊奏定留  
守事宜一在京及在外諸司凡重事遣人馳奏常事奏本送各  
科候 車駕回類奏一各王府所進表箋禮部以送司禮監齋  
來之人即遣還一祭祀有司預期具奏待報行禮一遠夷人來  
貢馬送御馬監方物送北京會同館俟 車駕回類奏光祿寺

供贖使臣如例一法司所繫輕重罪囚俟車駕回具奏一扈從文職官給腳力馬一匹扈從官吏人等行糧馬騾驢草料支給如例○乙巳四川松潘等處軍民指揮司祈命等簇刺麻勺先結林證等來朝貢馬○賜朝鮮國貢使元閔生等宴○行在都察院右都御史顧佐奏蕭牆之外置舖夜巡提鈴連驛已是定制今臣每於四更來朝而長安右門諸舖提鈴已絕換軍熟贖軍民人等喧雜往來不復呵問怠慢不嚴請申明約束違者治罪從之○山東按察司劾奏前巡按監察御史李素至歷城與縣民孫讓女姦因娶為妾御史趙純亦娶門子鄭能妹為妾皆在按臨之地有玷風紀今素已陞福建按察副使純陞河南按察僉事事雖經赦終不可居風憲上曰按察司所言是命行在都察院逮治時素已卒惟純下獄○夜有流星大如雞

彈色赤尾跡有光出北斗魁西北行至濁五鼓有流星大如盃  
色赤光燭地起北河北行至北斗魁○丙午以巡邊告 太廟  
○申戒諸將道路所經毋擾害百姓違者處以軍律○是日遣  
首鋒先發 上謂安順侯薛貴曰爾所部將士多劾勦勞其已  
沒者官其子袁老者令以子代貴遂列奏故後軍都督府右都  
督馬朶兒只子哈失合都督僉事把禿孫保保等一百一十二  
人金吾右等衛先疾指揮等官支榮子成等一百二十一人於  
是特以哈失哈襲為後軍都督府右都督保保襲為後軍都督  
府都督僉事餘皆如例襲代○寬釋違衛指揮千百戶罪時總  
兵官都督譚廣奏違衛將士多坐小罪又繁法司缺官守備  
上命法司亟錄所犯以聞於是自雜犯死罪以下指揮千百戶  
楊興等百餘人悉命從輕罰贖得還職役○丁未 車駕發京

師度路河 駐蹕虹橋召諸將諭曰朕深居九重豈不自樂但朝夕思念保民故為此行今日度河道路所經皆水潦之後秋田無獲朕念民難閔焉於心爾將士敢有一毫侵擾民者必殺不赦遂命錦衣衛遣官巡察○戊申 駐蹕三河縣東之草橋三河縣官朝見 上諭之曰善撫百姓今年此處水潦為災宜以實聞當圖優卹之毋妄有科擾朝廷被汝撫字之寄民不失所斯汝能盡職否則有罰朕已嚴飭將士經過不得擾民有擾民者汝執以聞

大明宣宗憲天崇道英明神聖欽之昭武寬仁純孝皇帝  
宣宗錄卷之四十六



大明宣宗章皇帝實錄卷之四十七

宣德三年九月庚戌朔 車駕入薊州境內 上覽郊原平遠

山川明秀田疇刈穫之後頗有遺粟帶穗 上甚喜歎曰使他

處皆若此朕何憂焉 駐蹕薊州西之五里橋州文武官吏耆

老朝見 上進其州官諭之曰此漢漁陽郡也昔張堪為政民

有樂不可支之歌流聞至今古今人材性不相遠爾曹勉之又

進其耆老諭曰今歲斯郡獨豐稔無他虔善訓勵子孫務禮義

廉耻之行毋安於温飽而自棄也衆叩首而退 辛亥 車駕

至石門驛喜峯口守將遣人馳奏元良哈之寇萬衆侵邊已入

大寧經會州將及寬河 上覽奏曰是天遣此寇伐虎耳遂

駐蹕石門之東召問諸將諸將咸請擊之亦有請發徵兵者

上曰孽虜無能為也但謂吾無備故敢此來若知朕在此當驚

駭走矣今須擒之不可縱也然此出喜峯口踞陘且險騎可行若侯諸將并進慮緩事機朕以鐵騎三千先進出其不意擒之必矣或言三千未必足用上曰兵在指與扣不在多三千精兵足辨擒賊諸軍可後進遂決策親征○壬子駐蹕遵化縣簡精銳騎士三千人人二騎各持十日糗糧以俟○癸丑勅騎馬都尉西寧侯宋瑛武定侯郭玘豐城侯李賢都督龔傑曰今虜寇犯邊朕親征之特命爾等率領在營官軍暨駐遵化須紀律嚴明晝夜詳慎纖毫不可怠忽諸事同議停當而行軍士有故違踰令侵擾百姓及盜劫者悉斬以徇告人得實量給賞賚俟別有勅爾等移營前進○命文臣扈從者悉留營中○命大子少傅楊榮從上率諸將及所簡騎士發遵化駐蹕滌陽驛東○甲寅駐蹕喜峯口內○是日定遼右衛副千戶潘雄

遇虜寇力戰死。雄青州益都人，膂力過人，熟騎射。時總兵官都督巫凱等率兵赴興河，命雄為前哨。至禮帽山，遇寇奮力與戰。寇圍之數重，而援不至。遂中矢死。事聞，恤典加厚。○乙卯，車駕出喜峯口，夜軍士皆銜枚，飲甲韜戈，馳四十里，昧爽至寬河。昨虜營二十里，虜望我軍以為戍邊之兵，即悉眾來戰。上命分鐵騎為兩翼，夫擊之。上親射其前鋒三人，壹之兩翼飛矢如雨，射虜虜不能勝，繼而神機銃發，虜人馬死者大半。餘悉潰走。上以數百騎直前虜營，見黃龍旗，知上親在也。悉下馬，羅拜請降，皆生縛之。遂獲虜生口駝馬牛羊，輜重。○丙辰，斬其首渠。駐蹕寬河，分命諸將披山谷，擣虜巢穴。○忠勇王金忠及其甥都督把台奏請自效。上從之，有密言於上曰：虜其類也，往則不復矣。上曰：去留亦任所欲耳。朕為天下顧獨



少此二人耶果如其志欲去雖朝夕置於左右亦終去寧能久  
繫之耶如不欲沮其行則遣一人足矣 上曰朕以誠心待之  
遣即俱遣留一人乃使之蓄疑矣朕待此二人素厚大馬識養  
養之恩况人乎彼畜有以見報遂遣之○遣將士以所獲虜寇  
及駝馬牛羊輜重入闕○勅駙馬都尉西寧侯宋瑛等移營前  
進 駐蹕冷嶺○丁巳 駐蹕會州○戊午 駐蹕會州○以  
重陽節賜扈從文武官宴并饗將士 上既斬獲虜寇仍遣將  
士補其潰散之黨至是有俘獲還者 上喜大饗又親製詩歌  
慰勞之將士皆叩首抃舞○夜月掩壘壁陣西第二星○己未  
駐蹕會州○庚申 駐蹕會州諸將獲虜生口駝馬牛羊輜重  
至者自是無虛日○辛酉駙馬都尉西寧侯宋瑛等以行營官  
軍至○總兵官都督譚廣奏和寧王阿魯台遣使來朝貢馬已

至宣府命中官王賁馳往宣府勞之○壬戌 車駕發會州  
駐蹕鐵將軍店○遣中官孟繼等以牛虜奏 皇太后及遣書  
在京諸王勅諭北京文武羣臣○諸將請以所獲虜寇男子十  
餘歲以上者悉誅之 上曰虜誠可恨悉誅非帝王之仁凡為  
惡者誅其首足矣昨日戰陣所獲但非酋渠尚釋不誅况今衆  
穴中獲至者於罪固有差等合悉解縛給食○忠勇王金忠獲  
虜寇數十人馬百餘牛羊數百至 上喜命中官賜之內厨酒  
饌而飲以大金爵併爵賜之都督把台獲虜生口及馬牛羊繼  
至賜亦如之 上顧謂侍臣曰王者任人亦誠而已既用之即  
勿疑上疑之則下思保身免禍誰復盡心昨者如惑於人言豈  
不失此二人心侍臣言外夷之人亦不可任信太過 上曰外  
夷人亦未必盡不可信但在審處得宜耳漢用金日磾何不可

也○癸亥 上初命諸將索虜巢穴約畢至則班師至是召文武大臣諭曰諸將至者今十六七孟冬廟享之期不遠應早旋師羣臣有言諸將未至者宜少俟之廟享之期如迫請勅一親王代行禮 上曰事 祖宗以待將士敦重孔子言吾不與祭如不祭必不可代有如諸將更五日未至亦可俟耶今朕留將士二萬於此以俟未至者必以明日班師遂命都督任禮太監楊慶等率官軍二萬留俟諸將畢至則歸○甲子詔班師詔曰恭 天撫民無革夷遠邇之間除殘去暴本帝王仁義之心故拔稂莠所以育苗而斬蛇虺為其傷物善善惡惡明聖所同朕嗣 祖宗之洪圖主萬邦之兆庶志存康濟夙夜惟勤此以殘胡嘗為邊患爰於農隙躬歷疆陲飭勵將士嚴固防守九月初二日駐師石門遽得邊報胡寇數萬南侵豕突獸奔已迫近境

朕躬率鐵騎三千馳赴之將士比力協心咸奮一當百斬馘虜首萬餘級擒其酋長百餘人徑擄其巢穴盡獲其人口兵器馬匹牛羊糧重不可勝計腥羶蕩滌邊境肅清即日班師嗚呼矜愍弗戢醜虜何道於天誅武威載揚嘉兵豈予之所志庶幾攘夷之績用副保民之心詔告中外咸使聞知○ 車駕發鐵將軍店○ 駐蹕擺山站○ 乙丑 駐蹕偏嶺○ 丙寅 車駕入喜峯關 駐蹕關內○ 勅守邊諸將嚴固備禦曰毋謂已安雖安不可妄危防邊之道常如寇至則寇不至晝夜頃刻不可怠忽凡寇之能為人患者幸窺伺隙乘人之不虞慎之慎之○ 分遣近臣巡督關隘守備○ 守關指揮奏近關有猛虎放出為害命都督李王率壯士捕之 上從容與羣臣往觀虎為壯士所圍方被怒 上引弓一矢中之遂為壯士所擒 上笑曰亦為

生民除一患也○丁卯 駐蹕遵化縣東之雙城召諸將諭之

曰自通州至此今歲豐歉不齊大軍所過其民皆有供給之勞

朕夙夜在念今已旋師爾等宜約束軍士毋令侵擾國家畜軍

以衛民不縱軍以厲民朕即遣人巡察但違令擾民者及所隸

頭目皆同罪雖有功不宥又諭之曰將士不教日皆至家矣宜

各守法令毋自投憲網其以朕意悉諭之命監察御史回錦衣

衛官巡察官軍之擾民者以聞○戊辰 駐蹕石門驛○己巳

駐蹕薊州○庚午 駐蹕三河縣在京諸王及文武衙門各

遣官進平胡表至 上覽表竟以示近臣曰稱道過矣朕於虜

寇初不過嚴備之耳豈有意誅勦之而虜不悛其惡則朕安得

坐視民患而不救至於誅之擒之昏 天與 祖宗之佑將士

之用命朕何與力焉○辛未 駐蹕紅橋命諸將明日過通州

二十里駐營諸將皆曰明日可至京師止曰非謂遠不可至朕前奏皇太后以二十四日朝見言不可矣也命扈從之臣以半先歸○壬申駐蹕齊化門外二十里自車駕入喜峯關至京道路軍民男女聚觀所得虜口駝馬牛羊輜重連屬數十里不絕皆喜躍叩首呼萬歲○癸酉車駕至京師謁告太廟朝皇太后置酒上壽○甲戌文武羣臣上表賀平胡○朝鮮國王李禔遣陪臣趙潛等奉表箋貢馬及方物○賜湖廣施州衛前鎮邊忠信等宣撫司故土官舍人黃圮先等亦馬刺衛指揮僉事伯羊加元者衛指揮僉事兀里著波羅河衛指揮僉事阿同哥亦馬忽山衛指揮僉事卜得等鈔綵帟表裏有差○乙亥上御左順門諭在兵部尚書張本等曰比者畿內百姓多言今歲水勞田禾少收其募收馬有當陪補者皆宜寬假

以俟明年秋成之後。遼東建州衛女直僧綽失班等來朝貢

馬。賜琉球國使臣鄭義才梁田等鈔綵幣表裏有差仍賜義

才回冠帶及金織紵絲襲衣餘皆素紵絲襲衣。山東新城縣

知縣董諒奏老人岳景賢等四十一人欺公玩法前縣官不從

所欲為其陷害今愈肆志欺凌官府把持公事不納糧稅貽累

鄉民乞懲治之。上謂行在戶部臣曰。祖宗之世立老人正

如古鄉師黨正以教小民決小訟必須年高有德者為之近聞

此輩多不出於推擇悉是以賄求充妄訐上官侵害下民以私

滅公無所不至誠如知縣所言其令布政司治之以法庶儆其

餘。浙江於潛新昌嵯龍游四縣江西彭澤縣湖廣邵陽縣各

奏今年春夏以來民多缺食已將預備倉穀及存留各年糧米

給貸俟秋收償官各具其數上。直隸金壇當塗二縣各奏令

年五月六月積雨不止河水漲溢滄沒低田禾稼命行在戶部  
覆實蠲其租稅○諸將索虜未至者自是次第皆至其所得虜  
口孳畜不可計數蓋前此平虜之績為最盛云○丙子遼東采  
林山等衛女直指揮僉事兀兒帖木兀者等衛女直指揮僉事  
把思塔廣西東蘭州土官知州韋思銘遣叔農璇湖廣施州衛  
前盤順宣撫司故土官向堽杓督子大旺等來朝貢馬○賜阿  
倫等衛女直指揮僉事亦省哥等鈔紵絲表裏有差○順天府  
灤縣奏近霖雨滄沒禾稼民田乏食官府賣買銅鐵銀珠等物  
艱於辦紉命悉免之○河南開封之鄭州祥符陳留滎陽滎澤  
陽武臨潁鄆陵杞中牟洧川十縣湖廣沔陽州又監利縣各奏  
今年七月八月夕雨江水泛溢低田悉滄沒無收 上命行在  
戶部遣人覆視免秋租○丁丑四川松潘等處軍民指揮司麥



中等族長官司故副長官子勒卦路甲族長官司故土官子若  
紀節牟力叔族長官司故土官孫觀者召阿昔洞族長官司故  
副長官子合兒者祈命族長官司故土官弟巴少白馬路族長  
官司故土官子霍則勒都族長官司故土官子川標北定族長  
官司故土官姪那兒卜等貢馬○戊寅以明日下元節遣鄭王  
瞻竣祭 長陵 獻陵○賜湖廣容美宣撫司尚長向大憲及  
兀也吾等衛女直指揮僉事件同四川松潘等處軍民指揮司  
祈命等族刺麻勻失結林奢等鈔綵幣表裏有差○行在工部  
尚書吳中奏今年雨多河水泛溢衝決近郊橋道請發民修治  
上曰及特成橋梁則民不病涉其亟為之

冬十月己卯朔享 太廟○遣中官祭司井之神○庚辰宣諭  
各王府長史俾戒戢下人勿為非明日鄭王瞻竣等入謝又諭

之曰在下小人所為王當戒之吾與王同氣有至愛存焉人情  
愛未者必去燕愛苗者必去莠况吾兄弟至親之愛乎小人者  
其為害甚於燕與莠也戒之於早可以消患於未萌不早戒之  
及其著則難制矣○行在河南道監察御史張循理等劾奏都  
察院掌院事太子少保兼左都御史劉梈恃恩玩法大肆奸欺  
與貪淫無耻御史嚴暄等狎昵賊穢狼藉又與各部郎中主事  
許性汪潤等私相往來歌舞酣飲戲謔無度又每左辭事官出  
外先需白金五兩謂之出批銀及還復需五兩謂之銷批銀嘉  
興土豪馮本等坐殺人監候覆勘受賂縱其逃逸又縱其子  
幅開酒肆誘娼婦恣意淫佚盜用沒官器物及與書吏安中文  
道為非不止一端切詳覈職總風紀位列師臣乃不守禮法作  
奸犯科直正其罰以清憲綱 上曰朕亦知之第以 崇朝舊

臣姑隱忍之冀其能改乃不悅改益肆其志朕近日遣之巡視河道而改命顧儻者未嘗無意因命諸大臣議於是少師吏部尚書蹇義等皆言請如御史所劾遂命刑部遣人追觀○辛巳直隸常州府進私米且言今歲雨暘順調田穀茂盛上謂尚書胡濙曰今年各處多奏水火深慮百姓艱食常州獨言豐熟頗慰朕心濙對曰陛下愛民常願豐稔聖心所欲天必從之上曰天果從之豈有他處水潦之患亦是為善未至不能格天也自今朕與卿等更當勉之○壬午湖廣前定遠軍民府故土官知府黃踞什用子永四川馬湖府土官知府安潛泥溪長官司長官王鳳子輔故副長官王麟妾樊氏等各貢馬○夜有流星大如盃色赤尾跡有光出火微東垣東行至蜀○癸未韓王冲域奏平涼土薄天寒到國以來祿未不克於用軍拔以道

遠多逃亡聞長沙府治久閒遷園於彼實感且賜 上復書王  
曰歲祿不充蓋陝右頻歲無獲未免供給不及若年穀稍豐便  
可足用惟叔安意以俟之府中軍校未至者已勅兵部挨究遣  
來長沙之喻 先帝成命在上不敢渝越惟叔亮之○遼東沒  
倫河等衛指揮僉事卜顏丕哈等來朝貢方物○上諭行在兵  
部尚書張本曰緣邊關口皆外連寇境今天氣已寒須嚴謹邊  
防爾宜移文戒飭將士令用心無怠仍命御史給事中往來巡  
視有懈怠者罪之○賜扈從巡邊文武官員人等筵宴錢官每  
員鈔五錠舍人將軍校尉軍士人二錠辨事吏尉校匠人軍伴  
之筍人一錠○甲申遼東玄城等衛指揮僉事乃塔哈兀者前  
等衛女直指揮僉事安同等及西番僧納立巴等來朝貢方物  
○命陽武侯薛祿充總兵官遂安伯陳英為左叅將武進伯朱

冕為右叅將率領官軍鎮守薊州永平山海等處操練軍馬并提督各關隘口謹慎設備遇有賊寇相機勦捕所領官軍悉聽節制又勅祿等曰爾等出塞殺虜備歷辛勤因當休息但慮殘寇懷忿復來侵擾今且留爾等鎮守薊州遵化以備之須晝夜用心哨瞭各城堡關隘必嚴固防守不可怠忽○命都督僉事陳景先復守薊州永平等處○賜朝鮮國使臣趙瑋等鈔幣有差○榮河郡主薨主韓憲王之女嫁儀賓王榮訃聞命有司治喪并遣中官賜祭○乙酉 上謂羣臣曰古者師保之職論道經邦寅亮燮理不煩以有司之政今少師塞義少傅楊士奇少保夏原吉太子少傅楊榮皆 先帝簡畀以遺朕者而年俱高令無有司之務非所以禮之於是賜勅諭義士奇原吉榮曰卿等祇事 祖宗多歷年所忠謨謹議積効勤誠朕嗣統以來尤

資贊輔夙夜在念圖善始終蓋以卿春秋高尚典繁劇優老待  
賢禮非攸當况師保之重寅亮為職不煩庶政乃副倚毗可輟  
所務朝夕在朕左右相與討論至理共寧邦家職名俸祿悉如  
舊卿其專精神審思慮益致嘉猷用稱朕眷注老成之意欽哉  
○陝西故都指揮僉事蘇字羅弟賢烏思藏刺麻高僧答哩麻  
星吉等來朝貢馬賜朝鮮國世子六梁冠一先是朝鮮國王  
李洵奏洪武中蒙賜國王冕服九章陪臣冠服比朝廷適降二  
等蓋陪臣一等比朝臣第三等得五梁冠服永樂初先臣芳遠  
遣世子從入朝蒙賜五梁冠服臣切惟世子冠服乃同陪臣一  
等乞為定制上從之故有是命○賜遼東叅林山衛女直指  
揮僉事兀兒帖木兀者衛女直指揮僉事把思塔及建州衛女  
直僧綽失班等鈔綵幣表裏靴襪有差○夜有流星大如盃色

赤尾跡有光出扉西行至濁口丙戌 上命駙馬都尉趙輝豐  
城侯李賢分往兩京太僕寺印烙馬騾給民牧養凡二萬九千  
五百七十二匹 薊州永平等處守備都督僉事陳景先言自  
山海至薊州一千二百餘里闕寨一百一十三處守備軍必今  
天寒水凍無復泥濘可為限制恐虜寇乘間竄入請以緣邊山  
海永平等一十六衛所見在神機營操練馬步官軍就帶原闕  
永中暫留操備從之○夜有流星大如盃色青白光燭地起紫  
微垣內東北行至濁口丁亥迤北和寧王阿魯台遣使臣那塔  
失等四百四十五人來朝貢馬四百六十四匹○賜四川麥甲牟  
力劫阿昔洞等簇長官司長官舍人勒卦若兒鄭觀著召合兒  
者等及折命白馬路勒都北定等簇土官舍人巴火霍則川操  
那兒卜等湖廣前盤順宣撫司故土官舍人向大旺廣西東蘭

州上官知州韋思銘叔農旻等鈔絲幣表裏紆絲藥衣靴襪有  
差○戊子命行在工部造 采宮儀仗○烏思藏番僧刺麻巴  
節等來朝貢馬及方物○夜有流星大如盃色赤有尾光燭地  
出天津後有二小星隨之西北行至濁脫刺焚惑犯大微西垣  
上將○巳丑陝西行都司上官都指揮僉事魯失加遣頭目祿  
祿進馬且奏即爾加獲刺麻鎖南黑巴頭目綽來卜兒加等二  
百三十七帳男婦一千一百六十五人舊逃往苦薛等處今皆  
招撫復業○詔蠲江西德興鉛山銅場夫徭後先是二縣銅場  
歲役掬得五千餘斤所用職炭丁夫自備其諸差徭科徵皆不  
免歲額累虧至是勅有司悉免其雜役稅糧於附近輸納仍令  
廣信饒州徽州等府辦給鐵炭所需鐵炭之家免雜役之半稅  
糧則運輸南京淮安○昏剗月犯外屏西第三星月在南○庚



寅翰林院儒臣進講春秋竟 上曰聖人匡世之功憂世之心  
備見此書當時先王禮樂法度日隳廢亂臣賊子接迹而起有  
此書而後天下皆知尊周又曰孔子作此書以尊周為本蓋子  
乃以王天下勸齊梁之君何也侍臣對曰孔子之時周室雖微  
天下猶知尊周孟子之時七國爭雄天下不復知有周矣 上  
曰聖賢之心無非為天下生民之計蓋子時不有王者興何以  
解生民之塗炭遂賜講臣生命左右賜果茗○辛卯遣行在吏  
部右侍郎王讓兵部左侍郎曹本都察院左僉都御史李潛太  
理寺左寺丞楊復鴻臚寺右寺丞焦循分督直隸浙江江西秋  
租勅讓等曰卿等須視國事如家事潔己愛民勅慎不怠庶幾  
不負任使○ 上以琉球國中山王尚巴志朝貢摺謹遣使齎  
勅往勞之并賜王紵絲紗羅錦段○壬辰行在都察院奏軍官

犯罪繫獄有病者請醫治療。上因謂右都御史顧佐等曰：祖宗待軍官恩意特厚，雖已得罪，猶思保全。此成憲當百世守之。○夜月犯昴。○癸巳，命行在吏部增設江西、饒州府、德興縣廣信府鉛山縣丞各一員，專管銅課，仍勅江西布政司量設銅夫免其雜差，使專力浸辦。其迺年所欠銅課悉與蠲免。○曉刻月生五色雲，鮮明。甲午，賜和寧王阿魯台等處貢使宴。○乙未，巡撫蘇松等處大理寺卿胡槩奏各部累差郎中主事等官催督蘇松及浙江諸郡造紙買銅鐵等物，今年蘇松及紹興等府水滂民飢，乞停買諸物。所差官員悉取回京。上命六部除軍需所用外，餘悉停止。所差官各令還京。○丙申，雲南富州故土官知州沈紘經子政遣把事周懋烏思藏等處高僧孛兒只藏卜來朝貢馬。○丁酉，勅總兵官陽武侯薛祿等及遼東總兵

官都督僉事巫凱謹邊備○行在吏部侍郎郭璉等引奏郎中  
張寶黃安又參議蕭常府縣等官考滿稱職者五十人平常者  
八人俱未九年例應復職 上諭寶等曰國家黜陟之典所以  
要成功爾等其悉加免以副任使○戊戌迤北和寧王阿魯台  
遣使臣多赤等貢馬且歸清平伯吳成家鶴初成等守興和日  
事田獵而忽守備虜伺其出乘虛入城掠其妻孥以去至是因  
朝貢之使并遣來歸○賜湖廣前定遠軍民府故土官舍人黃  
永四川馬湖府土官知府安濟況溪長官司舍人王輔故副長  
官王麟妾樊氏等鈔有差○大雪 上喜謂侍臣曰今年四方  
多言水旱生民艱食朕恒為憂惟冀 天地垂佑雨暘及時庶  
豐稔可望今冬初即見雪其來歲有秋之兆乎然欲昭格 天  
心朕當日加兢惕因賦雪詩以示不忘詩曰上冬暢月月維霽

木稼既納農滌場順時布令循典常敷命有司謹蓋藏肆備邊  
圍寧封疆祈年天宗致予誠日維戊戌墜五冀豐隆巽二相激  
揚太陰冥闕空青六出皎皎未禎祥霏素糝潔皆華萼大地  
一色疑白肪瓊樓玉宇擁相望八表六合含輝光下民遠邇忻  
洋洋吹笙考鼓歌樂康未茲慶兆宜豐穰相呼相勸趨耕桑嗟  
予非德承穹蒼萬機乾業寧敢忘間因志喜形詩章○已亥四  
川龍州土官知州薛忠義遣把事楊進原等貢馬○賜遼東沒  
倫河玄城等衛指揮僉事卜顏不哈乃塔哈兀者前等衛女直  
指揮僉事安同等陝西故都指揮僉事蘇字羅弟貴烏思藏剌  
麻答哩麻星吉巴郎等及西番僧納立巴等鈔絲幣表裏紵絲  
襲衣靴襪有差○太子少保兼左都御史劉視至命左右以監  
察御史擇章示之觀自陳歷事 太祖皇帝 太宗皇帝 仁

宗皇帝累官至左都御史加太子少保二俸并支 皇上嗣登  
寶位常加賜賚臣日夜孜孜思固補報今右都御史顧佐按求  
臣罪主令各道御史糾劾又通書吏安中妄指臣受贓等罪伏  
望 聖上憐憫察情明辯庶無冤枉 上曰臣下密奏觀罪者  
一人朕以其舊臣未忍罪之今尚欲文過耶遂出臣下密奏示  
觀蓋言其前後鬻獄受白金者千餘兩觀不能隱昏引伏法司  
議觀所犯皆枉法於律應斬 上命下錦衣衛獄○夜有流星  
大如盃色青白光燭地起臉蛇西行至濁○庚子命內官郭敬  
同武安侯鄭亨鎮守大同○月生左右月色黃赤鮮明○癸卯  
琉球國中山王尚巴志遣使臣南者結制等來朝貢馬及方物  
○監察御史何善生巡按廣東勞役軍民為僧建寺又采驛枉  
道還家辭為民○甲辰 上諭行在工部臣曰今天氣已寒諸

衛軍士用工七月之上未得代者甘罷遣還○乙巳烏思藏及  
判卜等族僧扎宗等來朝貢馬○巡按山西監察御史沈福  
言澤州心水蒲靈石等處八月早霜禾稼不實民食艱難皆採  
拾自給 上命行在戶部議賑恤之○丙午勅總兵官陽武侯  
前祿父都督陳景先曰得永平府奏胡寇至虛龍陳家莊劫掠  
人口馬牛爾等宜嚴飭官軍晝夜瞭望謹慎陟備若寇再至須  
盡殄乃已失機慢事必致無救○遼北甃鞏阿魯不的來朝貢  
馬奏願居京自效命為所鎮撫賜冠帶金織襲衣綵帶銀鞍綿  
布鞍馬仍命有司給房屋器用如例○行在廣西道監察御史  
胡啓先也受賄薦舉不當罪為民○行在陝西道監察御史趙  
倫巡按湖廣需索官民羅綺等物又收買人口又與樂婦奸事  
覺 上命請改遼米○丁未命都指揮同知蔣貴率領官軍及

神鏡手守密雲

大明宣宗章皇帝實錄卷之四十八

宣德三年十一月己酉朔行在欽天監進宣德四年大統曆

上御正朝受之給賜諸王文武羣臣頒行天下○朝鮮國王李

禔遣陪臣李恪等奉箋及方物賀皇太子千秋節○庚戌授

皇妹慶都公主冊命彭城衛指揮焦毅弟敬駙馬都尉賜之誥

命○辛亥賜逸世和寧王阿魯台使臣那塔失等四百四十五

人銀二萬六千三百錠綵幣一千三百三十五表裏絹六十三

匹○中書舍人陸伯綸言蘇州府常熟縣七浦塘與揚誠湖連

接東西相距百里灌溉常崑山二縣田計納稅糧二十餘萬石

七浦塘因潮往來河港淤塞水不通流致連年禾稼枯庠無收

乞今受利入戶出力間俊從之○陝西按察司副使胡永成奏

岷洮二嶺官軍作糧俱是西安等府人民送納出路險遠常年



惟齋布絹等物至鞏昌諸處易米上倉亡損之人私通官吏虛  
買實收其官吏人等習以為常朝遣家人出境邀接通同作弊  
又或販賣私茶或在途盜劫深為民害緣鞏昌至岷洮不下五  
百餘里山林深僻俱無守禁官司乞於中途三岔口設巡檢司  
巡捕盤詰軍民俱便 上命行在戶部兵部即如所言之○  
湖廣武岡州江西星子縣各奏去歲水澇不收今年春夏民皆  
缺食已發預備倉控賑之志具數聞○廣西思明府土官知府  
黃珣奏憑祥縣歲凶民飢命發龍州官倉糴米賑之○壬子勅  
總兵官都督僉事巫凱及掌遠東都司事都督僉事王真等整  
飭遼東屬衛軍馬提督各城池屯堡點閱隘謹慎提備嚴加哨  
瞭遇有寇至相機勒捕○四川平夷長官司通事文友得廣西  
上思州土官知州黃智永遠頭目黃安等陝西階州阿目等簇

判麻納麻堅皆等來朝首馬○賜烏思藏等虔高僧采兒只藏  
上等四百五十六人絲帶表裏有差○癸丑以明日冬至遣鄭  
王瞻竣祭長陵獻陵○甲寅冬至節上御正朝受朝賀  
大宴文武羣臣及四夷朝使皇太后皇后與文武羣臣命  
婦朝○乙卯烏思藏花言斌等簇刺麻簇頭南哈亦什土官百  
戶扎巴星吉馬巴孫普僧宗竹剎等來朝首馬○丙辰陝西岷  
州衛判答等簇生番頭目官着尚等洮州衛哈倫簇土官百戶  
結祿等來朝首馬○賜雲南富州把事周懿等鈔○丁巳初行  
在都察院右都御史衙門佐曰都察院之任所以整肅紀綱糾察  
奸弊伸理冤抑裨益治道比亦爾居是任所當夙夜盡心以副  
簡推然各道御史尚滿稽習之弊朋比於下有扶公法以報私  
忿深文刻薄有重私情而忽公法肆無忌憚爾一時不察其奸

為所欺侮自今宜詳慎有察凡事務致明審以合公道毋縱有  
罪毋枉非辜庶幾刑罰公平不負朕之所望欽哉人勅十四道  
監察御史曰御史之職必先正己心而後用法不觸比憲綱不  
清皆由所用邪正混淆朕簡用顧佐為都御史各道御史不才  
者多已黜罰然其間積習之弊猶未盡革或溺私情而賣公法  
或假公法以報私怨鞠訊之際任情煨燂深文羅織人寧不究  
自今悉宜秉公心行公道無欺長官無徇私意無枉平人庶副  
朝廷任使如或不遵必罪不恕欽哉○陝西北州衛朵哱簇番  
僧剽已星吉等來朝貢馬○戊午湖廣鎮南長官司副長官譚  
汝銘遣祀事驢蠟首馬○迤北鞑鞏罕罕來歸奏稱居京自放  
命為總旗賜貯絲襪衣鈔布仍命有司給房屋器血如例○賜  
迤北和寧王阿魯台使臣多赤等四川龍州祀事賜進京等鈔

綵幣表裏靴襪有差。○己未 皇太子千秋卽免百官賀禮。○  
夜有流星大如雞卵色赤尾跡有光出軒轅西北行至雲中。○  
庚申 上命行在禮部凡王府官進東宮箋者賜錢二百錠。天  
下諸司進者賜六十錠。○湖廣前廣平安撫司故土官安撫向  
顯祖孫大彪陝西岷州衛班藏等劾刺麻煙丹亂等未朝貢馬  
平江伯陳瑄奏運過木數 上諭行在工部尚書吳中等曰此  
皆勞民所致卿等無以為易已運至者必如法苦蓋勿令損壞  
今天寒水凍亟須散遣軍夫工程有未畢者亦俟春暖又諭中  
曰今已進矣即遣人馳驛諭之。○總兵官都督蕭授奏貴州都  
司都指揮僉事李政等招捕都勻衛豐寧長官司賊首羅文蕩  
貴州宣慰司各把寨苗人單子保等俱向化復業惟羅文蕩稔  
愆日久今械送京師請正其罪以警其餘。○辛酉賜琉球國使

臣南者結制等鈔綵幣表裏有差○浙江杭州府奏臨安新城  
二縣今年秋冬人民缺食已將預備倉糧一千三百九十六石  
有奇驗口給賑○壬戌巡按山東監察史包德懷奏遼東廣寧  
後屯衛西長嶺鞋賊入寇剽掠傷人備禦都指揮李敏及提督  
瞭望千百戶皆約束不嚴請罪之 上諭行在都察院臣曰軍  
官備邊但守常法以保境安民何能謹嚴豈有外患古之良將  
雖安閒之際常若臨敵不敢以怠今失機皆由主將弛令不嚴  
軍政不修所致其令御史治之如律○甲子賜烏思藏及剌卜  
等族番僧扎宗等鈔綵幣表裏有差○乙丑遼東自在州鞋官  
千戶舍人李開原保迤北和寧王阿魯台部下都督同知失控  
千戶字羅帖木遣使臣把兒台等未朝貢馬○行在都察院右  
都御史顧佐奏近江西鄱陽縣民董復安建言鈔法阻滯請禁

使錄不拘舊例凡交考錄一錢者買者賣者皆罰鈔一千罰一兩者罰鈔一萬前者仍各追免罪鈔一萬前者入言官吏人事貪贓者原其害民之情非止一日偶因一事而發耳若止追一事之贓則彼為得計之官夫貪贓者若受鈔則仍追鈔受贖物者估其直皆十倍罰鈔受錄者每兩罰鈔一萬前者仍追免罪鈔一萬曾庶可禁止奸貪民間鈔漸少必通行不滯矣戶部議從其言臣竊見夫易錄而已有榜例今欲追鈔并官吏受贓者亦計物估簡追鈔可從其議其追犯人免罪鈔一萬罰緣犯有輕重罪有不同難一槩追罰宜免追從之○晚刻太白犯罰星○丙寅連東東亭衛女直指揮僉事霖因塔等來朝奇馬及方物○日生左珥色黃赤鮮明昏刻歲星犯壘壁陣丙第六星○丁卯暘和寧王阿魯台使臣宴○監察御史張循理有罪下獄元先是

河南道監察御史趙儼往河南清理軍伍非法杖死無罪九人  
事發非應死監候委決循理與儼故同僚一日其酒呂儼出獄  
共飲飲罷儼束問逃逃行在都察院官奏循理縱死因 上命  
行在錦衣衛鞠之至是以病死獄中 戊辰陝西岷州衛好地  
平等漢番僧谷中等竊馬 命御史巡察皇城四門時四門官  
輩玩法怠弛凡官吏工匠無閤防牌者恣其出入不問而民間  
有進納內府財物者故生事留難必得賄賂乃得入事聞 上  
諭都御史顧佐曰守門官軍違法害民如此其揭榜曉示若不  
事前警悉虛重刑常以御史一自往來四門巡察者為全 行  
在兵部尚書教本言茶陵衛指揮俞事陳倘鄭某頭撫王昂十  
戶白真本試百戶李剛等知本衛指揮王奇同谷度人謀逆谷  
德不首伴應斬 太子皇帝特宥其死謫戍交趾立功復遇赦

擅復職亦有已先令子弟襲者犯知情謀逆雖經赦不應復職請罪之 上曰前罪已赦後罪但擅復職姑宥之謫戍遼東立功○夜有流星大如碗色赤有光出天苑東南行至濁○已已命太師英國公張輔等撥軍修治南海子周垣橋道○庚午命鎮守甘肅總兵官都督僉事劉廣及陝西行都司於簡衛選揀精銳官軍一千人各備馬及軍器聽太監王安率領朔宣德四年二月十五日以前京○進北和寧王阿魯台使臣多赤等陸辭 上以阿魯台摠誠歸化遺曹者赤帖木兒等與多赤偕行齎勅撫諭仍賜錦綺器物視昔加厚曹者赤帖木兒初為錦衣衛帶俸指揮僉事至是陞指揮同知以行○辛未 上御左順門謂行在禮部尚書胡濙等曰昨日廣宗縣奏訓導生員囑公事通明朕朕已令法司建問朝廷建學養士望其成才以資任



用訓導居師表之任正當謹守禮法以率諸生使人皆如此賢  
才何由得成卿等宜申明舊章嚴加戒飭以副朝廷教養之意  
上迎朝御文筆殿戶侍臣問曰國家恒欲人才足用官使得  
人而才每不足官或曠職何也侍臣對曰人才出自學校學校  
興不忠無人才人才衆多則官得人矣 上曰今國家郡邑有  
學以育秀民京師有學以升其成才者而復命之庶事諸司考  
其材器之高下而用之立法可謂備矣然 祖宗時咸稱得人  
聞比年生徒多不務學徒記陳言為出身之資及授以職訖無  
實用是蓋師範不得人也唐陽城為國子師斥諸生之久不省  
覲者於是人知孝宋胡瑗教授蘇湖置經義治事齋當時成就  
者多此政古人所謂師嚴而道尊道尊而官正侍臣對曰誠如  
聖諭○壬申命故金吾右衛指揮回知劉演弟全金吾後衛

指揮同知王輔子貴襲職以府軍後衛指揮僉事呂凱羽林前  
衛指揮僉事聊聚老疾命凱子斌聚子禹代○賜朝鮮國使臣  
李恪等鈔綵幣表裏有差○山東都司指揮使吳旺都指揮同  
知張鐸陝西都司都指揮使孫霖大寧都司都指揮僉事潘禮  
各以老疾致事○行在禮部奏都指揮郝茂等亡歿例應賜祭  
從之○癸酉命按察使邵玘為南京都察院左副都御史鄭辰  
為南京工部右侍郎參政段民署南京戶部右侍郎李衡署南  
京兵部左侍郎按察副使成均署南京刑部右侍郎僉事榮震  
為南京太理寺丞按察副使魏源署行在刑部右侍郎僉事傅  
啓讓為行在太理寺少卿先是 止以兩京六部都察院堂上  
官多缺命廷臣察舉方面官之廉公才幹者得玘等及江西參  
議劉中敷九人遣人召之中敷以運糧最先至會山東泰方面

缺官遂陞山東叅政玘等八人相繼皆至 上命行在吏部曰  
官宜慎簡不可輕授明試以功此唐虞法若品秩相等即實授  
不然且令試職觀其才猷設施然後授之於是玘辰震啓讓皆  
實授餘皆著事時啓讓先已食正四品祿○賜廣西上思州頭  
目黃安四川平夷長官司通事文友得等鈔有差○行在錦永  
欄帶倅指揮鍾法保奏臣廣州東莞縣大步海人知傍海橫沙  
潭石等處皆有珠池產大珠請差內官同往採 上諭錦永衛  
指揮王節等曰此小人欲生事擾民以圖己利即收繫於獄○  
甲戌 上御奉 門諭行在工部尚書吳中等曰夜來風氣已  
寒因念邊軍尤苦凡關口煙墩守瞭者即各與毛毯狐帽其舊  
給已敝者悉以新者易之○賜階州阿目等簇刺麻網麻堅皆  
等鈔絲幣表裏有差○乙亥陝西階州利簇刺麻番僧阿竹等

未朝貢馬○監察御史楊曷朱恩俱九年考滿行在吏部言曷  
練達政務惠政績未著上曰考績黜陟所以示勸懲興事功  
果得其宜則能者益勸中才亦將自勉曷仍於風憲陸用惠循  
常例而已於是以前為浙江按察僉事惠為太僕寺丞陸貴州  
思州府通判檀凱為應天府治中黜四川道監察御史曾令得  
為浙江温州府推官江西道監察御史陳鯨為江西贛州府推  
官皆以都御史言其不任職也○賜陝西岷州衛判答等簇生  
番頭目官著肖兆州衛哈倫朶咂等簇土官百戶結祿番僧劄  
巴星吉烏思藏花言城等簇刺麻簇頭南哈亦什土官百戶扎  
巴星吉馬巴簇番僧宗竹劄等三百二十一入鈔錄帶表裏金  
織紵絲襲水靴襪有差○丙子陝西西寧衛章咂簇土官指揮  
僉事切帖兒加鞏昌府僧綱司禪師銷南巴遣刺麻工旨堅賢

岷州衛刀劄等獲番僧頭目南峪谷中等未朝貢馬○賜湖廣鎮南長官司把事驢蠟前廣平安撫司故土官舍人向大彪等鈔有差○行在吏部左侍郎郭瑾奏巡按御史考覈在外郡縣官之才識平常者皆送至部宜有點罰以示激勸 上謂瑾曰平常者才不及也如無贓罪但降用之其郡佐及縣正佐降雜職若未入流則改除邊遠不足罰也又諭瑾曰凡考覈未者爾亦須審察其中或有堪用當量高下授職無槩枉之○丁丑擢廬陵縣知縣孔文英黃州府學教授趙奎霍州學正張呆德清縣學教諭尹銓蒙陰縣學教諭余濯山陰縣學教諭袁海蒲圻縣學教諭朱鑑萬載縣學教諭董臣新樂縣學訓導李懋富順縣學訓導楊禧南陽縣學訓導王晉遂安縣學訓導張政新建縣學訓導方端臨安府學訓導白圭鄭州學訓導潘岳江都縣

學訓導張勛進士揭稽謝衡施信胡器鄧榮高舉熊興張琦章  
聰王謙丘俊監生強敏梁幹趙敏郭原陳懋程富張鏞李志唐  
琛皆為監察御史文英繼行在浙江道奎李懋行在河南道舉  
翼琛行在福建道杲衡信陳懋行在江西道勛榮行在廣東道  
聰讓鏞行在廣西道禧俊原行在四川道鍾富行在陝西道海  
質岳行在雲南道政楷行在湖廣道濯琦行在文陞道瑞圭志  
行在山東道強敏幹趙敏行在山西道匡器行在貴州道先是  
右都御史禰佐奏舉進士監生及聰還知縣教官凡四十三人  
才堪御史○上令於各道歷政三月考其能否第為上中下三  
等以聞至是佐考按上等知縣孔文英等十二人中等教諭楊  
倍等二十四人下等並教等七人 上命上等中等俱為監察  
御史下等再歷三月考其賢否具以名聞因謂佐曰人才高下

不齊使練習之久加以考察彼將自奮而皆可用矣○賜朝鮮國使臣李恪等宴○賜陝西班蕪等簇刺麻煙丹皂等鈔絲幣表裏紵絲襲衣靴襪有差○藍田縣主卒主保安懷信王之女嫁儀賓徐榮訃聞遣中官賜祭命有司治葬事○中軍都督府都督同知陳真卒真湖州長興人初襲父職為駝騎前衛百戶以功陞濟陽衛千戶累陞至中軍都督府都督同知至是卒遣官賜祭賜賻贈給舟師其喪葬長興○夜有流星大如雞彈色黃赤有光起與魁東北行至游氣

大明宣宗皇帝天崇道英明神聖欽文昭武寬仁流慈于章曰王忠

大明宣宗章皇帝實錄卷之四十九

宣德三年十二月戊寅朔 上省郊祀牲○己卯日主文章色  
黃赤鮮明○庚辰修盧溝橋凌水所決河口○辛巳京顏衛鎮  
撫脫歡陝西岷州衛頭卜等簇番留領占星吉河州衛故土官  
千戶宗思又子敬等來朝貢馬○行在工部言通州嬰兒渡河  
決水從東注而正河淺澁舟行不便請發民修築故之○壬午  
賜建州衛舍人阿里因納遠來自在州鞮官舍人李開原保東  
寧衛女直指揮僉事賽因塔等鈔錄幣絹布紵絲襪衣履帽靴  
襪有差○總兵官平江伯陳瑄奏今年應賞運糧官軍鈔未給  
請俟明年春運糧至京給之 上謂行在戶部尚書郭敦曰一  
年勤苦賞以酬勞豈可候明年教言淮安山東德州等處官庫  
所收秋多請遣官會同平江伯如例支給從之○癸未撤馬兒



罕回回打刺罕亦速等奉朝貢馬○賜陝西岷州衛好地千等  
簇番僧咨中秦州衛階州利簇刺麻番僧阿竹等鈔綵幣表裏  
有差○甘肅總兵官都督僉事劉廣奏永昌衛指揮梅英莊浪  
衛指揮方柔提調守備不嚴 上命姑記罪令專巡捕番寇如  
再失機必罪之○甲申山西平陽府奏崔絳言臨汾翼城永  
和汾西蒲浮山鄉寧大寧石樓襄陵太平萬泉稷山沁津岳陽  
安邑猗氏絳垣曲趙城臨晉二十五州縣春夏不雨種不及時  
至八月中嚴霜菽豆死田無收穫百姓飢困 上謂尚書郭敦  
曰宜速遣人賑恤凡各處災傷之處皆寬徭緩賦以蘇息之○  
駙馬都尉廣平侯袁容卒容育諱鳳陽人父洪稔 太祖征伐  
有功官至都督洪武中容以選為燕府永安郡主儀賓 太宗  
靖內難容侍 仁宗守北京 太宗既正大統進永安為公主

容亦進駙馬又以守城功封廣平侯食祿一千五百石凡車  
駕出外皆命容守北京容通敏有才智莅事周密而謙和接物  
至是卒追封沂國公謚忠穆遣官賜祭命有司治喪葬子禎襲  
謙和如父而孝友廉慎過之○乙酉臘郎賜文武宰臣宴○賜  
和寧王所部都督失捏干子孛羅帖木所遣使臣把兒台等鈔  
綵幣裘裘金織紵絲縠衣等物仍命把兒台齎勅及綵幣裘裘  
賜孛羅帖木○戊子廣西田州府故土官知府岑祥子紹遣頭  
目黃聰湖廣散毛等宣撫司故土官黃楚子敬瑄等來朝貢馬  
及方物○己丑曲先等衛都指揮回知散即思安定王亦攀丹  
都指揮會事奈牙等遣鎮撫失列門等陝西西寧衛即爾加篾  
刺麻頭目鎖南黑巴幹來卜兒加遣頭目祿祿等來朝貢馬○  
庚寅廣西思恩州土官知州岑英遣弟取湖廣施南宣撫司同

知軍敬遣把事黃玘等來朝貢馬前石南道萬戶府故土官知府覃原子惠貢馬奏乞襲職○遣內官柴山等齎勅使琉球國賜其王金織紵絲紗羅絨錦○四川寧都司事都督同知李敬奏叙州府高珙筠連三縣與蠻寨接境蠻寇不時出劫掠詣於筠連縣設三公巡檢司高縣設江口巡檢司珙縣設洞門巡檢司各置弓兵八十人以四川三司所問囚徒充又珙縣來堡宜令叙南衛添撥軍士七十名與原撥三十名相兼守備為宜從之○癸巳 上以胡虜皆遣人朝貢緣邊重地皆有戍兵而總兵官陽武侯薛祿等尚恭陟於外宜令休息遂召祿等還令都督陳景先率備禦官軍嚴戍守○遼東總兵官都督僉事巫凱奏昨遣金吾右衛指揮使劉端迤北巡哨端畏難逃回廣寧不行請罪之 上謂行在兵部尚書張本等曰軍官巡邊自是常

職今食三品祿不思效勞猶脫身退避何以令衆其令凱治之  
如律○陝西按察副使胡永成奏岷州衛指揮千百戶龐敬等  
盜賣鳳翔等府秋糧六千一百餘石虛出實收悉應提問 上  
曰朕慮邊餉不足常切留心今奸弊如此軍士何所仰給古云  
軍窳未炊將不言飢今但務肥己不恤士飢此豈可用命悉治  
之如法○甲午定儀賓班次先是寧王權言慶賀行禮拜進表  
箋三司官員皆依品秩序列獨儀賓有定制 上命行在禮部  
考定其儀至是尚書胡濙奏臣按武禮制郡主儀賓秩從二  
品縣主儀賓秩從三品郡君儀賓秩四品縣君儀賓秩從五品鄉  
君儀賓秩六品若遇行禮宜序於同等官員之左 上曰禮不  
喻等儀賓雖親當守定分此為定制其頒行遵守○朝鮮國王  
李禔遣陪臣柳殷之等來朝貢方物賀明年正旦○土魯番城

都督鎮恪弟猛哥帖木兒來朝貢馬命為指揮僉○行在山西  
道監察御史張敬親喪服闋改行在山東道○乙未陝西岷州  
衛刺麻扎卦迷南烏思藏刺麻落小等來朝貢馬○賜陝西岷  
州衛刀劄等族番僧頭目南哈谷中領占呈吉等河州衛故土  
官千戶宗思父子敬宗顏衛鎮撫脫歡西寧衛章恆族土官指  
揮僉事切帖兒加鞏昌府僧綱司刺麻工葛堅贊等鈇綵幣表  
裏有差○行在兵部奏北京行都督府都督同知徐甫掌四川  
都司都督僉事山雲總兵鎮守廣西今行府已平宜改注他府  
上命注於右軍都督府○增設武功左衛中左中右中中中  
前中後五千戶所時武功左衛言績收逃匪編軍一萬五百餘  
名軍多事劇請如武功中衛例增設五所命行在禮部給印兵  
部除官兵部奏於羽林等衛選官改授從之○行在刑部都察

陀奏決重囚 上命公侯伯都督尚書都御史同審覆諭之曰  
古者斷獄必訊於三公九卿所以合至公重民命卿等往同審  
覆毋致枉死太師英國公張輔等覆審遂奏斬枉者五十六人  
上命法司重與勘實又諭之曰殺不辜者縱免人責難逃鬼  
誅不可不惧○雲南布政司承差洪溢奏車里宣慰使刀弄因  
與族叔靖安宣慰刀雙益相讐殺棄地投順老樹請差官同往  
招撫 上謂尚書胡濙張本等曰蠻夷讎殺帝事豈可輒聽小  
人之言其令黔國公與三司計議處置○丙申命故山東都司  
都指揮僉事湯銘子勝襲為通州衛指揮使金吾右衛帶俸都  
指揮僉事郭得原子永襲為本衛指揮僉事金吾前衛指揮使  
朱雋叔能羽林前衛指揮同知李俊弟忠府軍右衛指揮同知  
鄭瑜子文錦水滸衛指揮僉事馬貴子廣金吾右衛指揮僉事奉

敬姪斌俱襲職。○修南京各衛倉命襄城伯李隆以各衛軍及餘丁應天等府以丁多人匠為之。○巡撫浙江大理寺卿胡濙等械擒賊平康之黨三百人至京康海鹽縣人初名史慶真有罪充軍而逃改名平康居崇德縣交結豪橫多畜僮奴強奪民田劫掠財貨以是家富造居室器用僭擬王公鄉人忤其意者輒殺之其怨家訴於巡撫監察御史尹崇高遣人捕之康孛家逃會赦還糾集流民并千戶范信等凡八百餘人奪民船五十餘艘備弓矢銃砲鉦鼓嚴師令夜劫怨家執其親屬鄰里盡掠其家財燒其廬舍驅逐其子女以去遂大肆劫掠旁近民皆驚走郡縣莫能制檄奏請捕之上命錦衣衛遣官與察督巡按御史浙江三司捕之康復逃至是獲其黨至上諭三法司官曰平康罪必不宥但一人之惡而累衆如此其中豈無善良註

誤者卿等宜與之辯無罪者不可濫刑有罪者不可作免必須得實仍令御史三司捕平康○丁酉勅行在錦衣衛指揮任啓叅政葉春監察御史顧瑛回太監劉寧往鎮江常州及蘇松嘉湖等府巡視軍民刑病殄除克惡以安良善凡軍衛有司官吏旗軍里老并土豪大户積年逃軍逃囚逃吏及在官久役史卒倚恃豪強挾制官府侵欺錢糧包攬官物剝削小民或藏匿逃亡殺傷人命或強占田產人口或污辱人妻妾子女或起滅詞訟誣陷善良或糾集亡賴在鄉劫奪為軍民之害者爾等即同大理卿胡榮體審的實應合擒拏者不問軍民官吏即擒捕連家筭撥官軍防護解京有不服者就本都司及所在衛所量遣官軍捕之仍具奏聞爾等尤宜公動庶慎夙夜盡心以副委任毋徇情枉法縱釋有罪濫及無辜并遣勅諭緊○陝西岷州衛



這多等簇番僧頭口丹卜監藏烏思藏番僧着即堅藏等未朝  
貢馬○賜撒馬兒罕回回打刺罕亦速等四十六人鈔綵幣表  
裏襲衣等物有差○日上生背氣一道色青赤鮮明○戊戌四  
川馬湖府蠻夷長官司故長官文襲子呂保等未朝貢馬○直  
隸保定府定興縣奏本縣逃民及充軍死絕人戶所欠地畝錢  
草七萬餘束今田稼無收乞除豁 上命行在戶部除之○已  
亥陝西河州衛番僧思曼監監叅等來朝貢馬○釋免工匠老  
幼殘疾二百七人○庚子立春順天府官進春 上御正朝文  
武羣臣行賀禮賜宴罷朝御左順門行在禮部尚書胡濙等侍  
上曰獻歲發春生物之始人君當修德行仁以承天意卿等  
宜同此心輔朕不逮榮等頌首受命○行在戶部尚書郭敦奏  
在京文武官吏片俸折支數多請自宣德三年十二月以前

除山後無原籍者依例在京補支其餘俱令於原籍官司課程等項鈔內陸續支給之。○行在戶科左給事中許侃等奏六科俱合增蓋板房如南京六科之制。上曰近日小有營建言者多謂勞民朕皆從所言已之况六科規制已定且歲終當息民亦姑已之。○行在都察院奏貴州道監察御史嚴士安受賊故出都指揮錢義先罪於律受賍枉法懸死於新例應運甄畢日為民命從新例。○廣西總兵官都督僉事山雲奏率兵於慶遠府忻城等縣山峒擒獲賊首譚團等斬首一千五百餘級歸所掠軍民男婦三百八十五人馬一十七匹。○辛丑陝西西寧衛等處剝麻絛受等廣西泗城州女土官知州盧氏遣族人岑泰利州土官知州岑顏遣頭目羅鸞湖廣谷美宣撫司故土官黃萬通子隆傑來朝貢馬及銀器方物奉使瓦剌都指揮毛哈

刺等回京貢馬○賜朝鮮國使臣拂殿之等宴○敕致仕會寧伯李南哥曰卿自洪武初歸我太祖高皇帝又事太宗文皇帝是以皇考臨御首進爾子英之官朕嗣位以來英亦能擒殘擒寇肅清道路以通使臣往來簡在朕心故屢進位位錫以伯爵朕方委英以一方之寄今得卿奏云史昭有誣卿父子之言此必小人離間切不可信史昭但謂陳通誣之故建通與之辯理昭在法司未嘗半語及卿父子卿其勿起况朝廷明於日豈容謾口誣枉善良茲已敕英總率河州等八衛之兵赴京想必在道卿宜安意善加調攝以副朕眷待之意復遣勅諭英曰比得爾父奏云為史昭構誣蓋昭至京未嘗一語及爾父子此言必出小人離間心初卿父坦懷勿疑昭但謂陳通誣之故追通與之辯理爾父事我祖宗忠誠具著爾今事朕委任方

隆亦非人所能問也。爾當體朕至誠，勿聽小人誑惑之語。庶副朕之委任。○遠東總兵官都督僉事巫凱奏逃卒黃仲興高義畏避屯戍，潛奔虜營，與之交遁。今二人皆已就獲，審問明白，請罪之。上曰：此卒向賊，必將誘其寇邊，法不可容。勅凱就軍中斬之，以徇。又勅凱曰：人情誰肯樂從異類？此必為將者不善撫恤，又加暴烈，有不能堪，故往從寇。自今宜戒飭諸將寬惠馭下，毋失其心。○壬寅，四川鹽井衛土官千戶刺馬非遣舍人麥佐把事，抄撒等來朝貢馬。○賜廣西田州府頭目黃聰等湖廣散毛等宣撫司故土官舍人黃敬壇等鈔絲幣，裏有差。○夜有流星大如雞，倂色赤尾有光，起外月西南，行至濁。○癸卯，賜廣西思恩州土官舍人岑礫湖廣施南等宣撫司把事黃玘等前召南道萬戶府等衙門故土官舍人單惠等鈔有差。○甲辰，廣

西奉議州署州事土官子黃宗蔭遣頭目黃潮等貢馬○內官  
阮其內使范台等私買僧牒改名逃往山西陀羅山為僧命鎮  
守山西都督李謙捕之○行在戶部照磨康旭明奏南京浙江  
道監察御史尹循貪淫無行難居風憲歷陳其實 上命行在  
刑部執循治之○巡按山東監察御史包德懷奏近廣寧曹莊  
義州等處鞋賊屢入境殺虜人畜都指揮李信魯得等守備不  
嚴賊至又不率兵擊之請治其罪 上諭行在兵部臣曰邊將  
失機當死姑令巡按御史責先罪狀罰俸一年再失機必殺不  
宥○乙巳勅行在禮部曰今歲事維新京師見任文武群臣先  
有過犯已發落者並與滌除罪名令改行自新○遼東建州衛  
都督同知猛哥帖木兒差指揮僉事苦禿毛憐衛指揮同知哈  
兒委等未朝貢馬及方物○守備龍州都指揮僉事張貴奏交

陟閉邑新父子身帥已加撫恤與田宅但家口頗衆請以龍州倉糧給贍從之○  
力把里回回打刺罕劄罕失等奉朝貢馬○丁未歲暮享太廟○以明日正旦遣鄭王瞻按謁告長陵 獻陵○遣官祭五祀及旗纛之神○行在江西道監察御史陳憲卒憲字廷章浙江定海人由進士擢監察御史巡按湖廣江西莊重知憲體其在江西政績尤著糾察方面及郡縣吏之賢否而去留之悉公人用悅服南昌之民舊苦三司供給郡縣因之以為己利憲悉革之民大稱快吉安守禦千戶臧清貪滯兇惡殺人破家殆不勝紀都司受賂常曲庇之按察司巡按御史雖知之皆怯懦莫敢問憲至慮得清殺一家無罪三人執訊引伏械送京師一郡宴然舞於道他喜政尚多既歸同官以鞫獄出入相訐者引憲初鞫為證俱集刑部憲事已白

以待覆奏未出然已有病時施禮署部事寬而無制屬吏肆為  
姦弊凡死罪繫獄者悉得自便減清雖罪狀明白尚繫刑部獄  
未決夜竊至憲所詬詈播憲憲忿恨竟卒于刑部於是公論皆  
咎禮後 上問侍臣曰聞御史陳憲能持身振憲紀今安在侍  
臣以實對 上深惜之自是不直禮後有告清他罪者立命磔  
於市○是歲天下戶口戶九百九十一萬六千八百三十七口  
五千二百一十四萬四千二十一田地四百一十一萬三千一  
百三十七頃二十一畝田賦米麥三千二十四萬九千九百三  
十六石有奇絲一十七萬四千三十四斤綿二十二萬四千九  
百八十四斤絹九萬五千三百六十四疋布一十二萬八千三  
百九十三疋綿花二十三萬九千八十七斤拆色紗七萬五千  
四百五十九錠有奇雜課錢一千九百一十七萬三千九百五

十三錠米步七萬九千一百一十七石銀六千九兩銅二十二  
百九十九斤鐵五十二萬九千七百五十六斤有奇布二百八  
十三匹鹽課鹽三百五十二萬三千一百九十七引有奇折色  
鈔二千六百六十五萬五十九錠米六十八萬三千七百八十  
四石綿布七萬七千一百七十六匹茶課茶六十三萬八百五  
十六斤折色鈔一萬五千一十七錠有奇屯田子粒五百五十  
五萬二千五十七石採納金四百五十七兩銀一十九萬一千  
一百九十二兩水銀七千一百一十斤硃砂一千二百二十五  
斤石綠三千五百七十七斤雄黃一百七十七斤有奇漕運北  
京米麥豆五百四十八萬八千八百石減免天下官田等項稅  
糧升米麥一萬一千八百六石有奇





明宣宗章皇帝實錄卷之五十

宣德四年春正月戊申朔 上御正朝受賀大安文武羣臣及  
四夷朝使○文武羣臣命婦朝 皇太后 皇后○己酉巡按  
山西監察御史沈福奏去年十二月二十七日行在都察院移  
文處決山西重囚緣各人皆應秋後行刑今前四日己立春當  
律揆時未敢專決 上諭行在都察院臣曰 祖宗立法順天  
道御史言是令持坎乃決○庚戌南京地震○夜有流星大如  
雞輝色亦有光起天市垣內帝座東行至濁○癸丑孟春享  
太廟○遣中官祭司戶之神○甲寅勅掌莊浪衛事都指揮僉  
事魯夫加率原掠官軍赴京○四川總兵官都督陳懷奏四川  
諸衛騎士雖多無馬者十八之一有征調無所措置碣門系馬  
司每歲以茶易馬解京乞於其中取二十匹給軍士從之○夜

南京地震○丙辰以大祀南郊 上御正朝文武羣臣受誓戒  
○丁巳署南京兵部左侍郎李衍卒衛直隸當塗人永樂初科  
進士捐戶部員外即陞湖廣布政司右叅政未幾調四川宣德  
三年詔廷臣舉方面之有材行者衛預焉召至署兵部左侍郎  
命下而卒○夜北京地震○己未大祀 天地于南郊畢 上  
還謁 皇太后出御正朝文武羣臣行慶成禮○庚申以 大  
祀慶成大宴文武羣臣及四夷朝使○陝西秦州衛苗僧管著  
劄白西固城東坐穹等族生苗僧頭目响哥畏則等來朝貢馬  
○辛酉守赤城指揮同知方敏奏屯兵缺農器欲令往北京及  
大同置辦幼至開平衛給文憑緣路出獨石之外虜寇出沒往  
復為艱臣擬自置私記閱防立號簿給批為照行在戶部尚書  
郭敦吉指揮無私置閱防之例 上曰邊境事或有重於此者

使守將待從便宜則緩急可行其從之○士戍上元節賜文武  
羣臣宴○癸亥勅諭南京都察院左副都御史邵紀曰都察院  
乃朝廷綱紀之司庶政之興廢百僚之治忽繫焉近年南京都  
察院官萎靡不立頽壞憲紀非惟不能糾正諸司亦致各道御  
史恬無畏憚巡倉庫者通同監守細戶愚為姦弊巡欵法者通  
同市井商賈濫受貨賄甚者挾制諸司肆行囑託貪利壞法非  
止一端今特命尔往振舉之務革前弊小其竭誠盡力必公必  
明糾正權邪毋有畏避毋縱姦宄毋枉善良廢<sub>知</sub>人知警肅弊  
以清革副朕簡任之意其各道見任御史宜審擇之凡廉勤公  
正者俱留在職若不遵政體不諳文移貪淫無耻及曾犯贓罪  
者悉送吏部降黜有公差給假一憂等項亦如之務盡至公之  
道所闕御史即行吏部填送自今不許濫授尔其欵哉○行在

戶部尚書郭敦奏守開平都指揮使唐銘言所儲糧少僅足兩  
月之用請命大同宣府總兵官令整飭軍士郎中王良發倉儲  
令運赴開平以二月初啓行仍請命北京軍民運京倉糧赴宣  
府 上皆從之命陽武侯薛祿充總兵官武進伯朱冕為參將  
率軍護送口增錫石等處屯戍官軍時開平衛指揮方敏於赤  
城管軍屯糧種以其地臨境外路當衝要而軍士寡弱請益兵命  
總兵官都督譚廣遣官軍四百往益之周歲更代○羅江王妃  
趙氏薨遣中官賜祭命有司治葬事○夜月食○甲子大同總  
兵官武安侯鄭亨及開平備禦都指揮唐銘等奏守烽墩者紙  
大同境外西北有烟火開平西南有韃寇十五為群往柔出沒  
初山西大同宣府開平諸將嚴加守備○乙丑朝鮮國王李禔  
遣陪臣韓惠琉球國中山王尚巴志遣使者謂慈淳也等貢馬

及方物賀萬壽聖節○給慶都公主及駙馬焦敬歲祿共二千石米麥粟走○賜曲光寺衡都指揮同知散即思安定王亦襲丹都指揮僉事桑哥寺所遣鎮撫夫列門寺陝西即示加簇刺麻鎖南黑巴綽東卜兒加所遣頭目祿祿寺鈔絲幣表裏絹布有差仍命夫列門祿祿寺齎勅及鈔幣賜散即思亦襲丹桑哥鎖南黑巴寺○增北京順天府南京應天府并直隸蘇州等府州縣鎮市諸色店肆門攤課鈔時行在戶部以鈔法不通皆由客商積貨不挽與市肆鬻賣者沮挽所致奏請休洪武中增稅事例凡順天應天蘇松鎮江淮安常州揚州儀真浙江杭州嘉興湖州福建福州建寧湖廣武昌刑州江西南昌吉安臨江清江鎮廣東廣州河南開封山東濟南濟寧德州臨清廣西桂林山西太原平陽蒲州四川成都重慶瀘州共三十三府州縣商

費所集之反市鎮后肆門雜稅增舊十倍 上以太重令漕  
五倍俟鈔法通悉撥舊○丙寅賜朝鮮國貢使韓忠柳殿之首  
宴○己卯有流星大如盃之亦有尾從東南起經中天往西北  
方没○丁卯 上以武臣扈從平胡有功如陽春太師英國公  
張輔成國公朱勇太子太保忠勇王金忠人鈔六百錠銀三十  
兩綠幣三束東太子太保陽武侯彝祿安順侯彝貴恭順侯吳  
克忠人鈔四百錠銀二十兩綠幣二束東清平伯吳成應城伯  
孫傑遂安伯陳瑛武進伯朱冕人鈔三百錠銀十兩綠幣一束  
粟中府都督同知任禮高文都督僉事王宇英左府左都督  
柴永正右都督馬亮都督同知程忠業晃里都督僉事吳也兒  
免召吳宇表祀右府左都督蘇火耳灰右都督蔣信都督僉  
事郭志膝定廉宣前府邸督同知馮斌都督僉事韓隆梁成後

府都督僉事沈清郭義馮興李通人鈔二百錠銀五兩絲幣一  
表裏坐營定國公徐景昌鈔四百錠絲幣二表裏西寧侯宋瑛  
武定侯郭玘豐城侯李賢永康侯徐亨成安侯郭歲泰寧侯陳  
忠人鈔二百錠絲幣二表裏安卿伯張安廣寧伯劉滿崇信伯  
費到建平伯高遠人鈔二百錠絲幣一表裏左府右都督冀傑  
鈔一百錠絲幣一表裏永清右等衛官軍指揮同知張武等一  
十一萬五千七百八十九人鈔銀絲幣絹布有左○賜朝鮮國  
使臣柳殷之等四十五人鈔絲幣表裏金織文綺紫衣等物有  
左○疊州刺麻南島也夫未朝奏岷疊二州連捷請于其界忙  
渴見之地則建佛寺且乞職名 上謂尚書胡濙曰劉守營優  
遠民勿聽職名姑候未可聘養而遣之○戊辰賜陝西岷州  
衛刺麻扎針連南及烏思藏刺麻落丹番僧看即堅歲等鈔絲



帶紵絲裝衣靴纒有差○發封衍臣公北戶繕改道人在福建  
市書慮遂行不敢擅咨於尚書胡濙濙以聞 上曰福建屬書  
藉無禁先聖子孫款待賄亦何必言著度而後行亦見其能慎  
其令有司依時直為買紙募印工力亦官給之○總兵官平江  
伯陳瑄言山東濟寧以北信河自長清至棗林闊百二十里沙  
土淤塞沖舟難行今東漸解塊運將興約計用十二萬人流溝  
半月可成命山東巡按某民丁與今運木單士相兼月工○湖廣  
沔江縣奏本縣蚌湖皆臨襄河去年水漲衝決行岸荊州  
三衛刑門江陵荊州縣官民屯田多被其害今當築堤二千餘  
丈以捍水災緣非一縣人力所能請發守道州縣民丁與軍衛  
相兼修築庶不妨農業而事易就從之○己巳免宣府各衛軍  
士給京師薪炭初宣府十七衛所歲辦薪炭給京師又每歲運

帝給則平主是 上問之曰是車豆應重因命行在工部元共  
薪灰○ 上罷朝后宿宮召翰林學士楊溥從容諭曰朕即位  
以來今四年常念 祖宗創業之難子孫守成之不易夙夜惓  
惓未嘗敢忘今幸百姓粗安此皆賴 天地 祖宗之款佑蓋  
亦有羣臣勸翼之功朕恒自喜然自古國家禍亂每生於不虞  
又未嘗不以為憂對曰聖人治不忘亂安不忘危今 陛下心如  
此足以膺 天眷福蒼生於悠久也 上曰滄海之大皆由江  
河之助古之君臣更相戒飭所以克致太平號稱明良若為君  
者不備於臣為臣者不贊輔其君欲永善治未之有也然此來  
臣下往往好進諛詞令人厭之卿亦宜勉輔朕於善道溥對曰  
臣受國厚恩敢忘報稱 上曰但覺朕有過舉直言無隱是即  
為報矣溥頓首曰自古直言非難而容受直言為難 陛下樂

聞忠言如此臣等不敢不盡心○庚午設汾州黃蘆嶺巡檢司  
澤州沁水縣東烏嶺巡檢司時山西按察司奏黃蘆東烏路迤  
川陝兩山嶺深險林木茂密盜賊所聚往來未便請各置巡檢  
司領兵巡邏庶幾盜息民安 上命鎮守山西都督李謙及布  
政司按察司覆勘皆以為便故設之○辛未南京地震○壬申  
浙江布政司奏所屬缺府縣及雜職官百一一員 上諭行在  
吏部侍郎郭璉等曰庶官所理皆天事郡縣親民事尤切要久  
曠可乎自今內外大小職事有闕皆須早除勿致廢事○癸酉  
增置松潘衛前十戶所調利州衛前所官軍實之茂州衛前右  
二十戶所調成都中衛左所寧川衛後所官軍實之設小河十  
戶所調成都前衛後所官軍實之設漢子葉崇松林三路口四  
站撥軍二百人及馬給遞先是松潘衛指揮使吳璋奏松茂地

臨生番近常竊發而拉滿街舊有三十戶所茂州衛止二十戶所地方廣遠兵力寡弱控制為難且山高谷深道路修阻猝有緩急通報不易請增兵設站為使上命四川總兵官都督陳懷履勅至是懷奏以為便故從之○甲戌勅行在刑部都察院大理寺曰刑者輔治之具夫罪大惡極寔之重典理不容恤然有註誤干連於法難免而情實可矜者朕夙夜在心思所以寬恤之今官吏軍民人等自雜犯死罪以下其酌量等第悉令於北京納米贖罪爾等其會官定議以聞務適公當庶以副朕重刑恤人之意○乙亥賜岷州衛疊州這多等籙番僧丹卜監藏等一百三十六人四川鹽井衛土官舍人麥佐把事抄撒等馬湖府蠻夷長官司故土官舍人文昌保等湖廣容美宣撫司故土官舍人黃隆傑等貴西泗城州文土官薩人岑叅等利州頭

日羅嚮牙毛憐衛指揮同知哈兒克達東建州衛指揮俞哥子  
克等鈔線幣表裏金織大結襲衣等物有差○夜有流星大如雞彈  
色青白尾跡有光出於旗西行至濁○丙子賜奉使瓦剌還都  
指揮毛哈剌等廣西奉議州頭目黃湖天內河州衛舊僧思曼  
董監恭丙寧衛等處判麻綿受等秦州衛舊僧普到白西國  
城東出寧等鎮蓋僧狗哥畏則建州衛頭目忽牙奴亦力把  
里回回打剌罕劉罕夫等鈔線幣表裏紵絲襲衣等物有差○  
定納米贖罪例時 上欵寬恤罪囚令納米贖罪命三法司會  
官議擬以聞至是行在都察院右都御史顧佐等奏乞納米贖  
罪南京水運良使北京陸運勸難今斟酌定擬北京法司并直  
隸河間等八府及河南山東運至官吏軍民人等雜犯元罪以  
下納米於北京倉依今定例雜犯元罪五十石流罪比死罪減

十石徒罪五等徒三年者三十五石以下四等遞減五石杖罪  
五等杖一百者十石以下四等遞減一石笞罪五等笞五十者  
五石四十減一石三十比四十減五斗二十比三十減一石一  
十比二十減五斗南京法司及湖廣江西并江南直隸太平等  
府州縣所問雜犯死罪以下官送北京吏典軍民人等納米於  
南京倉依見行例浙江并直隸蘇松常鎮四府及江北直隸鳳  
陽等府州縣所問雜犯死罪以下官送北京吏典軍民人等納  
米於淮安倉其餘州納米於臨清倉俱依南京例死罪官吏一  
百石軍民減十之二流罪比死罪減十之四徒罪五等徒三年  
者五十石二年早者四十石以下三等遞減五石杖罪五等杖  
一百者二十石九十者十五石八十者十二石七十六比八  
十遞減二石笞罪五等笞五十者六石以下四等遞減一石納

單雜犯死罪武職調銜文職官吏皆罷為民流徙罪武官還職  
文官降一等更改撥官杖罪文武官吏人等各還職後再犯者  
依律科斷其監守盜糧兇攬物貨與逃亡軍囚大匠廚子等項  
及力不能納米者依舊例斷從之

大明宣德憲天崇道英明神聖欽文昭武寬仁純孝章皇帝實  
錄卷之五十

明宣宗章皇帝實錄卷之五十終

明宣宗章皇帝實錄卷之五十一

宣德四年二月丁丑朔遣北京國子監祭酒貝魯釋奠先師孔子○直隸真定府趙州高邑縣奏本縣饑民五百九十三戶皆當賑濟而倉糧不足乞於附近州縣倉糧內借給 上命行在戶部即如所言行之○戊寅祭 大社 大稷○遣官祭先農○朵顏衛都指揮僉事脫魯火綽兒子完者帖木兒等來朝貢馬○命隆平侯張信同太監沐敬浚河西務河道及修隄岸先是河西務安兒渡等處河岸衝決命行在工部修築水急民久無成功互是命信等往督發在京採備軍士萬五十人益之○中軍都督府左都督馬聚卒聚山東武定州人由燕山中護衛總旗從 太宗皇帝靖內難累陞至山西都指揮使永樂六年陞中軍都督僉事屢從 太宗皇帝征北虜洪熙元年陞在



都督至是卒 上惜之時恤甚厚追封邵陽伯謚壯勇聚為人  
體貌不長大而膽力過人魁直為人所稱其妻陳氏自經以殉  
贈淑人聚子雄襲留守中衛指揮使○己卯 皇后千秋節免  
文武群臣令婦賀○湖廣金峒安撫司前富南道軍民宣慰司  
故上官宣慰使馬散毛子顯銘前順天安撫司故上官安撫章  
起刺送子忠義前浦水峒潮門安撫司故上官安撫向起刺子  
安什用前馬仄峒長官司故上官長官黃恕括孫欽其什用前  
盤順安撫司故上官安撫利爾送子向鍾謹忠峒安撫司故上  
官安撫揚文顯子子隆等來朝貢馬及方物○庚辰行在刑部  
奏真犯重囚二十四人請依律處決 上問嘗審覆無寃否對  
曰屢會衆官審覆皆服罪遂從之因顧侍臣曰古有道之世刑  
措不用今重犯滋多矣為人上能不忤然久之○夜有流

星大如雞彈色青白尾跡有光出軫南行入庫獲○辛巳四川  
長河西魚通寧遠等處刺麻初刻今伯等來朝貢馬及方物○  
左軍都督府右都督冀傑卒傑永安縣人由行伍從太宗皇  
帝靖內難以功累陞左軍都督府都督僉事屢從北征仁宗  
皇帝嗣位命守閬平宣德元年進左軍都督府右都督至是以  
疾卒追封清源伯謚忠壯妻王氏自經以殉贈淑人長子斌襲  
彭城衛指揮使傑資性平直無所矯飾屢從征恭勤不懈亦明  
知人高颯反上親征列侯中有陰持兩端者言高颯機變不  
測用兵若神傑揚言於眾曰吾知其為人彼尚詐而無膽今天  
威臨之即震懼就擒矣何神之有竟如其言眾服其明云○壬  
午行在虎賁左衛指揮同知李原等奏本衛軍士留南京者多  
朔至者少且其間惰僕之人悉為神機等營所選及衛馬監等

衛門供役所餘罷軟以充守衛守衛不足以餘丁足之臣等計議請以本衛園子手及中軍右掖營無馬官軍捕還守衛為便從之仍命行在兵部計議如南京所留尚多再分調以來○廣西按察司奏鎮守龍州都指揮僉事張貴黃珙先以捕兵不進失陷城池蒙宥其罪今不改過日務貪婪厚索部屬供給措剋財物折毀民居後軍漁獵激變警民致多逃竄上命行在兵部臣曰黃珙土民令還思明張貴即遣人速赴京師治之○夜有流星大如雞彈色亦有光出於東南行入庫樓○癸未授皇妹清河公主冊命金吾左衛指揮李得之子銘為駙馬都尉賚之詰命○上以太師英國公張輔行在左軍都督府在都督張昇昏熟親之重所宜優禮不欲煩以戎勅諭輔曰卿以親以賢祇事祖宗多歷年歲忠存社稷功著國家遠朕縉水大觀勳

誠輔弼元勳厚德巍然于今方當注倚之時矧若燮理之任不  
煩以故乃理彼且可擬中軍都督府事官職俸祿悉如舊朝夕  
在朕左右相與究論軍國事務共爭邦家卿其專指神明道德  
益弘啓沃之功用臻治平之效欽哉勅諭昇曰卿勞氏至感而  
日理劇務不遑暇逸矧兵政之重更或以欺謾連違不問則廢  
法問之則傷息朕夙夜在念圖善始終可擬左軍都督府事官  
職俸祿悉如舊庶稱朕優禮至親共保富貴於無窮之意卿其  
體朕至懷欽哉○襲封衍聖公孔彥緒以賀 萬壽聖節至○  
夜有流星大如鷄彈色赤尾跡有光出天市西垣西行入心○  
甲申以明日 萬壽聖節遣鄭王瞻浚謁告 長陵 獻陵○  
陝西臨洮刺麻也失藏卜西域番僧緬兒載雲南蒙化衛土官  
千戶施勝子淵等貢馬及方物○命行在工部遣官往鳳翔衛

州建昌韶州安陸州脩治鄭襄荆淮梁五王府 上諭之曰諸王將之國未有府第其視所在衛所州治可以為王居者令軍衛有司協力脩理務在完固毋徒勞人力○乙酉 萬聖壽節

上詣 奉先殿及 皇太后前行禮畢出御正朝受賀大宴文武群臣及四夷朝使○南京地震○丙戌行在太常寺丞張以清自陳有疾難任職事 上諭行在吏部臣曰太常祇事神明不可任有疾者丞亦老矣令致事歸○丁亥行在工部右侍郎羅汝敬等使交趾還熱利及著老遣頭目何栗等首方物并代身金人且奏欽遵 聖諭訪求陳氏子孫無有遺者又奏彙索所留官吏軍人及其家屬軍器昨總兵官成山侯王通班師之時悉已送還臣利又嘗出榜禁約但有隱藏官軍一人以上者必殺其有首出者亦已陸續遣回今蒙詔勅謹復戒飭國人

且差人四出尋訪但有遺留盡應起送不敢孤負 聖天子惠  
愛元元之意伏惟 天日之明俯鑒下情又奉宣德三年八月  
二十日臣伏觀勅書放交趾給由土史人等回還本國臣仰見  
聖天子明見萬里之外軫念懷鄉戀土之情臣因是竊有私  
感臣比先被官軍驅逐倉卒之際夫一幼女年九歲訪知乃內  
官馬騏帶回進為官婢臣立山之罪已蒙赦除室家之念竟望  
完聚乞勅下赦回以全父子之親臣當感恩刻骨髓心死且  
不忘○復遣監察御史何文淵給事中李本往陝西布政司清  
理軍務初遣官清軍備陝西未行至是始命文淵等行亦如前  
戒飭之○戊子命都督李玉與選各處送到幼軍兼提督永清  
左右彭城三衛初二事皆屬英國公張輔至是 上優待輔不  
煩以政故命玉馬○勅都督山雲量撥廣西近地衛所帶管軍

士赴南寧都指揮花英量撥廣東衛所帶管軍士赴欽廉選擇  
揮千百戶之老成精練者領之協助戍守初工部侍郎羅汝敬  
等使交趾還言欽廉南寧守備寡弱故有是命○行在通政司  
奏工部辦事吏李懋訴本山東寧海州人為州史嘗告寧海衛  
指揮罪後考滿辦事工部以竊部退為民今指揮還職恐受其  
言乞復為吏以圖報効 上曰小吏狡僞告訐又竊部無能尚  
敢妄有希親命行在戶部仍發為民○己丑南京守備襄城伯  
李隆獻駙虞二云出滁州來安縣石固山素質黑文馴狎不驚  
上命群臣觀之行在禮部尚書胡濙等請上表賀 上曰禎祥  
之興必有實德庶幾副之朕嗣位今四年中外所任豈皆得人  
農畝豈皆有收民生豈皆得所朕夙夜不遑寧處駙虞之祥於  
德弗類况天道無常理亂之幾恒相倚伏豈可不慮唐太宗嘗

曰人君須至公理天下免弊在上百姓敬之如神明愛之如父母動作興事人皆樂之發號施令人皆悅之是大祥瑞此亦名言朕與卿等宜共謹之遂免賀○雲南順寧府故土官千夫長阿茂子阿威哈密所鎮撫羅哈喇等來朝貢馬○庚寅建州等衛副千戶咬納所鎮撫管肆來朝肆奏願居京師咬納奏願居遼東東寧衛賜紵絲絮衣線帶鈔布仍命順天府及遼東都司給房屋器皿等物如例○巡按湖廣監察御史陳搏奏漢陽等處逃民復業者有司急徵所欠稅糧民初還鄉科徵繁急恐致復逃乞依宣德元年早傷恤民事例稅糧折鈔上諭行在戶部尚書郭欵曰有司不能寬恤如此其移文各郡縣凡逃民稅糧悉免之○李邦順天府薊州平峪縣民耿彥方等奏今年田穀無收各里民多缺食因而逃移稅糧五百一十五石無從徵



納乞賜除豁從之○壬辰夜月食○癸巳朝鮮國王李陶遣陪  
臣朴實等貢馬及方物謝賜世子冠服○甲午命建萬全都司  
無祀鬼神壇從宣府總兵官左都督譚廣請也○朝鮮國王李  
禔遣陪臣柳思訥陝西行都司土官都指揮僉事魯史加貴州  
宣慰使安中遣媿怯四川天全六番招討司僧穩跋湖廣石梁  
下峒長官司故土官長官唐潮文子永恭毛憐弗提等衛都督  
同知蒼哥不花子撒滿答失里等貢駝馬及方物○亦馬喇兀  
者弗提比河等衛指揮亦里伴哥等遣人來朝奏言昨大軍至  
兀良哈諸衛皆恐怖慮不自保 上慰諭之曰天道福善禍淫  
人君賞善罰惡一體天心豈有私哉兀良哈有罪則朝廷討之  
豈肯濫及無罪爾等安分守法即長享安樂何用恐怖皆賜養  
遣還仍降勅撫安其衆○賜朵顏衛指揮僉事脫魯火綽兒子

完者帖木兒等六十三人鈔練帶表裏纒帽紵絲製衣有差○  
定陝西寧夏諸衛罪人加米贖罪例先是寧陽候陳懋奏寧夏  
軍士有犯罪者令於西安府倉納米贖罪各軍延緩規免征操  
且寧夏倉無儲備月支不足乞令於本處加倍納米 上命法  
司議於是行在刑部都察院議岷州洮州於西安府倉納米舊  
例死罪十石流罪八石徒罪六石杖罪三石笞罪一石五斗宜  
準此例倍之死罪二十石流罪十六石徒罪十二石杖六石笞  
三石納完依例發遣從之○行在都察院奏山西鎮武衛指揮  
同知馮鎮宮其義子為父者於律當徒今患病在獄請醫治療  
上從之語右都御史顧佐等曰武人之憑其積功甚難而犯刑  
甚易此人所為本不足恤但 祖宗仁厚之典不可以違○乙  
未命內官楊禮移即靖王宮眷居南京舊內勅太監王景弘等

凡歲時朝暮衣服飲食百常皆內府依期給之仍時遣人省視不許怠慢先是上謂侍臣曰鄧靖王無嗣其宮眷尚留安陸國中無主朕欲移寢南京舊內庶供給皆便於義何如侍臣對曰此陛下親親之仁處置當矣遂有是命○行在吏部奏六科給事中駁出河南浙江貴州等布政司及諸府縣弄土官等衙門奏本字有訛補錯謬者皆屬不敬其布政使蕭省身等官俱應速問上曰此治文書者之罪官則一時倉猝失點檢耳俱不問○行在戶部尚書郭敦奏洪武永樂年間屯田之例邊境衛所募軍三分四分守城六分七分下屯腹裏衛所一分二分守城八分九分下屯亦有中半屯守者都司布政司按察司提督秋成比較依例賞罰倉有餘糧近年各衛所不遵舊例下屯者或十人或四五人雖有屯田之名而無屯田之實且以一

衛計之官軍一年所支俸糧動以萬計而屯收子粒止有六七  
十石或百餘石軍糧缺少實由於此今擬在京在外衛所下屯  
之數不問正軍老幼餘丁必依舊額補數令其屯種在外屬衛  
令三司委堂上官在內并直隸衛所從都察院委御史提督巡  
視至被成依例比較賞罰廩倉有種儲軍無隸食從之○襲封  
衍聖公孔彥縉陞賜鈔一萬貫○上視朝罷御左順門諭行  
在禮部尚書胡濙曰朝廷之禮最先正名尊卑等級不可僭差  
凡內外官員士庶服飾儀從序立及尊卑稱呼之類皆有定制  
近多越禮犯分亦有在內府私行揖拜禮者其揭帖申明定制  
使無僭越○周府儀賓張義卒卦聞賜祭○昏刻有流星大如  
鷄彈青白色尾跡有光出東井西南行至雲中○丙申賜朝鮮  
國使臣韓惠等九人琉球國使臣謂慈淳也等十三人鈔緡幣

表裏及紵絲襲衣有差○逸北鞋襪裡兜來等三人來歸奏願  
居京自致命為所鎮撫賜官帶金織襲衣綵帶銀鈔鞍馬仍命  
有司給房屋器皿等物如例○丁酉勅諭三法司曰致理之道  
人倫為先五刑三千不孝最大今在外有司往往貪受賂賂寬  
縱不孝吏之壞法莫甚於斯勅至但犯不孝及烝父妾收兄弟  
之妾為妻凡敗倫傷化者在外有司毋擅斷決悉令送京師如  
律鞠治若武官及其子弟有犯此者不許復職承襲永為定制  
賜朝鮮國貢使柳思訥等宴○賜奉使恩哈麻湯等處還京土  
官都指揮魯夫加等八人鈔及絲幣表裏指揮甘輔等二十人  
未至京者就命魯夫加等齎鈔幣往賜之○賜兀者右等衛女  
直指揮僉事悅果等九人雲南蒙化衛故土官舍人施滿順寧  
府故土官舍人阿威湖廣石梁下峒長官司故土官舍人唐永

恭前富南道等處故土官子孫馬顯銘單中義向安什用向鍾  
謹揚子隆黃欲其什用等及陝西臨洮刺麻也失藏卜四川長  
河西魚通寧遠等處刺麻初刻令伯西城番僧納兒藏哈森所  
鎮撫羅哈刺等鈔絲幣表裏反紵絲表裏有差○行在禮部尚  
書胡漢奏郵請玉無嗣國除其護衛及官屬人等皆當改撥  
上從之曰郅玉雖無嗣其祭祀不可廢留內官使及奉祠各一  
人校尉五十人在國專供歲時之祀於是調安陸中護衛三所  
官軍於廣西桂林中右二衛其儀衛司典仗校尉調行在錦衣  
衛○交趾按察司副使戈定遠以老疾致事定遠浙江海鹽人  
由監察御史陞副使能持已不炫名考滿復職至蕪州通梗還  
京師以疾命致事○行在戶部奏直隸慶州言比遷民一戶  
例撥荒田五十畝本州并永寧縣荒田分發已盡今後應發本

州為民者請改發永平府所屬州縣為便從之。○宣府總兵官左都督譚廣奏宣府等衛軍士糗多倉糧分給開平當廣儲積往嘗召商中鹽每引米三斗今大同天城陽和中納之例已減每引止二斗五升客商多趨於彼宣府請亦依此例則邊儲有積命行在戶部議。○上覽歐陽文至夢卜求賢之說顧侍臣嘆曰君臣相遇豈偶然哉高宗恭默思道渴想賢輔未得說華傳叢雖有致君澤民之志不能自達一旦得於夢寐間遂相與講學論道而功被當時垂後世誠千載遇由此觀之人君誠心求賢固不無不得之理文王因田獵過太公亦豈非誠心相感水流濕火就燥雲從龍風從虎物皆有相感之理况一代君臣乎蓋天祐國家必生賢哲之輔翊高宗思道之心蓋有格於天矣又曰有高宗之心然後可以夢言有傳說之賢然後可以為相

若漢文以夢得鄧通光武以識用王莽豈不誤哉○戊戌命贈  
都督同知李任子淳襲為燕山右衛指揮使故都指揮同知謝  
榮子顯襲為大興左衛指揮同知府軍後衛指揮同知程興子  
勝金吾左衛指揮同知周貴子玉燕山右衛指揮同知李斌子  
鑑虎賁左衛指揮同知張瑾弟琰羽林右衛指揮僉事謝旺子  
隆府軍左衛指揮僉事劉海子斌通州衛指揮僉事周通弟貴  
府軍右衛指揮僉事徐政子劉濟州衛指揮僉事馬麟弟雲俱  
襲職金吾左衛指揮同知何興金吾右衛指揮僉事李成老病  
命興子玉成子信代○命故羽林前衛正千戶馬超住子旺為  
指揮同知初超住主軍功未陞而卒故陞用其子○行在吏  
部左侍郎郭璵奏交趾回京官若京官方面官例送各部聽差  
月與食米壹石其餘記名放回以俟召用令員外郎閻葵知府



陳松等一百六十四員在途稽延最後王當完治蘇共職 上  
曰道遠或貧或病有不得已不必罪悉如前例其中有老疾者  
令冠帶還鄉○夜北京地震○己亥選幼官指僱十人千戶十  
二人分為兩番佩刀入直○行在戶部郎中王良奏宣府懷來  
等處軍馬多而糧料少乞于昌平山口倉及京倉撥運一十萬  
石以備用尚書郭敦言昨已奏令山東河南及直隸八府發民  
丁行在後軍都督府起軍士運通州倉糧五萬石赴宣府今若  
舟起車夫發運山口糧恐妨農作 上曰可令山東河南民運  
山口糧二萬石赴懷來其他軍民運通州糧赴宣府除俟秋成  
○行在兵部奏南京太僕寺欲以宣德二年孳生及陪價馬駒  
如例分給淮女諸郎新編民丁及補種馬孳牧所餘壯駒送主  
北京請給順天府民畜養待用不堪者散北京諸衛餘丁畜之

又奏由京太僕寺看去年壯馬千五百餘匹及鳳陽諸郡種馬  
不能孳息者請令悉送北京付順天府牧養待用俱從之○庚  
子以明日清明節遣郵王賻竣祭長陵獻陵○勅行五軍  
都督府及兵部今天下軍士遇有征調當自備衣裳供給為難  
其原籍宜與復除一丁在營有丁者亦免一人差遣使率經營  
以給軍○湖廣五峯石寶長官司故長官張再武弟再貴等貢  
馬及方物○以廣西上隆州土官知州岑瓊母陳氏為本州知  
州瓊卒無子姪岑崧尚幼土人訴于朝願得陳氏襲職以撫其  
民故命之○辛丑趙王高燾奏款於封內為第二子安陽王選  
妃上遣書報之曰叔朝廷至親婚配禮之所重封內選擇於  
禮為宜如有定議以姓名聞即當遣人齋冊成禮○陞太子太  
保忠勇王金忠為太保進封清平伯吳成為奉天清難推誠宣

力武臣特進榮祿大夫柱國清平侯食祿如舊封都督李玉為  
奉天瑯衛宣力武臣特進榮祿大夫柱國新建伯食祿八百石  
俱賜諡券。壬寅陞行在吏科給事中徐儀為行在大理寺左  
侍丞仍於徐州呂梁二洪理漕事行在刑科給事中劉容為北  
京行太僕寺丞行在工部營繕司主事毛俊為行在宗人府經  
歷行在中書舍人劉謙為廣東布政司右叅議河南按察司僉  
事劉咸為本司副使行在湖廣道監察御史劉芬為福建按察  
司副使陶純為四川按察司僉事皆以九年考最故也。復張信  
尚寶司卿張守信行在刑科給事中王綱行在廣東道監察御  
史丁濬行在湖廣道監察御史皆以親喪服闋也。○陝西鞏昌  
府知府孫重直隸永平府昌黎縣知縣楊禧山西文水縣丞徐  
文襄垣縣主簿俞育俱九年考滿至京其耆民皆闕言宣等持

已廉謹撫民仁惠乞令徙任。○上謂行在吏部臣曰：吏得民心為難，宜加俸使徙任。于是加置正三品俸，正六品俸，文正七品俸，有正八品俸。○九刺等履鞋，靴小古台等率，婁子十四人，未歸奏，頌岳京自致命小古台五人為副千戶等官，賜冠帶，金織染衣，綠帶，銀紗布花鞍馬，仍命有司給房屋器皿等物如例。○熱行在河南道監察御史張震為武陟縣知縣，陝西

道監察御史葛榮深，御縣知縣，以都御史言其不任職也。○

南京都察院左副都御史邵北奏奉勅考察，得御史沈善、劉統、王愆等三人皆貪淫無耻，肅全、鄧迪、寧揚、昭、蕭昇、曾、泉、木、丙等六人皆不遵政體，王恭、梁鳳、潘綱三人皆不習文移，陶圭一人曾犯贓罪，請悉如例降黜。又奏會月六日，都堂上官考察得戶部郎中黃紀等十七人，貪汙戶部郎中陳愆等一十四人，姦嬖戶

部印中周砥等四十六人不諳文理刑部印中徐珩等九人  
力不及亦宜黜降○ 上命行在吏部悉從地言如例降黜○  
鎮守西寧河朔都督同知劉昭奏西寧衛那海川總旗領單九  
人樵于東山果逐卜嘔疾番寇射殺總旗掠其車牛獲而訊之  
皆伏罪請斬之仍梟首以徇百戶張藝守備不嚴亦當罪之遣  
勅報曰番寇殺人准爾所奏但須審寔勿令負寃更須察各該  
人情之動靜毋致激變百戶不嚴守備姑記其罪仍令守備如  
舟夫機必殺不宥○ 山東即墨縣奏縣民一千二百八十五  
戶俱以災荒乏食逃移各戶稅糧鹽課無從徵納○ 上命行  
在戶部除豁○ 癸卯降溪府教授曹方昌為廣東高要縣典史  
○ 方昌在府先以丁憂去後聞尚書敗服闋遂不赴行在吏部  
移文促之始主侍即歸進奏方昌在任久雖先事去亦當坐以

同謀罪 上曰一時同預起事今尚有釋之者矧其先事去乎  
不聞漢窮治楚獄濫及無辜乎彥昌但治其朕闕不起降官一  
等○乙巳瓜吐國王楊為西沙遣使臣亞烈長孫等來朝貢方  
物○給府軍前衛帶刀幼官指揮使魏傑等盈甲○行在兵部  
尚書振本奏驛馬之設本以飛報軍機重務今在外凡有符驗  
官司及鎮守官每以常事泛濫給驛皆宜禁止請今年終各具  
一歲給驛起數及所幹事務所差人員造冊奏聞以憑稽考又  
凡遣人齎送勅書例與雙馬及其徒回仍前開給此皆虛勞馬  
力請與驛驢及遞運船 上悉從之但令齎勅人若有事回奏  
者可與一馬○大同總兵官武安侯鄭亨奏大同控邊之地近  
歲朝廷常調馬步官軍萬餘護送糧餉赴開平所存官軍又多  
分往諸處守瞭巡邏一旦有急見操軍馬實不足用自今糧餉

諸發民夫魏運內地衛所發軍防護庶使大匠軍馬待專操備上命行在兵部戶部議開平每歲應運糧料及當用軍夫令在內軍衛有司預為之備若護送官軍則臨期調遣○德州民奏本州路當衝要每遇運物官船經過例給丁夫而督運者多不守法威逼有司以一索十以十索百前者未行後者踵至本處丁夫不敷有司無計或執商販行道貪人以足其數督運者中路逼取其賞無帶者至解其衣而縱之有為所逼迫不勝而赴水死者有在船軍士本用操舟乃得袖手而坐所載私貨多於官物緣路發賣率以為常乞勅所司禁約事下行在兵部兵部奏請自今運物馬船快船俱全掌船者每船預置木牌一大書本船軍夫數目姓名有急運應增者上水不過七人所司給與印信帖子大書所增貼於牌上以牌懸於船頭所過有司如牌所

增給之下水不給達者許殺害之人及有司指實以聞仍違內  
外官不時緣路搜檢私載物貨究治其罪庶使小人知所警懼  
從之○丙午行在吏部言陝西按察使陳智舉平涼府經歷劉  
聖才幹今考聖文字不中請治智濫舉之罪詔令智自陳智言  
初舉聖時但見其幹辦公務設施措置綽有可觀竇未知其無  
文 上諭行在吏部臣曰智所言亦有理人品不齊有長於此  
短於彼者不可驟論宥之勿罪



大明宣德憲天崇道英明神聖欽文昭武寬仁純孝章皇帝實  
錄卷之五十一

明宣宗章皇帝實錄卷之五十一終

明宣宗章皇帝實錄卷之五十二

宣德四年三月丁未朔行在禮部戶部奏昨總兵官都督陳懷  
報四川陝西貴州都司并四川陝西行都司所調官軍從征松  
潘等處有功者凡四萬八千九百九十六人有旨定高下給賞  
鈔請於所在官司給之紵絲及絹三千四百六十一匹布六萬  
五十七百匹請於南北二京官庫開領運赴各都司給與遂命  
主事金勉等往給敢勇當先都指揮人鈔一十貫絲帶表裏三  
指揮人鈔八百貫絲帶表裏二十戶衛鎮撫知州人鈔六百貫  
絲帶表裏一百戶所鎮撫序班人鈔五百貫絹三總旗總甲舍  
人頭目人鈔四百貫絹二小旗小甲人鈔三百貫絹布各一軍  
人餘丁土民土兵人鈔二百貫布二齊力向前布政使人鈔八  
百貫絲帶表裏二指揮人鈔六百貫絲帶表裏一十戶衛鎮撫

人鈔五百貫絹三百戶百天長所鎮撫人鈔四百貫絹二總旗  
總甲舍人生員頭目人鈔三百貫絹布各一小旗小甲人鈔二  
百貫布二軍人餘丁土民土兵人鈔一百五十貫布一隨陣擺  
隊指揮人鈔四百貫絹三千戶衛鎮撫人鈔三百貫絹二百戶  
所鎮撫人鈔二百貫絹布各一總小旗甲舍人人鈔一百五十  
貫布二軍人餘丁土民土兵人鈔一百貫布一守城守營等項  
都指揮人鈔四百貫絹二指揮人鈔三百貫絹一十戶百戶衛  
所鎮撫典仗判官經歷等官人鈔一百五十貫布二旗軍舍人  
吏典頭目把事人鈔一百貫布一病故者賞如見存之例陣亡  
及敢勇當先二三次者悉如本賞之半自餘功次不同悉依例  
給賞○賜行在錦衣衛指揮僉事何敏等四人鈔以招撫松潘  
番蠻還也建州衛都指揮僉事李滿住遣人奏請入朝充侍衛

賜勅諭之曰昔我皇祖臨御爾父顯忠及爾叔猛哥不花多效勤誠及朕嗣位爾亦克嗣先志用摠忠悃故特授爾都指揮僉事今欲入侍尤見誠心但部回之衆須有統屬姑留撫下未可輕來○夜有流星大如盞色青白光燭地起張西北行至游氣○戊申授皇妹真定公主冊命濟寧左衛指揮僉事王誅弟誼為駙馬都尉賜之誥命○加太師英國公張輔號為奉天靖難推誠宣力輔運武臣階為特進光祿大夫勲為左柱國命成國公朱勇兼太子太保○朶顏等衛頭目完者帖木兒等來朝貢馬 上嘉其誠宥其前過凡家屬被獲者悉還之陞完者帖木兒為都指揮同知餘陞秩有差且賜勅戒之曰自今宜嚴更部曲毋為寇盜庶幾大軍不出爾得永享太平苟或不遵仍蹈前過不有人禍必有天殃具敬慎之○福建都司奏倭賊自鎮

海衛古雷巡檢司登岸攻圍城池劫傷人民附近銅山千戶所  
不策應追勅都司把總都指揮僉事洪青不能嚴兵陟備亦不  
督兵赴援悉請論罪 上命行在都察院遣人速赴京治之○  
夜有流星大如雜彈色青白尾跡有光出貴索東行至雲中○  
庚戌四川監井衛土官副千戶輝甲把事日祐等采朝貢馬○  
賜爪哇國貢使亞里八句等及毛憐衛故都督子撒滿答失里  
宴○辛亥封中軍都督府都督僉事孫忠推誠宣忠翊運武臣  
特進學祿大大柱國會昌伯食祿一十石子孫世襲賜券誥贈  
其曾祖祖考皆會昌伯曾祖祖妣皆夫人封其母太夫人妻夫  
人忠 中宮父也命初下忠上表辭不聽○行在都察院右都  
御史顧佐劾奏交趾道監察御史顧達巡按淮安考通判何正  
不稱職遭正辱罵性鳳陽清理軍伍獲酣酒廢事玷辱風憲請

黜之 上諭行在吏部臣曰風憲官為人所辱而甘受之不任可知其改用之佐又奏蘇州衛千戶朱毓妄陳獲強盜求陞賞今勸覈明白請治其罪 上諭行在兵部臣曰賞功朕未嘗吝但施不當則人懷僥倖姦弊日滋矣毓不可恕○壬子命故掌毛憐衛事都督同知猛哥不花子撒滿答失里襲為都督僉事仍掌毛憐衛時撒滿答失里來朝貢 上厚撫遠人故有是命○命松潘衛指揮吳璋弟瑾為四川筠連縣三岔巡檢司巡檢先是松潘番蠻作耗率眾攻城瑾以舍人出家財招募丁壯竭力守城官軍與賊戰殲率所募兵奮勇當先殺賊至是松潘衛老卒表敬內江縣耆民劉友才等奏瑾有功行在兵部言瑾例當賞 上曰有功固當賞以白衣立功非有職守者可比當於賞例外加之官房合至公遂以珙為巡檢○行在吏部左侍郎

郭暹奏湖廣按察司僉事朱與言考滿赴京踰期當下法司  
上曰方面之臣小過不足問○行在都察院奏山海衛指揮趙  
忠領軍備禦開平科歛軍財行賂求回原衛而私有其半事發  
當降用今所領軍以忠能恤下告乞復其職 上曰彼能恤下  
曷為科歛而私有其半此必以賄求之朝廷當罰至公有罪不  
懲何以令衆小人敢以私情撓公法邪不聽○免四川茶戶徭  
役時四川安縣茶戶杜思聰訴本戶舊有茶八萬餘株年深枯  
死戶丁亦多死亡今存者皆給役於官無力培植積欠茶課七  
千七百餘斤郡縣責徵日急乞賜減免仍乞如例免雜役待專  
辦課庶無逋負行在通政司以聞 上諭尚書郭敦曰茶之利  
蜀人資之不但為公家之用今有司以他役苦之則民不得盡  
力于此矣即令四川郡縣緩其徵茶戶當免徭役者皆免之又

曰宋陳恕為三司使稍增茶課取綱當時非之此事今任於卿  
歲課決不可增果虛耗則當減徵科但當從寬耳○聽選官歐  
陽齊言舊任浙江永康縣丞縣有山產銅礦宜發工匠烹鍊以  
充國用又言在京工匠逃者一次的決令上工二次三次者宜  
判字罰工終身則有所懲戒上諭行在工部臣曰此小人妄  
言求進其斥之○癸丑勅由京守備袁斌伯李隆等督軍夫工  
匠修葺葦陵塙垣○命太子太保成國公朱勇管五軍大營保  
備官軍○哈察忠順王卜答失里遣都指揮使把台土魯番斌  
仲桑果大師等貢馬○賜朝鮮國使臣柳思納朴寶等鈔絲帶  
束裏及紵絲藥衣有差○甲寅優免大師英國公張輔彭成伯  
張棻會昌伯孫忠都督張昇朝恭但朝朔望○賜陝西行都司  
土官都指揮僉事專天加四川天全六番招討司僧梅岐貴州



宣慰使女中姪怯毛憐弗提寺衛都督僉事撒滿答夫里寺鈔  
線帶表裏及金織藝本有差。南京守備襄城伯李隆奏裝寶  
門城臺閣烈洽漏恐致傾圮請以軍大協力修治從之。行在  
都察院奏遼東總兵官都督巫凱遣衛填撫鄒敏促遼海衛未  
完軍器指揮費徵歛無財買馬及貂鼠皮賂敏收受賂竟不責  
完徵收皆留罪之。上曰守邊不可一日闕兵器有闕則宜急  
造其行賂求緩受賂廢事皆不知違悔為重悞孰而罪之不可  
貸。乙卯遣使齎勅賜朝鮮國王李裨白金三百兩紵絲紗羅  
五十匹綵帛三十匹。上月滑侍臣曰高麗遠在海外修貢益  
勤厚往薄來古之道也。逾王貴烜奏本月正門自前未建迎  
送詔勅未幾俱於偏門出入撥禮木女詣向南置門又宮殿外  
房舍墻垣多因雨壞亦請修治從之。○陸表存子王永節婦袁

氏年十五人永綏德府指揮使先任延安衛事母親氏生母  
有疾憂形于色衣不解帶調綏德以母老不能就祿留妻謝氏  
侍養母年八十六卒水聞訃旋旆命延女哀慟幾絕水篋不入  
口者七日事聞表其門曰孝行袁氏揚州府興化縣民徐禮妻  
生十甫一歲夫成邊而亡哀年二十八紡績織絀以奉舅姑旨  
孤子守節三十七年梅氏常州府武進縣民翟雲琴妻夫亡年  
二十九孝奉舅姑主事凡葬皆不違禮守節三十餘年李氏廣  
東惠州府鎮撫吳頌妻年十八喪夫守節四十二年蕭氏揚州  
府儀真縣民字三妻年二十六寡居誓不改適紡績縫紉以奉  
舅姑閩氏揚州府江都縣民管成妻年二十六喪夫不嫁守節  
三十五年馬氏揚州府江都縣民管哲妻年二十一喪夫不嫁  
存全祖母寡居三十八十操行清潔清氏和州民寡仲王妻年

二十有四喪夫無音四歲孤子底于成立守節三十餘年王氏  
淮女府山陽縣民張思人妻年二十九而寡勤苦績紡以養舅  
姑育孤子三十七年不改其節姚氏潯陽左衛軍徐在見妻年  
二十五夫從征死守志不嫁家貧無期功之親可依躬耕織以  
養老姑姑歿喪祭書禮鄭氏神棗衛軍王留見妻年二十四夫  
亡子幼事姑盡孝姑歿歿葬以祀守節三十三年倪氏應天府  
江寧縣民張讓妻年二十五夫亡誓不再嫁舅姑皆老二子皆  
幼家貧躬勤女事以資養育舅姑歿葬祭盡禮二子長皆有立  
長子益奉進士授中書舍人仲氏應天府上元縣民陳忠妻年  
二十七丈夫不嫁子幼家貧紡績以自資守節三十餘年馮氏  
山西陽曲縣民童三漢妻年二十一喪夫二子皆幼經絡縫製  
以自給居貧守節三十餘年商氏揚州府儀真縣民張成妻年

一十八大亡不嫁一子幼家貧補綴自給守志四十二年馬氏山西大同縣民劉曇妻年二十三受夫家無遺資紡績以給衣食撫育孤子皆有立寡后三十一年事聞俱旌其門曰貞節○丙辰淮府右長史劉真故事<sup>任</sup>教官永樂中陞司經局校書累陞至長史年老多疾乞歸田里上俞行在吏部臣曰是嘗以文學事皇考于春宮者端慤有守其聽<sup>任</sup>致事○行在工部奏總兵官太傅黔國公沐晟言四川東川府會川衛所屬山內產青綠銀銅諸礦軍民往往潛取其他與雲南武定軍民府金沙江及外夷接境恐土邊惠宜令四川雲南三司巡禁從之○丁巳行在工部奏奉元殿祭卓諸物歲必新造今材料未備命有司給官鈔市之○陝西京涼衛韃官千戶哈剌吾吐等來朝貢駝馬○戊午賜湖廣五峯石寶長官司改長

再賞等四川鹽井衛把事日祐等鈔幣有差。詔

等還初命祿等督運開平糧後祿奏已運千五百石可足開平  
官單八月之用餘候邊地草盛再運遂召之還。行在戶部尚  
書邦教言舊例內外衛所官單月支糧料無間差造俱從本衛  
所造冊轉行關給近年在京軍馬數多憑其自造文冊多有重  
冒又在外調主採備單馬分隸神機營及左右等掖者俱無印  
信或一衛人馬有分撥十處五處者開報差錯亦多冒支今擬  
在內各衛所及在外採備者月支糧料俱從本衛官井管採都  
司等官呈該管都督府令經歷司查無重冒造印信文冊具錄  
單衛分從本衛經歷司造冊通繳至部磨算明白下倉放支則  
錢糧有所稽考宿弊可革從之。壬戌陞西寧衛指揮僉事李  
文為陝西行都司都指揮僉事仍管西寧土兵。行在兵部奏

單士在外牧馬擾民往羊命卻督提調約束猶如舊例上命  
都督和吳郭義提督且諭之曰單士無知多縱口腹之欲為民  
害朝廷待單氏一體無有重輕卿等宜嚴約束況今耕種之時  
尤不可縱恣蹂踐妨廢農業違者必治以法○免前北京行都  
侍郎金庫官先是庫定令清理單位至清豐縣知縣梁璠等飲  
布帛羊豕菽粟賂庫皆受之為御史范循給事中賈諒劾奏  
上命三法司問庫皆引伏三法司奏庫受賍在赦前除罪應杖  
于例納米贖罪上曰庫貪小利無大臣體其免為民○行在  
地衣衛令人張恕有罪誅恕奉工部差往江西取過臣併其家  
屬赴京恕肆貪虐人索銀若干有介以所居弓球與之不足固  
繫之而操其妻至死又取其幼女事覺上命法司鞠問得實  
以聞上曰生匠非有大罪而肆毒虐如此鬼神不容也其斬

於市○癸亥昏刻焚惑犯靈臺○甲子遣行在禮部主事陳女  
賜周王妃董氏金丹冠服○命陝西都指揮同知曹敬寧掌陝  
西都司事都指揮僉事劉永寧掌河南州衛事撫郵軍民凡各處  
總兵及鎮守官不許擅差離職違者罪之○命四川青川守梁  
千戶所罷開百戶倪讓復職諫故百戶倪興從子興卒讓襲職  
後以例不當罷之松潘番寇攻青川城讓自奮與衆竭力守  
城賊遁去從官單追捕之至營溪茂州擊賊棄以前鋒屢收賊  
其功居多至是總兵官邵督陳懷奏讓軀幹勇壯遇敵不怯且  
列其功狀 上謂行在兵部曰歸整軍屬國家委任而以貪淫  
玩愒不能功若此人者安可棄之今復原職使再立功○賜爪  
哇國使臣亞烈七孫等三十一人紗綵幣表裏及金織氍毹衣有  
差仍賜亞烈七孫等五人冠帶○贈陝西都指揮使王徽妾時

氏淑人謚貞烈初徽備禦寧夏與虜戰而死與屍歸時氏哀毀不勝自經以殉時年二十有八事聞故有是命○乙丑命少師吏部尚書蹇義少保戶部尚書夏原吉同議天下建言事先是義等以師保之臣蒙恩優待不視事至是行在札部尚書胡濙言天下官員單民建言民情等事當命官議可否施行義原吉雖蒙恩優待不親政務而建言事皆關係國家天下重務請令會議上曰朕不以庶務勞之者止欲共專精神為國家決大爭定大議凡建言事令會議如故○有紙匠祈于行在通政司云水樂中自南京取至執役大財庫去家遠日給為難通政司官以聞上諭尚書郭敦曰官府但知校之而不知養之豈政理哉凡工匠役內府者悉月給食米三斗○丙寅時鄭述策刑淮五王鈔各五萬貫梁王十萬貫循歲例也○丁卯平陽王美



主奏弟妹皆長成將有家室而閨婦女使令詣于平陽單民之家選取 上曰使令不可無但外邊亦非使後書令于本府軍校家取其自願者而酬之以直。初都督僉事史昭趙安率平涼莊浪西寧鞏昌岷州臨洮洮州河州八衛官軍還原衛備禦先走兀良哈黠寇餘孽倭掠永平山海 上欲親率兵勅之命昭等率八衛原選操隨征官軍赴京至是兀良哈三衛大小頭目親來朝貢 上以虜既歸誠遂勅昭等各回衛備禦悉賜之鈔令陝西布政司以官庫所貯給之。命陝西行都司都指揮使宋興山西行都司都指揮使梅俊敘事。戊辰帝提等衛指揮僉事惜卜等六人來朝奏頒居遼東自在州賜金織絮衣鈔布仍命遼東都司給房屋器皿等物如例。各到愛感犯太微垣上將。己巳賜哈密等處使臣都指揮使把台等四十六人

土魯番賊僧奈果大師陝西平涼衛鞬管千戶哈刺苦咄等銀  
鈔綠幣表裏有差○釋道化衛總旗王彪妻蔣氏的姑婿欲取  
其奩具與已女不從姑憾之姑疾蔣事之不及又憾之姑積忿  
乃誣蔣搶其侯欲加害使魁訟之行在刑部當將斬罪蔣屢稱  
冤且引小姑及鄰姬為證事聞上曰論獄不當縱尤不可杜  
彼欲殺姑姑女肯曲為解乎遂召小姑鄰姬至皆言蔣實無殺  
姑意上命釋之因謂行在刑部侍郎吳廷用等曰姑慈婦孝  
當兩盡其迫令以小忿而欲寘之死則不可其以此意諭道之  
○行在大理寺山西陽曲縣典史馬欽畏職務繁作梅母長避  
去往宮杖八十于近例納未贖罪上曰君子不患死其說今  
此舉忠孝兩虧矣杖之百滴為違民○反可流星大如盃色青  
白光燭地起中樓南行入雲中○庚午四川威州兀惹峯番僧

刺麻羅如藏奇未朝貢馬○松潘土僧刺麻綽與舍利藏奏番人作托雷平衆追捕有功且乞創寺賜名分 上謂行在吏部臣曰彼既有補盜功俱命為禪師印師寺勞民不可從○靖江王佐敬奏輔國將軍贊德永樂中有罪謫泗州為民 仁宗皇帝即位宥之遂因令三年後未朝今當朝贊德有疾不能朝免之○召奉使外夷中官雲仙徐亮遂約雲仙受命分往外夷撫諭兩人素懷忿嫉各教誘土官相讎程阻遣使臣上是 上聞之悉召還○江西新建縣儒學教諭王未言寧王府每年祭祀社稷山川取府縣學生員習樂舞供祀今生員有定額務求成效而以供應王府祭祀拘充演習動經旬月有妨學業宜令於附近道觀選道童充用命在禮部議從其言如選不及數則于本府單士餘丁內選端謹者詔從之命各王府皆準此例○上退

朝御左順門謂史部尚書卷我曰今日卻察奏雲南按察司史  
受賂洗改文案脫免有罪法當絞朕聞太祖皇帝嘗言史心  
術不止不可任用 聖見深遠今六部卻察免改本之地所用  
之史尤洵擇人苟有職私必真之法若九年考滿應授官者尤  
當考察庶不濫用以病百姓○辛未徒密雲中衛右厘驛先是  
驛舍為水衝決衛奏其地正當潮塔二河合流之處不可復置  
去東北一里許有地高曠請徙于彼 上命行在兵部遣人覆  
視以為宜遂徙之○壬申 上以鄭襄利淮朶五王將之國命  
南京守備襄成伯李隆預選黃船快船三百艘赴北京○命改  
河南都指揮同知康堅子餘鑾為金吾左衛指揮使羽林前衛  
指揮使王廣子傑金吾右衛指揮使王平弟順錦木衛指揮同  
知袁清弟礼金吾後衛指揮同知陳始子貢燕山右衛指揮同

知達成姪伍拾旗手衛指揮僉事殷文叔成俱襲職羽林左衛  
指揮同知宋斌老疾命其子謙代。命成國公未勇以單士五  
千人修海子墻垣。○行在戶部左侍郎李昶言洪武間官吏換  
單閔支俸糧月不過五此是定例今北京文武官吏俱重俸糧  
每月放支不下數十萬石往往遷延月人不支致倉廩不空有  
誤收糧請自今應支俸糧者若公差無家屬于冊內明白開報  
俟日補支其餘先在者皆令按月休期開支有過期者不支  
各衙門造冊官吏遲慢者具奏罪之。上曰爾言固是但北京  
與南京事有不同當體人情而行今後過三月者不支者為令  
○癸酉給半島王表圭弟二弟鎮國將軍美境成祿一卒石于  
山西布政司米鈔兼支。○夜有流星天如雞彈色赤尾跡有光  
出織女後有一星隨之東北行入天津。○甲戌遣行在禮部侍

卽李琦鳴臆寺卿徐永蓮行人張聰等齎勅諭安南頭日恭利  
及其耆老曰覽奏具悉朕奉天子氏四海萬邦咸圖康濟矧  
爾安南距京師非遠陳氏歸化最先諸國豈忍遐遺獨今不遂  
所欲哉前聞陳氏有孫尚在爾等奏請立之俾主宗祀朕用嘉  
悅卽詔罷兵乃還所遣牧守令爾頭目耆老具實來聞蓋樂從  
衆志以圖保全一方也未幾爾等遽言陳氏之孫病死而爾謹  
守其國以待朝命朕以陳氏之後未必惟存一人再勅訪求今  
稱其後無遺遂有改命之請夫滅得一人以綏一國足愜予志  
但建立事重所當詳慎誠以陳氏之先德厚族衆歆處幽僻宜  
尚有人昔永樂中大軍初擒黎季犛父子卽下陳氏子孫立之  
是時國中皆謂已絕既歷二十餘載尚有存者推昔較合理未  
必無其令耆老人等徧歷咨訪如有陳氏子孫卽具名來聞若

咨訪實無朝廷當與處置爾利仍徧諭土官軍民之家有藏匿  
朝廷官吏軍人及其家屬者悉令送還軍器委素山澤者固有  
敵懷若城郭所收並須送納上之御下每務含容下之事上宜  
博誠敬庶幾去危即安之道爾其欽哉別勅利曰爾奏九歲之  
女馬騏收養帶回京師者欲得完聚聞之惻然朕為天下父母  
忍一穉子獨違所親即令咨訪蓋水土失性病死久矣父子  
之愛皆同脩短之數有定特諭爾知是日賜琦永達聰道里費  
使人何栗等衣鈔遺隨琦行○乙亥給清河公主及駙馬孝銘  
歲祿共二千石真定公主及駙馬王誼如之給會昌伯孫忠歲  
祿一千石新建伯李玉歲祿八百石俱於南京米麥魚支口行  
在戶部左侍郎李昶奏江南官吏率民運糧至者京師力士軍  
校工匠之無賴者多端詐偽強索財物及攬納誑騙擾害非小

乞嚴禁止

上命行在都察院揭榜禁戒錦衣衛造人緝捕



大明宣宗憲 系宗道 英明神聖 欽文昭武 寬仁純孝 章皇帝實錄卷之五十二

明宣宗章皇帝實錄卷之五十二終

大明宣宗章皇帝實錄卷之五十三

宣德四年夏四月丙子朔享太廟○遣中官祭司竈之神○  
寧王權奏曰臣切念祖宗積德之厚 父皇創業之艱立法  
畫訓以傳萬世錫子孫保全之福為宗室久安之計宣德元年  
八月江西布政司移文謂太祖高皇帝子孫以祿米定品級  
臣不勝惶懼伏惟 祖訓所載祿米蓋親親次序無有品級誠  
以子孫皆 祖宗一氣之中分不與異姓同至今四代乃定品級  
臣恐萬世之下謂自今日始也昔 父皇在位時靖江府將軍  
比正支減一等亦無比品凡朝賀祭廟皆與諸王同班惟駙馬  
儀賓有比品駙馬比從一品而冠服與侯同班列侯下郡君儀  
賓比從四品常服亦用麒麟玉帶班列都督之前亦蓋以至親不  
以品級論也又 父皇嘗謂靖江世子兄弟做將軍但異姓相

見還行君臣禮其衣服且着穿素二十年後諸孫有冠者袍用四爪龍冠用唐帽蓋不敵與外人同也今定品級則列于外官之下 聖子神孫皆 祖宗遺體臣不避斧鉞之誅干冒 天聽伏望赦免誠宗廟之福骨肉之幸也 上覽奏謂侍臣曰朕自即位以來恪遵成憲蓋 祖宗聖知立法精密以維持萬世非後人所可輕議昨以祿米定品級皆出舊制非出自朕今行之三年忽有此語其意蓋未可量若不明白則蓄疑積釁事將不測朕當有以復之○丁丑勅襄城伯李隆等於南京修葺邸府郡主儀賓第宅但取堅完勿事華侈○行在吏部奏各處吏多有考滿不給由丁憂服闋及裁替不赴部或改換文卷仍優恭<sup>亮</sup>或詐稱親喪相繼守制把持官府取索贓賄起滅詞訟生事告訐顛倒是非誣害良善蓋其立心不臧輕視國法當嚴某

約遣者論罪 上諭尚書塞義曰朕比語卿以 太祖皇帝之言正謂此也其揭榜嚴禁之○命行在戶部免昌平蘇陵戶雜役○戊寅復書寧王權曰承諭以祿米定品級非舊制念切之情適于言表再三披閱駭愕良深蓋事有非然理應明白所言太祖高皇帝子孫舊無品級之說今考 祖訓錄內凡郡王之子授鎮國將軍三品孫輔國將軍四品曾孫奉國將軍五品玄孫鎮國中尉六品五世孫輔國中尉七品六世孫以下世授奉國中尉八品是郡王子孫未嘗無品級也又云靖江王府將軍比正支遞減一等亦無比品凡朝賀祭廟皆與諸王同班必若此言則諸王兄弟子姪同為行列是無尊卑之分曷為而可又云 太祖高皇帝於郡君儀賓比從四品常服用麒麟玉帶班列都督府蓋以親親不論品級今考 祖訓錄 皇明祖訓及

禮制皆無明文可稽今之所云未審載于何典禮也又云高皇帝嘗謂靖江世子兄弟做將軍衣裳且着穿素而郡君儀賓既比從四品則令用麒麟玉帶如此即是抑族屬而重外親疏戚倒置於禮可乎又云高皇帝謂靖江世子兄弟做將軍但是異姓相見還行君臣禮今考祖訓錄皇明祖訓及禮制並無明文可徵但有洪武二十九年十二月欽定靖江王庶子鎮國將軍與郡王相見禮儀云鎮國將軍凡與駙馬儀賓公侯相見將軍居左駙馬等居右皆再拜與文武一品官至三品官相見將軍居中各官拜將軍各拜與四品以下官相見各官拜將軍坐受凡遇將軍於道駙馬儀賓公侯讓左並行文武一品至三品引馬側立四品以下者下馬凡傳其言曰鎮國將軍商旨稱呼之曰官人此有明著而別無行君臣禮之說若必如所

云行君臣之禮是教子孫越禮犯分不知有君矣且羣臣於靖江府將軍前皆行君臣之禮是天下紛紛多君也春秋之法天無二日上無二王家無二主聖人之道尊尊親親各有攸當故知此語決非太祖高皇帝所言今郡王庶子以下品級則載于祖訓錄靖江府將軍與羣下相見之禮則載于洪武二十九年欽定禮儀此皆太祖高皇帝所制以垂範子孫臣民所慮者甚遠所定者甚精皆非一朝一夕之所成也至洪武三十五年八月太祖皇帝臨御之初即令禮部申明舊制行此數事太祖皇帝當時見祖訓錄內鎮國將軍等品級與歲祿不相應遂加鎮國將軍從一品輔國將軍從二品奉國將軍從三品鎮國中尉從四品輔國中尉從五品奉國中尉從六品今行之二十有八年矣予自嗣位以來恭體祖宗之心恭循

祖宗之法非敢毫末有所增損况於諸叔祖諸叔及諸兄弟上念祖宗之重親親之意未嘗敢薄亦未嘗輒有悞逆之事往者逆賊高煦在太宗文皇帝時屢造大罪及予嗣位加厚待之而包藏禍心終謀不軌然求朝廷之過未得輒妄稱太祖高皇帝時未嘗頒給羣臣勅誥以為擅改舊制具本指斥遂舉兵反及被執至京出洪武中諸司職掌示之逆煦俛首無言愧悔不及今叔祖輒有不避谷鉞乞為赦免之說宗廟神靈鑒臨在上何寬何抑而忿恨不平予覽畢以示公侯伯五府六部文武大臣咸謂叔祖意非在此蓋託此為名耳不然何以宣德元年八月之事而至今始發也予已悉拒羣臣之言不聽尚望謹之或復不謹非獨羣臣有言不已天下之言皆將不已是時予雖欲全親親之義有未易能今故舉陳本末惟叔祖虛心聽

察庶幾君臣之分定尊卑之序明而所議品級又何繫于輕重  
何幸於禮法哉若以謂族屬之長必誣執為朝廷之過天理人  
心不可罔也惟叔祖亮之○四川茂州汝奉川寨番僧燕旦兜  
監藏威州魯思蠻等寨番僧曾咨烏思藏管覺護教主幹噶兒  
吉刺思巴八藏卜遣僧人什占千等來朝貢馬○命故中軍都  
督同知梅順昌子教襲馬孝陵衛指揮使○賜四川威州兀惹  
寨刺麻番僧羅如藏等銀鈔絲幣表裏有差○賜孝陵衛指揮  
使梅景福梅永善世襲誥命○陝西按察司僉事胡亨言延安  
府綏德高施延川延長宜川清澗甘泉吳堡米脂安定洛川中  
部十二州縣去歲春夏亢旱及秋霜早田皆無收今當耕種之  
時民多缺食已全有司發廩賑之各具數上聞○已卯浙江上  
虞縣人李志道充楚雄衛軍死而無繼正有孫宗傑已赴鄉試



中式而衛尤追補軍役不已有司為之達于兵部尚書張本請  
依洪武中石堅事例開其軍伍俾讀書會試以自效 上從之  
曰 祖宗立法如此正以作士氣成賢才朕遵承舊制又何急  
于一卒之用乎○庚辰監察御史張純言四事其一南京刑部  
都察院所問罪囚例應納米贖罪者皆送軍儲倉監候多有無  
勞馴至死亡其罪應死者不論着非死罪而死實有可矜今後  
請令原問官司審實果無勞力如舊決斷其二近奉 聖旨各  
衛所收支糧米皆委首領官及倉官同任其事緣衛所首領官  
止一員既掌簿書又主出納人才之力有限恐至妨廢宜添設  
一員俾專任為使其三南京國子監生有及一二十年未得進  
用百員朝廷教養之意請令兩京監生歷事授官相參取用庶  
免淹滯其四風憲官為耳目之司任紀綱之重糾劾百僚肅清

庶政宜養其銳氣以副任使近來風憲多懷顧忌少有敢言詰  
奉勅勉勵令各陳所見則風紀斯振言路無壅上皆從之謂  
右都御史顧佐等曰朝廷立法凡諸司官員及百工技藝之人  
皆許言事况風憲官職當言路朕所倚信者豈可有所顧忌爾  
宜以其職喻之若當言不言以失職論○陝西綏德州奏去年  
旱災州民艱食及今尤甚而上司賦役浩繁如運糧運茶之類  
民不堪命乞稍寬之上覽奏以示行在戶部尚書郭敦等曰  
卿等寧不與朕同憂乎恤民力當如救焚豈可以緩運糧可酌  
量使之運茶之類一切停止○慶壽寺僧志了奏城西平則門  
外故有萬安寺久廢請化緣於民重作之上諭行在禮部尚  
書胡濙曰化緣者巧取詐奪以盡吾民不可聽○辛巳廣西總  
兵官都督山雲討柳濤二州寇廖得寧藍再陸等誅之并誅其

從寇二千四百八十人梟首境上以徇歸寇所掠軍民男婦四百四十六人以聞 上覽之謂行在兵部尚書張本等曰蠻性亮悍其死皆所自取今瘴癘之時宜速令息兵有未服者遣人招諭若能順服亦可寬貸○壬午 皇太后聖節 上親率親王行上壽禮宗室諸王各遣人奉表賀文武羣臣命婦行賀禮○癸未宣府右衛總旗潘自興奏舊屬太原中護衛於定襄縣管辦煎鹽今調宣府緣定襄有鹽場未報官者尚多臣久居其地熟於煎辦乞令仍回煎鹽辦課 上謂行在戶部尚書張郭敦曰朝廷廣言路以求治道近來言者多出私心或相告訐或相專利已若此卒所言蓋欲苟免軍役還鄉擾民不可聽也其令兵部械送宣府著役○甲申命逮伊王府山川壇于河南府城之東南為洛水所決王請改建乃令有司為改擇候農隙為之○

釋方政穆肅降政為行在左軍都督府都督僉事肅為行在錦衣衛指揮僉事初政以都督同知鎮守交趾肅以都指揮僉事坐事謫戍交趾俱從王通棄城還下行在錦衣衛獄至是上察其可用且棄城非二人意特宥之而降其職○山西代州儒學署訓導事舉人曹勗上章言臣年少學問未充不堪為人師願就太學讀書以待下科再試或授別職亦得自進上謂吏部臣曰凡人不自滿者其志可嘉可授縣幕俾習知民事如有餘力亦可進學遂改江西泰和縣典史○陞漳州府漆門巡檢司巡檢朱顏為縣丞時行在吏部言顏在任獲逃軍一百五十三人作耗強賊七十人舊例能擒賊益六十人以上者不拘例陞用今巡檢當陞上曰巡檢以詰奸慝為職而能盡心如此是亦可嘉其陞縣丞以勵來者○上退朝御便殿與儒臣論史因

問漢唐諸君在位孰久對曰漢之武帝唐之玄宗皆在位久

上曰漢武好大喜功海內費耗末年能懲前過玄宗初政有貞

觀之風久而恣慾疎諫忠任邪遂至禍亂竄身失國武帝猶為彼

善於此又曰善心生則明孽心生則闇武帝以田千秋為賢玄

宗以李林甫為賢此治亂所由異也○乙酉行在右軍都督高

成以老乞致事從之命其子山襲為行在羽林前衛指揮使○

命哈密衛故都督僉事木納子尹亦襲職從忠順王卜荅失里

請也○行在兵部尚書張本奏舉前北京行部員外郎徐琦有

才有守職方司辦事人材陳孜勤謹有能今皆聽選乞授本部

屬官 上命改琦為職方員外郎擢孜為職方主事因諭行在

吏部臣曰近來人材未與六品京官但張本廉謹所舉必當故

從之他有舉者必會官考試然後量授以職○從隆慶州永寧

縣黑峪巡檢司於紅門口時巡按御史王聰言黑峪口已置官  
軍戍守而巡檢司相去止十五里其西南三十里有紅門口正  
當居庸關北天壽山之後有路通昌平軍民逃逸者皆由此請  
移黑峪口巡檢司於紅門口為便 上命都督譚廣覆勘廣奏  
稱便遂徙焉○丙戌命襄城伯李隆以軍匠修南京 社稷壇  
四門○陞行在翰林院檢討胡種為本院修撰行在雲南道監  
察御史連均為江西布政司右叅議行在陝西道監察御史石  
璞為江西按察司副使四川布政司右布政使殷序為本司左  
布政使陝西布政司左叅議吳存為湖廣布政司左叅政湖廣  
按察司僉事朱與言為四川按察司副使皆以三考無過陞  
擢進士張佑賈銓李運劉海為行在給事中佑刑科銓海禮科  
運兵科優趙顯宗潼川州知州陞正五品祿顯宗考滿當遷以

其民奉乞履任故有是命○行在吏部引進士監生及聽選敕  
官林英等十五人除監察御史 上曰風憲之任未可輕授令  
於各道歷政三月都御史考其賢否分等第以聞然後授官○  
增置神武中衛定邊衛通州左衛通州右衛經歷司經歷各一  
員以兼收支倉糧事繫故也○太監侯顯等歸自烏思嚴以烏  
思嚴所遣朝貢刺麻僧人入見命行在禮部供給如例其留止  
河州者勅都督同知劉昭如例給之○行在兵部奏甘州前衛  
千戶石安等送官馬至京中途馬多死由不用心之故請送法  
司罪之仍追償馬 上曰人亦有病豈但馬若送馬人道病死  
者官司未必以聞馬死不必罪亦不必償○丁亥 上語右都  
御史顧佐等曰臨清以南諸閘專為蓄水以便行舟比聞閘官  
罷軟多為權勢所惱不時開放輕泄水利強梁者即度良善者

候經旬日甚至忿閭溺死者有之爾即揭榜禁約惟進薦新物者再行不禁其餘不分公私必候積水及則方得開閉若有公事不可緩者即於所在官司轉給馬驢以行有仍前脅制及聽從者皆論罪不貸○陞行在吏部左侍郎兼少詹事郭璉為本部尚書罷其兼職○戊子 上以軍民每歲漕運勞苦欲少蘇其力使歲運不乏命行在工部尚書黃福往經畧之勅諭福曰國家餽餼悉出江南比歲以來輸運轉艱必盡處置之宜庶幾經久之道今命卿同平江伯陳瑄計議凡民間所運稅糧當于何處置倉收貯令官轉運或不必置倉令軍民輸運如舊務處置得宜使公私兩便其緣河運木皆由河水淺澁用力故勞當如何疏導人樂趨事諸閘積水舊有定規而挽于豪橫啓閉不時水利日消公私皆滯甚者至於頽廢當如何修治使上下通



行無壅凡諸漕事一以委卿必皆適所宜必悉革舊弊尤須撫  
綏軍民斟酌其力不可過于煩勞且嚴禁下人毋肆擾害卿國  
之大臣朕所倚任必夙夜祗勤悉心殫力上副朝廷之命下副  
軍民之望欽哉○己丑行在吏部奏第二甲進士王懋應投從  
七品官其允嘗為御史以誤決死囚抵罪懋乃極刑家屬當罷  
不用 上曰士勤苦問學始登一第棄之可惜朕記憶 皇祖  
時一進士以極刑當罷念其成才之艱特命吏部錄用此其故  
事也具以懋為州判官○辛卯 上諭行在鴻臚寺臣曰凡遇  
祖宗忌日通政司禮科兵馬司免引因奏事○上以久旱無雨  
遣太子太保成國公朱勇祭大小青龍之神其文曰今畿甸之  
內自春及夏雨澤愆期年麥稿枯穀苗不遂耕農為憂歲計無  
出朕為天下生民主用是惓惓靡寧夙夜惟神功存澤物久著

明靈鑒予志誠早彰靈應需敷甘靈霑足遠邇用致豐稔副予所望祭畢大雨數日乃止○行在工部言去年蘆溝河決滄浸禾稼壞南海子墻垣及廈壘諸閉用工修築久而未就今請命廷臣往督之庶幾早完 上曰去歲興役乃延緩至今今農在田雨潦將至尚可緩耶令侍郎羅汝敬往督必計日成功毋妨農事○監察御史王翱等奏往年諸司官吏及公差之人害民蠹政贓犯滋甚逆蒙 聖斷明正典刑衆心知戒此風願革切見今運磚之利不問輕重罪名工滿皆還職仗是貪黷有財者幸免廉潔無私者獲罪款以勸懲蓋無分別謹陳愚見伏乞 聖裁凡犯贓官吏見運磚未完及自今有犯贓私者運磚之後雜犯死罪文職官吏原籍為民軍職調衛應徙流者文職降用吏典改撥軍官還職其笞杖罪名與非贓犯者皆還職役庶幾

貧者革心 廉者勵節 上諭三法司官曰御史所言良是其從

之○癸巳造東宮儀仗成金輅一板轎一令旗一對清道旗二

對擘弓一刀盾十對弓箭二十副白澤旗二青旗二紅旗二黃

旗二白旗二黑旗二青素旗二十金鼓旗二金龍畫角十二花

匡鼓二十四柶鼓二金鈺二金二板二笛二杖鼓二小銅角一

對大銅角一對纓頭一領頭四對絳引幡一對傳教幡一對告

止幡一對信幡一對羽葆幡三對儀鎗斃三對戈斃三對戟斃

三對梧杖二對儀刀二對班劍二對金鉞二對立瓜二對卦瓜

二對骨朵二對鐙杖二對叉叉一對戟十對稍十對夾稍一對

鹿一幢一節一金節二對響節六對青方傘二紅方傘二紅銷

金傘一紅繡五柄圓傘二紅繡曲柄圓傘二紅繡花直柄傘二

紅圓傘二青圓傘二紅油絹銷金兩傘一青繡孔雀圓扇六青

繡花團扇四紅繡花團扇四繡孔雀方扇四青繡方扇四金  
馬杌一金交椅一金脚踏一子二紅紵線拜褥一金水盆一  
金水罐一金香爐一金香盒一金唾盂一金唾壺一金紗燈籠  
二對紅油紙燈籠三對鮑燈三對○召太子太師致士郭資赴京勅  
曰卿祇事 太祖 太宗暨予 皇考寅恭小心執德不移雖  
緣優老之恩退休致之地然精神未倦聰明未衰今朕思任舊  
人特勅召卿其即赴京以副虛佇之意○免少師隆平侯張信  
朝奏勅之曰卿祇事 祖考多歷歲年今春秋已高特免卿朝  
奏惟朝朔望用稱朕優待老成之意欽哉○都督僉事劉廣奏  
今鎮守甘肅以家屬同往乞移在京俸米三分就陝西行都司  
閩折俸鈔七分仍于京庫支 上從之命行在戶部凡鎮守總  
兵之俸各從所便使祿有所仰給○甲午命行在工部為趙王

第二子瞻高營府弟時趙王奏瞻高將婚未有居室兩牆東有隙地可作 上命工部具圖進且曰宜加意使寬整其西旁空閒地多更與增造毋惜小費○雲南鶴慶軍民府故土官知事董宗子壽貴州金筑安撫司土官安撫金得住道頭目李宗讓等來朝貢馬○四川按察司奏四川軍民狡猾健訟忍心害物淆亂憲章往往有小忿爭輒興大獄詐張事勢飾造誣詞實封奏聞煩瀆聖聽自宣德元年以來本司奉行二百餘事徇捷鞠問大半涉虛蓋誣人死罪止坐徒三年軍及餘丁止杖一百民人則發充弓兵滿日釋放得罪甚輕因此恣肆冒犯而良善被其誣罔不但妨廢生理多有破產亦畏畏軀請嚴禁約束有機密重事許實封進呈若私事獨論訴者必自下而上陳告有擅動實封者令法司治之并窮究教誘之人皆坐以罪連家屬發戍邊境正

單則仍于其家別選壯丁于原衛補伍庶使姦頑知懼訟商民  
女 上從之命行在都察院揭榜集約○乙未命行在戶部忠  
勇王金忠象太保之體以全未給之○賜烏思威管覺護林王  
使臣番僧什占十等四川茂州女奉川茶番僧燕旦免監威威  
州寺思蠻等蕃番僧曾容等鈔錄帶衣裘及貯錄籠木有差○  
詔單上自交止遂若于所在軍衛收授元是 上詔征守交止  
單從原伍其後有徑還其卿不之原野有行在兵部以其中精  
銳者多慮有更易之患請令單衛有司候訪其卿近原衛者令  
赴衛遠則收丁所在衛所其軍之補授者亦然 上從之且曰  
若毋不赴衛以逃論以勸告上者罪之現講成里蘇不古有同  
罪○職罰庫副使王斌竊庫物律當斬法司以聞 上曰君子  
近利而不遠丁則乃高可貴安命當庫以防盜乃自為盜當犯

而死何辭命如律。○上退朝御右順門諭三法司官曰昨大理寺奏陝西單牛因盜一羊而殺人論罪當斬朕息一羊之且幾何而致于殺人取之所得甚微而所喪甚重幾釐獄中有可疑者卿等更須詳審。○丙申命在外文武官歸所給官馬洪熙祐天下有司官未朔尚書李慶言大漢馬多諸人給一匹興業就育其孳牧既而有言事乖改體隨有詔止之然已有領者未及還官至是兵部請令歸馬于南北兩京太僕寺給民孳牧近鎮守之地者給軍士騎操從之。○春劉燮惑犯右執法。○丁酉改行在旗手衛指揮使郭竒于南京旗手衛食祿不視事先是竒自陳故父營國公吳墳塋在南京歲時無人祭掃故有是命。○南京進鮮魚早薦 奉先殿獻 皇太后午 上御文華殿召大學士楊士奇楊榮金幼孜持賜鮮魚醇酒加賜御製詩有樂

有嘉魚之司士可等齎獻和童。上喜曰朕與卿皆當以成  
周君臣自勉庶幾不忝。祖宗之付託。戊戌。上御奉天門  
謂行在兵部尚書張本等曰昨會寧伯手英言西寧衛舊選隨  
駕官軍五百人詣于內撥五十人赴京隨從滿歲而更朕思所  
選五百人蓋是。太宗皇帝在沙漠時所用今京師侍衛自有  
親軍何必外求其意蓋欲自隨非為國家計也舊制在京公侯  
伯皆無官軍隨從之例豈可以變。祖宗之法英言不可聽。  
陛行在工料給事中李庸為順天府尹。或刻受皇札右執法  
○已亥。上語三法司曰今天氣向熱因繫宜早疏遣即具情  
犯輕重以聞。給唐府新野王璫輝歲錄二千石於河向米鈔  
泉走。庚子。上御奉天門謂行在都察院右都御史顧佐等  
曰舊例軍民詞訟自上而上下不許越訴近來奴頑小人或曰私



念軌造虛詞擅動寶封或象人赴京遞狀原吏良民多被正杜  
四川尤甚既已命集約仍榜諭天下今及機密重事有寶請者  
方許寶封奏聞其餘事應古理者必須自下而上若仍前越訴  
不問虛實法司一體治之仍究主使教考及代書詞狀之人俱  
杖一百併家屬悉發遼東永為定例。行在工部奏南京修理  
海船請於湖廣江西二都司及直隸鎮江諸衛取車二萬四千  
人供役如例給糧事畢放遣從之。夜向京地震曉刻後震。○  
阜丑琉球國中王尚已遣使者耶伯茲每山向王他魯每  
遣通事梁容祖等來朝貢馬及方物。○癸卯蜀王友清奏欲修  
治宮室乞備成邵三護衛官單旗校當往松潘等處傳器械者為  
之從之。○四川播州宣慰使楊昇遣長官馮添祺陝西秦安縣  
番僧也夫須占等貢馬。○命故陝西都指揮僉事尚都驢姪榮

整為大興左衛指揮使山西都指揮使事權信姪安遼東都指揮使事孫得旺孫頌俱為今各右衛指揮使全吾左衛指揮使同知孫喜子子興整為本衛指揮使事燕山前衛指揮使王義子英金吾後衛指揮使劉謹姪剛通州衛指揮使包坎子清董貴子敬羽林前衛指揮使李敬弟信伯倅倅同知郭旺子海倅倅會事民成子止全吾後衛指揮使張斌子物子端末衛指揮使同知李端弟成俱倅倅羽林前衛指揮使同知王光疾命其子忠代○反心流星大如盃色赤有光起大市但西南行三陣車○甲辰賜雲南鶴慶軍民府文土官令人重葺寺奇州全祀安撫司同日手示謙寺沙線帶衣裏綃及貯絲帶衣有差



明宣宗純孝皇帝實錄卷之五十四

宣德四年五月丙午朔亥刻有流星大如鷄彈色赤尾跡有光  
出聲道東北行入天津○丁未亦力杞里拾伯沙來歸奏領居  
京自殺命為所鎮撫賜冠帶金織氍毹紫緜銀鈔綿布鞍馬仍  
命有司給房屋器皿等物如例○陝西漢中衛卒周堡妻毛氏  
一產三男下閨命給賜如例○夜有流星大如雞彈色青白尾  
跡有光出北洛師門宮東南行上雲中○己酉永清縣奏蝗蝻  
生上問左右曰永清有蝗未如他縣何似錦衣衛指揮李順  
封曰今日邠木谷皆茂獨曰永清偶有蝗耳上曰蝗生必滋  
蔓不可不備有命予在戶部選遣人執往督捕右庶尹即馳驛  
來問○庚戌端午賜文武羣臣扇及宴○辛亥潘王瑛奏弟  
八子沁源王倍輝選洛城縣知縣當城女為妃斌有坐事請成

懷未合婚期已近乞暫令試歸。婚嫁畢後詣簡所。上命行  
在兵部乞試成後具知縣職不理縣事。令休三日止已而顧侍  
臣曰此不得已為親者屈也。于在兵部奏比者京衛官軍有  
詭名冒給官馬盜賣者請嚴禁令盜賣者罰馬二匹知而冒者  
及牙保隣人各罰馬一匹仍先給諭許自首免罪不首及所官  
官瑛里若牙保隣人皆同罪仍追抄五千貫賣去捕者從之。○  
誅常州豪民王祖等祖先以殺人繫行在都察院擬用重賂得  
免既歸不悛與同鄉家民偕用故等皆以殺人等罪大理寺卿  
胡榮執送京師。上覽榮所奏祖等罪甚為甚命行在都察院  
覆審引伏遂斬於市。○壬子命改駙馬都尉廣平侯袁容子楨  
襲廣平侯。○雲南北勝州土官判官高琳子瑛來朝貢方物請  
襲父職。○陞哈爾差來都指揮使把台為都督僉事副千戶天

夫為正千戶百戶哈魯人省伯復禿所鎮撫下他罕為副千戶  
命亦那夫里整為指揮僉事阿馬力大馬目為所鎮撫。陝西  
慶陽府通判王俊奏子聰見任監察御史山東單縣學教諭李  
觀奏子蕃見任兵科給事中俱應封父母乞棄見職就封從之  
○行在三法司奏做圖罪狀 上親覽決凡反逆殺人強盜妖  
言惑衆造偽印發塚見屍誣告人致死凌虐人致死假降邪神  
枉法受財者皆依律除雜犯死罪及流徙以下如例連執無罪  
者釋之是日發遣二千二百餘人○改創兩浙都轉運鹽使司  
所屬浦浦場鹽課司并鹽倉於金山衛城西門外初奉司公廨  
鹽倉在城內至是言不便煎辦故改創焉○謫行在監察御史  
楊居正司鐸年綸雷恭胡謙清岑克軍遼東皆以貪淫不律為  
邪御史顧佐所劾初佐初御史嚴暄等貪淫無耻居正等六人

與焉曠寺已發遼東充吏居正等以公差出外至是還當發充  
吏而妄奏冤抑 上謂行在吏部曰彼貪淫無耻尚敢妄訴以  
冀苟免俱發遼東各衛充軍其先發充吏者如之卷○癸丑廣西  
鎮安府上官知府岑永壽遣族人岑堅四川長河西通寧遠  
寺虐判麻問卜雪能歲撒馬免罕回回阿力沙等來朝貢馬及  
金銀器皿○命行在禮部尚書胡煥兼掌詹事府事時吏部左  
侍郎兼詹事府少詹事鄧璉陞本部尚書罷其兼職故有是命  
○賜成邵右護衛副千戶田禾等一百二十二人鈔以司工造  
未進貢也○甲寅四川雜道長官司土官長官女伯遠東自在  
州指揮僉事木合兀妻兀答等來朝貢馬及金銀器皿方物○  
行在工部奏睿雲中衛城垣頽壞前奏勅單衛有司相兼修築  
今部指揮將責權促民夫用工甚急緣雨水已隆切恐速成不

朕堅久 上命罷役俟秋成後用上。罷河南按察司僉事趙  
純高民純先任監察御史巡按山東受縣官銀幣娶妾事在赦  
前當違執贖罪 上曰風憲贖罪不可贖其罷為民。丙辰行  
左兵科給事中戴弁奏自山海至薊州守閫軍萬人列營二十  
二所保練之外無他差違若稍屯種亦可資邊計取劾各營附  
近荒田料酌分給且屯且守實為兩便 上嘉納之命行在戶  
部同兵部各遣官與都督陳景先經理。丁巳書與寧王權曰  
所喻欲得灌城一鄉田土與庶子耕牧朕不吝惜但於民無損  
於禮無違是為朝廷經久通行之法可也今戶部言灌城之田  
共一千六百一十七頃六十餘畝鄉民所賴以足衣食別非荒  
閒之田况庶子郡王自有歲祿贍之 祖訓亦無撥賜田地之  
例若從叔祖所言百姓失業必歸怨朝廷亦必歸怨叔祖矣今



叔祖為諸王表率使諸王皆做叔祖所言豈不皆遠 祖訓而

損賢德故撥田之喻不能曲從惟叔祖亮之○賜琉球國中

王使臣郭伯恭等及山南王通事梁恣祖等鈔絲幣表裏有

差○四川安岳縣學教諭何澄建言十事曰重兵制擇守令慎

財用興學校選耆老均賦稅防姦幣清吏使肅禮儀平訟獄

上覽之謂行在禮部尚書胡濙曰其言雖若無序其實於時有

益可會舉來其切要者行之○戊午上魯齋城都指揮僉事也

若著見哈察等慶回回刺罕倒兀等來朝貢馬○命行在工部

及湖廣三司遣官于長沙修治谷廡人舊居官室以俟葺王之

國罷衡州府修理○己未行在禮部以鄭王襄王荆王淮王梁

王之國條具合行事宜以聞一緣遠應祀神祇據道行人合有

司具祭物至期啓王遣官祭之一王之國告祀社稷山川等神

所司為具祭其後祭祀則王國自具一諸國教祭祀樂舞者例于北京神樂觀選樂舞生五人所用樂舞生選本處道士道童不足則選軍餘充之燒香道士亦於本處宮觀有度牒道士中選用禮生齋郎舖排廚役屠人於本處及附近有司取用一所用醫士選本處醫者如其數一諸國應用樂工二十七戶今隨侍去者不足則於所司樂戶內選精通樂藝之人充之一國社園稷山川寺壇改所在有司壇場為之一經過南京孝陵祭祀翰林院為撰文香帛於內府閤支牲禮品物及在京應祀神祇酒果皆太常寺供備從之○命土魯番成僧桑果大師為本處僧綱司都綱哈密衛僧太倉為本衛僧綱司都綱時俱來朝貢馬政命之○賜四川播州宣慰司土官長官馮添祺陝西秦安縣番僧也失須占等鈔錄幣表裏有左○庚申賜寧化王濟

煥庶長子名美瓌第二子美瓌第三子美塔第四子美坊第五子美埔○行在通政司奏神策衛經歷郭豐考滿當受勅命并封其父母其父尚存誤作已故申吏部今自首乞免罪 上曰事固有無心而錯誤者然父母存沒豈當有誤於此有誤即平日所治職事可知不准所首付法司治之○辛酉陝西洮州衛百爾占等簇刺麻高僧捨那藏卜雲南定遠縣黑鹽井巡檢司把事楊景芳等來朝貢馬○陞掌府事前衛都指揮同知陳敬王或俱為中軍都督府都督僉事○壬戌 上謂行在兵部臣曰曩分撥錦衣衛多餘校尉於各王府今後有告願還原衛報效者勿聽○哈密忠順王卜吞夫里遣使臣打刺罕哈忻等貢貢○賜雲南北勝州土官舍人高瑛等鈔○瓜哇國使臣亞烈麻抹等將還國訴于行在禮部云來時舟為海風所壞乞令廣

東都司布政司造舟與歸又欲以所費之物於廣東易鐵禮部  
言蕃臣朝貢其職當然舟壞應自出費以造豈可上煩朝廷且  
鐵有禁例昏不可從 上曰易鐵勿聽但遠人來朝撫之宜厚  
造舟小費不足校宜從之○行在中軍都督府奏府治獨壞命  
行在工部秋成後修葺○癸亥賜四川長河西魚通寧遠宣慰  
司利麻問卜雪能藏雜道長官司土官長官安伯廣西鎮安府  
土官知府岑永壽族人岑堅等鈔綵幣表裏有差○陽武侯薛  
祿奏神機營官軍初留一萬五百六十人於口北十八衛所守  
備議于內地衛所選補其缺今久而未補乞如前議 上命行  
在兵部補之祿又奏山海至永平十九衛所初調官軍一萬二  
千九百六十八人於神機營操練後分七千九百七十人以屬都  
督陳景先於原衛所鎮守其間復有逃亡以故見操軍少不得

更代請令各衛補其逃亡以足一萬二千九百六十之數分為三班更番赴京操練其鎮守官軍則于退班軍內量撥上皆從之○甲子賜遼東自在州指揮僉事木答兀妻木答等五人徽馬兒罕回回阿力沙等六十三人鈔紵線絹襲衣有差○山西按察使張政奏各處軍民多肆狡猾或有規避或因讐隙妄生事端虛飾詞狀挾制官府誣害良善及至提對輒自逃遁使被告之人監繫于獄累月經年無由得釋瘦死者多乞勅法司凡詞訟有原告逃者其被告皆即放遣俟獲原告取至對理庶奸頑知畏良善獲安上命三法司官曰凡原告逃者被告即放遣勿問此皇祖定制也恐在外諸司未之行其即申明著為例○乙丑行在工部尚書吳中言昨山西代州圓果寺奏本寺是古跡道場為國祝釐之所舊塔塌壞今欲修理未敢擅造

且力不能自備乞于農間之日役民為之 上曰卿欲藉此求  
福乎朕以安民為福其止之勿勞吾民○福建福清縣民奏縣  
之光贖里官民田百餘頃舊有隄六百餘丈以障海水因隄壞  
田荒永樂中縣民嘗奏請築堤工部移文令農隙用工至今有  
司未曾興築民不得耕 上命行在工部責有司修築因諭尚  
書吳中曰陂地隄堰民賴其利外無贖令舉其政爾宜申飭即  
縣務及時修浚慢令者罪之○有建言治道而泛濫無窮者

上以示侍臣因論為治之要侍臣對曰為政在人知人為要  
上曰知人固難然臨事聽言之際以理為主君子小人亦可辨  
天下事即充弊處之亦取善於人人臣有愛君之心隨事規正  
以利國家此君子也若不念君德不恤國家阿意曲從以求容  
悅此小人也侍臣對曰知人誠難言有似是而實非者 上曰

然豈獨言哉於行亦然必正卯是已○丙寅賜哈密使臣打刺罕哈忻等鈔及綺綵金織襲衣綵帶表裏等物有差○己巳勅諭行在六部都察院曰國以民為本民女則國安朕亦大統君主天下孜孜夙夜以安民心顧國家用度有不得已取之于民者朕尤惓惓軫恤民艱爾六部都察院為國大臣常東愛君愛民之心有益於上無怨於下庶幾不忝祿位比聞中外奸弊紛然嗟怨盈路皆由爾等不體朕心凡朝廷科買一物輒差數人促辦所差之人又各有亡賴十數為之鷹犬百倍科徭民破家楚不勝其毒百分之一歸官餘皆入于私室人之困苦因所訴告爾等非不知之蓋實縱其所為風憲耳目非不聞之亦略不糾舉此豈仁人君子之心哉自今當洗心悔過以革前弊朝廷有繁急重務慎選廉公官員循辦不急之事悉不許差人假公

營私擾吾良民違者罪之仍令巡按御史及按察司官察舉如  
有前弊具實奏聞不察舉者與罪同○庚午給賄哈密差來都  
督僉事不刺納指揮僉事亦那失里等誥命○賜土魯番城都  
指揮僉事也苦著兒及哈密回回刺罕倒兀等絲幣裘裏紗羅  
綾綉絹有差○辛未 上御奉天門諭行在戶部尚書郭敦等  
曰近屢有言京師及通州各衛倉場象馬牛羊等房收支糧芻  
官攬人等玩法欺公取受財物虛出實收惟貧而無財者則收  
本色加以考掠數倍增收既收又偷盜入已其數動以千計爾  
戶部宜嚴禁止於是數等議奏凡收支糧芻官吏人等有仍折  
收銀<sup>金</sup>并攬納偷盜者許諸人出首或擒送法司正犯處斬仍  
追物入官家屬發戍邊擒獲與首告得實者賞鈔五十貫其嘗  
通同官攬作弊能自首者亦得免罪 上從之命揭榜戒約○



寧化王濟煥奏婚禮在邇乞免大同備禦官軍三百餘人歸以  
俛使令 上復書曰已令工部凡府中官軍在京聽役者悉遣  
還所款得大同備禦官軍三百餘人朕非吝惜蓋大同當極邊  
虜寇出沒衝要之路各郡王府皆有官軍守備故太原一路得  
以無虞若從所言罷歸則別府亦援例來乞難于處置矣○壬  
申行在工部右侍郎羅汝教奏交趾廣源州人閉顏岑丰烈譚  
忠謹初以龍川四村地歸附授顏本貫知州丰烈判官忠謹吏  
目黎利叛顏等三人義不從利咸歸龍州臨終屬其子玄成曰  
受天朝官職不可懷戴心從賊今顏已死乞憫其忠量與玄成  
等職事而處之善地 上命行在吏部曰闕顏等死不從賊亦  
當加恩玄成仍令為知州判官吏目職如舊俱于廣西布政司  
支俸有司常加綏撫○遼東總兵官都督僉事巫凱奏虜寇至

西山下掠民財畜隨道官軍擊敗之追回所掠 上遣勅褒凱  
且諭凱嚴守備○癸酉 上諭行在兵部臣曰比聞陝西河南  
諸處驛路朝廷差遣之人所過往往多索供給甚者十倍常數  
迫取丁夫馬驢車牛之類百姓猝不能給輒加考掠得財乃免  
又聞福建等處差遣者不來應給舡馬皆欲乘輜亦多違例強  
索百姓苦之爾兵部出榜禁約仍令巡按監察御史及按察司  
官不時體察仍遵法害民者具實奏來○勅諭各布政司按察  
司直隸府州及巡按御史曰朕荷天命嗣承 祖宗洪業惟以  
保民為心比歲田里小民負冤赴京陳訴者日衆究其所由皆  
府州縣不得其人小民受虐不能自存赴訴府州縣府州縣受  
誅縱奸往往反坐以罪又訴于布政司按察司及巡按御史亦  
有以枉為直以是為非或淹禁致死者由是被害者遂赴京越

訴但求雪忿雖死不恤京師刑獄之繁皆由于此夫理訟之道當寬實情使有罪者不逃刑無罪者不遭枉將殫民自戢良民自安訴訟自簡而政平刑清美自今宜易心改過去惡佑善錮奸植良如復不改致無理者肆雲不己被害者歸怨朝廷則國典具在罪不可逭○行在吏部尚書郭璉引中軍都督府經歷彭遠等及進士監生二百人擬除御史主事及郡縣正佐等官上諭璉曰古人授官必量度才德之高下與職事之煩簡而授之庶幾能稱選事方咨于爾其更勉修厥職乃擢彭遠為淮安府知府遠以求賢舉也進士李安馭陽涿張楷劉仕昌為南京監察御史安福建道涿貴州道楷江西道仕昌陝西道以任滿考最陞刑部貴州司郎中趙公器為應天府丞兵部武庫司員外郎周文為湖廣布政司右叅議行在交趾道監察御史屈伸

為雲南布政司左叅議行在浙江道監察御史郭堅為陝西布政司左叅議行在貴州道監察御史汪泳為江西按察司僉事貴州顯遠府知府顏澤為福建布政司左叅政復趙次進太僕寺卿次進任滿當陞以民奏乞留之也調行在禮科給事中賈銓於行在刑科降監察御史胡謙為縣典史謙嘗往虜州府開辦銀課科歛白金杖殺民婦法司言罪經赦宥應復職上曰是可復若風憲持命降之○論追斬鞋寇功賜遼東官軍都指揮劉清等三千一百七十九人鈔及白金綵幣表裏有差○上視朝退御文章殿讀典謨之篇率然成詩以示廷臣詩曰大哉堯舜君道高德巍巍睦親敦九族施惠漸羣黎命官察璣衡勤民謹天時文章赫輝映賢俊罔或遺元凱及稷契夷益與皋夔雍容廟堂上百工用允鑿治教既修舉刑罰廩所施祥徵徇雲

見樂奏彩殿儀盛治有如此端拱已無為猶聞謹天戒兢業恒  
自持矧子素菲薄夙夜念在茲惟爾卿大夫國家所倚毗進賢  
獻忠謹竭力殫謀為庶幾懋功采將追古雍熙斯言出誠惻勉  
旗爾勿違當歸明良歌毋取伐禮譏○甲戌命故金吾右衛帶  
俸都指揮僉事范廣子斌襲為本衛指揮使金吾右衛指揮使  
李忠子英金吾後衛指揮同知孫忠子勝羽林前衛指揮同知  
宋勵子瑄指揮僉事崔成弟剛金吾左衛指揮僉事包林子文  
王真子山羽林右衛指揮僉事蕭興子旺羽林左衛指揮僉事  
于奉先子能俱襲職金吾右衛指揮使喬福子教羽林前衛指  
揮同知坑金子貴王金子裕通州衛指揮僉事高興子山各代  
父職蓋其父皆自陳老疾也

明宣宗章皇帝實錄卷之五十五

宣德四年六月丙子朔○丁丑勅寧王權奏鎮國將軍以下不應有品級郡君儀賓應服麒麟玉帶 上既引 太祖皇帝所定禮儀復書喻之至是權自知非是具奏深陳悔過之誠 上復權書曰向者所喻必出一時匆促不及考究長史又不能以禮開說今叔祖深自引咎足見虛已從善之心夫事理既明辟之春水既消湛然無迹更不用芥蒂于心也○上退朝御奉天門召行在工部尚書吳中等諭之曰去歲各處薄收湖廣為甚其民艱難所宜寬恤比聞工部採辦竹木科冒諸物動以萬計何得不為國家愛恤民力而勞擾如此宜斟酌事之輕重緩急痛與裁省果是緊要合用之物則令營辦餘不急之事俟民力從容以漸為之寬一分則民受一分之賜卿等宜體朕意○戊

寅詔增雲南科舉額先是定雲南布政司科額止十人貴州布政司有學額試者於湖廣布政司就試其後貴州布政司言貴州去湖廣四十餘驛去雲南止八驛乞以近相附行在禮部以聞從其言至是雲南布政司奏貴州生從雲南試請增名額禮部議增五名從之○己卯四川伽木隆等處妙智通悟國師孫兒只監藏遣刺麻温卜釋麻監藏等貢馬及方物○夜夜字正行正濁不抄大如盃色赤有光起天廩東北行至濁○庚辰四川威州番僧刺麻引占等來朝貢馬○辛巳復雲南都司都指揮僉事吳旺陳忠職初旺忠生累就逮愍國公沐晟征交趾請以二人領軍立功至是還行在兵部奏二人例應復職調任 上曰總帥既言二人可用令復原任○命山東三司遣官專理河道時總兵官平江伯陳瑄奏濟寧長溝至棗林闡河道淤淺漕運不便初

朝廷專命侍郎蘭芳及山東三司遣官督視疏濬往來無阻比  
年不遣大臣惟都司按察司有官如舊督視而布政司亦不遣  
官乞令遣官如舊仍乞勅三司所遣官專理河道不與他事庶  
幾以便遣運從之○壬午遣都指揮喜刺丁等齋勅賜哈密忠  
順王卜荅失里忠義王脫歡帖木兒及都督脫脫不花都指揮  
陝西丁等文綺綵絹有差時內官李信等自哈密還言忠順王  
等能謹修臣職恪守邊疆故有是賜又遣指揮牙忽等齋勅往  
亦力把里及刺竹等處撫諭賜其王及頭目文綺綵幣及絹有  
差○浙江蕭山縣知縣吳汝芳奏本縣一百四十九里分設九  
區糧長二十三人催糧四萬餘石舊所隸諸里分設隔遠催徵  
不便請改就近分隸上命行在戶部移文所司審復俾從所  
便○浙江山陰縣主簿李孟吉奏本縣糧八萬四千五百九十



六石有奇中以一萬四千五百名運赴北京通州水陸之費凡  
費三石可致一石其餘輸于緣海衛所者過洋度囅每石亦須  
加倍有奇又有連風淪溺者以此糧多虧欠乞以所納于通州  
者改納淮安徐州令官軍催運其納緣海衛所者改于寧波府  
倉收貯以俟閏天庶民易輸納軍餉不缺 上命行在戶部從  
之○行在吏部聽還官歐陽齊言洪武中於各州縣置倉積粟  
令耆民大戶典守遇凶歲以賑濟秋成還官今各倉多廢一遇  
荒歉民無所望乞令府縣如舊修理倉廩原有儲糧給散未還  
官者悉徵還官其民戶繁而積粟少者豐年令所司支官錢於  
有穀之家平糶收貯庶凶歲無虞小民有賴 上令行在禮部  
議行之○湖廣華容縣耆民言去年十月兵部移文湖廣布政  
司分擬驛船運運船赴直隸揚州儀真運緣本府城陵驛并

遞運所上至長沙常德澧州荊州下至湖廣俱有六七驛之程  
明山古樓驛船八艘上至常德小江驛并安鄉驛南平驛水行  
一百八十里至華容驛一百六十里又下至城陵驛一百一十  
里析為四路而總三江汎路當要衝若雲南四川貴州廣西等  
處土官貢獻皆由於此遞運往來尚且未定乞免分撥直隸太  
湖縣耆民奏本縣十區勅各置糧長一人一歲更代今每區設  
永充糧長三人而糧止如舊額糧長既多徒見紛擾乞驗各區  
有糧三千石之上者設三人不及數者止設一人江西秦和縣  
耆民奏縣有南平橋驛使經行要路為水衝決請修治以便往  
來皆從之○日土左右珥邑黃赤鮮明○卷末行在戶部尚書  
郭敷奏福建廣東二布政司與直隸徽州府遞年稅糧除存留  
備用外餘皆折布鈔運赴南京今南京布鈔充積宜令福建廣

東徽州附近州縣量徵本色米於南京上倉 上曰舊時折收布鈔今令納米恐非民便姑如舊○河南布政司右叅議邢旭奏洪武中直隸安慶等府宿松等縣四鄉俱有預備倉糧令耆民大戶典守歲凶民饑借給賑之秋成還官今河南布政司州縣俱無預備倉糧及遇凶歲無以賑濟 上命行在戶部議行戶部言宜令各處州縣未設倉者如例皆設於今歲稅糧內存留或秋成支官錢於有粟之家平糶入倉以備賑恤 上曰此固善策須俟豐年行之○甲申遣中官祭中雷之神○賜陝西洮州衛右副占簇刺麻高僧捨那藏卜雲南黑鹽井巡檢司把事楊景芳等鈔絲幣絹有差○乙酉左軍都督府都督僉事吳守義卒守義勅名把敦杭海山人初自涼州歸附賜今姓名陞涼州衛指揮同知從 駕北征有功陞指揮使降虜闕脫赤復

叛追至暖泉殲賊衆獲其部屬馳馬陞都指揮僉事十二年從  
征至撒里怯兒擒紇有功令居定州復從征至鬼里列兒及拾  
敦之地皆有功洪熙元年陞左軍都督僉事至是卒遣官賜祭  
賻贈甚厚追封西和伯謚僖順○丁亥行在戶部尚書郭敦言  
嘗具奏減中鹽則例召商於北京納米不拘資次支鹽緣近年  
中納名項數多鹽不足支客商來者愈少今擬依永樂五年營  
造事例淮浙等處鹽不為常例以十分為率六分支與北京在  
城倉納米者四分支與遼東永平山海甘肅大同宣府萬全已  
納米者其餘各處中納暫且停支則客商皆至糧儲可積從之  
款又言洪武中客商中淮浙等處鹽者年久物故其子姪及遠  
親異姓之人徃徃具告代支多有虛冒請行各運司但洪武三  
十五年以前客商所中鹽於流通簿內銷注以各商姓名籍貫

造冊繳部移文原籍有司每鹽一引給與本錢鈔十錠庶革連  
年胥吏之弊 上曰國家嘗資其用矣彼身雖歿有妻子存今  
所給鈔不償所費其母引給鈔二十錠○申明女婦出家之禁  
時順天府大興縣真元觀女冠成志賢等詣行在禮部請給度  
牒禮部言 太宗皇帝時命尼姑皆還俗今成志賢等亦宜道  
還父母家 上命遵先朝令仍嚴女婦出家之禁○戊子行在  
錦衣衛故總小旗之子奏乞併鎗以繼父仗 上顧尚書張本  
等曰此亦可嘉從之前日羽林右衛指揮龐斌棄職事妻冠帶  
自稱匠人在市飲酒遊蕩皆人子也有志無志何其相去甚遠  
朕所以必罪斌者蓋以警衆○夜行生五色雲鮮明○乙丑錦  
衣衛舍人白蘭等九人奉使亦力把里還賜鈔及紵絲襲衣絹  
布有差○辛卯賜勅獎諭行在兵部尚書張本曰卿祗事我

皇祖 皇考歷有歲年廉潔無私才猷茂著朕繼成大統卿亦  
盡心匡輔克慎克勤比者命卿清理軍伍致誠竭慮措置有方  
積弊頓革奸頑莫容良善免于誣害軍伍得以清明可謂一心  
于君理國如家者矣朕嘉念卿特勅獎諭惟卿始終一誠廢或  
懈急用永副朕眷注之意欽哉○壬辰太子太師致仕郭資至  
京 上命以本職掌戶部事務資以老疾致仕 上念之諭行  
在吏部曰資久事 祖考多劬勤勞且剛直不畏強禦雖老尚  
可用遂遣勅召之既至命掌行在戶部惟朝朔望蓋憫其老也  
○賜四川伽木隆等處僧溫卜釋麻監藏刺麻引占等鈔絲幣  
表裏有差○北安門守衛百戶楊清奏昨夜一更初府軍後軍  
指揮李春進題本臣遞至北中門守衛官不肯傳達 上命取  
所進本視之諭行在錦衣衛指揮王節等曰 祖宗成法朝罷

外廷有事急奏者不問晨夜即具本進守門者即為上達所以  
通繫急絕壅蔽今敢若此不可寬貸其執付法司罪之○癸巳  
四川播州宣慰使楊昇遣姪九成貢馬○命開平衛千戶楊洪  
領精騎二百人專巡邏以防虜寇聽都指揮唐銘等節制降勅  
獎諭之曰爾能竭誠盡忠為朝廷效力良用嘉宜益慎重毋  
致疎虞有挾私害爾者即具奏聞必治以罪○謫開封府知府  
劉進為吏初進受所屬部糧官綺帛遇赦還職又犯不法巡按  
監察御史言進既犯贓罪赦後又犯不法不可以長即政 上  
曰御史言是其罷為吏用警守令之貪汙者○甲午命法司文  
職官有犯贓罪者俱依律科斷先是監察御史言比年因營建  
宮殿官吏有犯不問輕重皆令運購贖罪復其職殺其間犯贓  
者若槩令復職役是明啓貪汙之路誰復為善如使犯贓罪律

應死者運碑畢罷為民徒流者官降用吏改發重服非犯贓及  
笞杖者還職徒如是庶有所勸懲而人思勉于善 上從之至  
是行在吏部郭<sup>高</sup>迥引奏官之贖罪應降者請降用 上問迥徒  
流罪何以降迥曰以納米贖罪例徒流贓罪降一等 上曰例  
者所以權一時之宜豈可常行者久行之使貪汙者益肆其志  
蘆公者無所激勸其可乎今後文職官吏犯贓罪俱依律仍命  
諭法司知之○行在戶部奏昨陽武侯薛祿言開平之糧待草  
盛再運今時將秋邊草饒足宜令武安侯鄭亨都督譚廣量摘  
大同宣府操備軍士仍邊總兵護送從之○乙未行在大理寺  
奏萊州府學生程章姜辛惠教授戚虎學規嚴章造誹謗語使  
辛誣告虎論章依律抵罪應絞辛誣人死罪未決應徒近例皆  
罰工畢日遣還學 上曰學者當務孝弟忠信兩人存心如此



尚可教乎章依律辛杖一百發戍極邊○昏刺有流星火如鷄  
彈色赤尾跡有光出營室西南行入建星○丙申登州衛指揮  
戚珪以操備科歛軍士綿布萬七千餘疋事覺山東按察司請  
治其罪 上從之諭右都御史顧佐等曰近聞軍衛科歛皆是  
減除月糧是國家徒費糧而軍士不得食此輩上千國法下夫  
士心不可不懲○丁酉 上御奉天門諭行在吏部刑部都察  
院臣曰文官久任有政績者給誥勅以示獎勵勸懲有法則人  
勉於善而恥於不善爾等其循舊例但受誥勅之後有犯者違  
奪未受而犯者勿給○虜寇入自西衝山至赤城掠人口而去  
關平衛指揮方敏在赤城管屯率兵追之盡得所掠且獲賊馬  
而還事聞 上勅敏曰寇之入境皆爾平昔不嚴約束所致今  
既追回亦有所獲姑記爾罪自今益宜慎防諭行在兵部臣曰

西衝山守烽喉官軍失於警備致虜劫掠其悉處軍法仍以此  
戒飭大同宣府等處守邊將士○戊戌羅山王有燠堯王周定  
王第十三子宣德二年九月封至是堯年二十一計閩命有司  
治喪塋遣官賜祭謚悼惠王無子其妃張氏自經周王有燠以  
聞賜謚貞烈○昏刺有流星大如鷄彈色黃赤尾跡有光出紫  
微東蕃北行入勾陳○己亥命行在禮部尚書兼華蓋殿大學  
士張瑛工科左給事中薛廣為正副使持節冊瀋陽中護衛百  
戶陳立女為黎城王妃百戶楊斌女為稷山王妃百戶鄭敏女  
為沁水王妃潞城縣知縣黃斌女為沁源王妃命秦隱長女洛  
南郡主配陝西布政司叅議劉斌子名泰第二女韓城郡主配  
西安右護衛指揮何忠子滿第三女華陰郡主配陝西都指揮  
使李遵子琛永寧王長女榮澤縣主配宣武衛士諫敏子學第

二女考城縣主配祥符縣民雷和保安懷僖王第二女洛川縣  
王配西安中護衛十戶李忠子賢命名泰等俱為儀賓賜之誥  
命○是日虜寇入開平晚殺掠獨石等處官軍人畜鎮撫張信  
百戶盧讓死之○庚子勅陽武侯薛祿佩鎮朔大將軍印充總  
兵官武進伯朱冕充叅將率領官軍防護運糧赴開平勅總兵  
官武安侯鄭亨都督譚廣各備牛車令官軍俱於宣府倉支運  
仍各調馬步官軍全都指揮曹儉指揮文弘廣李徽率領護送  
俱聽祿等節制○四川雜谷安撫司番僧失刺江藏刺麻嚴藏  
等來朝貢方物○行在戶部掌部事太子太師郭資等奏所議  
漕運使宜事片是勅工部尚書黃福同平江伯陳瑄議催運糧  
儲璫等吉江南民糧昔於淮安徐州臨清置倉收貯令軍轉運  
赴北京後因官軍多有調運江南之糧令民自運北京路遠遺

期有誤供給今淮徐臨清倉廩猶存宜令江西湖廣浙江之民  
運糧一百五十萬石貯淮安倉蘇松寧國池廬安慶廣德民運  
糧二百五十萬石貯徐州倉應天鎮江常州太平淮安揚州鳳  
陽及滁和徐三州民運糧一百五十萬石貯臨清倉山東河南  
北直隸府州縣糧俱令運赴北京倉為便又言運糧官軍多調  
發營造并下西洋等項各衛撥補皆老弱餘丁及有畏難而逃  
者又運糧至京因缺倉廩及少斗斛收受遲悞又連年催運軍  
船雖遣人採木修理然損壞者多民糧既就近上倉減省其力  
請以明年為始量地遠近與糧多寡如淮安上糧民船十抽其  
一徐州十三抽一臨清十五抽一給與官軍兼舊船運載若河  
道淤淺閘壩損壞即時用工修浚然後移咨工部庶不稽誤  
上命行在戶部同尚書蹇義夏原吉楊士奇楊榮及六部都察

院堂上官六科給事中議可否至是義等議除淮安倉收貯及  
河南山東北京郡縣糧如璵所言外會計徐州倉可增糧二十  
四萬石臨清倉可增七十餘萬石其官軍差遣者令各衛撥補  
并預定空閑倉廩增置斗斛江南民船量地遠近抽隔及潘河  
修閘俱請依璵所奏從之○行在戶部奏比年巨商富民并權  
貴之家凡有交易俱要金銀以致鈔不通行 仁宗皇帝即位  
之初款通鈔法許官員軍民以鈔中鹽貪利者競以昏爛之鈔  
中納一人動計千引及支鹽發賣專要金銀鈔愈不行此皆圖  
利肥己欺謾朝廷乞捕中鹽之人追鹽還官仍治其交易金銀  
之罪庶革奸弊以通鈔法 上曰此 先朝極重之政既納鈔  
矣豈可復追鹽交易金銀罪亦未著勿究○定軍官軍人調衛  
例時廣東都司奏大明律內軍犯徒流罪者杖一百調發充軍

永樂中例凡邊塞烟瘴綠海諸衛所軍有犯杖一百不調而頑  
猾之徒恃此益肆或避差遣或挾私讐或緣貨財產業輒造誣  
詞挾制官府枉害良善甚者綁縛官旗非理凌辱肆無忌憚積  
習成風若不懲戒難於管束請自今軍卒有犯若因人連累及  
告已事或誤犯者依律斷決免調若事不干已或有規避典詞  
妄告連及衆人或擅綁縛官旗人等所告涉虛應徒流者皆調  
庶使小人知戒 上令行在兵部刑部都察院議皆請如所言  
凡軍應調者不拘地里遠近仍調本都司極邊衛所餘丁別發  
充軍 上曰法不可偏重若嚴於下而不嚴於上則下將有受  
其害者管軍官亦須景約庶幾公平於是法司議軍官若官軍  
及抗拒上司不服差遣或因他事犯徒流者腹裏衛分調邊衛  
邊衛調極邊雜犯死罪依例降一等調用從○改置保定府定

興縣遵運所於縣治東初置於縣東南地狹隘車運往來不便  
有司以請故改之○辛丑賜四川播州宣慰使楊昇姪九成等  
鈔文錦綵幣衣裏有差○降行在兵部右侍郎曹本為山西布  
政司右叅政本勅督稅糧浙江催徵頗勤然挾勢驕蹇惟務便  
已不恤下人道路側目且恣肆貪求有勅奏其罪者本還朝  
上切責之行在戶部奏本所督糧未完者多仍命往督至是有  
告本恃恩非法不改前過遂降用之○罷浙江按察司僉事王  
鉉為民鉉居毋喪受民白金千縣官釋死鞫論法當絞法司言  
新例應納米贖罪復職 上以風憲官化職不可復罷為民仍  
追奪誥命○昏刻有流星大如鷄彈色赤尾跡有光出北斗魁  
南行入亢五鼓有流星大如鷄彈色青白有光起於參旗東行  
至濁○壬寅定塌坊等項納鈔例勅以鈔法不行命行在戶部

議至是掌部事太子太師郭資等條列具奏請榜示中外一南  
北二京公侯駙馬伯都督尚書侍郎都御史及內宮內使與凡  
官員軍民有蔬果園不分官給私置但種蔬果貨賣者量其地  
畝果株疏地每畝月納舊鈔三百貫果每十株歲納鈔一百貫  
其塌坊庫房店舍停塌客商貨物者每間月納鈔五百貫一驢  
騾車受顧裝載物貨或出或入每輛納鈔二百貫委監察御史  
戶部錦衣衛兵馬司各一員於各城門巡督監收一船受雇裝  
載計其載料之多少路之遠近自南京至淮安淮安至徐州徐  
州至濟寧濟寧至臨清臨清至通州俱每一百料納鈔一百貫  
其北京直抵南京南京直抵北京者每百料納鈔五百貫委庶  
幹御史及戶部官於綠河人烟輳集處監收一蔬果園并塌坊  
庫房店舍委監察御史戶部官按月催收送庫有恃勢隱匿不



報不納鈔者地樹船車房設俱沒官仍治其罪若其地不係種  
驚取利牛車小車止載祭草糧米及空船往回者俱不在納鈔  
之例 上從其議○遼東東寧等衛女直千戶朵羅不納等貢  
方物○陝西岷州衛軍雷霖言岷州衛山口蕙設闌隘哨備用  
軍千五百人今多為管軍官私役仍於岷州調集民丁五百餘  
人助軍巡守妨廢農業甚為患乞勅所司依舊例以軍哨備戒  
約管軍官不許私役若有死亡急補其闕庶使軍民各得其職  
從之○癸卯順天府通州涿州霸州并東安武清良鄉三縣各  
奏蝗蝻生命行在戶部遣屬官都察院遣御史同往督捕○甲  
辰四川雜谷安撫司政工官安撫曩卑孫阿惹貢馬

大明宣宗實錄<sup>輯</sup>卷五十五終

明宣宗章皇帝實錄卷之五十六

宣德四年秋七月乙巳朔享太廟○遣中官祭司門之神○遣道士齋祝幣往命所在守臣祭歷代帝王陵寢○丙午命行在工部增修天地壇齋宮後廡舍○四川建昌衛土官指揮使安均遣使事張古判徹馬兒罕回回打刺罕阿都判等來朝貢馬○順天府固安縣奏縣南吳家口堤岸為水衝決三十餘步恐傷苗稼請用民修築從之○丁未陞行在羽林前衛指揮僉事昌英為都指揮僉事○命改金吾右衛指揮使李興于勝濟陽衛指揮同知麻榮于誠通州衛指揮同知李斌于信金吾右衛指揮僉事智海于寧施諒于祥各襲其職金吾右衛指揮僉事王敬老疾命其子瑞代○命交趾故都指揮僉事崔成姪珍借襲為行在金吾前衛指揮同知時成子瑛廢疾上命待瑛

有子可襲仍還之○行在兵部尚書張本奏比者郎中岳敏閱過大營及神機等營官馬一千一百九十五匹今止存七百四十九匹所報齒色驗敏所閱籍多不同顯有欺弊當究治之上曰亦間有在借應閱者悉非原馬令自首實免罪若馬死如數責償○置給馬勘合時行在兵部尚書張本奏北京操備官軍數年額馬騎操凡一十七萬一千五百八十三匹除事故外今實存者五不及一蓋由關馬之時無官司印信文書故得重買關領得之既易遂不愛惜或私自交換及至點閱那移在借作弊多端以致虧損數日不清請置勘合發北京行太僕寺收掌每關馬一匹給勘合一道填寫齒色年月日轉發五軍各衛并管隊者付領馬之人執以為憑遇倒死等項備由陳告就勘合註寫明白限十日內親送北京行太僕寺比較應償者追視

苗色附簿開註勘合與兩如前收領再有事故償給如例如領  
馬人有故馬與勘合宜從所管別付人收領如此人難欺弊馬  
無侵損上從之但命應償者仍赴御馬監印烙然後給之○  
巡按陝西監察御史傅吉言比召高於寧夏中納靈州監糧每  
引米六斗視平涼等府中納者多一斗五升緣靈州地在極邊  
山路險遠費重利輕趨之者少請減輕且不拘米麥兼收又延  
安等府每歲供給秋糧因秋田不登供以小麥或他物易米輸  
官勞費尤甚已許止用小麥抵斗送納庶民糧易完軍儲亦足  
上可其奏○戊申上御奉天門謂行在兵部尚書張本等曰  
在京軍旗為數不少及有差違皆言無軍不知竟作何用爾兵  
部宜差官同廉幹御史六科掌科給事中查理明白以聞○已  
酉行在兵部奏湖廣保靖軍民宣慰司舊有二宣慰一為人所

殺一以殺人今當死其同知副使僉事皆缺請命流官往治之  
上曰蠻夷之性難馴流官不諳上俗治之尤難必其同類乃能  
相安其令都督蕭授就土人中擇其素有恩信衆所推服可任  
用者具名奏來更令授從公選擇不可濫舉○庚戌行在兵部  
奏錦衣衛帶俸百戶黃勝因匠藝得官今告老乞以子代職  
上曰武官皆由艱難積累所以傳之子孫然自開國之初從軍  
効勞今尚有為旗軍者此以工藝一時蒙特恩果何勞而欲世  
官不允○薊州守備都督陳景先奏請仍留神機營放四官軍  
守備其在京操練者亦宜分班更代為使 上勅景先曰在京  
更代者已勅兵部從爾言軍士久在外者亦當均其勞逸○辛  
亥四川鹽井衛故上官副千戶阿抄子昔井上谷西番頭目各  
坐等貢馬○湖廣荊門州吏日党厚本言今雲南文趾四川湖

廣廣西五布政司一切庶務及番夷貢獻方物皆由湖廣歷河南有司供應人夫馬騾糧芻日不暇給且府州縣地之遠近民之多寡各有不同今襄陽宜城與南陽新野二縣民庶不過五六百家而供應如一江陵縣送荊門州荊門州送宜城縣山路崎嶇各遠二百餘里視江北一路馬騾其費倍之特當炎暑自朝達暮雖使縱嗜疾馳亦不能及不得已則止於鋪舍人馬餓疲宿食不使乞如江蘇每六十里設一馬騾令法司遣雜犯絞斬及徒流人備馬遞送量罪輕重以定限期俟滿即代如是則民庶有更休之使政令無稽遲之愆 上命行在禮部會議行之

○壬子哈密回回打刺罕賽夫刺兀者左等衛女直指揮命事柳溫哥等來朝貢方物○行在戶部上戶口登耗之數 上視朝退因語侍臣曰隋文帝時戶口繁殖財賦充足自漢以來皆

莫能及議者必在當時必有良法後世因其享國不永故無取焉此未必然夫法存乎人理財國之大務若漢唐初間之法未嘗不善至其子孫或恃富厚力役頻興費用無度天下不能不凋敝若隋文克勤政事自奉儉薄足致富庶豈徒以其法哉秦法多非先王之制後世猶有存者亦未嘗計其享國長短也大抵人君恭儉國家無事則土齒日繁生齒繁則財賦自然充足又曰天下富庶致理之本民物凋耗兆亂之階使煬帝不破其奢慤能謹守隋文之業安得遽至敗亡哉○癸丑亦城管屯關平衛指揮方敏奏臣所守地正臨極邊數有聲息遣人飛報及其四邊行在兵部不與脚力廩給道路艱難上諭兵部臣曰飛報邊警豈是小事而今從步以歸是不達事體輕重自今悉如甘肅寧夏例與之○巡按監察御史劾奏關平衛指揮方敏

備禦亦城匪怯畏懦不能練兵禦寇乃豫後妻子於鵬陽以避  
之比寇至亦城殺掠人畜以去士卒莫有鬪志請誅敏以勵其  
餘上命姑宥之降勅責敏曰朝廷命爾領軍屯守正宜晝夜  
用心謹訪兵備使賊至無所得賊退則據險伏兵截殺之庶稱  
爾職爾乃怠棄邊務但知全軀保妻子使虜寇肆毒於邊如蹈  
無人之境論爾之罪萬死莫贖今姑寬宥仍封御史奏章示爾  
宜省咎勉圖後效如再失機必殺不赦○甲寅琉球國王中山王  
尚巴志遣使臣謾泰來結制等奉表貢馬及方物○乙卯監察  
御史羅亨信言臣監收在京官員軍民鋪店課程及兩坊園等  
鈔京師軍民轉集額課俱不按月納官及有鋪店積貨陸陸不  
報者又油坊磨坊執瓦窯木植場昏未增課請今後課鈔過期  
不納者令順天府兵馬司催督私匿貨物者取勘各追罰鈔一



千貫油坊濬坊如塌坊之例除額課外別納鈔五百貫牛車納鈔一百貫小車二十貫其在外州郡城市多有豪猾軍民居貨在家一如塌坊或就船相與交易俱要金銀詣遣官點勘居貨之家每房一間月追鈔五百貫又於各處河岸檢開往來舟船載物貨者量地遠近盤貨多少每船百料追鈔二百貫三百貫俱就本處有司收贖則內外鈔皆可通命行在戶部采其可行者行之務適中道○總兵官都督僉事劉廣奏永樂中選訊陝西都司及行都司隊伍馬五千五百於甘肅操備連年調用馬多倒死今止存一千一百每有差調不足於用若候追陪不無候事今陝西甘肅二苑馬寺及甘州所買壯馬總一十六百有奇請於內簡選備邊役之○丙辰廣東進白烏二行在禮部尚書胡濙具本入奏云考之瑞牒此 皇上聖孝所感請率羣臣

明旦上表賀 御批答曰祇敬 祖宗恭養 聖母皆職分當  
然何德之有感瑞之云良增慙愧朕夙夜祇念 祖宗付託之  
重懼弗勝負荷惟賴爾文武羣臣同心同德贊輔不逮溢美虛  
詞非所樂聞其止勿賀○丁巳朝鮮國王李珣遣陪臣李中至  
等爪哇國王楊惟西沙遣使臣亞烈麻抹李添養等貢馬及方  
物○戊午以朔日中元節遣鄭王瞻竣祭 長陵 獻陵○賜  
四川雜谷安撫司故土官孫阿惹番僧失刺江藏刺麻嚴藏遼  
東東寧等衛女直千戶朵羅不納等鈔絲幣表裏有差○戒寧  
夏鹽糧例凡陝西山西所屬客商每引納米麥四斗寧夏衛所  
五斗五升用御史傳吉之言也○己未命翰林院侍讀錢習禮  
修撰劉永清為應天府鄉試考官○直隸河間府獻縣奏本縣  
柳林口堤岸為水衝決計一十丈有奇水勢驟急奔注漫散長

豐榮卿三堤口等村滄沒軍民田苗乞命河間衛及有司發軍民協力修築從之○車駕臨文淵閣少傅楊士奇太子少傅楊榮論經史遂咨政務已而悉召諸學士及史官諭之曰國史貴詳實卿等宜盡心於是賜士奇等及學士以下鈔有差○庚申賜四川建昌衛把事張古判等鈔絲幣表裏有差○行在虎賁右衛指揮使徒瑞奏指揮同知吳煥荒惰不治事常不朝參惟日遊蕩酣飲上命行在錦衣衛執付法司治之曰前日指揮顧斌方以草飲得罪此人又繼之國家費廩祿養此輩何用不治之無以警衆○辛酉賜四川鹽井衛故土官舍人河昔及工谷西番頭目各坐等鈔絲幣表裏有差○靖江王母妃張氏薨遣中官賜祭命有司治葬事○右軍部督府右都督高成卒成遼東金州人初以騎士從太宗皇帝靖內難積功陞右軍都

督僉事永樂三年復陞都督同知洪熙元年陞右都督至是辛  
上遣官賜祭賜賻贈命有司治喪葬追封營山伯謚武毅○  
夜有流星大如雞彈色黃白尾跡有光出羽林軍南行至濁○  
壬戌賜兀者左等衛女直指僉事柳溫哥撒馬兒罕回回打  
刺罕阿都剌等四十人哈宴回回打刺罕賽夫剌等三十四人  
鈔絲帶表裏有差○癸亥雲南八寨長官司故土官百夫長阿  
伯弟阿覺臨安府教化三部長官司營長阿宗等貢馬○賜朝  
鮮爪哇琉球諸國貢使李中至等宴○行在金吾左衛將軍千  
戶李春奏管隊指揮張三未經奏請擅收王榮李舟馬將軍令  
帶刀上直上令行在都察院同錦衣衛鞫之諭之曰將軍侍  
朕左右最係切要之人非經兵部奏請誰敢擅收唐太宗時長  
孫無忌入閤忘解佩刀為是熟親得免今此輩何人而擅令帶

刀在朕左右必審問誰所指使縱是公侯大臣亦不貸○甲子  
賜朝鮮國使臣李中至等琉球國中山王使臣謾泰來結制等  
鈔絲幣表裏有差○行在都察院右都御史顧佐奏舊御史嚴  
暄等貪濁汙濫欺公賣法臣嘗奏之已奉旨發遼東各衛充吏  
今暄潛逃至京 上命錦永衛執之○謫廣東道監察御史沈  
潤充軍遼東初潤受土豪黃金五兩白金百兩文綺十匹出其  
殺人无罪事覺 上命行在三法司鞠之潤引伏法司奏律應  
絞但寧在赦前應杖 上曰御史朝廷耳目受重賂縱死罪是  
耳目獲矣豈可輕貸其免杖發戍遼東邊衛○乙丑封行在左  
軍都督府都督僉事金順為順義伯右軍都督府都督僉事滕  
定為奉化伯俱食祿八百石○賜爪哇國使臣亞烈麻抹李添  
養等鈔及金織紵絲衣絹衣有差仍賜亞烈麻抹等冠帶命齋

勅及絲幣紵絲紗羅歸賜其國王及妃命行在禮部遣人護送  
赴廣東就賜海船二艘以便其往來○夜月掩昴○丙寅貴州  
小平代長官司舍人宋斌來朝貢馬○給事中賈諒張居傑劾  
奏行在戶部郎中蕭翔等不理職務惟日挾妓酣飲恣樂命悉  
下之獄 上謂尚書夏原吉等曰飲酒人之常情朕未嘗禁但  
君子當以廉恥相尚倡優賤人豈宜褻狎近頗聞此風盛行如  
劉觀輩尤甚每赴人邀請輒以妓自隨故此輩做做若流而不  
返豈不大壞禮俗大臣者小臣之表也卿當以朕此言編諭之  
○昏刻有流星大如盃色青赤起東北流三丈餘分爲二星後  
有一小星隨之行至西北沒○丁卯廣東龍川縣民運降香千  
餘斤納京庫虧四十斤庫官奏請罪之仍責陪納 上曰涉萬  
里水陸運載寧無虧損免罪遣歸○夜有流星大如盃色青白

尾跡光燭地起輦道西南行至斗○行在戶部奏都督滕定封  
奉化伯歲祿八百石請於北京支米一十八石八斗餘米四百  
八十一石二斗小麥三百石於南京兼支從之○先是 上命  
行在兵部遣官同御史給事中查理京軍至是其實以聞請令  
各營分詒差遣等項名役置籍以防欺隱 上然之兵部又奏  
大營五軍操備官軍先有事故或應選補或應退換管隊者徑  
自取放其間那移作弊及避重就輕者多以致軍數不清隊伍  
不整今後遇有事故或三月或半年一次總督官具實奏補不  
許擅將操練已成精壯之人脫放及私下占役又中軍左右哨  
左右掖官軍多寡不同宜令總督官計議均分管領 上皆從  
之○虜寇殺宣府守神銃內官王冠時冠率官軍送內官海壽  
至龍門醉止田舍虜謀知襲殺之并殺十戶陳諒等掠牛馬而

去事聞 上遣勅責都督譚廣曰王冠擅出爾為總兵不阻之  
致死賊手冠不足責爾老將也怠事如此過實歸誰特念舊勲  
姑寬不問自是當加飭勵毋蹈前失并勅大同總兵官武安侯  
身薊州守備都督陳景先睿雲都指揮蔣貴等警備仍戒飭各  
處內官不許自擅輕出時內官在邊者挾勢恣肆非總兵所能  
制 上聞知故戒之○己巳 上謂行在兵部臣曰今後都督  
之子當襲指揮者能治事即定注衛不能者令原衛支俸操練  
時兵部奏以都督冀傑子斌襲馬彭城衛指揮使治事因有是  
命○占城國王占巴的賴遣使臣邁沙怕麻答等奉表貢金銀  
及象牙犀角等方物○行在兵部尚書張本奏中外衛逃軍有  
自洪武永樂逮今二三十年勾取未獲者蓋因任差等項或在  
衛所或在遠方死亡不明所管官旗不知的實亦有知而畏罪



下敢從實呈報，槩作逃行勾戶。下有丁者，先解無丁，則杖限隣里，徒使平人無辜受害。終無完期，欲遍行天下，所屬官吏軍旗人等，從公保勘開豁。如果不知下落，曾經三次以上，有司里長親隣保結無者，依故軍事例，停勾仍具由造冊回報，以憑覆勘定奪。上從之。仍命嚴戒所屬務令具實報來，不實者罪之。

○庚午行在禮部尚書胡濙言：鄭襄諸王之國所給厨料，宜依永樂中定例。上閱其數，謂濙曰：每府再增羊豕各二十，酒百瓶，親藩之賜寧過於厚。○宣府總兵官都督譚廣奏指揮王林擅後守煙墩官軍出境捕鹿，致虜寇逐蹤犯邊，殺掠人畜。上諭行在兵部臣曰：王林等罪不可宥，今械送京師，罪之。又諭翰林臣曰：此亦廣號令不嚴戒飭不至，致屢有失，其降勅責之。○宥劉觀死罪，謫其子輻遼東充軍。令觀隨輻間往觀，烏都御史

貪賊狼藉敗壞憲紀小人恃以縱恣君子恒被控辱蓋觀嘗為  
嘉興知府郡民豪富者咸通貨賄及為都御史曲庇上郡豪強  
得逞小民受抑時郡豪民馮本張謹等及常州王昶松江蔡琳  
陳莊等以殺人及強奪人妻女侵盜官糧等事罪皆當死觀受  
黃白金劾以千數羅綺不可數計陰庇佑之或援輕例贖罪或  
縱其逃逸得免時與行在刑部郎中許性御史嚴暄李綸等及  
辦事官姚景彭楊大旺等交結謀議凡鬻重獄悉此數人所為  
其子福充無狀與暄等相為表裏各道御史悉聽指使浙江姦  
民伍辰顧宗淳等皆犯死罪輻受其白金數百兩白於觀皆聽  
番異得免死輻之所得蓋與觀等輻貪淫狼復靡所不至上  
初有聞猶以舊臣曲容觀及御史劾奏其父子之罪備得實狀  
然後發之至是法司論觀斬罪輻應流上曰刑不上大夫觀

雖不善朕終不忍加刑命以輻及其黨皆發遼東充軍得觀隨  
其子居觀熟於法律臨事能斷但素無廉聲而愈久愈甚時論  
譴然謂壞法度者劉觀及其下獄公議稱快云○監察御史張  
衡巡按湖廣擅鞠武昌衛指揮又受罪人白金法司上其罪狀  
且言衡素與劉觀交結為非 上命追所受贓謫戍遼東○幸  
未加賜鄭襄荆淮梁五王祿米時行在戶部奏鄭王襄王荆王  
淮王梁王受封時歲賜祿米各三千石鈔五萬貫今各王皆之  
國祿米宜仍其舊 上曰諸弟初之國凡百所需未備其祿本  
歲給萬石○行在兵部尚書張本奏昨鎮守山西都督李謙言  
太原左等衛所收山西清出軍士一萬五千七十六人已逃一  
千七百一十三人有旨令都察院移文將首逃者枷項示衆一  
月依律杖之并其家發甘肅充軍餘皆杖之復役若仍蹈前非

治如前令其全家逃者全家起發惟自首者免罪收役此懲一  
戒百 聖恩厚矣然臣慮天下無知之人不體 皇上好生之  
德頑惡不悛容隱如故宜令各處都司布政司按察司並嚴曉  
諭若三司視為泛常許鎮守官及巡按監察御史糾舉倘有遺  
漏一體究治 上從其言仍令行在兵部都察院移文申飭俾  
咸知之○壬申以任滿考最陞江西布政司左叅政史怡為應  
天府尹工部營繕清吏司員外郎張諒為貴州布政司左叅議  
山西平陽府知府謝瑾為廣西按察使行在廣西道監察御史  
周泰亨為湖廣按察司僉事降順天府尹郭良為山東布政司  
叅政廣東布政司右叅議蕭履玉為福建市舶提舉司提舉四  
川按察司僉事李清為真定府通判良以寬縱廢事庭玉以嘗  
犯杖罪清以受賄難會赦皆降用熙行在監察御史鍾量為叅

和縣知縣游奎為歸安縣知縣以都御史言量根戾奎柔懦故  
庶之○命故金吾右衛指揮使聶忠弟恩燕山前衛指揮使張  
善子壯燕山右衛指揮使張山子能襲職金吾左衛指揮同知  
司存老疾命其子英代○命指揮曹泰鎮守彰德○癸酉勅薊  
州守備都督令事陳景先曰聞山海衛關口至廣寧前屯衛高  
崗驛六十餘里山水深密正當衝要其西北接到家号口并大  
寧路道正虜寇出沒之所自今公差往來之人當視事緩急量  
遣官軍護送庶幾無虞○甲戌途東總兵官都督僉事王凱奏  
緣邊地方分置官軍瞭望巡邏素有定規比者曹莊沙河諸處  
數有虜寇竊發致掠人畜臣親率軍巡邊甲嚴警備其都指揮  
季信指揮千百戶于昭等怠於防閑以致失機皆當問罪 上  
命行在都察院遣御史一人往治之復勅凱及掌邊東都司事

都督僉事王真曰李信等失於防禦烏寇所乘已遣監察御史  
究治爾等平日號令不嚴以致部屬懈怠亦安得無罪自今宜  
嚴約束使邊備監固庶蓋前愆

大明宣宗憲天崇道英明神聖欽文昭武寬仁純孝章皇帝實錄卷之五十六

明宣宗章皇帝實錄卷之五十七

宣德四年八月乙亥朔○丙子命行在工部右侍郎羅汝敬都察院左僉都御史李濟大理寺右少卿傅啓讓鴻臚寺丞焦循郎中趙新胡添祺員外郎張鑑吳傑往蘇松浙江江西等處督運糧賦汝敬等陞辭上諭之曰比來有司徵收多弊輸納違期今命爾等往督之催科當戒苛刻持已當加廉慎無效曹本所爲也○丁丑遣北京國子監祭酒貝泰釋奠先師孔子○命鄭王瞻埈之國鳳翔襄王瞻璿之國長沙荆王瞻垺之國建昌淮王瞻嶼之國韶州梁王瞻垺之國安陸○鄭府等府官左長史王瀚等一百八十九人從王之國陞辭賜鈔有差○戊寅祭大社大稷○行在翰林院學士沈度奏臣年七十有三筋力衰微不堪任事乞賜臣骸骨還鄉里上諭行在吏部尚



書郭璉曰度誠謹 皇祖養之彌厚今雖老精神未衰亦不可  
頃以事但令居京食祿免朝參有召則入○己卯增築山西偏  
頭關煙墩二十六所從鎮守都督李謙所奏命於山西平陽等  
衛所新清出軍士內取三千人并各衛所軍餘相兼用工行糧  
於附近有司支給○行在禮部奏太常寺卿兼翰林院學士楊  
溥母太淑人辛 上命遣官賜祭視武臣二品例賜米五十石  
功布五十匹仍命有司治葬○行在兵部奏大同左等衛神銃  
手別無指揮管領操習欲令總兵官斟酌各衛神銃多寡選官  
專領不許別差其各衛神銃手宜令籍記遇有更代從守銃內  
官同總兵官選補若老疾得代者俱留隨營從之○庚辰賜貴  
州小平伐長官司舍人宋斌等雲南八寨長官司故土官舍人  
河覺等臨安府教化三部長官司營長河宗等鈔紵絲紗羅絹

及羅絹衣有差○辛巳修北京國子監大成殿前兩廡○爪哇國王楊惟西沙遣使臣亞烈龔以善等貴州安順等州土官同知何寵遣祀事阿開等貢馬及方物○命右春坊右庶子兼翰林院侍讀學士王直侍讀李時勉為順天府鄉試考官○陝西按察司奏肇昌衛指揮李斌以軍屯牛易馬給軍而乾沒十八匹請罪之 上謂行在都察院臣曰馬雖軍中所用牛亦耕屯所急無牛則農事廢軍食缺可假此馬名以自利乎命逮治之○浙江海鹽縣耆民奏本縣歲徵馬草一十二萬包輸京師舟涉江海運載艱難往往於近京之地市納乞如永樂間例遠縣馬草每包折米或料豆五升如秋糧上倉於近京州縣每糧五升徵草一包為便命行在戶部議○壬午賜占城國使臣通沙怕麻荅等鈔絲幣表裏金織綺絲襲衣絹衣有差仍命齎勅并

錦繡紗羅賜其王及妃○北京行太僕寺奏今年金吾等衛順  
天等府羣生馬騾駒凡五萬五百七十四匹○癸未命岷州衛  
指揮使王永復任綏德衛初永自延安調綏德鎮守河州都督  
劉昭以岷州地連生番所任指揮不能奉職城垣不修糧儲出  
納不明永勤謹有才略遂奏徙岷州至是綏德州泰州境臨邊  
時有外警舊所任指揮多是幼官襲職不諳邊務欺弊日滋強  
者凌弱自永來蒞事號令整肅軍民安業邊境無虞今調岷州  
軍政廢弛前弊復作乞還永以慰人望 上謂尚書張本曰永  
之恩信既行於彼宜還之岷州當別擇人○行在戶部奏順義  
伯金順歲祿八百石請於南京倉米麥兼支 上命就北京倉  
給之不爲例○行在兵部進甸軍條例先是遣官清理軍伍定  
例十九條至是復增例二十二條通前奏請頒行一甸軍之人

務在簡擇遣人不許泛遣孤單無藉之徒一新勾軍士依宣德元年四月榜例限以半月收幫月糧兩月葺理居室俟其安定方許役之若官旗不遵生事虐害者在內監察御史在外巡按御史按察司及鎮守官巡察軍吏總小旗就便擒治官奏聞區處其舊降榜文都司衛所刊置公署永為遵守一存恤軍士依宣德四年二月勅每軍一人免本鄉戶下一丁差役如在營有餘丁亦免一丁令得專一供給資費一勾軍違限二年以上者官追奪其俸旗軍就於戶下選丁補伍再限一年之內以所勾軍數赴部覆報過限不赴部者全家起調別衛舍人餘丁戶下亦如之正犯人所屬衛所捕執如官吏容情不捕者一體治罪仍依榜例許巡按御史按察司捕解一勾軍須填給勘合遣人其所屬衛所不許擅以關牒批帖徑行有司勾擾違者許所在

官司擒解赴京如職官奏請擒問一所勾軍有殷實之家本身及戶丁精健者不行乃賂官吏以所買輒弱家人小廝及義女女奴之夫冒名代者又有姦民私通軍士變亂版籍以戶丁過房典賣招贅為婿影射徭役者悉許改正男女歸宗否則官吏依律坐罪本戶全家調發別衛代者就於本衛補伍如正軍果無戶丁方許以少壯義子及同籍女壻補之仍禁約有司自今勾解軍士務須選應繼壯丁不得容情作弊違者一體治罪一誘處軍戶應繼壯丁有懼為軍故為傷殘肢體者許鄰里擒首全家發煙瘴之地充軍一凡有陳告父兄子侄往年充軍逃逸獲斷調發及年久歇後勾發別衛者本鄉又勾戶丁補伍果無他故許令轉達兵部覆勘開豁重勾戶丁就遣還家待補見充軍伍一凡有陳告本戶舊屬民籍止與故軍同名姓冒勾補役

者許措考逐年黃兩果無相關就為分豁仍取正軍應繼戶丁  
補伍如正軍戶絕後無名籍轉達兵部覆勘開豁其同名姓已  
到衛所食糧三年以上者不許一有族屬疎遠及異姓人舊為  
同籍後乃分戶如以罪充軍在分戶之前宜將舊同戶之丁解  
補在分戶之後止許於有罪人戶下勾取其有聞親屬有罪充  
軍懼及於己妄為文憑作分戶在充軍之前及祖孫父子分居  
并充軍食糧年久者不許一同籍父祖伯叔兄弟生前各自充  
軍今有故勾取儘本房之丁解補無則他房有三丁以上者勾  
取補伍不及三丁者以其本房無丁緣由轉達兵部開豁一同  
戶有兩軍三軍在各衛者或闕壯丁止有幼丁二人宜俟出幼  
轉達兵部定衛以一丁充軍一丁待補餘衛開豁一招募諸色  
軍士如舊嘗全戶充軍有故今悉依數勾補宜先以一人解發

却通以實有戶丁具報兵部議擬奏請處分一正軍在營者有  
壯丁就收補伍不許於本鄉勾取如已在勾有司即覈實覆報  
本衛以在營之丁收沒不許違例勾擾一義男女婿代義父妻  
父之家為軍者有故止許於義父妻父之家勾補如屬逃逸通  
責限擒捕或義父妻父之家戶絕轉達兵部覆勘開豁不許於  
義男女婿之家一槩勾擾一已故軍戶止有一丁年七十以上  
或為廢殘疾不堪者覈實覆報不必起送官吏人等不許因緣  
為辭以非老疾之人妄報免違者論罪一有自小過房與人  
為子為婿者各家俱屬正軍無丁止過房子或女婿一人在則  
宜以義父妻父之家為戶絕開豁存過房子及女婿待補其親  
父之家軍伍如親父之家屬民籍仍令補其義父妻父之家軍  
後一官員軍民之家有家人義子女婿之類自願充軍者有因

已事充軍者有改止於其人本房丁內勾補如本房已絕轉達兵部覆實開豁不許一槩混攙一僧道坐事充軍者依洪熙元年二月事例有故者不勾丁仍轉達兵部開豁一故軍戶丁止一丁或為僧道者其出家給度牒如在未充軍之前者轉達兵部覆實開豁如在已充軍之後仍發充軍一故軍戶下止一丁先生員起解兵部奏送翰林院考試如有成效依例開豁否則仍發充軍一自今所勾軍士如有丁盡戶絕及山後諸處人換無名籍之類實無勾者軍衛務稽考各軍從軍緣由遣人同有司官吏老人等核勘至再三無勾保結申報軍衛有司各仍造冊備寫各軍來歷根因并再三所遣之人及申報官吏人等姓名通以無勾緣由轉繳兵部以憑開豁如所該官吏推調遷延展轉延填勘合虛文擾害及勾軍之人妄指平民者罪之



又奏自今逃軍每三月或半年一類勾死亡及殘疾者歲一類  
勾皆從之○薊州守備都督陳景先奏六月淄兩山水泛漲山  
海永平薊州口外長城欄馬石墻及建昌諸營山海永平諸衛  
城垣皆頽塌 上謂工部臣曰口外城墻及諸營堡俱邊防要  
切就令景先即督官軍修之其餘城垣當修者工役繁重待農  
事畢以旁近民夫保力為之○部指揮使李昌坐受賄贖罪昌  
亭山海衛逼取度閩商人財物事覺行在部察院論徒罪部御  
史顏佐言昌老應贖 上從之因歎曰昌為國大臣雖得贖亦  
可恥古之君子皆慎晚節昌武人烏足知此○乙酉擢全椒縣  
儒學教諭杜琮寧陽縣儒學訓導孫純黃州府儒學訓導李縉  
大理府儒學訓導趙本南安縣知縣張鑑進士林英普南陳贊  
連旺劉濟劉敬俱為行在監察御史琮河南道純廣西道縉陝

西道本浙江道鑑貴州道英四川道南福建道贛廣東道汪交  
吐道濱敬江西道○命太監楊慶等率神機營銃手往荊州永  
平山海等處同都督陳景先備禦一切軍務必與陳景先計議  
而行不許偏執私見誤事○丙戌命故金吾左衛指揮使張馬  
家驢姪子指揮同知乃兒不花姪乃額帖木兒羽林前衛指  
揮使岑失剌姪火帖木兒濼州衛指揮同知惱歹弟巴答燕山  
前衛指揮同知忙統姪買來的舍吾右衛指揮同知加忽歹孫  
完者不花俱襲職○設河州衛陰陽醫學從守備都指揮劉永  
請也○總兵官陽武侯薛祿等還自開平○丁亥 上諭行在  
六科給事中曰朝廷置給事所以出納命令封駁章奏關防  
百司之弊而朝政闕失庶官賢否民情休戚皆得言之非其他  
職事比也 祖宗時慎重用人其有敷奏詳明莅事勤敏智識

優長有補於政治者皆次用之朕嗣承天統期于庶政修和  
尚賴左右侍臣之助古之士君子力學養德得君而用之莫不  
建功於時施澤於民流芳於後爾等受職有年諳達憲章尚思  
委任之重夙夜在公庶幾朝無失政官無廢事不惟國家有賴  
爾亦有間於悠久其慙勉之○勅諭行在錦衣衛指揮鎮撫及  
千百戶曰朝廷委爾等以心腹凡機密事務獄情輕重必須謹  
慎嚴密纖毫毋泄乃爾等職分所當為若泄漏機務走透獄情  
而與外人交接是不知有朝廷矣近者紀調等不遵國法往往  
詐傳勅旨擅作威福顛倒是非泄漏機密重事暗結人心一旦  
發露殺身七家皆爾等所親見今獲效其所為獨不念禍及身  
家邪已往之愆姑置不問自今常加警省無負朝廷以保祿位  
如或不悛國有常憲朕不爾貸○湖廣都司奏百戶孫清往茶

陵等縣捕強賊蕭序真等清至安仁縣與安坪鎮巡檢陳監率  
兵同捕賊拒敵殺傷官軍五人清被執 上命總兵官蕭授同  
三司官捕之○己丑宣府前衛指揮章容私役軍二人出境採  
木營私屠馬兔所殺而掠其所乘官馬巡按監察御史李守請  
治容罪 上曰邊關謹防出入乃私令人出境寇至又不知容  
之罪豈止私役命治之如律○直隸安慶府潛山縣知縣俞益  
言洪武初凡遇正旦等節在外大小衙門慶賀禮儀俱行舞蹈  
山呼十四拜禮後來惟五品以上衙門進表之日行此禮至節  
日上於露臺上設香案告 天祝壽行九拜禮回是定制緣五  
品以下不進表衙門尚多亦止行九拜禮臣下之心皆有未安  
宜仍舊行舞蹈山呼十四拜禮庶臣子至敬之心從之○庚  
寅兀剌忽等衛指揮僉事龍加四川昌州長官司土官長官

阿壽遣把事阿荑等來朝貢馬○賜貴州安順州把事阿開等  
鈔絲幣表裏紵絲襲衣有差○贈兵部尚書陳洽以保益節愍  
洽常州武進人博覽書史謹敏有才識洪武中為兵科給事中  
進吏部郎中 太宗皇帝嗣統之初陞本部侍郎改大理卿命  
將交趾洽參贊軍事兼總兵餉交趾平承制稽考將士功過及授  
土官職事裁決如流靡或不當是時初置郡縣尚書黃福兼掌  
布政司按察司事與洽叶謀創立規制福政尚寬大加意綏撫  
若選才授能咸當其任多洽之明是以新附之民莫不悅服洽  
還朝陞兵部尚書後仍往交趾叶贊總帥軍事洪熙元年召福  
還洽代福兼掌布政司按察司仍贊軍事夙夜勞勩土人歸之  
後因內官馬騏苛徵暴斂毒痛其人總戎及洽成不能制黎賊  
因之徭強及攻交趾城我師敗之洽同總兵官王通率兵分道

擊賊戰於寧橋洽奮身與敵力不支被執不屈極口罵賊而死  
軍民慟之事聞上惻然謂侍臣曰大臣以忠殉國一代幾人  
命行在禮部議贈典贈洽榮祿大夫少保謚節愍遣官即其家  
賜祭而官其子樞為刑科給事中○浙江道監察御史宋準奉  
命監糧至金華娶妾又索府官白金及私通民婦事覺妄奏求  
免行在刑部以所犯在赦前但坐奏事不以實應徒上曰顧  
佐已知此人貪淫無恥其違所受職杖之發戍遼東○辛卯有  
獻兵書者上因與侍臣論用兵上曰古之用兵者卿等試  
言其一二侍臣對曰昔趙括少學兵自以天下莫能當及為將  
以四十萬衆敗於秦此不知合變曹操得孫武之術及其破荊  
州乃驅北方之人遠涉江湖以八十萬衆敗於吳此驕之過詩  
葛孔明知古陳法以為足以取天下然相持數年魏人不救決

戰而孔明亦不能成功用古法試難矣 上曰霍去病不學孫

吳而伐匈奴功嘗居多由是觀之用兵制勝方略存乎人又不

在拘古法也 上又曰兵法世稱孫武武止於穽霸曹操亦終

不能取吳蜀所謂桓文之節制不能敵湯武之仁義者是已○

賜爪哇國使臣亞烈鑿以善等四十六人鈔紵絲羅縵幣表

裏及金織紵絲衣絹衣有差仍賜鑿以善冠帶○壬辰監察御

史李等言今北京文武官及軍民園店舍舟車俱令納鈔人

皆以鈔為重在外浙江江西山東山西河南陝西等都司及屬

衛并直隸衛所武官各處鎮守內外官多占田地耕種栽植

蔬果動千百畝俱無糧稅請令按察司巡按御史勘實每田一

畝歲納鈔三十貫荒地每一畝果樹每十株歲納鈔五十貫隱

匿及倚勢不報者必罪其地畝入官則在外之鈔亦流通矣命

行在戶部議○監察御史張駿等劾奏陽武侯薛祿以更番操練烏名擅調山海等處守關士卒至京致邊防不固請罪之祿聞奏叩首服罪上命宥之○甲午監察御史陳祚奏揚州府邵伯閘壩舊設官二員民夫二百三十人置盤車輓過舟船今高郵湖堤及儀真瓜州壩岸高固河水積滿舟經邵伯皆是平流閘壩官夫盡為虛設而白塔河上通邵伯下注大江凡直隸蘇松常州及浙江諸郡公私舟楫以孟子河至瓜州江濤險惡多從白塔河往來然河既淺狹且有不平之處若遇少水未免艱阻如以邵伯閘壩官及夫移於白塔河稍加疏浚又置閘積水以通浙江蘇松之舟實為利便上命行在工部勘實果利便則從之○乙未祭太歲風雲雷雨嶽鎮海瀆山川等神○遣官祭旗幟之神○河南右布政使蕭耆身辛耆身江西秦和入



永樂初科進士預修永樂大典授刑部主事蚤暮勞動而蕭介自執上官材之 仁宗皇帝監國進郎中歲餘超進河南右布政使時河南乃歲旱惶省身一務寬恤郡縣承風民用安之每事存大體略小過吏民服其長者洪熙元年考最例給誥命省身自陳父年八十餘願以給父 上嘉而從之封其父如制後有應給誥勅願先給親者皆援省身例而得省身有雅量能容人過而不能自容其過每有小失輒赧然而赤而圖改焉人以是多之卒年五十○守列有流星大如雞彈色青白尾跡有光出尾東南行入羽林軍○丙申 上諭行在禮部尚書胡濙曰祖宗時文武官之家不得挾妓飲宴近聞大小官私家飲酒輒命妓歌唱沉酣終日怠廢政事甚者留宿敗禮壞俗爾禮部揭榜禁約再犯者必罪之○行在兵部奏宣德三年應天等府

孳生馬騾駒七萬六十三百七十三匹例應今年遣官印記命  
應城伯孫傑往莅之○湖廣永州府寧遠縣有逃卒李即集逃  
民百餘人妖言惑衆謀為不軌縣官以聞上命總兵官都督  
僉事蕭授同三司捕之○陝西臨洮衛儒學生員張叙言國家  
設預備倉積粟以防水旱有益於民甚大比典守者以粟給民  
不以時徵還官或侵盜為己用甚至倉廩多為風雨摧敗一遇  
饑饉民無所仰乞令有司查究原儲糧數及未還官者徵收入  
倉庶使國有蓄積民無饑餓從之○丁酉夜有流星大如雞彈  
色青白有光起天苑西南行至濁○戊戌上念趙王高燧劄  
文致書遣太監袁琦送金織文綺紗羅袍三襲○遣給事中楊  
鼎武達王瑩張居傑往山東河南山西順天等府選附近衛所  
清出帶操軍士通一萬人赴京專事更直守衛以親軍內多老

弱政有是命○宥都督同知徐甫罪甫掌四川都司初有告其杖殺人者按察司請罪之上令甫具實以聞至是甫言軍丁運糧赴松潘中路素糧而逃又有軍逃三次者皆捕至臣愚念其違法各杖四十瘡潰而死實臣之罪上謂右都御史顧佐等曰軍雖應杖致之元則不應今姑宥甫其移文戒之勿再犯也○己亥命駙馬都尉趙輝行在吏科給事中富敦為正副使持節兩北城兵馬指揮謝真女為伊王妃行在高寶司卿張信兵科給事中金文英為正副使持節兩南城兵馬副指揮許璘女為潞城王妃和陽衛百戶羅暹妹為山陰王妃朔州衛千戶蕭宗女為襄垣王妃北城兵馬副指揮郭定女為靈丘王妃封代王第四女為鄉寧郡主配大同左衛指揮范瑄子欽命欽為儀賓賜以誥命○皆刻有流星大如雞擘色青白尾跡有光出

五車東北行至渴○庚子土魯番城國師把剌馬剌失里亦力把里回回把剌罕馬黑麻哈非思等奉朝貢馬○行在翰林院侍講高穀光祿寺丞陶璿親喪服闋行在吏部以聞皆命復職○陽武侯薛祿奏口外架砲旗軍有自陳五年不代不勝其勞者事下行在兵部議兵部言自今邊境架砲守墩旗軍宜令或一二月或三四月皆選精壯者更代仍籍記姓名庶有稽考仍從總兵官選官提調不許徇私違者治罪從之○孝陵衛軍潘阿回母因醉呼婦索茶婦無茶飲以湯姑怒妻婦趨避遂告婦嘗已刑部當婦死罪婦固稱寃且引鄰里為證鄰里至皆言婦寃而始亦慚悔自陳實妄告上命釋之因笑曰求茶得湯亦何不可而遽欲殺之為婦亦難矣官府每為人解忿邪○昏刺有流星大如雞彈色赤尾跡有光出貫索西行文餘光大如

孟入渴○辛丑賜兀剌忽等銜指揮僉事者龍加等四川昌州長官司祀事阿荏等鈔絲幣表裏及紵絲襲衣有差○遼東總兵官都督僉事巫凱奏近虜寇三犯邊雖調官軍追捕前後被其殺傷者二十餘人被掠者八十餘人馬牛一百六十其失糧都指揮鄒洛及指揮千百戶等三十六人皆當罪之上命監察御史同錦衣衛官往責洛等死罪狀罰俸有差其守備巡哨應接應而不接應者加杖悉復職守備再犯不宥○壬寅巡按貴州監察御史吳訥言貴州所設各馬驛路通雲南往來者多驛丞凡者滿赴京往來動經二年土官衙門多委土人總甲署事驛夫被宰馬皆瘦損有妨傳逆乞依雲南事例驛丞三年一次赴布政司考覈九年通考給由赴京為便從之○濟川衛指揮僉事張諒自陳老疾命其子興代○江西按察司僉事高第

坐贓罪罷為民初巡按御史奏華貪贓行在吏部尚書郭建言  
其經款例應改調 上曰為風憲尚受贓使居他職豈不尤甚  
罷為民○癸卯彭城侯夫人全氏卒訃聞遣官致祭贈夫人進  
封彭城侯張麒之配今 太皇太后之母也世居興河郡為大  
族後徙永城考諱善仕元為管軍萬戶夫人歸張氏秉恭儉為  
內行洪武中麒授兵馬指揮夫人封安人麒後陞昭勇將軍指  
揮使安人進淑人麒卒進封彭城伯淑人進封夫人麒加彭城  
侯進封侯夫人卒年八十八 上篤親親屢遣官致祭贈贈加  
厚命行在工部治喪葬○下太常少卿徐善淵獄蓋同官發其  
穢行 上曰此不可以奉神明遂下錦衣衛獄

大明宣宗憲天崇道英明神聖欽文昭武寬仁純孝章皇帝實錄卷之

明宣宗章皇帝實錄卷之五十七

明宣宗章皇帝實錄卷之五十八

宣德四年九月甲辰朔○乙巳雲南羅次縣煉象關巡檢司土官巡檢李俊等來朝貢馬○丙午遼東總兵官都督巫凱奏海西野人女直數有寇邊者請發兵討之上曰夷狄寇邊固當誅然諭之不從而後誅之彼將無悔遂遣勅諭之曰爾等野人女直受我皇祖太宗皇帝大恩積有年矣朕即位以來上體皇祖之心加意撫綏屢勅邊將毋肆侵擾俾爾等安生樂業有來朝者皆量授官職賜賚遣還朝廷之恩厚矣今聞尚有不和感激思報屢寇邊境者此愚之甚也蓋其所得甚少不知召禍甚大非全身保家之計今邊將屢請發兵勦捕朕慮大軍一出玉石難分良善之人必有受害者茲特遣人齎勅諭爾宜互相勸戒約束部屬各安爾土朝貢往來相通貿易優游足給豈



不樂哉若仍臨前過恣意為非大軍之來悔將無及○丁未吉  
河衛指揮木刀兀溫河衛指揮阿哈出察剌禿山衛指揮咬禿  
建州衛指揮卜顏禿亦馬忽山衛指揮伯成哥乞忽衛指揮亦  
哈者帖列山衛指揮刺塔等來朝貢馬及方物○戊申陞陝西  
左布政使周璟正二品祿以九載任滿故也○鎮守甘肅太監  
王安奏請運彩色三梭布十萬匹於甘肅市馬行在戶部請市  
於蘇松二府 上曰近來稍有買辦州縣假公營私百倍擾民  
方欲禁革此弊豈可復擾之上於京庫減半支去○己酉朝鮮  
國王李禔遣陪臣權蹈等來朝貢方物○初戶部尚書郭敦言  
軍民工匠執役於京者月支糧賞所管之人或造冊增減或重  
複冒支侵刻入已請革其弊 上命遣監察御史主事閱其案  
牘以聞至是監察御史任祖壽主事彭真等言有已逃亡而冒

闕者有已支而不給散者有重複姓名不明者管工官吏計五百三十人皆當逮問 上謂敦曰每聞軍民工匠有饑者朕謂月皆給糧安得饑今知有此弊不可不治其重複關支及冒支并支而不散者俱送法司鞫問文罔不明者姑記罪罰俸半年 ○巡按河南監察御史嚴烜言各部司堂上掌印官鎮守城池及諸軍衛責任不輕其中有歷練能幹者乃以公事差遣他官任事不能周知前後抵牾乞勅兵部移文各部司及衛所常留能幹官一員在任如此則事不廢弛又言各部司及衛所武臣有年老力衰者猶在任治事至犯法則止收贖及有差違則稱老疾不惟虛靡俸祿抑且有誤軍政乞勅兵部移文各部司及衛所有年老者令其子孫代職任事如此則官無曠職 上是其言 ○庚戌廣西總兵官都督僉事山雲言廣西地闊寇發無

時遇有征哨馬力不足請如舊選衛所有丁力設實旗軍買馬騎操以備調用而免其餘丁二人差役以助正軍又言貴州都司調至廣西操備官軍分作兩班一年一更今廣西各處徭獐馬寇擬進兵勒捕而寇多軍少請令貴州分政官軍暫留耕力征勦候來春更代 上皆從之○辛亥復書伯王濟熿令於平陽建家廟濟熿晉恭王長子也永樂中為諸弟所構廢為庶人仁宗皇帝復其王號稱兄王 上即位稱伯王初濟熿割魯晉國麻濟熿請歸太原奉晉恭王祀 上復書曰春秋祀祖考子孫報本追遠之道不可闕者然父子祖孫一氣也子孫之所在于即祖考之所依惟其氣之相感豈拘乎地哉往者濟熿棄忠背孝得罪 祖宗然其爵位是時恭王之靈必依伯王父子此必然之理故得恭王遺像即令送平陽伯王父子當作家廟以

奉祀不意迄今尚未有廟如必以舊廟為神聖所栖昔 皇祖  
既建都北京亦作 太廟於北京此考古禮而為之天理人心  
之正也伯王今宜就平陽作家廟以祀恭王若恭園享堂損壞  
亦當修葺以盡孝子順孫之道○遣將出塞燒荒先是每於冬  
初命將率兵出塞燒草名燒荒蓋防虜南向且耀兵也至是守  
大同武安侯鄭亨守宣府都督譚廣守寧夏寧陽侯陳懋等各  
遣人奏宜及時發兵出塞 上曰燒荒固常例師行不可不謹  
遂勅諸將肅部伍嚴號令毋或怠忽為虜所窺○設順天府鄭  
家莊馬坊倉置大使副使各一員○土魯番城都指揮僉事受  
鬼首兒等來朝奏願居京自效賜金織製衣綵幣銀紗綿布鞍  
馬仍命有司給房屋器皿等物如例○宥都指揮僉事李敏罪  
初欲備禦義州不設守備致虜入境殺掠人畜行在都察院論

杖一百發戍邊 上命姑宥之今戴罪復織造船運糧赴海西

○夜有流星大如雞彈色赤有光出紫微東蓄西北行至北斗

魁○壬子重陽節賜文武羣臣宴既又特賜太師英國公張輔

及文武大臣三品以上及學士宴加賜 御製詩一章有谷猗

亮功之句又命中官宣諭皆醉而歸○察判光山衛指揮僉事

咬秃來朝奏願居遼東安樂州賜金織襲衣絲帶鈔布仍命遼

東都司給房屋器皿等物如例○大理寺卿胡榮奏應天蘇松

等府并浙江屬縣永樂二十年至洪熙元年稅糧馬草民有負

欠者皆因貧困乞折收絲綿等物 上命行在戶部如榮言斟

酌折收不可損民於是戶部議奏絹一匹准糧一石二斗綿布

一匹准一石苧布一疋准七斗絲一斤准一石鈔五十貫准一

石綿花絨一斤准二斗鈔五貫准草一束從之○癸丑行在兵

部尚書張本言遞承 聖諭腹裏郡縣所取軍士其地方相離  
二千里以外者令於附近衛所收操山東河南與直隸順天等  
處所收軍士見有選在親軍衛分守衛上直者內有違衛之數  
無從撥補請自今內外衛所旗軍有犯偷盜等罪及強盜家屬  
二次逃軍與軍民官吏人等犯該充軍者各照南北地方發遣  
除緣邊緣海衛所旗軍依律斷遣官吏人等就於本處充軍其  
腹裏地方以遞就遞發於邊衛補伍移文內外諸司遇有此等  
在京并直隸送部定衛在外暫收本處帶操聞報所屬上司每  
歲終本部遣人照所定地方衛所起調其逃軍亦解所定地方  
收後保邊衛者仍是原衛并以所擬發南北地方聞具以聞  
上曰犯法當充軍者定地方發遣固是但遠近不同貪者必逃  
其在外者止於附近衛所收操逃軍則令還原衛○掌岷州衛

部指揮僉事後能奏。臣祖台朵爾只初爲岷州宣慰司土官。同知洪武初歸附。除岷州衛指揮僉事。父台安襲職。被召至京。改大寧右衛。從征討。戰沒。臣又自立功。授指揮使。宣德二年。以土官還岷州。征松潘有功。陞都指揮僉事。掌岷州衛事。土官例無俸。給臣父祖舊有田地房屋水磨。今悉爲人占據。乞令還臣。以代俸祿。上諭尚書郭敦曰。古者公卿有圭田。免其租稅。使耕以自給。今文武官皆有廩祿代耕。而土官無俸。固當給田。土况是其父祖舊業。其即藉文有司。悉令還之。○夜有流星大如雞彈。色赤。有光。出南河東南。行至濁。○甲寅。祀忠兒河衛指揮僉事阿隆加撒。只剌河衛指揮僉事者令加弗提。衛指揮僉事達木哈忽。石門衛指揮僉事鎮那等。奉朝貢馬及方物。○放南北兩京園子監生年五十五以上。學無成效。及老疾者姚哲等二

百五十三人還鄉爲民○山東按察司僉事李誨抑買民物爲副使童貞所劾上曰風憲不務操守是不知恥無恥之人豈可用其罷爲民○乙卯性行在監察御史朱理爲河南按察司僉事裴俊爲湖廣按察司僉事擢進士張紘鄧羅澤宋原端李敏爲南京監察御史僉四川道頭廣東道澤浙江道原端雲南道敏福建道後王黼漢中府洋縣知縣陞從六品祿以任滿其民奏乞留之故有是命熙廣西道監察御史田原慶爲銅梁縣知縣以部御史言其不任職也○北京國子監助教王懷言學古入官忠孝爲本重祿勸士寵命爲先稽諸古昔九品官人之法自三載至於三考明者或有進秩幽者各有降黜由是百工惟時庶績其凝唐虞成周之世用此道也欽惟聖朝稽古建官考課得宜勸懲有道伏覩諸司職掌凡在京五品以下官



已實授者三年考滿即給誥勅封贈永為成規今國子監博士助教從八品三考任滿稱職止加從七品俸俾之復職散官仍舊及至六考任滿稱職又不加俸陞用老於學官情實可憫乞如諸司職掌賜應陞從七品散官勅命仍掌博士助教事得承顯父母之恩當益勵忠孝之道又言學校教養人材固當講習經史進修德業至於書數之學亦當用心近年生員止記誦文字以備科貢其於字學算法畧不曉習既入國監歷事諸司字畫蠹拙算數不通何以居官蒞政乞令天下學校生員兼習書算從提調正官按察司巡按御史考試庶幾生徒才可致用上謂行在吏部臣曰其言皆有理自今國子監博士助教考滿稱職者必陞用生員亦令兼習書算○山東布政司奏東昌濟南二府高唐州并平原夏津陵三縣自春初至五月中不雨田

苗旱傷命行在戶部道人驗視蠲租○丙辰巡撫蘇常等府大理卿胡學等械送土豪至京皆以姦盜殺人奪人妻女田宅侵盜官糧等罪應死 上謂三法司官曰國家孜孜安民而豪猾害民如此非治以法良善何由得安然卿等更須詳審處置使之心服○昏刻變惑犯天江南第二星○丁巳命故金吾右衛帶俸都指揮僉事姜義子泉襲馬大興左衛指揮使羽林前衛指揮使王震子鑑襲職○行在兵部尚書張本言在京各衛軍士月糧每遇闕支或因差遣或離倉遠又無專官領督遂致官吏總小旗虛張名目冒支扣除甚者全被侵欺所以軍士缺食自今宜令每衛委公正指揮一員專任其事依期闕給其新至衛軍士督令親管頭目即與支糧庶不失所軍士有投託官長為營幹生理納錢買閒曷支月糧者及有仍前侵欺或所委官

家情作弊者俱從監察御史與所部上司糾舉究治其罪從之  
○發蔚州等衛軍士家屬詣大同完聚時大同總兵官武安侯  
鄭亨言大同備禦神銃手原係蔚州等衛軍原衛已支月糧大  
同又月支行糧請令各軍家屬俱詣大同完聚 上慮大同糧  
少且軍士之家移徙不易下行在兵部戶部議尚書張本等言  
兩處支糧則官府費多蔚州等衛皆近大同移徙亦不甚難若  
令家屬隨住只支本等月糧而罷其行糧可以養贍且得省費  
上曰軍士去家亦懷內顧若家屬得同處亦於人情為便宜  
如亨議行之○山西萬泉縣丞王琦奏萬泉山石之地去年少  
雨耕種無收今春至夏亦早間種穀皆不長民多艱食稅糧無徵  
上以奏示戶部掌部事太子太師郭資進曰山西他郡縣未  
有奏早饑者當遣官察視 上曰旱澇之災天用啟朕有司所

言勿用致疑即量免其租稅仍令有司善撫恤之○戊午 上  
謂行在工部尚書吳中等曰天氣向寒白河等處人難徒涉當  
治橋梁中奏惟白河水深沙溜橋梁難成宜用官船為梁以濟  
餘皆用民修治從之○遼王貴烜奏弟八人已封者三人餘皆  
長未封妹三人已選儀賓未嫁俱無居宅請令有司創建 上  
謂行在禮部曰宗室子孫衆多國家之慶第宅豈可無今農事  
將畢宜令工部遣官督有司次第營建其郡王當封郡主當嫁  
者亦須及時行禮○己未雲南鶴慶軍民府故土官知府高寶  
妻楊氏劄肥河衛指揮僉事牙失塔弗朶禿河衛指揮僉事卜  
也哈益實衛指揮僉事奴克禿四川長河西魚通寧遠等處灌  
頂弘慈妙濟國師綽思吉遣其徒領占巴藏卜等來朝貢馬  
行在兵部奏昨遣給事中柱山東等處選調帶操新軍赴京宿

衛請處於親軍之中 上曰用人須令得所若身未得所何以責其效力宜令親軍衛分為定居止之處俾至即得安居不失所矣○行在刑部奏審決強盜其中臨刑有詞者數人 上令三法司與辯因諭之曰強盜殺人當死有詞者不可不辯蓋欲使其死無憾也○夜有流星大如盃色青白光燭地起北河南行至東井○庚申賜雲南羅次縣煉象闕土官巡檢李俊等土魯番城國師把刺馬刺失里亦力把里回回打刺罕馬黑麻哈非思等鈔綵幣絹有差○辛酉賜吉河衛指揮木刀兀溫河衛指揮阿哈出察刺禿山衛指揮咬禿建州衛指揮卜顏禿亦馬忽山衛指揮伯成哥乞忽衛指揮安亦哈者帖列山衛指揮刺塔一百五十三人鈔綵幣絹有差○壬戌賜把忽兒河衛指揮僉事阿隆加撒只刺河衛指揮僉事者令加弗提衛指揮僉事

速木哈忽石門街指揮僉事鎖那等六十二人鈔絲帶絹有差  
○初巡按山東監察御史包德懷言四事其一遼東地臨外境  
寇賊之所窺伺自高嶺至凌河凡七站遼東每被寇擾請於曹  
莊驛東湯池置一衛七站各設十戶所置軍半以護送行者半  
以屯種養贍則可保無虞其二入才之生各有所長苟有所長  
皆可任用今武職之家除長子廢襲其諸子豈無諳練武藝才  
畧出衆之人欲功名無階可進請開武科除應襲之人及有  
過者其餘弓馬諳熟輜畧精通者許赴部司比試技其能者兵  
部覆試如果堪用先與試職守邊待其顯立功勞一體實授如  
此則有才之人皆得效用其三遼東自洪武中設立馬驛及遞  
運所各置旗軍一百人百戶一員領之屯田自給備馬驢車輛  
供具以待使臣往來視地險易間制其多寡之數今歷年久

旗軍逃亡者十率八九供具之物日漸減損以至於無邊境有報豈不誤事請令兵部取勘各處旗軍有不及八十人者就令都司於附近衛所以多餘軍補之如舊供辦遞送則道路往來無有稽滯其四瀋陽中衛舊置撫順遞運所及撫順驛止通本衛九十里更無他處往來洪武中以其間僻而鐵嶺衛罵州驛至開原路遠地荒乃移驛於鐵嶺東北五十里設置名沙河撫順驛行者便之而遞運所仍在舊地今開原一路往來滋多請移撫順遞運所於沙河與驛並置則彼無閒曠之人此得協助之力實為兩便 上命行在禮部集議至是尚書胡濙等議開武科非舊制增置衛所難於遠度當今都督巫凱等計議可否驛夫有缺請以馬事發遼東充軍者補後從之○申明栽種桑粟之令時有建言云洪武中令天下栽種桑粟實以為民今民

之無知者砍伐殆盡存者亦多枯瘁有司不督民更裁以致民無所資乞令郡縣督民以時栽種仍遣官巡視 上曰古人宅不毛者有里布 祖宗養民之心甚至爾戶部其中明舊令務求成效毋事虛文 釋哥吉河衛指揮充能哥等罪遣歸時遼東總兵官都督王凱以充能哥等入境剽掠獲三人送京師又奏遼東衛軍劉勝兒逃為劫盜已鞫訊具服 上命法司訊之充能哥等云初入境求貿易耳實非剽掠法司以聞 上曰此或實情剽掠則當有兵器命釋之初凱曰充能哥等訊之非盜今遣之歸使遠夷知朝廷不妄殺無辜也劉勝兒果強盜不枉即軍中新以徇○癸亥爪哇國王楊惟西沙遣使臣亞烈郭信等來朝貢方物○宥鎮遠侯顧興祖罪給祿不命之事興祖初鎮廣西監察御史劾奏其貪財好色失地喪師逮至皆引服繫



錦衣衛至是 上念其功臣子孫特優容之○甲子賜朝鮮國

貢使權蹈等爪哇國貢使亞烈郭信等宴○夜有流星大如盃

色青白有光起天倉東南行至雲中○乙丑行在兵部尚書張

本言忠義前等衛軍士其初候募民為之年久失實妄指平人

屢有陳訴送衛查理者衛官不為查理加以拷掠強使入伍甚

至取其財物逼迫逃竄而冒聞其月糧又有原籍有司保勘是

民而衛所執稱是軍詐言卷籍迷失無可稽考今欲去官同部

督府首領官吏以府衛遮年勾軍勘令底冊并應有卷籍公同

查勘其所指軍名除到衛倉糧年遠外餘見訴待報及執係平

民者替令別衛帶管候覆勘至日明註所由分豁從之○丙寅

夜有流星大如雞彈色青白尾跡有光出朱東南行至狼星旁

○丁卯勅朝鮮國王李禔曰王比遣使進海青鷹犬足見王之

誠意使回賜王磁器十五卓至可領之王國中固多珍禽異獸  
然朕所欲不在於此自今勿獻仍賜其使臣權踏等鈔絲帶表  
裏及金織紵絲襲衣有差○戊辰賜剡肥河衛指揮僉事牙失  
塔弗朶禿河衛指揮僉事卜也哈益實衛指揮僉事奴克禿等  
六十二人雲南鶴慶軍民府故土官知府高寶妻楊氏四川長  
河西魚通寧遠等處僧領占巴藏卜等鈔絲帶絹及金織紵絲  
襲衣有差○迤北黠剌沼禿孛完八歹等來歸奏願居京自效  
命沼禿孛完為百戶八歹為所鎮撫賜冠帶金織襲衣絲幣銀  
鈔鞍馬仍命有司給房屋器皿等物如例○大理御胡榮奏臣  
奉命巡撫蘇松及浙江諸郡訪知嘉興府洪武中舊有陸贄祠  
湖廣府有胡瑗書院蘇州府有范仲淹祠魏了翁書院今皆頽  
毀欲從宜修整未敢專擅

上諭行在工部尚書吳中曰崇祀先賢蓋以表勵後進如不勞  
民宜從所請○昏刻有流星大如雞彈色青白尾跡有光出五  
車西北行至雲中○己巳陝西西寧衛灌頂弘教翊善國師列  
藏等貢馬○命改燕山右衛指揮使李信子能府軍左衛指揮  
僉事蕭興第亮金吾右衛指揮僉事張昇姪興俱襲職○昏刻  
有流星大如雞彈色赤尾跡有光出南斗魁後有小二星隨之  
東行至北落師門旁夜有流星大如盃色青白尾跡有光起北  
落師門旁南行至濁○庚午兀塔兒等處頭目哈即賽夫丁子  
小失帖木兒等六人來朝奏願居京自效命為百戶等官賜冠  
帶金織襲衣絲帶銀鈔綿布鞍馬有差仍命有司給房屋器血  
等物如例○調都指揮僉事陳文於廣西文初鎮守儀真揚州  
求索官民財物事覺輸作京師至是行在兵部奏應復職還鎮

揚州 上曰揚州內地何用鎮守彼閒暇而處富饒徒以濟其所欲宜處之兩廣遂有是命○辛未擢行在太常寺贊禮郎戴慶祖王一居俱馬本寺丞○癸酉以明日下元節遣駙馬都尉西寧侯宋瑛祭 長陵 獻陵○賜爪哇國使臣亞烈郭信等四十五人鈔幣及金織襲衣胖襖加賜亞烈郭信等五人冠帶○夜分流星大如盃色赤光照地起卷舌西北行入華蓋

大明宣宗憲天崇道英明神聖欽明昭武寬仁純孝章皇帝實錄卷之五十八

明宣宗章皇帝實錄卷之五十八終

宣宗皇帝實錄卷之五十九

宣德四年冬十月甲戌朔享太廟○遣祭司井之神○  
孝陵神宮監官苗青奏孝陵具服殿朽壞勅襄城伯李隆及  
南京工部修理○夜有流星大如盂色黃赤有尾光燭地起五  
車西北行至文昌○乙亥命行在尚寶司勦葛真戶科左給事  
中許係為正副使持節封岷王樞第三子徽煥為江川王第四  
子徽燦為廣通王第五子徽熾為陽宗王冊工部員外郎李宣  
女為鎮南王妃選長河衛副千戶何富女為鎮國將軍李塗大  
人賜以誥命○監察御史王豫奏老人之設本以理斷民訟勸  
戒頑愚今多不遵舊制往往營求差遺圖利肥己於其所當理  
斷之事畧不究心致使詞訟紛然乞禁約之上命行在都察  
院申明舊制違者令巡按御史按察司究治○夜有流星大如

雖彈色青白尾跡有光出牽牛南行至濁○丙子復命都督劉  
昭守河州都督史昭守西寧○賞捕倭將士先是浙江海門衛  
倭寇自蚶嶼等嶼二港登岸攻城十戶徐忠等率衆敗之寇退  
走又爲巡海指揮路鐸所敗餘寇狼狽奔走至是上其功杖命  
行在禮部議賞禮部請依洪武中捕倭例陞賞凡陸地殺獲有  
功者不陞官軍各賞銀二十兩鈔二十錠今十戶徐忠等宜准  
此例水路殺獲有功并獲賊船者陞一級官賞銀五十兩鈔五  
十錠軍旗賞銀五十兩指揮路鐸等當准此例但未獲船不陞  
宜悉令其家人赴闕關給 上曰賞當如例其遣人齎往給之  
或於浙江官庫支給亦便○行在兵部尚書張本奏安定王謀  
逆之時西安三護衛從逆正犯以伏誅而同籍爲官者尚仍舊  
任爲軍者仍原伍亦有遺下人丁皆在秦府舊制有過之人難

充護衛隨侍宜調邊衛 上以陝西去甘肅近令俱發戍甘肅  
○夜有流星大如碗色青白光燭地出外屏西南行至羽林軍  
炸散○丁丑勅諭行在五府六部如察院通政司六科朕嗣位  
之物已甲明舊章誠飭在京諸司凡朝廷有公務差委不許差  
三司及軍衛府州縣正官近年以來又不遵守遇事輒委正官  
幹辦又聞各司府州縣官有蕪能者輒坐名差委不思其所治  
之事非一今以一舉委之一舉難集而誤衆事所成者少所誤  
者多在外軍衛有司官之不才者喜得別差以避繁就簡往往  
營求差遣俱盡則委總小旗及陰陽醫學等官或吏員人等護  
印者事更肆其姦人受其害官府政務十誤八九致使軍伍累  
年不清稅糧累年不完原夫弊之所起實自在京諸司其初文  
書行移皆經通政司六科而相共蒙蔽緘默不舉既往之失姑



記不問自今五府六部都察院但有行移在外三司及衛所府州縣催辦公務者悉聽在外衙門自行分官辦理在京諸司並不許擅委正官及生名差官若仍循前弊悉處重罪其通政司六科不糾舉者罪同夫爲臣之道當推公正之心上遵成憲下體人情毋專一己之使毋規一事之利庶副朝廷建官圖治之意又勅南京諸司南北直隸軍衛有司及各都司布政司按察司巡按御史亦如之○勅南京六部都察院曰南京諸司所繫甚重其六部等衙門屬官比年以木貪污淫穢不才者多欺公虐人其弊非一爾副都御史鄧紀即與六部堂上官公同遴選其中果公廉勤慎者存之貪污姦懶及不諳文理者即行黜退其名未聞別選賢能任之爾等必公必明毋枉毋縱若或徇私蒙蔽悉論以法○戊寅常州府同知張宗璵卒宗璵字重器江

西吉水人由進士爲翰林庶吉士修永樂大典書奏授刑部主  
事嘗奉命錄囚廣東人稱其長厚 仁宗皇帝臨御簡朝臣賢  
者爲東宮官權左春坊左中允 上嗣位陞大理寺丞時國家  
軍政久而多弊遣廷臣四出清理且賜璽書諭之母枉民縱恣  
宗璉性福建民稱其公廉既還改常州府同知專督農事視民  
如子惟思爲民興利其民愛之時朝廷又遣監察御史出理軍  
政之未盡者御史李立當往蘇常諸郡言於兵部曰常州必得  
張同知共事乃有濟卽遂撤宗璉時立銳意得軍爲功不念民  
枉凡軍戶絕者必取同姓名或異姓之親及承繼產業之人如  
酷刑使承役宗璉執詔旨與爭立怒宗璉異已數盛氣詬詈之  
宗璉終不爲變而積忿恨不平發背疽以卒卒之日常四邑之  
民皆走哭之具儀奠祭累日不絕發歸喪素衣冠送者數千人

江陰之民爲建祠云○昏刻有流星大如雞彈尾跡有光出北  
落師門旁西行至雲中○庚辰 上臨視文淵閣少傅楊士奇  
太子少傅楊榮太子少保金幼孜學士楊溥曾榮王直王英侍  
讀李時勉錢習禮侍講陳循等侍 上命典籍取經史親自披  
閱與士奇等討論已詢以時政從容容勿者久之命中官出高  
膳酒饌賜士奇等并賜纂脩實錄官士奇等叩首謝 上曰朕  
聞有道之朝頓治之主崇禮備碩講求治道卿等爲朕傳保與  
諸學士皆處祕閣朕躬至訪問與有所聞耳稍暇當復至卿等  
必有所陳論也已而親製詩賜士奇等詩曰祕閣弘開當異隅  
允揀之積皆圖書仙家蓬山此其處上與東壁星相符罷朝聞  
暇一臨視衣冠左右環文儒壇塔錯錯詩響振寶鼎護香煙  
數維時日上扶桑初始看瞻隴絢綺疏息已繁爛明金鋪從容

與生披典謨大經大法古所訓講論答沃良足娛朝廷治化重  
文教且謀切磋商安可無諸儒志績漢仲舒豈直文采凌相如玉  
醴滿賜黃金壹晶哉及時相勵莫輔德富與夔龍俱庶幾致治  
希唐虞○五鼓有流星大如碗色青白有光出北斗杓北行至  
濁○辛巳召南京太常寺丞符守約至命為行在太常寺丞以  
其在太常久謹於祀事也○行在錦衣衛指揮參事何敏言四  
川松潘等處關堡接連生熟四番布羅韓胡等類番蠻洪武中  
買官軍嚴備番蠻不敢為非近來衛所官旗多縱家屬在堡居  
住與番人往來交易及募通曉漢語番人代其守堡而已則潛  
往四川什邛漢州諸處販鬻經年不回致番蠻窺伺乘虛作耗  
燒劫關堡劫虜人財今雖降附亦宜榜諭諸處販鬻者各還營  
堡仍依寧夏官軍更替備禦庶番蠻畏服邊衛寧安 上曰番

變之變不徒以是然防禦之計亦不可不周其令兵部行總兵  
官計議行之○壬午修鳳陽 皇陵殿宇垣墻時因雨損壞命  
行在工部凡用竹木磚瓦銅鐵顏料諸物令有司備仍選廉幹  
官性總督之○總兵官都督諱廣奏虜寇入境抄掠人畜殺死  
軍士守關千戶蘇斌等不能禦敵臣親率兵追之獲所掠人口  
并賊器械蘇斌等失機請正其罪 上勅廣曰此亦平素隄防  
不謹所致雖能追回所掠未見終獲一賊不足言功失機官皆  
罰俸兩月仍令守禦再失機處死○巡按監察御史李叙奏戶  
部員外郎樂斌盤點淮安衛屯田子粒受官軍白金等物當治  
其罪 上諭右都御史顏佐等曰屯種以備國用最為切要命  
之盤點者蓋欲知其多寡之實而賞罰之以勸農功今既受賂  
豈復有公道其罪之可貸○癸未 上謂三法司曰今天氣已

寒獄因宜早決斷悉其所犯以聞○命故左軍都督府都督僉事吳把敦子信襲父原職涼州衛指揮使○行在工部奏明年正月四方蕃夷例應朝貢而北京會同館慮不能容宜預增修上曰四夷朝貢皆取祖宗之舊昔能容矣今日豈便不足但修葺其壞者不必增創勞民○守備薊州山海都督僉事陳景先奏勇士有出口二次者百戶有出口一次者皆給一次之賞再出者未給上諭行在兵部曰此有司之吝也將來何以使人其補給之自今凡出口二次者軍陞小旗民免丁雜役一次者軍待有功定奪民免一丁雜役賞賜皆如例○甲甲朝鮮國王李禔遣其弟禔等奉衣來朝貢方物○乙兩河南道監察御史徐訓等上言臣等切惟御史巡按一方職在糾察官吏劬劬貪和仲理冤抑各詢民俗宣布政化責任甚重非有司可比

故凡御史差遣分巡追問等項本院官遵守成憲必引於御前請旨點選慎重其事近年以來五府六部凡有公事未完不分大小輕重輒便擬奏委任巡按御史崔辦况五府六部各有官屬可遣巡按御史止是獨員若從所委徧歷郡縣職專催辦非重風憲之職矣乞勅五府六部自今果有重務當御史督理者明白具奏取自 上裁不得仍前輒行差委庶幾憲綱可以振舉 上覽奏諭行在吏部尚書郭瑾曰御史言是其從之○浙江徽州府建德縣奏歲荒民飢凡借官倉穀九百五十一石七斗濟之俟秋成償官○上朝退御武英殿與侍臣語偶及封建侍臣曰成周以封建故歷年八百秦孤立一世遂亡 上曰周秦享國長短非但封建也周自后稷公劉以農事答國至文武積德累仁乃有天下繼之以成康保恤烝民克紹先業秦自孝

公據靖岳以窺周室惠文武昭蒙其故業至始皇吞二周滅六國專詐力利罰以制天下繼之以胡亥殘忍刻薄周得之以忠厚守之以忠厚故其祚長秦取之以詐力守之以詐力故其祚短非但封建也○丙戌勝陝西而寧衛灌頂弘教翊善國師列藏等鈔錄帑表裏有差○上出御製猗蘭稱賜諸大臣序曰昔孔子自衛反魯隱居谷中見蘭之茂與衆草爲伍自傷不逢時而托爲此操朕慮在野之賢有未出者故亦擬作其詞曰蘭生幽谷兮曄曄其芳賢人在野兮其道則光嗟蘭之茂兮衆草爲伍於乎賢人兮汝其予輔又諭之曰薦賢爲國大臣之道卿等宜勉副朕意○丁亥嘗南總兵官黔國公沐晟奏曩者永寧府蠻人矢不利非糾合四川鹽井衛土官馬利非等校前知府各言八合與今任知府卜撒剌掠村寨已擒其黨解京朝廷已命



卜撒弟南八襲為知府今馬剌非率衆又據永寧節卜上下三村大肆殺劫南八脫走馬剌非又據其尖住夜白等十村塞攻圍促卜瓦寨屢遣官撫諭不服請令四川行都司下鹽井街禁約馬剌非還所據村寨上從之命行在兵部移文雲南四川三司撫諭禁約○戊子早朝罷上復臨視文淵閣儒臣叩頭畢列侍左右上從容顧問所治職業遂共論古帝王及祖宗時事上甚悅命中官出內帑鈔緡賜儒臣又親書御製詩一章以賜明日少傅楊士奇太子少傅楊榮等上表謝恩○賜朝鮮國貢使李相筭又琉球瓜哇二國貢使宴○夜有流星大如盃色青白有光起羽林軍西南行至濁又有流星大如盃色亦有光出文昌西北行至濁○己丑鎮守龍州都指揮僉事張貴以貪刻害民被逮論法當死詔免死杖一百謫戍關平○

燕賓改行在禮部尚書兼華蓋殿大學士張瑛爲南京禮部尚書無職如故命行在戶部尚書兼護身殿大學士陳山專授小內使書○辛卯上謂侍臣曰朝鮮僻遠朝貢之使數至其貢物率用金銀此豈小國所能常有其以勅諭國王今後貢獻以土物效誠足矣○癸巳上將閱武郊外命各都督府整兵從衛文武衙門各以堂上官一員屬官一員扈從召豐城侯李賢太子太師郭資兵部尚書張本都察院右都御史顧佐命之曰朕以農務既畢將閱武近知特命卿等看守凡大小諸事須措置得宜遇有機密重務計議即行仍差人馳奏外夷來朝者同大監楊瑛等以禮待之○琉球國山南王他魯每遣使者步馬結制等貢馬及方物○甲午車駕發京師駐蹕順義縣境遣勅召太師英國公張輔扈從○乙未駐蹕峪口獵○丙中

駐蹕峪口臘○夜有流星大如雞彈色青白尾跡有光出后  
晏旁東行至濁○丁酉 車駕發峪口還京師 駐蹕順義縣  
境○戊戌 車駕至京師○庚子肅府伴讀劉準言自陝西臨  
洮府蘭縣逸西止有軍衛鎮守城池而無州縣管屬人民近見  
戶部榜示各商納粟中鹽蘭縣官吏倉損不體朝廷立法備邊  
之意通同鹽商與攬納者凡上倉之粟糠批半之每粟一石歸  
米不及反斗守邊之士荷戈執戟抵霜臥雪辛苦萬端所得月  
糧不及其半致使妻子啼飢號寒何以堅其守戍之志乞令巡  
按監察御史與按察司嚴加禁約所輸務皆精米庶幾邊儲可  
實軍食充足 上從其言命都司布政司按察司及巡按御史  
體實遠聞而嚴禁約○辛丑遼東總兵官都督僉事王凱奏九  
月中虜寇數入境劫掠射傷官軍都指揮魯得等守備不嚴請

治其罪 上勅賁凱罰魯得俸兩月得以下罰有差○守備密雲都指揮蔣貴奏二十七日虜寇百餘人至古北口東靉操子口劫掠官軍與敵今虜上未退命揚武侯薛祿率兵馳往援之既而聞虜已退不果行○夜有流星大如雞彈色青白有光出五車西北行至濁○壬寅賜朝鮮國使臣李相筭七十七人絲幣表裏金織紵絲等衣有差○

十一月癸卯朔行在欽天監進宣德五年大統曆 上御正朝受之給賜諸王又文武羣臣頒行天下○勅陽武侯薛祿充總兵官恭順侯吳克忠充副總兵率領官軍往宣府等處境外巡哨別勅總兵官都督譚廣又武安侯鄭亨各選騎士一千步卒一千有馬神銃手二百五十俱帶神銃委官率領於宣府聽祿調遣○甲辰朝鮮國王李相筭陪臣趙慕瓜哇國王楊惟西沙

遣使者亞烈襲用才等貢方物賀皇太子千秋節○乙巳陝西  
河州衛捨藏等劾刺麻賞木藏卜來朝貢馬○命故羽林前衛  
指揮僉事張林叔玉襲職燕山左衛指揮同知姬整子祥濟陽  
衛指揮同知朱彥中子興羽林右衛指揮同知蘇善子能金吾  
後衛指揮同知杜榮子貴金吾前衛指揮僉事童亮子英金吾  
右衛指揮僉事潘政等俱代職以筮等皆老疾也○以獲強  
盜功陞燕山前衛正千戶楊春為指揮僉事總旗孫興為試百  
戶○行在刑部奏瓜哇國人麻沙等朝貢還至廣東與其同類  
麻抹有隙殺之陳杓伍墨加虱二人皆從行事覺廣東布政司  
鞫問麻沙服罪死於獄陳杓伍等雖從而不加功當徒 上曰  
夷狄之人不知禮法且殺人者已死彼既不加功不足深治宥  
之遣歸○夜有流星大如雞彈色青白尾跡有光出勾陳北行

至濁○丙午朝鮮國王李裲遣陪臣元愜生洪師錫等來朝貢  
方物○陽武侯薛祿奏從臣巡邊官軍關外頗艱其日走行糧  
請加半給之○丁未降勅獎勵總兵官鄒督譚廣時虜屢犯邊  
廣自陳守邊失律請罪 上宥之勅責之曰自今宜益謹豫備  
若再有失當命人代非分之恩不可數得矣○賜朝鮮瓜哇  
琉球三國貢使宴○夜有流星大如鷄揮色赤尾跡有光出天  
格西北至濁○戊申 上御正朝謂右都御史顧佐等曰洪武  
中設立老人以其周知民事凡鄉人小有詞訟專令理斷必能  
辨別是非勸善懲惡比數聞老人多營差違生事擾民挾制官  
吏貪贓狼籍莫敢誰何有無印御之號爾都察院即揭榜禁約  
今後老人只依教民榜例行事違者令巡按御史按察司鞠治  
若有司故違巡按御史按察司不問者亦罪之○初朝鮮國

王李掬曰朝廷遣人至王國中王代以飲食足矣母遺以物王  
父子敬事朝廷多陛下徽逾久逾篤朕所深知非左右近習所  
能問也王無慮焉蓋嘗遣中官至彼多所需求至是 上聞之  
遂有是命○命故都指揮同知納谷出弟虎丹都指揮僉事  
脫卜子失連台指揮同知刺哩子阿失別孛羅杖馬尼指揮僉  
事孛羅子阿剌脫木兒阿力不該弟伯顏察兒土干帖木兒弟  
虎答魯充襲職皆忠勇王金忠故部屬也○行在兵部尚書張  
本奏邇者開平衛千戶楊洪言開平騎士少今欲於開平環州  
諸驛選壯士二百人本衛選馬二百匹付洪提督操備從之○  
巡按江西監察御史劉伯大奏前巡按御史姚蕪善有罪被逮  
江西布政使孟桓按察使童寅叅議胡俊僉事黃察南昌知府  
任庸俱有饋贖請治桓等罪 上曰被逮而致饋人之厚也非

有所求不必究○運糧指揮盧貞奏率軍士漕運因風浪壞船  
滯留在途今天氣已寒乞於近河倉分收貯為便 上謂行在  
戶部曰河水將合糧船難行其已過武清者令於通州倉收未  
至者於武清倉收○浙江按察使林碩副使江鍊以奏事錯謬  
自陳有罪 上宥之○己酉陞廣西道監察御史劉登為太僕  
寺丞山西道監察御史王增祐為陝西按察司僉事浙江道監  
察御史楊潤為山東按察司僉事擢進士陳綱為山西道監察  
御史復陳真揚州府知府陞正三品祿耿寬鳳翔府同知陞從  
四品祿王通許州判官陞正七品祿張鼎延安府保安縣知縣  
莫魯敬州府休寧縣丞陞祿一級皆以任滿當陞其民奏乞留  
之故也黜行在各部都察院屬官之怠惰職事又不從禮度者  
於外任刑部文陞司郎中胡珏為黃州府同知兵部車駕司郎



中揚威為杭州府同知戶部福建司員外郎魏邁為守嵐州知州刑部廣西司主事鄭述為廣西太平府通判江西司主事吳瑄為撫州府通判工部營繕司主事田謙為平涼府通判虞衡司主事元貴為延安府通判兵部武選司主事荐和為重慶府通判行部工曹主事齊整為松江府通判刑曹主事馮銘為嘉興府通判都察院廣西道御史方鼎為陽朔縣知縣雲南道御史吳傑為臨武縣知縣河南道御史徐遠為臨淮縣知縣降戶部浙江司郎中蕭翔為遼東都司斷事刑部陝西司郎中金忠為陝西都司斷事四川司郎中劉伯墳為胡廣都司經歷戶部山東司員外郎張鶴為山東布政司經歷初監察御史秦珏等偽疾家居不理職務翔等常挾妓私飲不謹禮度上未信遣給事中賈諒張君傑密察之諒等還奏皆實遂皆黜之行在浙

江道監察御史林銜以君喪不謹降南京戶部照磨○增置宛平大興二縣縣丞各一員專督營造○庚戌命應天府戶薛均致仕均湖廣蕪水人初授州同知累陞陝西山西行太僕寺少卿遂陞府戶均爲人和焉而才能無聞行在吏部言均年老息事遂有是命○點山東道監察御史張釗爲山東益都縣知縣陝西道監察御史任確爲陝西高陵縣知縣北京道監察御史沈澗爲潁上縣知縣山東道監察御史許昕爲江西廣昌縣知縣以卻御史言其不勝任也○賜琉球國使臣步馬結制等鈔絲幣衣裘有差命步馬結制等齎勅及鈔絹歸賜其國王○逸北韃靼那合赤未歸奏願居京自效命爲副千戶賜冠帶金織襲衣絲幣銀鈔綿布鞍馬仍命有司給房屋器皿等物如例○行在工部奏昨內官蒙安言饒州等府德興等縣沒煉銅鐵缺

匠供後請以彼處輪班及逃回熟銅等匠六十三人留用惟其班次緣此等逃匠朝廷累遣官督取經一二年不至今釋其罪復令就其鄉用工恐倣效成姦無以戒後乞取至京定奪

上曰細民不足與狡始從之但後來不得援例○南京地震○辛亥徙廣西思恩縣治於白山寨勅廣西布政司按察司奏思恩縣治山谷荒野累被猺蠻攻劫不能自守境內白山寨四面險固宜移置於彼 上命行在工部覆勘還奏宜徙故從之○監察御史張聚坐家人以銀交考黜為松江府推官○武德衛指揮使高山橫取軍士月糧事覺 上諭錦衣衛臣曰指揮使月俸與軍糧厚薄懸絕而扶勢橫取此豈知良將與下同甘苦之道命執付刑部治之○夜有流星大如雞蹏色青白有光出畢東行至游氣○壬子以 皇太子千秋節下寬恤之令勅行

在刑部都察院大理寺錦衣衛見監罪囚除真犯死罪不宥外  
餘雜犯死罪以下適寬減令運磚贖罪犯笞杖及枷令者工役  
鎖鑰者悉宥之復還職後挾妓飲酒者仍罰俸三年○直隸廣  
平府成安縣奏本縣四月五月苦雨漳滏二河泛溢淹沒田苗  
一百二十八頃有奇上命行在戶部覆視免其秋租○成王  
皇太子千秋節免百官賀○劫赤城官屯備禦關平衛指揮方  
敏王俊等以所領官軍聽總兵官都督譚廣節制○甲寅宣府  
總兵官都督譚廣奏緣邊墩隘為兩所壞令冬令難修恐賊窺  
伺入寇欲分緣邊諸衛神銃手之半與各衛馬隊相無分布西  
陽河至龍門口諸七堡以備不虞從之○守備益雲都指揮蔣  
貴奏神銃官軍數少行在兵部請以營州左右屯衛指揮許志等  
所領神銃官軍三百四十三人益之○乙卯設江西豐城縣江

河口巡檢司時巡按江西監察御史許勝奏江潞口南昌臨江  
二府接界之地盜賊出沒劫掠行旅宜置巡檢司 上命江西  
三司覆勘至是三司咸奏宜設故有是命○行在兵部奏北京  
直隸諸衛及遼東大寧二都司山西行都司所屬衛所軍士逃  
亡者多宜取勘降罰其有總兵鎮守官之處從總兵鎮守官比  
較若無則從都司按察司官及巡按御史比較果有苦害軍士  
者依禁約榜例逮治 上曰行事須有次第速降罰則過於急  
且定為三限半年一次回報三限之中皆須勾解完足不完則  
如例降罰才貸○丙辰賜朝鮮國使臣趙慕等及瓜哇國使臣  
龔用才等鈔紵絲羅絹及金織襲衣胖襖有差仍賜用才等六  
人冠帶○總兵官平江伯陳瑄奏自徐州至濟寧河水多淺轉  
運甚艱今遣官巡視謝溝胡陵城八里灣南陽淺及東昌梁家

鄉淺師家莊仲家淺皆當置開其徂徠諸山泉源所出舊有湖塘今多淤塞乞加修濬庶有停蓄得以通利徃來從之○戊午給皇城四門守衛官軍新盔甲刀鎗○賜陝西河州衛拾歲等簇刺麻賞木歲卜等鈔絲幣絹有差○平江伯陳瑄奏指揮王成及千百戶等官漕運違期并軍士輸糧不足者悉請罪之上諭行在戶部臣曰漕運甚艱違限官記罪軍士糧不足者令來年補納○己未以明日冬至節遣武定侯郭玘祭長陵獻陵○庚申冬至節上御正朝受賀大宴文武羣臣及四夷朝使皇太后皇后免外命婦朝○晚刻月犯與鬼○甲子初督把台奏請鄆縣新河里地四十餘頃為牧地上命行在戶部遣官踏勘果空閒地可與十五頃若民耕種納糧熟地皆不與○夜有流星大如雞彈色赤有光出天園南行至濁月犯

右執法○乙丑宣府總兵官都督譚廣奏是月十九日夜虜寇百餘人入鵬鴛殺傷浩嶺驛官軍掠奪畜懷米衛已發軍勦捕聞平衛指揮方敏王俊不出兵策應請治其罪上曰暮夜舍猝或有不爰姑宥之令巡邊立功再犯不想○丙寅迤北和寧王阿魯台遣使臣阿都赤等貢馬仍以馬求市上諭行在禮部臣曰彼既歸心朝廷聽其市易毋縱下人侵擾違者執而罪之○廣西總兵官都督僉事山雲奏廣西柳州府洛容諸縣蠻寇出劫屯聚鄉村遣指揮王綸等率兵討之綸等因賊拒敵縱兵勦殺害及良善請治其罪上諭行在兵部臣曰兵力之下不免有誤綸等幸有功姑宥之其移文山雲凡平民有係累者皆遣還令有司用心撫恤勿令失所○夜月犯角○丁卯上以河東天下朝覲官及往來之人俱由陵路慮有盜賊遣監

祭御史張政白圭唐琛同錦衣衛官校分往巡捕仍命綠途軍衛有司並嚴巡警○迤北韃靼帖木兒來歸奏願若京自效命爲百戶賜冠帶金織襲衣絲幣銀鈔綿布鞍馬仍命有司給房屋器皿等物如例○戊辰勅鎮守山西都督李謙及山西都司曰和寧王阿魯台遣使朝貢從大同入境今已至京度其人馬必來緣邊屯駐宜嚴守備亦不許土事答魯近者韃寇百五十餘人犯古北口東磚梁子口守關百戶以銃擊之殺賊五人賊即遁去而探之聞平浩嶺驛無備徑由西衝山口突入射傷官軍將士失機者已治其罪比聞崖頭等墩舉火放砲恐即此賊宜親歷緣邊關隘督視官軍整齊卽伍晝夜隄備庶幾無患并勅各處邊將俱嚴禦○勅總兵官都督諱瀆等操練口北各衛所軍馬謹守關隘提督屯堡○嘔罕河等衛指揮同知阿里哥



兀者衛指揮同知保同沙州衛指揮僉事桑哥失里亦力把里  
回回倒剌火只等來朝貢馬○已巳賜朝鮮國使臣元憫生洪  
師錫等鈔絲幣表裏襲衣靴襪有差○上御奉天門諭行在刑  
部侍郎施禮等曰昨日大理寺奏爾等遣吏送強盜赴寺審錄  
中道受財縱之逃逸於律當絞朕已可其奏夫吏人心術已壞  
惟知利耳其中有蕪耻者百無一二爾等宜嚴飭之使知守法  
畏刑彼能保身此亦省事今彼陷入死地非爾等寬縱之過乎  
當以為戒禮等皆頓首謝○巡按福建監察御史方端奏延平  
府尤溪縣強盜陳赤哥等四十餘人劫掠居民巡檢王佐往捕  
賊拒敵殺弓兵奪印信勅福建三司發兵捕之○兩浙都轉運  
鹽使司判官黃惠奏海沙場鹽課司鹽倉俱在海寧衛城中其  
第三等圍隄城三十六里日煎火鹽不敢停積隨運赴倉往還

七十餘里今去城二十餘里海口巡檢司北有沒官屋一區甚  
近各憲乞改作鹽倉又言西路等場鹽課司竈丁俱嘉興海鹽  
華亭等縣之人有盡室死亡及事故去者令所司捕之移文各  
邑經二三年不補本司相距各邑甚邇乞免達布政司止於各  
邑催撥庶鹽丁不缺鹽貨無虧命行在戶部禮部議行○直隸  
徽州府黟縣奏賑濟饑民二千一百一十一戶乞給官倉穀二  
千六百五十六石五斗○庚午命故行在羽林前衛指揮使胡  
亮弟旺襲職○浙江杭州府奏臨安於潛二縣歲荒民饑共借  
官倉米一千五百九十石賑濟○直隸大名府內黃縣奏六  
月間連雨不止河水漫溢淹沒田苗一千九百三十八頃八十  
一畝 上命行在戶部蠲除田租○曉刻月犯天江南星○辛  
未西蕃把沙等族大國師奔完卜失兒監藏又申冲等族指

揮僉事星斤奔等未朝貢馬○陞行在錦衣衛指揮同知曹者赤帖木兒爲都指揮僉事以使遠夷勞也○行在都察院奏工部員外郎李宣前以公事往江西違限當問罪今其女爲鎮南王妃且宣年老已蒙恩致仕緣前事未竟 上曰彼爲國戚又已致仕違限小過不足究○行在禮部言和寧王使者被歸附韃官盜其馬及賞物 上諭右都御史顧佐曰韃官受朝廷名爵俸祿猶敢如此豺狼之性終不馴伏其揭榜通衢軍民有能擒盜得實者人賞鈔三千貫綿布二十匹犯人斬首示衆以籍其家產若十日之內盜物者能自首亦免其罪

大明宣宗憲天崇道英明神聖欽文昭武寬仁純孝章皇帝實錄卷之五十九

明宣宗實錄卷之七

宣德四年十二月癸酉朔 上省郊祀牲○甲戌賜朝鮮國貢使元憫生洪師錫等及和寧王阿魯台貢使阿都赤等宴○其肅總兵官都督僉事劉廣奏漢中衛千戶陳庸告陝西管操都指揮趙恭取受所部贓物及諸不法事恭亦告庸私役軍諸並治之 上曰都指揮苟能持身守法何至與千戶相訐亦不知有應恥矣命巡按御史同陝西按察司並鞠之○山東泰安州稅課局大使郝智言州近泰山田土素薄所耕僅足以納稅糧民多饑食比者京師所遣中官採天麻野味民被虐害蕪妨農種今後凡朝廷所取應用之物乞不遣官止令該部移文有司採進 上曰朕豈以口腹累人者命該部凡所遣人悉召還治之自今更不許輒遣人○乙亥宣府總兵官都督諱廣等奏長

安嶺以北獨石鴟鴞等處屯種軍餘宜徙入長安嶺以南為便  
遂勅廣曰此雖便於隄備然未知開平差使往來及人情動靜  
若何須公私兩便然後可行其再計議以聞○直隸懷來衛奏  
洗馬林等處守縣軍士三百七十七人舊給毛襖抵帽經久皆  
敝 上諭尚書吳中曰今苦寒之際宜速給之不可緩他處應  
給者皆速給之○先是扯兒禪等處頭目羊采木台伯蘭火者  
挈家屬一千四百餘人及馬駝牛羊米歸至沙州為罕東衛指  
揮那南弟苦奴把都麻失加等所掠至是軍聞勅那南等盡進  
還之不還者悉治罪○北京地震○丙子廣東南海縣民葉登  
言番禺縣懸口地有銀鋪民多竊取魚銀宜開治置官 上曰  
今各處歲辦銀課者往往害民方革其弊豈可再開銀冶不聽○  
丁丑命給文武百官俸鈔時行在戶部奏南北二京文武官今  
年俸鈔未支 上曰仕者所仰俸而已其速支給武官於京庫

文文官於原籍官庫文以給其家○行在禮部言梁王瞻均遵  
千戶進謝恩表副本不當用寶又東宮千秋箋亦附齋米違式  
不謹當罪其長史等官 上曰王未諳典故過在長史但此小  
事亦不足罪其移文俾知之○戊寅 上諭行在戶部尚書郭  
敷日前為鈔法全蔬果園俱納鈔今天寒無蔬果可鬻其令有  
司停徵○弗提等衛女直指揮僉事佛家奴陝西岷州衛禪師  
判麻高僧沙加等來朝貢馬○甘肅總兵官都督僉事劉廣奏  
甘肅採備軍士陝西都司調至者一萬人行都司續調至者五  
千人又外夷來朝又奉使命者俱給糧餉請以續調軍士五千  
人下屯耕種外夷又奉使命者甘肅止關糧一月其餘就陝西  
布政司折與布絹庶使還儲可積從之○己卯勅鎮守山西都  
督李謙曰爾奏欲留潞沁二衛自京回還官軍一千餘人於緣

邊防守及留都指揮劉信管領皆往所奏待明年黃河凍開仍  
令赴京操練○臨洮衛指揮李敬千戶王瑀嘗與臨洮府推官  
許巽同捕強賊敬瑀畏賊退縮解鎧甲腰刀付民丁赴聞民丁  
奮開直前皆有擒獲巽嘗奏之敬等聞之懼得罪遂誣府官受  
賕事 上命陝西按察司逮問且諭都察院臣曰其令按察司  
必明虛實不可枉人已而語侍臣曰此必指揮誣府官忿府官  
前所奏也武臣國之爪牙一有調發當奮不顧身今遇小寇輒  
畏縮設遇大敵豈能奮勇成功乎○庚辰臘節賜文武羣臣宴  
○南京地震○辛巳迤北和寧王阿魯台使臣乃顏答兒奏願  
吾京自劾命爲試百戶賜冠帶全織襲絲幣銀鈔鞍馬仍命有  
司給房屋蓋皿等物如例○濟陽衛卒李致嘗與草場吏相毆  
後草場火時致已先差運糧赴開平吏告致放火陷已致還行

在刑部急追之其女擊登聞鼓訴冤又武清縣民劉全宇既厥  
民張記赴厥運軌適軌頤壓死記弟告全謀害刑部拷訊全不  
服全妻亦擊鼓仰訴給事中以聞上曰二獄皆可疑理獄者  
當詳覈庶無冤抑若但淹禁加鞭笞不勝苦楚者必誣服而枉  
死矣朕恒以此戒法司其能體朕意者幾人此二獄令都察院  
刑部堂上官同與之辯○壬午賜嘔罕河衛指揮同知阿黑哥  
兀者衛指揮同知保同沙州衛指揮僉事朵哥失里亦力把里  
回回倒剌火只等及招撫至京福餘衛韃靼阿路灰鈔絲幣表  
裏全織紵絲等衣及靴襪有差○夜有流星大如鷄卵色青白  
有光起孤矢而南行至孫星○癸未有違言洪武永樂中法制  
有當改易以從宜者上謂侍臣曰自古帝王創業垂統必有  
成憲以貽子孫子孫能謹守之足以保天下若自作聰明或惑



於小人而變更之不免生禍亂如唐府兵其制頗近古後一變為騎再變為方鎮遂使武夫得專方面唐遂以亡宋賦役祖宗時皆有定制其後信用小人變為新法民不勝其煩擾自是朝政反覆國事日非卒致夷虜之禍是皆可監侍臣對曰子孫惟恭儉則能保守 上曰然而亦須任老成人如宋任用李沆豈有改祖法之事○賜西番把沙等簇大國師命奔完卜失兒監藏及中冲等簇指揮僉事星斤奔等鈔幣帛靴襪有差○甲中增置通州等衛各副使時行在戶部左侍郎李昶專督倉庫言通州等衛倉藏收糧各四五十萬石每倉止副使一員攢典一人雖有經歷常以計事赴部不在職又各倉文籍皆識字軍掌行歷久弊多乞每衛倉增置副使二員及通書等攢典四人 上命行在吏部悉從之原用識字軍盡令選伍○賜弗

提衛女直指揮僉事佛家奴陝西岷州衛揮師沙加等九十一人鈔幣帛靴襪有差○宥桂州平浪長官司賊黨尚紀狄楠等罪初蠻賊紀那狄魯諒稱土官率衆劫掠貴州都司發兵擒之送京師其子弟尚紀狄楠嘗同惡逃不獲至是悔罪自首願改過復業納賦總兵官都督蕭授以聞上曰首惡既就擒其屬可宥况有悔過之意遂宥之命授撫諭之俾安業○乙酉南京大理寺少卿呂升言江南之民運糧至北京者不諳河道險易稍與官軍漕舟相遇勢不能敵被其欺凌至呂梁則負米登岸俟船上洪又負入舟遂留下半月宜於洪之西岸置倉收貯如平江伯所行事例令軍船運載又言江南糧長之設專督糧賦近時永充糧長恃其富豪肆為亡賴交結有司承攬軍需買辦往往移已收糧米別用輒假風濤漂流為詞重複追徵深為

民患請令郡縣各增置官二員專率糧長催徵使不得干預諸事 上諭行在戶部臣曰呂梁洪貯糧宜令平江伯陳瑄尚書黃福計議可否糧長害民事令郡縣官督察究治之○丙戌慶成王濟炫薨王晉恭王第四子未樂元年十一月封至是薨年四十有六卦聞賜祭謚莊惠命有司治喪葬○廣西利州土官知州岑顏等遣族人岑忻等來朝貢馬及銀器方物○特命沙州衛故副千戶撒的子保童襲職初瓦剌賢義王太平卒時撒的嘗密探以聞保童又諳境外事故命之○賜朝鮮國及逸北和寧王貢使宴○丁亥陝西岷州等處剽麻阿南谷等來朝貢馬○戊子四川長河西魚通寧遠等處宣慰使喃哩遣把事短竹伯并大寶法王之徒剽麻鎖南扎等來朝貢馬及方物○以任滿考嚴陞行在刑 給事中賈諒為本科都給事中四川道

監察御史彭謙為四川布政司左叅議刑部員外郎高翥為湖廣布政司左叅議南京刑科給事中楊蓋為江西按察司僉事○擢工部司務秦獻萊州府學教授高超常州府學訓導張昶濟陽縣學訓導張璘武康縣學訓導姚登俱為行在監察御史臧交趾道超福建道昶江西道璘四川道璧貴州道進士郭瑾姚銑李原縉龔全安葉穎鄧崙為給事中瑾銑原縉皆行任刑科全安穎皆行在工科崙南京刑科黜南京湖廣道監察御史裴亨為山西清源縣知縣以不勝任也行在湖廣道監察御史潘純為山東陽信縣知縣工部屯田司主事程鈞為延平府通判以偽疾家居不治職務也○己丑免直隸鳳陽順天保定河間真定大名永平廣平八府所屬六十六州縣宣德二年三年水災田地五萬八千八百七十五頃五十九畝其應納稅糧一

十七萬四千九百五十餘石穀草四百五十八萬八百三十餘  
束○庚寅秦王志傑奏解三護衛 上復書曰比者護衛軍張  
嵩秦王府中諸事朕知其妄付錦衣衛治之既遠關衛送至千  
百戶李凱等四名亦告府中事所言與嵩同王自嗣封以來安  
分無過朕所知者豈彼小人所能離間王其安心凱等亦必不  
怨但王存遠慮欲 小人之口懇解三護衛言之切至今姑強  
從然王不可無侍衛之人聰留一衛以備使令其二護衛令兵  
部調來北京○廣西茗益等州土官知州李子實遣族人李子  
愈等貢馬○鄒縣知縣張清奏本縣歲辦課鈔數少舊無稅課  
局今軍民商賈往來輿販者多宜設局置官吏職專徵稅  
上曰鄒亦小縣置局徒擾人不聰○辛卯四川龍州土官知州  
薛忠義白馬路長官司土官副長官薛繼良遣舍人薛志高等

來朝貢馬○設白塔河巡檢司時兩淮運使何士英等言軍民  
販賣私鹽自通泰高郵從瓜洲等港出江皆經江都白塔河其  
地宜設巡檢司庶革其弊故有是命○壬辰四川永寧宣撫司  
土官宣撫奢蘇九姓長官司土官長官任爵遣把事梅受先等  
來朝貢馬○加行在兵部尚書張本太子賓客二俸無支○召  
內官亦失哈等還初命亦失哈等率官軍往奴兒干先於松花  
江造船運糧所費良重 上聞之諭行在工部臣曰造船不若  
使遠方無盜徒以此煩擾軍民遂勅總兵官都督王凱凡亦失  
哈所齎頒賜外夷段匹等物悉於遼東官庫貯貯命亦失哈等  
回京○癸巳四川烏撒軍民府故土官知府卜穆婁圖和馬湖  
府土官知府安璿太平伐長官司土官長官宋應偏橋長官司  
土官長官安銜遣把事宇北等來朝貢馬○行在兵部給事中

李蕃巡關還言五事一守關士卒勞苦冬衣布花例應七月與之今年終春物方給亦有一年不給者乞申飭各衛冬衣布花俱於秋成後關給一自山海衛南海口至右庸等關每關官軍或百餘人衣甲止十餘副或四五副亦皆損壞乞令工部給之一官軍畏避邊戍之勞或託修築墩墩為名潛出口外擒捕野獸巡關指揮與之相通不行禁遏因而逃遁乞令以家屬隨營仍禁出口捕獵一湯峪等緣邊關口官軍月糧俱於通州倉關給往復路遠軍常飲食乞令戶部計議將附近州縣稅糧撥支為便一陰慶等衛路當衝要北虜往來朝貢以軍士孳生牝馬接過多墮胎而斃所司責令償馬又採辦柴炭運載艱難多裒歛布貨至京買納貧者皆逃今後虜使往來宜令各衛所以官軍騎操馬通送柴炭不急之務宜暫蠲免 上諭行在兵部尚

書張本等曰朕嘗親歷邊城見士卒艱苦未嘗暫忘今覽其所奏益為惻然卿與戶部工部即議行之毋重困苦士卒○遼東總兵官都督僉事巫凱奏虜寇竊入鐵嶺廣寧境內劫掠人畜都指揮魯得全聲等不嚴守備百戶陳善等失於瞭望皆當問罪上命皆罰俸兩月失瞭者加笞五十若再蹈前失不宥○甲午四川天全六番招討司七官招討使楊欽廣西南丹等州土官知州莫禎湖廣永順軍民宣慰使彭忠陝西西寧衛指揮師領占星吉岷州衛高僧文瑜等來朝貢馬○乙未烏思藏國師領占端竹阿木葛大國師釋迦也失并大乘法王輔教王闡化王使臣鎖南領占等五百四十二人貢馬及方物○修歷代帝王忠臣功臣廟時南京工部奏各廟歲久損壞皆宜修理上謂行在工部尚書吳中曰此祖太皇帝崇德報功勅諸祀典至



為重事即令襄城伯總督修理務令完固毋徒應故事○行在兵部尚書張本奏前者總兵官都督譚廣言兩濠頓壞長城墩隘請益兵修築濬其壕塹有旨令臣計議臣以為修築長城工役繁重况宣府猶是內地若開平孤懸則將何以保障宜令廣按行閱視果係要害關口則修築之毋與大役疲勞人力從之○丙申貴州思州等府土官同知党禮湖廣龍潭安撫司等衙門土官安撫黃景中等來朝貢馬○丁酉貴州龍里等衛土官千戶周斌龍里蠻夷長官司土官長官何慶祿上馬橋長官司土官長官李慶四川疊溪等長官司故長官卻書華弟白失結等來朝貢馬○行在兵部奏山西行都司言大同臨邊重地使臣往來及奏軍務事者給驛於道雲中驛馬二十匹不足適送寬城上盤王家莊大白香山五驛地僻往還者稀欲於每驛調馬

五匹於雲中驛迺送從之○戊戌右軍都督府都督僉事嚴宣  
卒宣本遼陽胡人初名火里歹及貴始改今姓名洪武中襲父  
職為新安衛千戶以功陞指揮同知永樂五年調井肅備禦七  
年陞陝西行都司都指揮僉事八年充驃騎將軍從征北虜以  
功陞都指揮同知後復從征北虜洪熙元年陞右軍都督府都  
督僉事至是卒 上遣官賜祭○己亥廣西慶遠等府那地等  
州土官知州羅志通等四川沐川長官司女土官副長官王氏  
及烏思藏合立麻尚師等來朝貢馬及方物○庚子嘉河等衛  
女直指揮僉事莽哥兀名等衛指揮阿剌孫等來朝貢馬○辛  
丑歲暮享 太廟○以明日正旦節遣衛王瞻埏謁告 長陵  
獻陵○遣官祭五祀及旗纛之神○四川泥溪等長官司土  
官副長官壬鳳等湖廣下愛茶峒長官司土官副長官丹達等

遼東自在等州千戶伯顏禿等來朝貢馬及方物○夜五更南方有暈如盞大赤色有光起平星西南行至軫宿尾跡炸散○是歲天下戶口戶九百八十四萬八千三百九十三口五千三百一十八萬四千八百一十六田地四百五十萬一千五百六十五頃九十九畝田賦米麥三千一百三十三萬一千三百五十一石有奇絲一十七萬九千三百一十五斤綿二十三萬四百一十六斤絹九萬五千四百五十七匹布一十二萬九千八百五十二匹綿花二十三萬八千二百二十一斤折色鈔七萬七千三百一十九錠有奇雜課鈔三千二百七十八萬六千六百一十九錠米麥七萬四千一十八石有奇銀五千八百八十八兩銅二千一百二十九斤鐵四十九萬八百九十八斤布二百七十四匹鹽課鹽五百二十五萬七千四十九引有奇折色鈔

二千五百八十一萬四千九百五十二錠米六十萬二千七百  
五十二石有奇綿布七萬九千一百九十五匹茶課茶六十一萬一  
千六十四斤折色鈔一萬一千一百六十四錠屯田子粒六百  
八十二萬六千八百四十七石採納金三百五十九兩銀二十  
九萬四千八十一兩水銀五千三百二十五斤硃砂一千一十  
三斤有奇石綠二千九百八十六斤雄黃一百九十斤漕運北  
京米豆三百八十五萬八千八百二十四石減免天下官田等  
項稅糧計米麥二萬一千五百七十九石有奇

大明宣宗憲天崇道英明神聖欽文昭武寬仁純孝章皇帝實  
錄卷之六十

明宣宗皇帝實錄卷之六十終

大明宣宗章皇帝實錄卷之六十一

宣德五年正月壬寅朔 上御正朝受朝賀大宴文武群臣及  
四夷朝使 文武群臣命婦朝 皇太后 皇后 ○癸卯朝  
鮮國王李洵遣陪臣吳陞等來朝貢金銀器皿及方物 ○甲辰  
遼東兀者等衛女直指揮弗羊加貴州福祿永從等蠻夷長官  
司署司事舍人石宗和等來朝貢馬 ○乙巳立春順天府遞春  
上御正朝受之文武群臣行賀禮遂賜宴 ○丁未孟春享

太廟 ○遣中官祭司戶之神 ○戊申梁王瞻伯奏求郢府故莊  
宅田園及安陸護衛官軍所遺房屋田土命行在都察院委御  
史覆視如皆郢府故物不關於民悉與之 貴州古州蠻夷長  
官司長官揚致賢道卿老石再原等貢馬 行在吏部奏朝覲  
官未到者廣東崖州寧遠等處土官凡三十餘處法當違問

上曰瓊崖諸州遠在海外但移文審勘不必追逮 山東文登縣執妖僧明本法鍾等解京師明本等皆栖霞縣太平寺僧以化緣至成山衛依百戶朱勝因金改舊額勅諭度牒為妖言惑衆詐稱轉輪王出世作偽詔紀湧安年號違法鍾持詣文登誘惑愚民縣官執之以聞而成山衛亦執勝等械至京 上謂侍臣曰道佛二教本欲離世絕俗養生治性其後乃說禍福亦欲誘人為善而亡賴之徒徃徃以妄言造禍其付錦衣衛窮治之 恭寧候陳鍾卒鍾直隸泰州人祖珪從 太宗皇帝靖內難積功封候父璽亦以軍功授武成左衛指揮僉事永樂二年陞指揮使及卒鍾襲職後年珪卒次子愉襲為候有罪下獄死吏部奏鍾實珪庶長孫應襲珪爵 仁宗皇帝從之命襲封恭寧候至是卒行在禮部言鍾卒應如例祭葬賻贈 上曰彼藉前

人餘蔭而不能飭躬修行惟以酣酣終身與祭是矣 己酉大  
雪時猶涇寒天久不雨是日雪 上喜口北足以膏澤土壤矣  
作喜雪歌以示群臣○庚戌以大祀南郊 上御正朝文武群  
臣受誓戒 宜府總兵官都督譚廣奏赤城屯堡垣墉卑狹比  
賊屢入劫掠今屯守官軍慮其復至欲增徙長安嶺南候春暖  
擇利便地修築城堡增兵守備半年一更為便時開平衛餘丁  
唐子英等亦告欲移入長安嶺南耕種每歲候大軍運糧之時  
隨往開平供送正軍為守禦之計遂勅廣等曰朕以邊務付爾  
事有便宜從爾斟酌但宜審度務保十全 陝西守將言卷免  
零部屬今居亦集乃遷徙無時恐為邊患 上命道人招諭如  
其來歸即與官賞擇善地處之○辛亥昏刻月犯五車○壬子  
南京地震○癸丑大祀 天地于南郊畢 上還謁 皇太后



出御正朝文武群臣行慶成禮○甲寅以大祀慶成大宴文

武群臣及四夷朝使 貴州新化蠻夷長官司長官歐林遣頭

目歐陽孫廣西上隆州署州事土官知州岑瓊母陳氏遣頭目

羅善等貢馬 乙卯嘔罕河等衛野人頭目兀冬加等及貴州

平伐長官司遣頭目楊文得四川龍州土官同知李爵遣舍人

李添諒等來朝貢馬及方物 陞赤城致仕指揮僉事汪貴為

都指揮僉事先是虜寇犯赤城備禦指揮同知方敏率衆禦之

為寇所斃貴所部斬獲功多故有是命 賜武候薛祿言和寧

王阿魯台再遣使朝貢將至宜預調官軍一千五百往居庸關

五百往懷柔守備從之 宜府總兵官都督諱廣言宣府諸衛

少馬請增給五千匹命發順天府孳牧馬二千五百往給之餘

二千五百令廣遣官軍赴御馬監關 南京都察院左副都御

史邵玘卒玘字以先浙之金華蘭溪人由進士授湖廣道監察御史巡歷江西廣東福建所過以威嚴憚吏郡邑振肅時仁宗皇帝監國特見知遇刑部都察院大理寺間缺堂上官輒命玘署有重獄亦數付玘玘夙夜盡力遇事善斷有所顧問應對詳明陞江西按察使江西倚郭南昌新建二縣素苦上官和買為里長者多收玘玘至立罷之丁內艱改福建按察使宣德三年召為南京都察院左副都御史時南京諸司縱弛御史尤甚玘奉勅揀擇奏黜其貪淫及庸儒者殆半繼奉勅簡黜諸司亦如之玘家居有孝行居官克舉其職然負氣簡慢同官而好自用治獄少愆其卒年五十有六訃聞遣官賜祭命有司營葬事○丙辰上元節賜文武群臣宴○韓王冲焮奏初之國護衛軍士逃逸者多屯種者少且牛具種子措辦甚艱請限三年後依

例也種從之○陝西河州衛刺麻劉思已失檢亦馬刺衛指揮  
完者先等來朝貢馬○日生左右項色黃赤鮮明○丁巳行在  
六科給事中劾奏天下來朝布政司按察司及府州縣等官治  
民事者不能承流宣化加意撫綏居風憲者不能激濁揚清剔  
除姦蠹致戶口消耗稅糧逋負獄訟繁滋貪弊愈甚未完之事  
數以萬計皆應執送法司明正其罪及有正佐在任託故不朝  
輒委屬官并老人吏與代來<sup>者</sup>又有在途稱病不至<sup>者</sup>為臣不敬莫  
甚於此亦當遠問 上命行在吏部考察其賢否黜陟之又曰  
疾病人有之遣人代來亦必有故皆不須問未完事更約限使  
完 戊午行在刑部都察院劾奏天下來朝布政司按察司府  
州縣等衙門官曠職稅糧逋負八十餘萬石公事不完以數萬  
計今皆朝覲而來請付法司治罪 上曰朕嘗念臨下太嚴下

或失措故每事存寬恕乃今流於怠弛豈寬恕之過邪遂降勅諭之曰國家建置官府簡賢才而任之蓋以爲民民者國之本也爾等受任理民非一朝一夕今三歲來朝一不聞有陳言民情者豈民皆安而無可言者與抑心不在民雖知其患而不言與廷臣又以爾等稽誤政務交章劾奏爾罪當治朕念民力艱難且郡縣之官有賢有否已令吏部簡斥其不稱任者其餘皆宥復任爾等徃遵朕令盡心民事勤力政務持之以廉公行之以寬厚凡民有所不便政有所不通者具實來聞庶幾副朕恤民之意欽哉毋怠 勅都指揮韓鎮等領兵自永寧至懷來巡備凡諸隘口屯堡煙墩務令整齊嚴謹有寇則乘機勦捕寇去不必窮追 上因謂侍臣曰今虜寇雖衰然鼠竊狗偷乃其常性惟邊防嚴密使彼無間得乘可也○朝鮮國王李裲遣陪臣李

澄等貢馬及方物謝賜磁器 廣西上林長官司署司事土官  
子岑世榮遣頭目黃昌田州府土官知府岑紹遣頭目蕭原貴  
州金筑等安撫司頭目田以得湖廣散毛宣撫司土官于斌四  
川華部軍民府故土官知府普得第容戴沐川長官司土官舍  
人悅福得陝西洮州衛七占等簇剌麻番僧歲卜領占弗提衛  
百戶刺里達東撤又河等衛指揮僉事喃都等來朝貢馬及金  
銀器四方物○賜和寧王阿魯台使臣阿都赤等三百三十人  
鈔幣有差 己未四川平夷長官司故長官王宣女來朝貢馬  
奏請襲職 賜廣西利州土官知州岑顏所遣族人岑忻等鈔  
絹有差○日上生背氣一道色青赤鮮明○庚申賜四川長河  
西魚通寧遠等處軍民宣慰可把事短竹伯及大寶法王之徒  
鎖南劄岷州等處剌麻阿南荅等鈔珠幣表裏靴襪有差 辛

酉賜廣西茗益等州土官族人李子愈貴州太平伐長官司長  
官宋應偏橋長官司把事宇比四川馬湖府土官知府安璠烏  
撒軍民府土官知府卜務妻圓和龍州土官知州薛忠義白馬  
路長官司舍人薛志高九姓長官司把事梅受先永寧宣撫司  
土官宣撫奢蘇天全六番招討司土官招討楊欽廣西南丹州  
土官知州莫禎湖廣永順軍民宣慰使彭忠陝西西寧等衛禪  
師領占星吉岷州衛僧文瑜等鈔絲幣表裏及絹有差○南京  
地震○壬戌進 兩朝寶錄前期一日設 寶錄案于丹陛之  
東錦衣衛設鹵簿駕教坊司設中和韶樂及大樂如常儀設輿  
及香亭于史館是日早監修官英國公張輔等率總裁纂修官  
皆朝服捧 寶錄置輿中 上先具袞冕既鴻臚寺官朝服引  
寶錄輿用鼓樂繖蓋導從左順門東廟出由金水橋中道行

監修等官皆後隨至奉天門下監修總裁纂修等官捧 寶錄  
置于案樂止俟輿及香亭退鴻臚寺奏執事官行禮贊五拜奏  
請陞殿導駕官前導樂作 上御奉天殿樂止鳴鞭監修總裁  
纂修等官入班文武百官朝服分左右侍班鴻臚寺<sup>官</sup>奏進 寶  
錄序班舉 寶錄案以次由中道升班首由左階升 上興序  
班以 寶錄案置殿中班首跪于案前贊史官皆跪內侍官舉  
寶錄案置內殿中 上復座贊俯伏班首及史官皆俯伏興  
班首復位贊四拜贊進表序班舉表案置殿中贊宣表贊衆官  
皆跪宣表表詞云奉天靖難推誠宣力輔運武臣特進光祿大  
父左柱國太師英國公臣張輔等誠惶誠恐稽首頓首上言臣  
聞上有堯舜禹湯文武之君斯有典謨訓誥誓命之紀當時所  
錄萬世攸師自漢以來暨于唐宋皆建史官專職記述我國家

奉 天啓運 聖聖相承大經大法明於上善政善教被於下  
萬方一統海宇清寧洪武以前 神功聖德史氏所記具有成  
書欽惟 太宗體天弘直高明廣運聖武神功純仁至孝文皇  
帝剛健中正廣大高明體 天之心行 天之道勵精為理躬  
儉愛人載奠邦家中興鴻業文治光昭於日月武烈弘靖於華  
夷大略雄材茂功偉績規模宏遠卓冠百王欽惟 仁宗敬天  
體道純誠至德弘文欽武章聖達孝昭皇帝孝友英明寬仁恭  
儉敏 天法 祖制治保邦明日達聰周詢民隱時使薄歛博  
施濟人撫盈成之運廣文明之化丕新政紀覃敷德澤暮月之  
內天下歸仁 二聖升遊仰雲車之益遠萬姓哀慕在海宇以  
同情恭惟 皇帝陛下文武聖神聰明睿智續承大寶君國子  
民推廣至仁繼志述事敬九功之惟叙得萬國之歡心上念



祖宗功德之隆同符 天地覆載之大宜宣昭於簡冊垂儀範  
於帝王宣德元年五月勅修 兩朝實錄命臣輔臣義臣原吉  
監修臣士奇臣榮臣幼孜臣山臣瑛臣溥總裁臣榮臣英臣直  
臣述臣時勉臣習禮臣學夔臣循臣從善臣驥蒙臣鶴齡臣  
洪臣永清臣叙臣曰恭臣敬臣翰臣雅臣蕭臣繼臣中臣叔剛  
臣文奎臣節臣錫臣壽纂修發左右史臣之所記閔中外官府  
之所上無考章疏奏之見聞編載事功必備著其本末纂述謨  
訓必致謹於精微闡制度者雖細不遺切幾務者雖明必審於  
紀叙 聖神之道德如繪畫造化之功能儼諸形容誠難髣髴  
乃若附錄臣下必在推明是非訖五年正月恭成 太宗文皇  
帝實錄百三十卷 仁宗昭皇帝實錄十卷合百五十四冊謹  
繕寫上進伏念臣輔等智識淺陋學術空疎曠歲月而又稽亦

討論之惟勤方之良史深愧之三長之稱監于先朝庶少資萬  
幾之暇臣輔等無任瞻天仰聖激切屏營之至宣訖贊俯  
伏興贊四拜興進實錄官退于東班侍立文武百官入班鴻  
臚寺官奏太子太保成國公朱勇同文武百官恭遇太宗文  
皇帝仁宗昭皇帝實錄纂成群情款抃禮當慶賀宣訖各  
官四拜興贊有制史官後入衆班贊跪宣制制詞云恭惟  
皇祖皇考功德光華纂述詳實朕心歡慶與卿等同之宣訖  
俯伏興舞蹈山呼又四拜禮畢上命行在禮部宴史官例仍稽  
賞例以聞○癸亥和寧王門魯台遣使臣脫火歹等來朝貢馬  
一千二百八十四匹駝五十頭○以太宗皇帝仁宗皇帝兩  
朝實錄成賜監修官太師英國公張輔少師兼行在吏部尚書  
蹇義少保兼太子少傅行在戶部尚書夏原吉總裁官少傅行

在兵部尚書兼華蓋殿大學士楊士奇太子少傅行在工部尚書兼謹身殿大學士楊榮太子少保行在禮部尚書兼武英殿大學士金幼孜太常寺卿兼行在翰林院學士楊漕白金各一百兩綵幣各六表裏織金羅衣各一襲馬各一匹并鞍轡至總裁官行在戶部尚書陳山禮部尚書張瑛白金各六十兩綵幣各五表裏織金羅衣各一襲纂修兼考校官左春坊大學士兼行在翰林院侍讀學士曹榮右春坊大學士兼行在翰林院侍講學士王英右春坊右庶子兼行在翰林院侍讀學士王直左春坊左諭德兼行在翰林院侍讀周述行在翰林院侍讀李時勉錢習禮侍講余學夔陳循蔣驥白金各五十兩綵幣各四表裏素羅衣各一襲纂修官侍講簡從善修撰苗衷曾鶴齡狄洪劉永清編修周叙孫曰恭楊敬檢討王雅楊翥五經博士陳繼

戶部主事陳中行在四川道監察御史陳叔剛福建布政司右  
叅議潘文奎四川重慶府榮昌縣知縣萬節浙江衢州府儒學  
教授丘錫陝西漢中府漢陰縣儒學教諭梁萼白金各四十兩  
綵幣各三表裏素羅衣各一襲催纂官行在禮部主客清吏司  
主事張習膳寓正本兼錄篆官行在禮部儀制清吏司郎中朱  
暉行在吏部稽勲清吏司郎中程南雲行在禮部精膳清吏司  
郎中陳景茂行在吏部驗封清吏司員外郎宣嗣宗考功清吏  
司員外郎夏衡行在中書舍人俞宗大陸友仁蕭湘羅淵張益  
白金各二十五兩綵幣各二表裏素羅衣各一襲膳寓副本兼  
錄篆官行在中書舍人宋琰黃振宗千需凌壽胡灝劉鉉胡宜  
衡解禎期行在大理寺右寺副丘宗揚鉉白金各二十兩綵幣  
各二表裏素羅衣各一襲續至膳寓副本兼錄篆官行在吏部

驗封清吏司主事蘇鉞行在中書舍人周崇厚白金各十五兩  
絲幣各一表素羅衣各一襲膳葉及稽考察對官行在翰林  
院修撰邢寬蔣禮胡種編修劉矩葉綸陳詢梁禋檢討許彬連  
智馬信周貴孔目沈寅行在中書舍人王璜慈厚胡宗繇行在  
禮部祠祭清吏司郎中黃養正行在禮部儀制清吏司主事王  
觀行在大理寺左寺副洪益中右寺副邵選續至膳馮副本官  
行在中書舍人龐叙白金各十五兩絲幣各一表粟素羅衣各  
一襲收掌文籍官行在翰林院檢討胡讓典籍李錫牛麟張禮  
白金各十兩絲幣各一表裏素羅衣各一襲續至膳馮副本儒  
士鄒循生負朱銓白金各五兩辦事史翁選王子翔李用方考  
斌許智王秀才馮英張懋徐忠梁衡鈔各二十錠時禮部尚書  
張瑛已往蒞南京部事翰林院檢討周翰以疾卒及有故而去

者陳景茂龐叙胡宗蘊陳詢梁裡凡七人行在禮部具奏

上命皆如例給賜表背等匠十人亦各賜鈔二十錠○賜貴州  
思州府土官同知覺禮龍里等衛土官副千戶周斌龍里長官  
司土官長官何慶祿上馬橋長官司土官長官李慶湖廣龍潭  
安撫司安撫黃景中下愛茶峒等長官司長官冉暹四川泥溪  
長官司土官壬鳳沐川等長官司女土官王氏疊溪等長官司  
土官舍人白失結廣西那地等州土官知州羅志通等及烏思  
藏哈立麻尚師遼東自在等州副千戶伯顏禿嘉河等衛女直  
指揮僉事莽哥兀者等衛指揮阿剌孫等鈔緜幣表裏紵絲等  
衣靴襪有差○日生暈隨生交暈皆黃赤鮮明

大明宣宗憲元崇道英明神聖欽文昭武寬仁純孝章皇帝實

錄卷之六十一

明宣宗章皇帝實錄卷之六十一

明宣宗章皇帝實錄卷之六十二

宣德五年正月甲子烏思藏必力工瓦等處刺麻高僧南哥監  
藏靈藏都指揮桑爾結監藏陝西寧夏刺麻僧人耳力貴州湖  
耳蠻夷長官司長官歐景虎遣頭目姚子雲等來朝貢馬○賜朝  
鮮國貢使吳陞等宴○乙丑賜朝鮮國使臣吳陞等二十二人  
鈔絲幣表裏命陞齋勃及朝服襲衣歸賜世子珣○賜烏思藏  
國師領占端竹阿木葛等五百八人大國師釋迦也夫并大乘  
法王使臣鎖南領占等五百四十二人招諭至京福餘衛韃官  
副千戶火赤互并原監招諭指揮僉事木當加等及兀者等衛  
女直指揮弗羊加等蠻夷長官司舍人石宗和古州等蠻夷長  
官司鄉老石再原鈔絲幣表裏絹布胡椒等物有差○行在吏  
部奏選官退 上因與侍臣論前代官制 上曰省官安民之



道唐虞建官惟百夏商官倍秦漢以下視夏商官益增多何也

侍臣對曰特世不同也 上曰唐虞三代事簡民淳不可比擬

唐太宗定内外官七百三十員去古未遠亦足為法侍臣對曰

然必由君心靜則事可簡事簡則官可省官省則民安矣若國

冢多事政務煩雜小人倖進冗食者多欲百姓免於煩擾難矣

上曰此誠確論清心者省事之本○丙寅以纂修 兩朝實

錄成賜監修總裁纂修等官太師英國公張輔等宴于行在中

軍都督府○上御左順門謂行在兵部尚書張本等曰馬軍比

之步軍尤為勞苦蓋自備軍裝為難今後馬軍戶內再免一丁

差役以助給之○南京戶部左侍郎郝鵬言今鈔法阻滯乞令

應天府人民凡需賁及織造幣帛并停塌物貨之家每月納門

攤鈔五百貫庶鈔得流通從之○雲南總兵官黔國公沐晟等

奏招諭永昌千戶所千夫長刀不浪班等順服先是刀不浪班等劫殺潞江安撫司人民遂安撫曩壁奔金齒而據其地晟與雲南三司遣官招諭至是刀不浪班懼罪盡還其所據地復歸舊居常差如故晟等因而撫之○謫郡縣官之貪汙者戍邊老疾鄙猥者罷為民初天下朝覲官至京上命行在吏部廉察其賢否又令方面官各具所屬官貪虐及不稱職者上名行在吏部是吏部奏貪汙者二十五人當充邊軍老疾及鄙猥無能者五十人當北京為民上曰老疾者無過鄙猥無能者無惡皆罷歸為民貪汙者民之害宜發戍邊衛○福建萬安千戶所千戶夏麟奏本所城池切臨大海近增延平衛官軍五百人同守領軍千戶張忠百戶陳瑾令軍士邀阻納糧之人強取糧米搶奪財物及強姦婦女肆為非法上謂右都御史顧佐曰增軍以

固守備乃重為民害不可不治然偏辭未可遽信或者新舊之人雜處不相孚而相忌亦未可知且令福建按察司察實有罪者即治之○丁卯命行在兵部閻實懷朱永寧撫寧三衛官軍之數○陞京衛指揮使吳凱等十七人為都指揮僉事指揮同知李弘等十一人指揮僉事呂昇等二十人署都指揮僉事先是行在兵部言各都司缺官有旨命公侯伯都督都指揮公同推舉至是有十餘人共舉一人者或三四人或七八人共舉一人者其名以聞上謂尚書張本曰人之才行未易知今衆人同舉必合公論其指揮使皆陞都指揮僉事指揮同知僉事皆令署都指揮僉事分布各都司於是指揮使陞都指揮僉事者行在金吾左衛吳凱任浙江都司濟南衛張璣任福建行都司行在羽林前衛劉斌遼東都司濟州衛李弘行在羽林左衛朱

英俱廣東都司行在金吾左衛金瑛永平衛劉海俱福建都司  
武功中衛張善湖廣都司武成前衛戴旺陝西都司蔚州衛李  
昇行在金吾右衛孫智俱山西行都司行在金吾左衛邢安永  
清左衛趙諒俱四川都司行在金吾右衛李進河南都司行在  
金吾左衛劉玉雲南都司行在旗手衛俞詢四川行都司彭城  
衛李謙仍掌彭城衛事指揮同知署都指揮僉事者隆慶右衛  
李弘任中都留守司行在羽林前衛陶旺福建都司寬河衛施  
祥四川行都司武成中衛蔣貴福建行都司密雲中衛史直山  
西行都司瀾州衛劉福陝西都司行在金吾左衛胡清陝西行  
都司山海衛李瑾河南都司行在金吾左衛王信山東都司行  
在羽林前衛胡成韓雄俱廣西都司指揮僉事署都指揮僉事  
者天津右衛呂昇任陝西行都司興州後屯衛阮璿行在金吾

左衛高王俱大寧都司行在旗手衛吳亮燕山左衛曹義俱湖廣都司行在羽林前衛鄭泰遼東都司行在金吾左衛馮貴容雲後衛張鑑俱山西都司大興左衛朱原陝西行都司行在羽林前衛趙斌李忠俱貴州都司行在金吾左衛葛聚雲南都司保定中衛王斌廣西都司行在驍騎右衛高原山東都司武成右衛魏廣河南衛屠義俱江西都司行在金吾後衛鄧安福建都司彭城衛王濟浙江都司行在金吾右衛楊得清陝西都司燕山前衛楊興中都留守司○賜貴州平伐長官司頭目楊文得四川龍州舍人李添諒等鈔絲幣表裏有差○宥保安衛指揮同知王俊死罪降充軍立功俊先守赤城虜寇遠俊與指揮方敏率軍禦之敏戰死俊不之援與其麾下解甲棄弓矢脫身走不歸赤城徑走宣府 上聞命法司逮至初欲殺之至是宥

死請充軍保立功贖罪○四川總兵官左都督陳懷奏蜀王府中忽舉砲銃不知何為察之蓋四川都司私與王府者於法當問上令行在都察院取長史承奉詰之勅懷凡四川都司堂上官皆責死罪狀而械送其首領官赴京○江西按察司奏饒州府同知張憲貪贓在赦前合送吏部改用今憲仍掌府印署事不肯赴部檢校劉爾於公堂詈辱之奪其印皆屬違法請治其罪上諭行在都察院臣曰同官相處事有不當須以理論何至詈辱乖爭以壞禮法且此兩人果為公果為私邪令皆執而治之○河南南陽縣知縣李垣主奏典史鄭彥宗不諳文字不理職事嘗委催糧草二年之上不回任事亦不完乞取回部降點上命法司罪之又顧尚書郭璉等曰典史雖末職然最親民除授之際豈可不擇又謂右都御史顧佐曰朕屢勅風憲

考察郡縣官今不才者如此而不黜是風憲不遵朕命爾其中  
戒之○戊辰賜貴州新化蠻夷長官司頭目歐陽孫廣西上隆  
州頭目羅善等鈔幣有差○行在戶部陝西司員外郎鄭源奏  
初以進士除主事九年陞員外郎近得疾艱於步趨乞改授教  
職以圖報效從之○少保無太子少傅戶部尚書夏原吉卒原  
吉字維詰湖廣湘陰人自幼端重好學蚤孤勤力養母洪武中  
自太學生擢戶部主事曹務叢脞處之悉有條理同列取正馮  
陞戶部右侍郎廵撫福建所過郡邑考察吏治咨訪民隱公明  
寬大人咸悅服 太宗皇帝入正大統轉左侍郎逾月陞戶部  
尚書永樂初蘇松諸郡水沴命往治發浙西兵民十數萬疏決  
壅滯自松江黃浦東北以達于海水患乃息而撫恤曲當人不  
言勞又撫綏其飢民奏發粟三十餘萬石賑之初建北京採宮

殿材於東南命自南京抵北京督視運送給以錦衣衛官校且命有不率命便宜行事原吉於號令中備矜恤之意人人效用太宗巡狩北京預扈從命燕行在禮部都察院事歲餘車駕親征北虜是時上以皇太孫留守命原吉輔導九載秩滿賜勅嘉獎上親宴之別殿重修太祖皇帝實錄為監修書成賜鈔織金衣文綺北虜復犯邊太宗皇帝將視征原吉言今邊儲不足請遣將手之無煩六師行旨收繫之仁宗皇帝嗣位時日復其官加少保仍兼戶部尚書賜玉帶上正位東宮如兼太子少傅少保尚書二職如故賜銀章一其文曰繩愆糾繆且諭曰朕有過舉但卿奏未以此識之修太宗皇帝實錄為監修仁宗皇帝崩上嗣大位以舊輔尤重倚任寵眷日盛修仁宗皇帝實錄仍為監修庶人高煦反上親率六



師擒之原吉與扈從還賜白金文綺加厚賜銀圖書一其文曰  
含弘貞靖蓋褒其德云明年扈從巡北邊既還上念原吉等  
四人者皆春秋高思優逸之賜勅加勞輟職務仍其諫朝夕侍  
上備顧問預謀議而恩遇益厚兩朝實錄成賜白金織金羅  
衣文綺表裏鞍馬且賜宴明旦入謝暮歸第得未疾遂卒

上聞計震悼遣禮部尚書胡濙賜祭加贈特進充祿大夫太師  
謚忠靖賻鈔萬緡勅有司營喪葬官其子璠為尚寶司丞仍復  
其家原吉天性孝友德雖微必報未嘗存怨惡之心接人溫然  
襟宇闊深不見涯沒嘗從吏污金織賜衣懼欲逃者原吉曰污  
可況何懼為有吏壞所寶硯石匿不敢見原吉召諭之曰物皆  
有壞吾未嘗惜此慰遣之於時卿大夫雅量推原吉第一其在  
上前所言必歸於厚臨政必酌大體故不問貴賤疏戚及識不

識皆知其為善人長者云。己巳四川軍民府土官知府沙白  
鳥思戩刺麻着失工威等貢馬。賜陝西河州衛刺麻劉恩已  
夫德亦馬刺衛指揮完者克嘔罕河等衛野人頭目兀冬加等  
鈔練帶表裏等物有差。大同總兵官武安衛侯鄭亨奏練邊關  
隘要衝之地如爛荼溝等十五處舊無城堡止是樹柵為備威  
久未壞請於今春三月調軍每處築堡增軍守備從之。庚午  
命永康侯徐安吏科給事中張君傑為正副使持節冊趙府與  
儀副王約女為安陽王妃安鄉伯張安尚賓司丞郭斌為正副  
使持節封岳陽悼惠王姻長子李境為岳陽王其嫡次子李燁  
永安王孟炯庶次子李懋俱為鎮國將軍賜之誥命。上謂行  
在兵部尚書張本等曰古人云惟賢知賢又曰舉能其官惟爾  
之能稱匪其人惟爾不任非所舉後指揮為都指揮者皆將領

衆任事其令各舉二人以觀其才識何如舉不稱者罰之於是都指揮吳凱等舉指揮使高昇等五十八人命籍記以待用

賜朝鮮國使臣李澄等鈔絲帶表裏有差置遼東寧遠衛於

湯池凡五千戶所以定遼中衛右所定遼前衛中所定遼衛後所廣寧中衛右後二所實之其湯池上下六站各增置一千戶

所山海東關至高嶺驛設廣寧前屯衛中前所沙河驛至東關

驛設廣寧前屯衛中後所吉山驛至小凌河驛設廣寧中屯衛

中左所凌河驛至十三山驛設廣寧左屯衛中左所東關驛至

曹莊驛設寧遠衛中右所連山驛至吉山驛設寧遠衛中左所

以遼東諸衛多餘軍士當之不足則於內地附近諸衛撥補官

缺於諸衛刺員及廣寧孫備官內調補從巡按御史包得懷所

奏也南京都察院考送貪污官郎中黃玘等十七人懶惰不

不治事即中陳懋等十四人至京。上謂行在吏部臣曰：官無大小，皆務庶勤。况即官尤重，比輩貪污懶惰，即如例降黜。自今當慎擇人，不可濫授。辛未，定都指揮馬昇等職任。先是，上諭行在兵部尚書張本曰：用人必視其年力如何，庶幾得當。今神機諸營都指揮年六十上下者，皆分別來朕，與御處置。至是本具名聞。上覽畢，諭本曰：朕皆能識之。其馬昇等十五人，精健堪任事，皆留在京。其次馬義等十四人，令於各都司管屯守。城胡通等三人，老疾無嗣，令於各都司食祿不任事，以終其身。其留在京者，亦定職銜於各都司。於是注都指揮使馬昇於大寧都司，趙榮山於都指揮同知李貴山西行都司，崔忠毛翔俱山西都司，李榮武與俱河南都司，韓雍山東都司，都指揮僉事馬騏、俞綱俱中都留守司，董興河南都司，姜原向得大寧。

都司錢義趙崇山并恭司屯守都指揮使馬義山西行都司李  
琛湖廣都司都指揮同知王政陝西都司周貴陝西行都司都  
指揮僉事吳彬廣西都司王興四川行都司劉原廣東都司李  
信四川都司謝貴江西都司徐震中都留守司朱成福建都司  
閻福遼東都司杜真浙江都司蔣英山西都司食祿不任事者  
都指揮僉事胡通湖廣都司來用江西都司高三山東都司  
太監侯顯奏先使烏思藏至邛部之地遇賊劫掠官軍馬牛隨  
行官軍與賊對敵有勇敢當先者有齊力向前者有擒賊者有  
斬賊首級者有陣亡者通四百六十餘人悉具名聞 上命行  
在兵部擒賊及斬首與當先者皆陞一級齊力向前者加賜養  
陣亡者陞用仍恤其家 又有流星大如雞彈色青白有光起  
大廟西南行至濁

大明宣宗宣惠天憲公道英明神聖欽 大昭武寬仁純孝章  
皇帝實錄卷六十二

天明宣宗章皇帝實錄卷之六十三

宣德五年二月壬申朔勅行在戶部俊故少保熹太子少傅戶部尚書夏原吉家勅曰朕惟輔弼大臣與國同體保全永久及其子孫乃攝明良始終之義贈特進光祿大夫太師謚忠靖夏原吉祇事先朝多歷年所據其忠懇夷險一心朕承大統以來嘉猷入告益效勤誠遽不遐增予永難其子孫宜持優恤凡諸徭役永與蠲免以稱朕懷癸酉陝西文縣黎平簇番僧新吉汪秀上丹堡等簇番僧多只尖尖等來朝貢馬免順天府房山良鄉二縣民三百八十戶蝗災田地一百一十九頃七十八畝宣德四年秋糧六百四十石八斗馬草一萬一千五百束江西按察司奏遼東金州衛指揮陶春取豐城等縣軍丁五人皆受其賄放免不辭請罪之上諭行在都察院臣曰為

將全賴軍士立功將之有志者常慮軍伍缺人今此輩受賕賣  
軍是不復思立功蓋無志憇人其治之如律 甲戌皇后千秋  
節文武群臣命婦行賀禮 乙亥賜湖廣散毛宣撫司土官于  
斌廣西上林長官司頭目黃昌田州府頭目蕭原貴州金築安  
撫司頭目田以得四川芒部軍民府土官弟普審戴沐川長官  
司舍人悅福得陝西洮州衛七占等簇刺麻歲卜領占弗提衛  
百戶刺里遼東撒乂河等衛女直指揮僉事喃都等鈔絲幣表  
裏及綃胖襖有差 丙子陝西洮州衛故土官百戶永魯劄子  
宗劄必爾即簇故土官百戶捌于子祿于等來朝貢馬 賜四  
川平夷長官司故長官王宣女來朝貢者鈔 丁丑遣少傅兵  
部尚書兼華蓋殿大學士揚士奇擇奠先師孔子 上御奉天  
門謂侍臣曰武備國家重事今軍政不脩資由將校之不職宜

詳察其實以示勸懲遂遣勅諭各都司按察司及巡按御史曰  
兵政國之重務任得其人則舉不得其人鮮克有濟今各處衛  
所指揮千百戶鎮撫有公廉幹濟能整飭軍馬者亦有老幼殘  
疾不能任事者勅至即用心察訪其實來聞若有貪婪不才虛  
害軍士亦察實具奏庶幾玉石不混兵政以修如徇私廢公詢  
察不實是非倒置國有常憲其有總兵鎮守官處則會同咨訪  
務盡至公、命太子太保陽武侯薛祿佩鎮朔大將軍印充總  
兵官恭順侯吳克忠充副總兵武進伯朱寯充左叅將奉化伯  
滕定充右叅將率師巡邊 陝西洮州衛火把等竊國師拔丹  
星吉岷州衛判麻札失監威貴州丹竹長官司土官長官羅海  
等來朝貢馬○昏刻有流星大如雞彈色赤尾跡有光出生宿  
東南行至濁○戊寅祭 太社 太稷○遣官祭先農○朝鮮



國王李相遣陪臣徐選貴州宣慰使安中遣弟喜承西蠻夷長  
官司長官揚暹四川烏蒙軍民府土官祿昭雲南楚雄府女土  
官設剗坤城回回馬兒丁等貢馬及方物賀 萬壽聖節 廣  
西太平府土官知府張高歸德州土官知州黃高四川石柱宣  
撫司同知陳紀遣舍人陳伯州等貢馬 賜迤北和寧使臣脫  
火歹等六十二人鈔絲帶表裏有差○命右春坊大學士王英  
翰林院侍讀錢習禮為行在禮部會試考官賜宴于本部 上  
聞行聖公孔彥縉每歲來朝皆僦居民間命行在工部賜居第  
於京城內以便朝參○夜有流星大如盃色赤有光起紫微東  
蕃內東北行至濁○己卯以明日 萬壽節聖遣駙馬都尉趙  
禪謁見告 長陵 獻陵○賜貴州湖耳長官司頭目姚子雲烏  
思藏僧南哥監藏靈藏都指揮桑爾結監藏寧夏僧耳力等鈔

絲帶表裏有差 宥武定侯郭珰罪特巡按直隸監察御史白  
圭劾奏珰令家人強奪滄州南皮縣民十七家田土拆毀民居  
置立莊屋天津右衛指揮呂昇阿附珰勢奪官軍屯田一千九  
十餘畝與珰軍民失業督督怨嗟珰等所為非法請治其罪  
上曰勲戚之家正當謹守禮法庶幾長享富貴乃敢縱恣貪暴  
如此此非朝廷少恩珰姑宥之令其改過呂昇及珰家人皆執  
而治之 巡按監察御史章聰奏德州左衛指揮千百戶鎮撫  
張鐵等三十五人收山東平度州秋糧二萬五千石堆積延兩  
月之上每五十石索布三十匹方與上倉又多收米入己民受  
其害至賣車牛以賂之通計所受不少請治其罪 上諭石都  
御史顧佐曰軍民相資當互相愛百姓勤苦耕作艱難餽運官  
軍坐食不知感而又加虐害武夫若此者多命御史悉治之如

律 行在光祿寺厨子訴其寺官竊減外夷供給通政司以聞

上命行在刑部侍郎施禮執而罪之且諭禮曰光祿之弊不止此自 祖宗以來飲食供給皆有定規今擅自增減應給之人平不得几得者率非應給之人惟虛立素牘以掩人目宜究治之因顧侍臣曰母謂飲食細故然亦干大體華元殺羊享士羊斟不與遂致喪師勾踐投醪於江與衆共飲人心感悅遂成伯業以此而論所繫豈輕 庚辰 萬壽聖節 上詣 奉先殿行禮 皇太后前上壽畢出御正朝受賀勅諭文武群臣曰朕初度之旦上念勗勞大德允切於心幸侍 聖母皇太后洪福萬壽年每當茲辰奉觴拜慶伸婉愉之誠致天倫之樂必在從容以愜所志爾文武群臣應宴者悉於光祿寺給宴物自今悉准此例 山東按察司奏平山衛千戶潘禮私役老軍以小過

擊傷致死請治其罪 上曰私役已應罪况私憤殺之命執罪之如律 癸未建行在禮部於北京大明門之東時五府六部皆未建以禮部所與者 天地 宗廟 社稷之重及四方萬國朝覲會同者皆有事於此故首建之其地位規制皆如南京加弘壯焉 作府軍前衛幼軍營於京城內之西南隅 福餘衛都指揮安出猛古乃歹都等奏云朵顏泰寧二衛所部近嘗作過邊境臣等恐其貽累故遠避去今蒙諭撫皆已復業然慮彼作過者終將累良善臣已道人詰責勸誘使改過自新如其不悛臣等請自擊之 上嘉之特賜勅獎諭之曰爾守法效忠朕志知之彼若能改過亦可寬宥如稔惡不悛聽爾發兵勦之 甲申寧化王濟煥奏舊以太原右護衛治為永和王府今永和王居汾州府第空閒及故安邑寧鄉郡主第亦空閒損壞乞

修葺以為庶子美堞美堦及諸女居第 上命行在工部令有司悉修葺與之 賜朝鮮國及迤北和寧王等虔貢使宴 浙江都指揮僉事吳凱等陞辭勅諭之曰朕以方面所繫甚重持簡任爾等務在守禮循法盡忠奉國受恤軍士毋縱私以背公毋剝下以肥己常須嚴飭武備堅固城池使一方寧謐百姓無虞庶幾副朕委任之心爾亦永保祿位欽哉 大同總兵官武安侯鄭亨奏天城衛北邊舊立雙山青松嶺尖山三峒墩并川北平虜墩近已革去宜於懷來衛西陽河口築一墩迤南天城衛長勝墩東北之中增築一墩爛柴溝亦築一墩相接懷來瞭望又鴉兒峒烟墩去迤西三尖山煙墩三十餘里每舉砲或風逆不相聞因而誤事請於其間增置一墩俱從之 乙酉韓王冲域奏本府一護衛軍當以什七下屯今家廟未創宮宇未修

請免屯田之半 上命行在戶部免屯田三年 興平王尚焯  
奏女長將嫁未有居第今西安中護衛指揮胡能舊居空閒請  
以給賜從之 行在工部尚書吳中言淮安至濟寧河水淺溢  
所運材木淹滯難行請以揚州鳳陽淮安等府在京繕工民夫  
一萬八千人往勸 上從其言命畢日遣歸 廣東按察司奏  
廉州衛指揮王泓每月全軍俸納鈔有不納者擊之死請治其  
罪 上從之語侍臣曰人命與錢孰輕重殺人者死雖積錢如  
山可贖乎 丙戌巡北和寧王阿魯台使臣阿都赤等陛辭  
上嘉阿魯台勤誠遣都指揮曹者赤帖木兒齋勅同往賜之金  
織文綺七十四匹皆有副并所奏求藥物悉與之仍賜其下有  
差因謂尚書胡濙等曰阿魯台歸心朝廷實由 皇祖威德所  
致今以高求藥亦悉與之朕以至仁待人人亦富識朕意濙對

曰 陛下心同天地薄海內外無思不服譬諸草木皆薰生成之恩矣○上退朝御左順門謂行在工部尚書吳中等曰比聞在京工匠之中有老幼殘疾并不諳匠藝及有一戶數丁皆赴工者宜從實取勘老幼殘疾及不諳者皆罷之丁多者量留餘悉遣歸凡久役者亦勘實以聞○丁亥 上聞中官督江西泰和縣採寒水石者虐民特甚命巫召還歲令民自採納○都督金事趙安等七人指揮同知丁敬等七十五人還自烏思臧賜鈔綠幣表裏金織綺絲素綺絲製衣等物有差○戊子初南京都察院右僉都御史李敏等放遣採木軍夫初遣敏往徽州督民採木以給京師敏施設無方不吾撫下徒勞無功 上聞故勅罷之令敏還任○廣西萬承州土官知州許永成等遣族人許永昌等貢馬○賜乞河衛指揮念事都倫帖不并福餘衛魏

趙指揮念事那木納等五人鈔練帶表裏等物蓋都倫帖木齋  
勅招諭那木納等來朝故並賜之○夜月犯角南星月在下○  
己丑違行在工部五侍郎許廡巡撫河南勅曰今命爾任河南  
巡撫凡軍民有利富與者即舉之有害富除者即革之民有濫  
竽巡徒者撫今復業免其稅糧一年應行諸事皆與河南三司  
計議行之具由來奏詣司官吏貪穢壞法虛害軍民者擒聞解  
京奉公守法愛養軍民者具名以聞務使軍民安業不致失所  
庶幾體朕之憂盡爾之懃爾其敢承毋怠并勗之詩曰河南百  
州縣七郡所分治前歲農事缺始旱澇復繼衣食既無貧民生  
苟由遂顧予任民上日夕懷憂愧爾有教孱賢其往勤撫字從  
者必綏輯饑者必賑濟茲詢必周庭毋憚躬勞勩處久徒瑣碎  
所志見實惠袍旃祭乃說庶用副予意○賜四川軍民府土官



知府沙白烏思箴刺麻着夫工歲等鈔錄幣表裏有差○庚寅  
命行在工部尚書吳中蕪行在吏部事以尚書郭璉有疾在告  
也○賜陝西文縣黎平獲番僧新吉汪秀上丹堡等獲番僧多  
只夫尖等鈔錄幣表裏有差○福建永春縣奉本縣十四里歲  
造弓二百四十張前三千枝德化縣十八里止造四十張安溪  
縣四十里乃九十張前者具奏得成五之二今本府令依舊額  
多寡不均民力難辦 上曰此有司不得人令按察司究治之  
○辛卯命改羽林前衛指揮使毛把都兒子榮行在府軍後衛  
指揮同知王昇子瑄全吾左衛指揮僉事全瑄子廣葉職府軍  
後衛指揮同知王興老疾命其子貴代○賜陝西洮州衛故土  
官百戶永魯到子宗劄必爾即發故土官百戶柳牙子祿牙等  
鈔錄幣表裏有差○修直隸河間府獻縣單橋以河間真定二

府保定左等衛軍民供役令行在工部遣官督之。○江西建昌知府吳欽文卒致文浙江平陽人由進士擢刑部主事以能稱陞九江府知府改建昌守職公勤一志愛民請託不行急革姦弊奏官田租重請折收布朝建從之閩郡稱快他政績益多卒之日民哀慕之如父母云。○夜月犯房。○壬辰罷採木之役上諭侍臣曰馬國之道農事最急今國家無人營繕當求作之時而工部採運木植木已豈不妨廢農業遂命書勅諭而書孝友直等凡已錄之木隨處堆積軍夫急罷遣歸農。○勅重求總兵官都督巫凱等曰野人女且朝覲往復道路皆出遼東爾等宜善加撫恤毋令失所亦須禁約下人勿有所授庶不阻其歸順之心。○廣西龍州土官知州趙仁政遣瑄目謝康四川石程宣撫司土官宣撫馬應仁子鎮等貢馬及方物。○賜陝西洮州

衛大祀等獲國師秩丹至吉岷州衛刺麻扎失監藏貴州丹竹  
長官司土官長官羅海等鈔跡錄幣表裏有差。行在工部  
尚書吳中奏昨山東為賊踰不區告有第先區逃回今全家起  
族亦衛先軍當區緣家口眾不能贖給乞令以第先軍供役而  
釋免其餘以待後繼緣此類尚多未敢分報。上曰逃區先軍  
用示警戒全家起廢則使之失業則從所言與之分贍事同者  
皆如之。癸巳初諭行在六部都察院曰朕恭膺 天命嗣承  
祖宗洪業夙夜孜孜保民圖治每食則思下人之饑衣則思下  
人之寒心存民瘼未嘗忘之今春氣已和特頒寬恤之令條示  
于後爾六卿大臣與國同體為德為民務盡乃心如政令有所  
未當朕慮有所未周者尚審思列奏都御史任耳目之寄亦宜  
博訪以聞庶用副朕恤民之意欽哉無怠一宣德四年各處有

經水旱蝗蝻去處速行巡按御史按察司委官從實體勘災傷  
田土明白具奏開豁稅糧坐視不理者罪之一宣德三年以前  
官員軍民有倒死官馬騾驢及軍民有虧欠孳生馬匹者悉免  
追陪一宣德三年以前軍民有欠柴炭草者盡行蠲免一各處  
百姓近因饑窘逃徙他處者速行各布政司按察司及府州縣  
招諭復業仍善加撫綏免其戶下稅糧及雜泛差役一年一除  
造軍器及軍需買辦外其餘為營造等事各處採買顏料生漆  
諸<sup>物</sup>工部速行各處有司已採買在官者差人運赴京庫未採買  
者盡行停止其差去督採買官員人等即令回京不許留滯擾  
民一朝廷所用之物各有土產之處今後凡遇收買只派於土  
產之處如收買數多量免其他差役以優恤之不許一槩於不  
產之地收買糾擾害民違者罪之一各處舊額官田起科不一

私擅既重農民弗勝自今年為始每田一畝舊額納糧自一斗至四斗者各減十分之二自四斗一升至一石以上者減十分之三永為定例一近年在京工作匠人多有逃者蓋回管工官及作頭等不能撫卹又私縱其壯者不令赴工俾辦納月錢入己併冒關其糧賞止令貧難者做工又逼索其財物受害不已是故在逃及差人勾取差去之人又逼取財物工匠受害弊非一端自今工匠一戶有二丁者令一丁赴工一丁放免四丁者二丁赴工二丁放免六丁以上俱準此例單丁者與別戶朋合聽其一年或二年相輪代替違者依夫班例論如遇大營造暫借撮工者計其用工日月准役班次用工之處常差監察御史給事中點閱考其工程仍前作弊者就執奏究治庶革宿弊下得均其勞逸上不虛費糧賞一工匠有年老殘疾戶內無丁

力者保勘明白即開其匠籍一近年逃匠往往有懷挾私離妻指平民為匠者所司不與分豁民多受害工部及法司即與分豁仍嚴行禁止再犯者罪之不忍一各處衛所有司倉厰官攢斗級交通糧戶私自包納虛出實收作弊百端今後令監察御史按察司官往來巡視但有作弊就使擒問一理刑之官惟公與明使有罪者不得以苟免無罪者不陷於冤抑庶幾稱職比聞法司不體朕卹刑之心任情用法往往過當嚴刑之下何獄不承若有罪而縱之恃凶人益肆無罪而枉之將善人何恃且曠汙士之極醜無斯行而加斯名即玷棄終身豈當不念自今其深以為戒必明必公必詳必謹庶副朕欽卹之意○瓦剌順寧王脫歡等遣脫火歹等來朝貢駝馬○朝鮮國王李禔遣其姪李察李孟昉陪臣尹湏彌等奉表貢方物謝免貢金玉器先

是朝鮮所獻方物有金銀龍盃<sup>盃</sup>之屬 上謂侍臣曰朝鮮進貢  
類數每有金銀器以小國措辦必艱宜止之遂勅祠曰金玉非  
爾國所產自今貢獻惟以土物效誠而已祠感悅至是遣宗等  
奉表謝○賜貴州宣慰使安中弟嘉來西蠻夷長官司長官楊  
暹四川石柱宣撫司舍人陳伯舟烏蒙軍民府土官祿昭廣西  
太平府土官知府張高歸德州土官知州黃高雲南楚雄府女  
土官設劄坤城回回馬兒丁等鈔絲帶表裏及緞有差○迤北  
和寧王阿魯台使臣從人字羅察兒奏願居京自效命為所鎮  
撫賜金織襲衣絲帶銀鈔綿布鞍馬仍命有司給房舍器皿等  
物如例○行在禮部奏會試天下舉人得中式者陳詔等一百  
八 甲午賜朝鮮國使臣徐選等十三人鈔絲帶表裏有差  
日生交暈隨生戟氣皆黃赤鮮明 乙未 上奉 皇太后率

皇后謁 長陵 獻陵 車駕發京師先是 上以清明節近  
召少師蹇義少傅楊士奇太子少傅楊榮太子少保金幼孜太  
常卿楊溥諭之曰 皇太后聖心篤念 祖宗朝夕弗真每諭  
朕曰 祖宗之鴻業惟勤負荷 祖宗之成憲惟敬遵承朕不  
敢怠忽昔漢明帝奉皇太后謁陵著於史冊今朕將奉 皇太  
后謁 長陵 獻陵庶少慰 聖心裡歟義等對曰 皇太后  
聖孝 陛下敬承之天理人心之正也 上以聞於 皇太后  
皇太后曰是吾心也明日 上命欽天監擇日初五軍嚴備  
有司供具命英國公張輔成國公朱勇安順伯薛貴忠勇王金  
忠泊侯伯都督各率兵從衛皇親駙馬皆從命義士奇榮幼孜  
溥及尚書郭敦胡濙吳中者侍即魏源副都御史陳勉扈從初  
豐城侯李賢都督張廌尚書張本都御史顧佐守京城時春深



兩澤久闕及命下密雲布雲彌厚而廣周徧遠通翌日乃霽越  
二日 上奉 皇太后率皇后告 奉先殿遂啓行天氣和暢  
道路潔滑風埃不作 上躬乘執騎導 皇太后輦至清河橋  
下騎扶輦既渡橋 上復乘騎時畿甸之民迎拜夾道瞻望感  
悅山呼之聲震動林野是日 駐蹕沙河 上侍 皇太后膳  
退召義士奇榮幼孜溥諭之曰 母后天性至孝今日朕隨侍  
於道中指天壽山言此下即 二陵所在 母后望之感愴今  
日天氣清和人心歡悅亦是 母后誠孝所感義等對曰 太  
后聖孝 陛下奉承之足以感格天人既而 上惻然曰朕昔  
侍 皇祖往來兩京每令朕過農家問其疾苦蓋欲知稼穡之  
艱難自嗣位以來凡昔 皇祖教詔之言未嘗敢忘今出都門  
望村落居民及其田作追思往事愴感之情自不能抑義等對

曰 陛下聖孝久而不忘 祖宗在天之靈應當永祐 丙申  
車駕至陵下營於陵南五里 上易淺浚服先詣謁 陵時英  
國公張輔及士奇榮幼致濟皆從 上謁 長陵次謁 獻陵  
畢徘徊陵下召士奇等指示陵旁山川諭之曰豈非天造地設  
以俟 大德卿等皆先朝舊臣其審觀之又曰 皇祖嘗言古  
帝王陵寢有崇倉廩及藏寶玉<sup>者</sup>無遠慮吾子孫宜戒之不可  
蹈也此語朕恒記憶不忘今所建寢殿皆 皇祖當時規畫不  
敢有增益 上因語及 祖考時事倭愴弗已顧左右亦有感  
愴者遂命宦官引從官謁 陵畢復召士奇等諭曰 皇考遣  
詔山陵務從儉約蓋平日仁民愛物之心不忘於彌留之際朕  
不敢違越士奇等對曰 陛下欽承 先訓此 聖孝之大者  
皆叩首而退 丁酉 駐蹕陵下昧爽 上侍 皇太后率皇

后謁 長陵 獻陵 車駕還營陵旁居民老稚迎拜於道

皇太后顧謂 上曰百姓愛戴君上以能安之古帝王保有天

下垂俗子孫令聞長世千載之下人猶仰慕亦惟能安民耳國  
家恒輕徭薄賦以存恤為務庶幾為民父母之道於是 上奉

皇太后過視道旁農家 皇太后召其老婦問所業及安否

其婦女老稚皆歡喜踴躍應對質朴如家人然 皇太后喜賜

鈔帛布飲食皆歡躍感戴民有進蔬食酒漿者 皇太后嘗之

舉以與 上曰此農家食也當知之 車駕還營命禮部凡陵

旁民家皆賜鈔八十錠是夕小雨中夜乃止土膏潤暢人皆以

為和氣之應 昏刻太白犯昴西南大星太白在下 戊戌

駐蹕陵下 己亥 駐蹕陵下 上奏 皇太后言臣輔及義

士奇榮幼致溥皆扈從在此請令見于行殿 皇太后可之輔

等行五拜三叩頭禮畢 皇太后曰皇帝數言卿數人贊輔多  
用心今家國清寧生民無事固是 祖宗垂祐亦有卿等之力  
輔等叩頭對曰 皇上聰明睿智敬 天法 祖仁愛兆民以  
致康濟之功皆此本於 皇太后聖德大訓臣等實無寸補  
皇太后曰吾何德所以致今日者上由 祖宗積善垂慶卿等  
皆 先朝舊人自今更須協力一心非但家國蒙福 祖宗神  
靈昭鑒在上亦必教祐卿等俾卿子孫安榮永世遂命 上賜  
六人酒饌及白金文綺輔等稽首退遂召彭城伯張臬都督張  
昇及諸皇親皆賜酒饌及白金文帶有差 皇太后諭之曰外  
戚所以與國家同享富貴於永久者以其能謹守禮法不敢踰  
越苟不知禮而恣肆分外朝廷必不以私親廢公道爾曹勉之

庚子 駐蹕陵下

大明宣宗憲天崇道英明神聖欽文昭武寬仁純孝章皇帝實  
錄卷之六十三

明宣宗章皇帝實錄卷之六十三終

明宣宗章皇帝實錄卷之六十四

宣德五年三月辛丑朔 駐蹕陵下是日雨 上感甘澤之及  
特思 先帝之不復作皇陵春雨之詩 脫百官奏事畢 士奇榮  
幼孜溥留侍 上出詩示之 詞旨悽惋 士奇等皆感動 上從  
容語曰 諺云一歲之計在春 去冬少雪 今春雨亦未洽 朕昨觀  
田隴間 尚未有耕種者 心為之憂 今雨連日 皆霖霖不歇 遠邇  
霑足 甚慰民望 士奇等對曰 惟 皇上憂民一念不已 天必  
昭應 〇壬寅 駐蹕陵下 開平守將奏邊務數事 上舉其可  
行者 付所司施行 因謂侍臣曰 方今海內小康 惟殘虜叛服不  
常 古人制夷狄 惟在守備 若城堡堅固 糧芻充足 士卒精練 哨  
瞭嚴謹 彼亦何能為患 朕屢以此戒飭 邊將但慮其因循玩愒  
今春氣漸深 政邊民耕作之時 一或農事妨廢 秋收無望 仰給

於轉輸則勞矣遂勅邊將嚴警備○直隸懷柔衛指揮同知許  
信奏長安嶺迤北直抵開平別無城堡數有虜寇而糧儲充積  
宜戒不虞請給軍器爲備從之○癸卯 駐蹕陵下 上於營

中閱馬命武士調習之顧謂侍臣曰軍國之政馬爲先務今孽  
虜固當懷之以恩亦不可不示以威古人云事事乃其有備肆  
朕於馬政尤所用心侍臣對曰今馬蓄息視 祖宗時加數倍

矣 上曰此皆 祖宗之澤但朕遵用成法不敢少怠耳○甲  
辰 駐蹕陵下中官飛致遂進所獲禽 上擇其美者命剖烹

躬調膳進 皇太后畢遂分賜文武大臣 上始食○乙巳

駐蹕陵下賜從官酒饌○丙午清明節 上奉 皇太后率皇

后祭 長陵 獻陵先二日雨是旦雲陰解散惠風融暢天日

晴朗人咸以爲 聖孝所感祭畢 上奉 皇太后率皇后還

營命文武從官皆謁 陵脫賜從官豆粥○丁未 駐蹕陵下  
上敕謁 陵昭荷神呪本於 皇太后誠孝所感製 大德頌  
以進○戊申 上奉 皇太后率皇后還京師道中 上遙見  
耕者以數騎往視之下馬從容詢其稼穡之事因取所執耒耜  
三推耕者物不知爲 上也既而中官語之乃驚躍羅拜呼萬  
歲 上顧侍臣曰朕三舉耒已不勝勞况常此事乎人恒言勞  
苦莫如農信矣命耕者隨至營人賜鈔六十錠已而道途所經  
農家悉賜鈔如之是日 駐蹕沙河 上侍 皇太后膳既徹  
皇太后語 上曰今日於道中親生物暢茂農家長少咸趨所  
業吾心樂之皇帝試作賞春之賦以道吾意 上立草以進  
皇太后覽之喜曰皇帝其知吾心也○己酉 車駕至京城文  
武百官軍民耆老及四裔朝貢之使皆出迎自都門至清河道



路相蜀望 車駕至皆拜稽呼萬歲 上奉 皇太后率皇后  
謁 奉先殿 上率皇后奉 皇太后還宮行禮畢 上御奉

天門朝羣臣○庚戌廣西鎮遠州土官知州趙得茂上下凍州  
土官趙慶隆雲南大理府河泊所土官楊定湖廣前安定軍民  
宣慰司故宣慰使判大送用孫向海隆四川八郎安撫司土官  
安撫阿性子阿兒結羊刀劫等族土官長官觀仲少等遣其徒  
刺麻樂覺先結等奉朝貢馬及方物○賜廣西萬承州土官族  
人許永昌等龍州頭目謝康及四川石柱宣撫司舍人馮鎮等  
鈔絲幣表裘及絹有差○給永寧衛備禦軍士衣甲弓箭○上  
罷朝御左順門召少師蹇義少傅楊士奇太子少傅楊榮等曰  
朕昨謁 陵還道昌平東郊見耕夫在田召而問之知人事之  
艱難吏治之得失因錄其語成篇今以示卿卿亦當體念不忘

也其文曰庚戌春暮渴 二陵歸道昌平之東郊見道傍耕者  
僂而耕不仰以視不輟以休召而問焉曰何若是之勤哉跽曰  
勤我職也曰亦有時而逸乎曰農之於田春則耕夏則耘秋而  
熟則獲三者皆用勤也有一弗勤農弗成功而寒饑及之柰何  
故怠曰冬其逸乎曰冬然後執力役於縣官亦我之職不敢  
怠也曰民有四焉若是終歲之勞也曷不務爾業為士為工為  
賈庶幾乎少逸哉曰我祖父皆業農以及於我我不能秀也且  
我之里無業士與工者故我不能知然有業賈者矣亦莫或不  
勤率常走負販不出二三百里遠或一月近十日而返其獲利  
厚者十二三薄者十一亦有盡喪其利者則闔室夫意戚戚而  
計其終歲家畜之日十不一二焉我事農苟無水旱之慮而能  
勤為歲入厚者可以給二歲溫飽薄者一歲可不憂且旦暮不

夫父母妻子之聚我是以不願芴業也朕聞其言喜賜之食既又問曰若平居所覩惟知賈之勤乎抑尚他有知乎曰我鄙人不能遠知嘗躬力役於縣竊觀縣之官長二人其一人寅出酉入盡心民事不少懈惟恐民之夫其所也而陞遷去久矣蓋至於今民思慕之弗忘也其一人率晝出生廳事日晏而入民休戚不一問竟坐是謫去後嘗一來民亦視之如塗人此我所目覩其他不能知也朕聞其言歎息思此小人其言質而有理也蓋周公所陳無逸之意也厚遣之而遂記其語○安順侯薛貴罕貴舊名脫火亦順天府昌平縣人燕山右護衛指揮僉事脫歡之弟爲人有膽氣 太宗皇帝舉義靖內難貴以舍人從征戰有功累陞都指揮使永樂八年從征沙漠遂陞中軍都督府都督僉事後屢危罵北征有功封安順伯食祿九百石洪熙元

年命其子孫世襲伯爵宣德元年加封安順侯至是卒追封濱國公謚忠壯遣官賜祭命有司治葬賻贈甚厚○辛亥成國公朱勇行在兵部尚書張本等奏京師操備官軍其間有屬陝西緣邊鞏昌等衛及階州文縣千戶所者去京師甚遠每歲更代必俱遣人促之方至請以陝西內地衛所官軍與之兌換又山東內地衛所官軍有調緣海備倭者緣海衛所却調京師操備通州諸衛官軍發淮安運糧而直隸安慶諸衛乃赴京師操備彼此不便請通行兌換 上悉從之曰諭勇等曰大凡人必須富其便利則人樂於趨事若不度量地里遠近人情難易既不便下人亦有誤公務卿等宜連行之○侍郎李琦等使交趾還劾利遣頭目陶公僕等貢金銀器皿及方物且奏云欽蒙聖諭土官軍民之家有歲歷朝廷官吏軍人及其家屬軍器者

悉送逐臣伏惟前者官軍征討除已死傷外止存軍官二百八十人民官及吏一百五十七人旗軍一萬五千一百七十八馬一千二百匹臣謹具名籍給饋餉備舟船與在官財貨軍器等物及几家口並已裝載回還秋毫不敢有犯其新來官軍器械或在山林遺棄或自己焚毀並無存者宣德三年三月初八日伏覲詔勅做索臣已戒飭國人及差人四散搜覓但有此等悉皆發還其有患病不能起程者臣亦令醫療治供給衣糧痊可之日護送出境任自回還今奉詔勅諭以前事臣再蓋人徧於山林僻遠去處悉心挨究國中各府州縣頭目耆老人等因稱實無見存臣竊自思惟臣之罪過重若丘山而聖恩每垂寬宥其交趾給由土吏及省親土員皇上猶軫念懷鄉戀土之情悉皆放逐臣等雖糜身粉骨不能報萬一何敢復留朝廷官

更不奉詔命是臣不獨得欺上欺天之罪實臣不能愛其國  
人欲自作孽以速後禍一國之人必相聚怨於臣臣雖至愚亦  
不至若是之甚伏惟天日之明俯賜照察并齋其頭目耆老人  
等奏章云宣德四年十月十三日伏覲勅書再諭以陳氏子孫  
果若咨訪實無朝廷當與處置及謂得人以綏一國足愜予志  
臣一國之人莫不歡忻舞抃仰見聖天子軫念遐方之大恩  
也臣等切自思惟一國民社之重不可無人統攝所以再三哀  
籲而不能已緣臣等昔者累奉勅諭令咨訪陳氏子孫奏求用  
頌繼絕之命皇上之於陳氏憐祖父之忠勤憫子孫之失業  
猶愛恤無已如此况臣等為陳氏臣庶世受陳氏厚祿豈有不  
體朝廷盛意而悉心咨訪於是與國人徧行尋覓內而國中  
外而邊遠家至戶到並無兒存臣等思惟本國大項目黎利為人

謹厚撫綏有方甚得民心可堪管攝前已陳奏伏望 皇上開  
念庶氓俯從所請使黎利得布宣 聖德以安遠人播揚 皇  
威以固封守水為藩臣常奉職貢是 聖天子惠顧遠方之大  
福亦臣等一國生靈之大幸也 上覽畢顧侍臣曰蠻夷謫詐  
未可遽信更當索之命行在禮部賜公僕等文綺衣○夜有流  
旦大如雞彈色亦有光起天門西南行至雲中○壬子復家琥  
駙馬都尉琥永樂中以駙馬都尉襲封西寧侯洪熙中禮部尚  
書呂震等嘗劾琥不恭之罪 仁宗皇帝削其官爵俾閒居省  
咎 上即位為親親之恩降勅宥其過至是始復駙馬都尉并  
歲祿一千石○遼東毛憐衛故都督莽哥不花子官係奴等來  
朝貢馬○癸丑昏刻有流星大如碗色赤光燭地起西方雲中  
西行至濁○甲寅遼東建州等衛都指揮僉事李滿任雲南之

雲南縣安南坡巡檢司故土官巡檢李英弟李珍等來朝貢馬  
○愛河等衛女直指揮僉事可因帖等四人來朝奏願居京自  
效賜金織裝衣綵幣鈔布有差仍命有司給房屋器皿等物如  
例○南京寶鈔提舉司奏請濬故洗桑穰河道及修工作房舍  
上以農務方興不可役民不聽○乙卯 上御奉天門秉試舉  
人陳詔等一百人制曰朕奉 天命嗣 祖宗大位期與天下  
咸躋雍熙惟帝王之政必有其要舜紹堯治申命稷契夏商周  
迭興授田建學稽古可見矣我 太祖高皇帝肇造鴻業 太  
宗文皇帝中興邦家 仁宗昭皇帝恭己守成孜孜愛人 三  
聖一心重農事崇學校其法精備朕恪謹繼述于茲有年然猶  
田里未肯給足風俗未底刑措謂愛民若保赤子也未嘗不致  
其誠德化本於躬行也未嘗不慎諸子為政存乎用人已孜孜



之吏師表之職未嘗不擇何其效之未臻激抑別有其道歟朕  
勵精圖理諸生體用之學講明有素其有可以行者舉要以對  
務歸中正將親覽焉 上臨軒發策畢退御武英殿謂翰林儒  
臣曰朕於取士不尚虛文欲得忠誠之士為用其間有若劉蕡  
蘇轍輩能直言抗論庶幾所望朕當顯庸之於是賦策士歌以  
示諸讀卷官云○宣府總兵官都督譚廣等奏以神銳分布緣  
邊城堡備用勅廣等曰神銳國家所重各處止可量給以壯軍  
威至於殺賊又有弓弩刀槩不止於此然制敵安邊要在方畧  
何如苟約束不嚴將士不律兵器雖多亦奚以為爾等勉思良  
策以稱委任○丙辰免山西 平 陽府一十九州縣去歲旱雹所  
傷官民田三萬九千九百八十四頃五十四畝其應納稅糧三  
十二萬二百五十九石○憲臧贊善王喃葛監臧巴臧卜道僧

人捨利截卜烏思藏牙兒加寨官結年遺頭目管卜兒加等貢馬及方物○總兵官陽武侯薛祿等奏二月二十日兵至鳳凰嶺遇虜寇擊之殺寇百餘人被傷遁者無幾獻所俘男婦四十六人及駝馬牛羊千餘上嘉祿功進祿太保語尚書張本曰古語賞不踰時其即勅實功次高下行賞○平江伯陳瑄遣其子儀齋密奏言湖廣東南大藩襟帶湖江控引蠻越實交廣黔蜀之會人民蕃庶商賈往來舟車四集楚府自洪武初立國有三護衛官軍及儀衛司旗校俱無調遣四五十年之間生齒繁育糧餉充積造船以千計買馬以萬數兵強國富他藩莫及而衛所之官多結為姻親枝連蔓引小人乘時或有異圖竇難制馭伏乞皇上勿為疑慮斷自聖衷於今無事之時託以京師糧儲不充命重臣與湖廣三司選其護衛精銳官軍給糧與

船令運至北京因而留使採備則剪其羽翼絕其邪謀王可以  
永係國土而朝廷恩義兩全矣 上不納顧謂侍臣曰從來楚  
國無過 祖考待之皆厚朕尤加意禮之瑄何其過慮也調兵  
運糧一時權宜運單則違歸徇留採備上夫宗親之心下夫軍  
士之心鄙哉瑄也○丁巳 上親閱舉人所對策賜林震等一  
百人進士及第出身有差○賜朝鮮國貢使李霖等宴○順天  
府尹李庸奏初發三河諸縣民丁助修容雲中衛城緣工役繁  
重未能即完今東作已興乞發遣歸農秋成之後復令供役從  
之○戊午 上御武英殿偶與侍臣論漢以下創業諸君侍臣  
有言漢高帝之大度有言唐太宗之英武有言宋太祖之仁厚  
不相下者 上曰唐太宗宋太祖皆假借權力襲取天下唐太  
宗慈德尤多漢高帝及我朝 太祖皇帝起布衣光明正大可

此而同然高帝除秦苛政而禮文制度不修我太祖皇帝剪除羣雄革前元敝俗申明中國先王之教要為過之侍臣皆叩首以為至論○賜進士林震冠服銀帶餘各鈔五錠賜宴於行在中軍都督府○賜瓦剌使臣脫火歹等二十二人綵幣表裏有差○改新調陝西中護衛官軍為神武前衛居定州左護衛為神武右衛居真定而以神武前右二衛合為義勇左衛○行在工部尚書吳中奏南京及浙江等處工匠起至北京及於隨駕各監上工者俱未有定藉請令附藉於大興宛平二縣庶有稽考從之○廣恩伯劉才卒才字子才鳳陽府霍丘縣人元末為元帥太祖皇帝龍興率眾歸附授百戶洪武中陞府軍左衛千戶進大寧後衛指揮僉事衛改營州中護衛仍為指揮僉事從 太宗皇帝靖內難以功封奉天翊衛宣力武臣特進崇

祿大夫柱國廣恩伯食祿九百石追封三代永樂二十一年偕  
隆平侯張信理永平山海關二十二年從征沙漠至懷柔病還  
才為人個偏無華不<sub>レ</sub>苟合亦不<sub>レ</sub>苟詆訾甚為 仁宗皇帝所重  
至是卒遣官賜祭命有司治葬○已未進士林震等上表謝恩  
○行在都察院奏北京國子監生許薛等三人公差往應天府  
受民白金於律當徒 上曰為士當謹義利之辨諸生尚未受  
官便汲汲求利若使得位豈能卓然有立今太學諸生不少宜  
如律治之以示警○辛酉寧化王濟煥奏乞太原等縣古城郝  
莊大陵城北享堂四處空地以資牧養 上從之勅鎮守大同  
內官郭敬等毋擅侵擾以副優待宗親之意○賜朝鮮國使臣  
李宗李孟昉尹須彌等三十五人鈔絲幣表裏及金織文綺襲  
衣有差仍賜宗等冠帶○行在禮部奏靈威贊善王喃葛監歲

已臧卜奏欲建佛寺乞朝廷給賜雜用顏科 上曰彼造佛寺乃欲勞中國民不與○大理寺卿胡傑奏本姓熊因父幼孤隨母改適胡氏遂冒胡姓乞復姓熊從之○壬戌貴州樂平長官司副長官宋真廣西南丹州土官和州莫真遣族人莫銘陝西岷州衛苟家平等族番僧族頭各各貳恭各貳等貢馬○賜瓦剌等處貢使宴○行在三法司奏蘇州衛副千戶張開源禽獲強盜例應陞賞緣開源充任百戶已因禽盜得陞雖今有勞難再陞 上曰為強盜者皆輕生禽之亦犯危險况國家大信不可失宜如例陞遂陞開源正千戶○癸亥行在兵部上陽武侯薛祿恭順侯吳克忠武進伯朱冕奉化伯滕定及諸將士殺虜寇功狀命行在禮部賞祿克忠鈔人四百錠絲幣六表裏冕定各三百錠絲幣二表裏都督柴永正等六人各鈔二百錠絲

幣一表裏部指揮馬昇等并軍士一萬一千二百六十二人共  
鈔四十一萬八千二百三十錠絹五百八十五匹綿布一萬二  
千七百四十八匹○國子監吏郭弘奏臣本監生永樂十二年  
以歷事勤謹吏部引選因疾步趨不前發充吏屢訴年老有司  
不准今臣年六十有八乞免役遂鄉 上謂行在吏部臣曰近  
時凡吏之老疾者悉放免何獨此人不免假令有過謫之爲吏  
已十餘年可使之老死刀筆手即放遣歸○甲子寧化王濟煥  
奏本府舊除教授一員後起送吏部今有子五人皆堪入學請  
除教授俾專訓誨 上謂行在吏部臣曰人未有不學而能成  
才德者苟失時不學縱有美質亦徒然矣宗室子弟其伴讀教  
授有闕宜速選授不可稽誤○廣西上思州土官知州黃智永  
安樂州土官知州李華崇善等縣頭目劉遠遣吏目黃吉等貢

馬○行在中書舍人胡澗奏九年秩滿當陞用有老母在鄉乞改除近鄉教職以便養行在吏部言中書舍人考滿當陞欲改教官無例上曰彼欲就卑以便養其志可嘉宜從之○乙丑貴州宣慰使安中遣舍人安北四川播州宣慰使楊欽遣長官李欽廣西鎮安府土官知府岑永壽遣頭目岑昔等來朝貢馬及金銀器皿方物○丙寅陞行在貴州道監察御史李立為廣東按察司副使行在戶科給事中宋傲為山東按察司僉事山東道監察御史張敬為雲南按察司僉事行在行人司副鄭雍言為河南按察司僉事皆以任滿考最故陞留雍言於內府俊小內使書擢進士胡敬丁寧監生李柰蕭清李雯蘇恒楊仕敏張清于奎為行在監察御史敬恒浙江道寧廣西道柰湖廣道清江西道雯貴州道仕敬山東道張清四川道奎陝西道復段



準河間府通判陞從五品祿蓋以任滿當遷其民奏乞留之故也熙行在監察御史張昇為蕪湖縣知縣李光學為高郵州興化縣知縣鄧敬為永福縣知縣以都御史言昇光學怠於職務敬不勝任故也降行在監察御史龔遂為四川布政司副理問山西按察司僉事劉敬為建平縣知縣遂受賄更赦敬不勝任皆以風憲故降用之○賜廣西鎮遠州土官知州趙得茂上下凍州土官趙慶隆四川八郎等安撫司土官舍人阿兒結牟力幼等族剌麻樂覺先結雲南大理府河泊所土官楊定湖廣前安定軍民宣慰司宣慰使剌大运用孫向海隆等鈔綵幣表裏有差○行在吏部奏會試副榜舉人胡志等六百八十九人當授者學正教諭訓導其中尹昌等七十人告願入國監讀書者有例陳文昇年十九已食原膳告還鄉依親讀書舊未有例

上曰願入監者如例年少願依親者亦從之彼有志於學又得在父母之側且與平昔師友相琢磨學亦可進○行在兵部奏各衛故總小旗幼男今應給糧優養俟出幼補役 上從之因謂尚書張本等曰 祖宗立法微勞必報如此類皆是仁厚之意雖萬世行之可也本等頓首曰 陛下聖德恪遵成憲臣等敢不欽承○宣府總兵官都督譚廣等奏永寧衛永寧縣皆在平川又有隆慶衛軍相雜屯住舊無城垣可依縣北有地若築城緩急可保計工當用一萬人今止有五百人請發順天府及關內諸衛軍民協助 上謂行在工部尚書吳中等曰邊城富彙但時當耕種未可妨之○廣西總兵官都督僉事山雲上任劉柳州府蠻寇斬首之數 上謂尚書張本曰蠻性好亂自取死可憎亦可憫其令雲善綏撫制馭使不得爲寇亦所以保全

之也○巡按湖廣監察御史陳搏奏湖廣浙江各處河路每遇運物官船經過俱用軍夫挽送每船率二三十人船多則用一二千人而督運者率意多取又加猝暴因緣索財人被其害請勅所司自今給與文書必須斟酌緩急應用夫若干明白注寫其餘進納金銀之船悉以額置船夫自送為便又言諸處關津以軍人守把本以防姦近年以來守關軍並緣為姦甚者乘風濶不測邀阻行舟逼取財物為害百端乞勅所司移文三司及直隸府衛同巡按監察御史按視凡近城關津及巡檢司非衛要之處者悉革去從之○太白晝見○丁卯 上聞趙王高燧有疾遣中官齋書幣藥物呈馳往問○陞行在錦衣衛指揮僉事任啓為本衛指揮同知仍掌鎮撫司事○賜建州等衛指揮僉事李滿住毛憐衛故都督莽哥不花子官保奴等綵幣表裏

絹布金織紵絲襲衣有差○行在吏部奏主簿周顯因差往浙江至海寧縣之硤石獲強盜二十餘人例當陞賞然前無民官獲盜之例上曰給榜定賞格正欲捕盜榜以令衆令以示信豈問軍民官耶其陞賞如例○山西趙城縣知縣張東有罪誅東差役不公民有欲訴之上司者東執而杖殺之民妾又欲訴執而杖之烙其肢體亦死行在刑部論於律當斬上曰縣令民父母當愛民如子今以私意殺一家二人是民賊也無故傷人畜產食人瓜果尚有罪况殺人乎斬之如律○行在工部奏炒鐵囚徒一百十八人自陳俊滿初有令滿日就配所為民今願再役三年還原措從之○應城伯孫傑有罪下獄初傑受命往鳳陽諸郡印識馬所過貪蒸肝胎縣官畏傑酷刑斂牧馬之家白金七十兩賂之江都縣官亦斂白金二百餘兩賂之巡按

御史李叔廉得其實以聞 上命行在都察院俟傑歸治之至是歸右都御史顧佐奏請鞫之 上曰傑為大臣受祿不少當謹身率下為國家恤小民乃貪雲如此計所至害人未必止此命公侯伯五府六部大臣鞠之皆實遂下獄仍追其贓○行在工科給事中陳祥坐竊書掌科給事中薛廣姓名用印發文書事覺誦煮鹽○戊辰陞大理寺卿熊檠為南京都察院右都御史四川布政司右叅政葉春為行在刑部右侍郎○賜雲南之雲南縣安南坡巡檢司故土官巡檢弟李珍等鈔絲幣表裏有差○增置嘉興府秀水嘉善桐鄉平湖四縣先是巡撫蘇松等處大理卿胡榮言嘉興府所屬嘉興等三縣為里一千九百三十有九民二十九萬六千三百戶稅糧八十五萬餘石課程軍需等項視他府加數倍政繁事冗宜增設縣治建官分理 上

命行在吏部員外郎奈亨往同浙江布政司按察司相度其地  
詢訪其民計議以聞至是亨遂奏嘉興縣宜分置二縣一於附  
郭一於魏塘鎮崇德宜分置一縣於鳳鳴鄉海鹽宜分置一縣  
於富湖鎮 上從之命嘉興附郭置秀水縣魏塘鎮置嘉善縣  
鳳鳴鄉置桐鄉縣富湖鎮置平湖縣吏部除官禮部給印○行  
在戶部主事張衍言近賜慶都公主地舊該月納鈔三千六百  
貫 上命除之○赤城備禦都指揮僉事汪貴奏獨石諸驛軍  
士二百餘人舊皆驛養馬遞送比虜寇掠去馬驢遂移置諸軍  
於長安嶺今二百餘人及各處取至清出新軍并補伍軍多以  
無糧逃竄乞不爲常例如開平守城軍士暫給月糧與備禦軍  
士相無守備從之○己巳命大學士楊士奇楊榮金幼孜曰新  
進士多年少其間豈無有志於古人者朕欲循 皇祖時例選

擇俊秀十數人就翰林教育之俾進學勵行工於文章以備他日之用卿等可察其人及選其文詞之優者以聞於是士奇等選陸琦遂端葉錫陳璣林補王振許南傑江淵八人以聞上命行在吏部俱改爲庶吉士送翰林進學給酒饌房舍月賜燈油鈔悉如永樂之例復命兵部各與皂隸上又顧士奇等曰後生進學必得前輩老成開導之鄉等日侍左右無餘閒其令學士王直爲之師嘗提督教訓所作文字亦爲開發改竄卿等或一兩月或三月一考閱之使有進益如一二年怠惰無成則黜之又命禮部尚書胡濙曰進士新入翰林各賜文綺衣一襲鈔三百貫○四川威州刺麻伽瓦藏卜等來朝貢馬○平江伯陳瑄言餽運四事一南京及直隸衛所運糧官軍遞年選下西洋及征進交趾分調北京通計二萬餘人又水軍右等衛官軍

今年選下西洋者亦多俱無軍撥補今江南民糧止運於淮徐臨清三處却令官軍運赴北京比之上年須增僱運以足歲用然軍少加運亦艱乞以南京并湖廣江西浙江及直隸衛所附近府縣清出逐年迷失旗軍見在寄留操備者選其精壯補數一山東都司舊調兗州護衛旗軍一千三百人運糧宣德元年曹府奏留修理王府本司以登萊寧海膠州四衛所旗軍撥補緣俱近海路遠來遲况其軍士不諳水運往往候事今濟寧等衛旗軍亦有撥緣海備禦者請令所有司計議以登萊等衛所官軍遣還備禦仍以兗州護衛所留官軍或濟寧等衛貼守補倭官軍運糧一湖廣都司瞿塘衛州九溪水州水足茶陵長寧夷陵直隸寧山潼關汝寧等衛所官軍每歲以路遠來遲有誤運糧請以湖廣武昌及河南宣武等衛所清出寄操旗軍代之



其湖廣瞿塘等衛運糧官軍止令專於本處採木每年一送至  
淮安造船庶省民力一浙江綠海昌國等衛運糧官軍已經奏  
內地衛所官軍易換然嘉興松江等處俱係偏僻之地守禦官  
軍別無操備亦無他役請以撥補各衛欠數領船運糧 上悉  
從之○庚午擢第一甲進士林震為行在翰林院修撰林文為

編修

大明宣宗皇帝實錄卷六十四

大明宣宗章皇帝實錄卷之六十一

昭

宣德五年夏四月辛未朔享太廟○遣中官祭司竈之神○  
命成國公朱勇提督在京諸衛幼軍舍人操練○壬申上御  
左順門諭行在工部尚書吳中等曰方今正當播種緣河燒甌  
運石軍民皆罷遣歸農毋以末務妨之○命故大寧都指揮僉  
事傅昇子宗舟襲為旗手衛指揮使羽林前衛指揮使丁和子  
王指揮同知刁賁子信張祥子旺燕山右衛指揮僉事將福弟  
祿大興左衛指揮僉事將雄孫英俱襲職羽林右衛指揮僉事  
劉順老疾命其子勇代○命遼東都指揮僉事徐忠致仕將忠  
以老疾乞就閒故從之○以其子徽為金吾右衛指揮僉事○  
賜靈藏等處僧捨剎藏卜烏思藏牙兒加寨頭目管卜兒加等  
鈔絲幣衣裘及金織紵絲襲衣僧衣有差○癸酉廣西向武州

故上官和州黃謙昌子宗蔭雲南太和縣土人揚榮等貢馬○  
狂表孝子康祥劉原真趙紳及節婦陳氏烈女朱氏等十五人  
祥大名府南樂縣民母患風疾祥齋禱於神母疾愈繼患瘡癬  
祥又倚願以身代忍徧體皆癬母瘡遂痊母年七十卒負土成  
墳廬墓三年原真山西翼城縣人事父母至孝旦夕不離側父  
平為知縣致仕還家年八十終原真既葬父露宿墳域中三年  
有異草生其傍紳浙江諸暨縣人父讓禮為高郵州學正考滿  
赴京至武城縣墮水紳奮躍入水救父竟抱父同死事聞俱旌  
其門曰孝義陳氏蘇州府吳縣民王友諒妻年二十有四喪夫  
家貧父母欲改嫁之不從自誓守節彭氏淮安府安東縣民蘇  
希瞻妻沈氏神策衛小旗張善保妻張氏延安府膚施縣民陸  
立望妻劉氏錦衣衛卒史鑑妻孫氏湖廣龍陽縣民史源濟妻

時氏河南祥符縣民魏安仁妻劉氏祥符縣民燕從義妻曾氏  
江西吉水縣民周伯循妻石氏武功左衛卒張定定妻范氏真  
定府棗強縣民蔡福厚妻孫氏南宮縣人監察御史孟著妻單  
氏羽林右衛小旗張碩兒妻吳氏雲南前衛卒嚴士良妻俱年  
少畏夫貧居守節孝事舅姑撫育孤子有成事聞俱旌其門曰  
貞節未善真錦衣衛校尉朱狂女許嫁校尉丁貴貴以疾卒善  
真號慟不已父母止之曰汝年少可別適何苦乃爾女曰身既  
許丁氏卽其婦也寧死不改圖遂自經事聞旌其門曰貞烈○  
行在三法司奏杭州前衛百戶李真守關津使老軍邀阻行人  
需索財物月納有定數不足擊之死湖州千戶所百戶李智馮  
萬陰使強盜行劫而以所劫財歸已又以私怨殺無罪四人於  
津皆當斬命斬於市○昏刻月犯五車○甲戌坤城等處使臣

者馬力丁等貢駝馬○監察御史李奇給事中賈諒等劾奏陽武侯薛祿朋比不敬初應城伯孫傑以印馬受賂事覺上命公侯伯文武大臣詰責之祿黨傑有狠愎語成國公未勇於公朝以聞上不問祿不出班謝過於是奇等交章劾祿上曰武臣不知禮姑宥之○江西按察副使劉洵奏萬載縣民多因艱窘逃徙其戶內稅糧鹽鈔有司每令民已納歷久艱難乞止於見在戶內徵納逃者免徵從之仍命行在戶部令有司招撫其民之逃者○乙亥行在錦衣衛軍顧狂妻趙氏一產三男命給賜如例○遼東等處居住女直副千戶開原保等來朝貢馬及方物○山西左叅議王儒與沁州知州楊瑀判官游萃挾妓飲酒又受瑀等銀絹巡按御史庶察以聞上諭右都御史顧佐曰人無私欲乃能立事功一受私印志屈氣餒豈能立事參

議方面之臣所爲如此豈能施善政邪令御史治之如律○行在三法司奏重罪應斬絞者十七人 上取奏牘親閱之曰殺人者必死其中有誣告人致死者比之操刃故殺宜有不同皆杖一百發戍遼東於是免死者十人○丙子賜貴州樂平長官司副長官宋真廣西南丹州土官族人莫銘陝西岷州衛苟家平等族番僧族頭各各亂番僧恭各威等廣西上思州土官知州黃智永安樂州土官和州李華崇善縣吏目黃吉等鈔練幣表裏有差○陽武侯薛祿奏永寧衛團山及鷓鴣赤城雲州獨石四站最爲緊要應築城堡當用夫匠五萬人人齊兩月糧防護官軍用萬人醫者二十人 上命所司悉如數給之○行在戶部奏山西平陽府吉州臨汾等一十州縣春夏亢旱秋早霜民田地五萬二千九百三頃九十七畝皆無收請免其應徵秋

糧三十四萬一千八百八十九石有奇又奏近客商有告中納  
淮浙鹽糧者其所納粟米多難以較若欲全收細米誠為艱難  
宜令每石加米二斗以乘商賈俱從之○丁丑 皇太后聖節  
上率親王上壽宗室諸王各遣人奉表賀文武群臣命婦行賀  
禮○戊寅命陽武侯薛祿豐城侯李賢等率師築赤城等處城  
堡勅大同總兵官武安侯鄭亨發軍一萬人大同府發民夫五  
千人宣府總兵官都督譚廣發兵一萬一千二百人保安隆慶  
蔚州共發民夫八百人赴役仍令以精騎一千五百防護皆聽  
祿節制并賜之詩有出車命南仲城齊維山甫之句祿稽首受  
賜退問少傅楊士奇南仲山甫何如士奇具以告且曰 上以  
古之賢人待爾也祿拊心曰祿本武夫安敢望前賢然 上所  
命亦不敢不勉庶幾萬一有以報 上恩○命南京署刑部侍

邵成均往蘇松等處專理農務○湖廣長沙府奏江西永新縣梅花洞賊蕭啓寧蕭彥真等合茶陵等縣賊廖武紹等流劫殺人劫湖廣江西二都司量調官軍以都指揮率領剿捕毋遺民患○釋御史李驥初驥巡視通州倉遇軍斗高祥等盜糧執而鞫之祥父妾吉祥同張貴等盜糧受貴等白金縱之不問而獨問祥行在刑部當驥絞罪驥上章訴寃上曰御史既擒盜豈有受賊之理若其受賊即此事皆泯滅不發安肯尚存事端命尚書侍郎都御史等官同訊之至是覆奏驥實寃但應奏不奏當杖上曰既實寃并免杖令復職因諭刑部侍郎施禮等曰人命至重爾等論刑何為不詳慎驥不自言幾於枉死後將何以使人儆等頓首謝○己卯建川衛都指揮李滿住等奏欲於朝鮮市易而朝鮮不納上遣勅諭之曰朝鮮國王素守禮



法其事朝廷小心敬慎不與外交於理為宜爾等既受朝廷爵命亦當禁絕外交毋縱下人侵越隣境若欲市易聽於遼東境上不爾禁也○賜瓦剌坤城等處貢使脫火歹等宴○行在戶部奏定各處中納鹽糧則例京倉雲南安寧等井鹽每引米五斗宣府衛倉淮浙鹽每引三斗五升山東福建鹽每引二斗河間長蘆鹽每引四斗四川廣東鹽每引二斗山海衛倉淮浙鹽每引三斗五升山東福建鹽每引二斗河間長蘆鹽每引四斗甘肅衛倉淮浙鹽每引米豆麥四斗寧夏衛倉靈州鹽課司小鹽池鹽若陝西山西所屬客商每引米麥四斗五升寧夏衛并所屬客商米六斗又奏定獨石關中鹽糧例淮浙鹽每引米二斗五升山東福建河東廣東四川鹽俱一斗五升雲南安寧等井鹽三斗初陽武侯薛祿言立赤城等處城堡宜廣儲積於獨

石開中鹽糧遂命戶部議至是議奏俱從之○昏刻月犯軒轅  
○庚辰哈密忠順王卜吞夫里遣使臣指揮僉事速來蠻廣西  
思明等府土官知府黃炯遣族人黃明等來朝貢馬○調行在  
交趾道監察御史陳毅於行在福建道浙江按察司副使許銘  
於湖廣按察司以親喪服闋也○南京國子監司業陳敬宗奏  
先聖廟及兩廡廚庫大學六堂及諸生齋舍皆年深損壞夫今  
不修恐工費愈大 上諭行在工部尚書吳中等曰廟學以尊  
禮先師教育賢才非細務其行南京工部即與修葺○山東布  
政司秦濟南府高唐等州縣去年旱田禾無收民多飢窘 上  
命行在戶部遣官馳往發本處倉糧賑之○日生左右珥色黃  
亦隨生白虹貫兩珥○辛巳有建言請設諫官者 上曰 祖  
宗建官有定制但朕有過夫令中外大小之臣皆得諫而納之

不為迂豈不所得者多歟因謂侍臣曰三代以下人君唐太宗善納諫當時之臣若魏徵王珪亦善諫故有貞觀之治宋太祖嘗曰唐太宗受人諫疏常自引咎不以為耻不若己不為非使人無可諫二者孰是侍臣對曰宋太祖所言為優上曰宋太祖固是務本之論然人所行豈能皆是若禹聞善言則拜湯從諫弗弗改過不吝禹湯猶取善於人況其下者乎朕以為若人者當以太宗為法○行在禮部尚書胡濙奏監生周琮等九百人給假省親是鄉遠限有半年一年之上者令慈鄉土請建治之 上曰人情固是慈土然亦有父母在不想遽離者但移文趣之○廣西潯州大藤峽強賊合龍頭山賊行劫鄉村掠人財守備都指揮陳全坐視不率兵剿捕巡按監察御史張善請正其罪 上命總兵官都督山雲治之○四川龍州土官和州薛

忠義等奏本州密通番戎舊無城池近者番人作耗率衆征剿有功乞改龍州爲宣慰使司置城堡築集土兵鎮其地 上命行在兵部同吏部議尚書張本等言龍州自洪武初大軍平蜀開治運官所管土民有警則征調無事則耕種行之已久夷民服從今忠義以鎮番爲名欲改設衙門增其品秩且既築城置軍將亦難制 上曰卿等言是只循舊規勿有改作○壬午賜貴州宣慰司舍人安北等四川播州宣慰司長官李欽等廣西鎮安府頭目岑昔等鈔綵幣表裘及絹有差○烏思藏闡教王頭目朵令遣米鑽扎夫思乞願居京自效命爲所鎮撫賜冠帶金織罷衣綵幣鈔布仍命有司給房室器皿等物如例○行在工部尚書吳中奏河南民夫赴京用工者多逃逸請建送法司罪之 上曰朕聞管工官吏需索害非止一端故致其逃逸

若違送法司人何以堪但行文有司促其來爾亦宜戒飭管工者勿蹈前過有犯必不宥○癸未重修玉牒成少傅楊士奇太子少傅楊榮以進上覽之曰古人重世譜蓋欲正倫理篤恩義我國家宗族之盛皆由祖宗積德所致又曰今於朕雖有親疎然亦所自實本於一人朕何敢忽士奇等對曰周自后稷以來世積忠厚是以子孫衆多維持王業所歷年世最遠國家世德隆厚故本支繁衍陛下又遠宗帝堯明俊德以親九族將采盛福當過周家上頷之曰然○陞署行在刑部右侍郎按察副使魏源為河南左布政使起復左布政使李昌祺仍任河南特河南旱災民多流亡命侍郎許廓往撫輯之廓至河南奏缺布政二員乞選任廉能幹濟識大體者其府縣亦多缺官上以源署刑部廉正有為特陞布政使俾馳驛之任行在吏部

因奏河南左布政使李昌祺在河南久廉潔寬厚民悅其政前以丁父憂歸計將服闋亦請起復上從之命昌祺馳驛赴任又命府縣所缺官卽選擇除授必得廉厚之人乃稱任使○賜廣西向武州土官舍人黃宗蔭雲南太和縣土人楊榮等鈔有差○行在史部奏陝西按察使孫頌有疾不能任事宜罷歸從之○修居庸關道路○甲申陞太子少傅工部尚書兼謹身殿大學士楊榮爲少傅尚書大學士兼職如故○夜有流星大如盂色青白有光出東南雲中東南行至濁○乙酉遣安南頭目陶公僕等齋勅還諭黎利曰朕惟太祖高皇帝混一天下安南陳氏首先四裔摠誠歸化載在冊府又以陳氏施澤於其國久人心未忘肆前命求陳氏之後以主國事蓋欲徇民之心冀安一方今安南頭目耆老共言陳氏之後已絕無從訪求如前

所奏又言爾利謹厚撫綏有方甚得民心可堪管攝朕用嘉悅  
蓋從民所志朕之素心其廣集安南頭目耆老更詢陳氏如果  
無後連名奏求朕與處置兵器以衛民也安南之民皆朕赤子  
今留在彼與在此同一真不問惟朝廷官吏軍人及其家屬之  
未歸者皆有父母妻子之望恩愛隔絕其心如何大便已之私  
而獨人父母孤人之子寡人之妻仁者不為 天地鬼神鑒臨  
在上非仁不佑厥應惟彰其志遣歸庶幾受福之道賜公僕等  
鈔有差○少傅工部尚書兼謹身殿大學士楊榮奏今蒙 聖  
恩陞臣少傅仍兼尚書學士二職三俸無支願辭學士俸其少  
傅俸如前於原籍開支在京止闕尚書俸從之○丙戌行在鄱  
察院奏應城伯孫傑以受贓繫獄今病請醫治療 上曰武人  
嗜利積習則然豈獨傑哉姑遣歸治疾○戊子柳城等處頭目

阿黑犯失貴州貴竹長官司副長官劉榮等遺頭目宋禮等米  
朝貢馬及方物○賜坤城等處使臣者馬力丁等二十四人哈  
容忠順王所差奏事指揮捨黑馬黑麻等二人絲幣紵線表裏  
絹有差○行在禮部奏都察院右副都御史陳勣父卒例應賜  
祭從之○己丑起復浙江左布政使黃澤山西左布政使馬璘  
湖廣按察副使俞上悅至命復舊任○命前四川石柱宣撫司  
宣撫馬應仁子鎮爲宣撫初應仁有罪應死貸死謫戍至是  
上念其祖克用嘗效力於先朝命求其子孫之良者用之至  
是其土人皆言鎮德性淳實衆所服從故有是命○賜遼東等  
處居住女直副千戶關原保等鈔及紵線絹布襲衣有差○行  
在吏部奏工部右侍郎蔡信任滿九年於例當陞上曰信在  
祖宗時以營造有勞持授是官今復任足矣○辛卯置義勇左



衛經歷司經歷一員倉副使一員○壬辰裁減貴州銅仁府大  
萬山長官司大崖土黃坑水銀硃砂場甸副使一員○癸巳廣  
西都康州土官知州馮斌及龍英州護印頭目趙義登利州護  
印頭目趙啓忠州護印頭目黃雄思陵州護印土官子常昌等  
來朝貢馬○甲午邕州奏蝗蝻生 上謂右都御史顧佐曰今  
禾苗方生宿麥漸茂而蝗蝻爲災若不早捕民食無望卽選賢  
能御史往督有司發民併力撲捕初發撲之則芴若稍緩之卽  
爲害不細○丙申令故秦寧侯陳鍾子灝封秦寧侯○哈密忠  
順王卜答夫里忠義王脫歡帖木兒奏求婚姻禮幣毛剌順寧  
王脫歡亦奏求弓刀等物命悉與之○丁酉陽武侯薛祿奏開  
平歲運糧四萬石人力不齊請令行在兵部五府議其用力多  
寡立爲定例 上命尚書張本與五府議本等議自京師至獨

石立十一堡每堡屯軍士千人各具運車計日并可畢一連三日則運糧二千石六十日可運四萬石其包席就所發倉給之布囊則官給之別用軍五百人專於京倉發運之際應雖役如運車猝難辦集量給官驢運去其糧運至獨石新城內置倉收貯令閒平備禦官軍分番於獨石搬運副總兵都督馮興專領軍防護上從之仍命武進伯朱冕總督○行在戶部奏甘州寓居回回沙八思等中納鹽糧該支兩浙鹽一萬一百二十五引今浙鹽少請以山東鹽如數給之馮兒丁等應支兩淮鹽五萬二千三百引今淮鹽亦少請以河間長蘆鹽如數給之從之○工部尚書兼詹事府詹事黃福建言三事一言足食之要惟國朝稽古為治民輸稅糧軍衛屯種邊境有商賈中納鹽糧鄉社有倉賑濟民飢所以國有儲積軍士飽食邊無空廩鄉無飢

民永樂間雖營建北京南征交趾北伐沙漠而供給未嘗乏絕近年以來無大營造征伐之費當有數年之積而倉糧每歲僅足設有水旱之災征調之用將何以給之臣竊為此慮為今之計莫若以操備及營繕官軍之近京師水路者摘十萬人於濟寧以北衛輝真定以東緣河屯種離京不遠可以調用其歲收子粒則從輕取之初年自食次年人收五石三年收十石歲可得一百萬石又京倉省支口糧六十萬石原衛省支月糧一百二十萬石歲得糧通二百八十萬餘石矣其淮浙長蘆官鹽嚴禁私販每歲會計除遙地足用外餘者呂商於京倉納米務足一百萬石更將兩廣福建稅糧各隨所產折收細絹布足運至濟寧官庫收貯每歲差官支出就濟寧以北豐熟之地增價收糴置倉收貯其營繕民大口糧各於原籍關鈔令其買食而操

練赴京官軍口糧若不通舟楫者仍在京支給路通舟楫者於  
綠河糧多官倉支給就所坐船順帶食用姑以十萬人為數京  
倉歲可省支六十餘萬石以所省并所收計之縱有虛耗每歲  
所積不下四百萬石加以直隸民納稅糧并官軍饋運之糧通  
計之不但歲用充足而倉原有儲積天二言足兵之道兵者國  
之大事不可一日不講必制之有道養之有法統之得人則兵  
可足今天下衛所之兵多有亡故有丁者追捕無丁者久缺為  
今之計凡腹裏衛所缺者莫若於附近郡縣十丁以上田不及  
五十畝徵實民戶選補其邊衛有缺以各處犯死罪者以近就  
近發補則士伍不空矣然又不可不養其銳必令所司先止軍  
之雜役使專操屯存戶下之老幼使治生產則有以養其生而  
又嚴禁私役括剋之害則猜銳之氣自不挫矣又令天下都司

凡衛所官及在間旗軍有廉能智勇者禮送至京五府會官試驗堪大用者則授之以職任之以事則所統者無庸勞之人屯守攻戰無不克矣三言省役之法古之為治者必資民力其用民力必不奪農時所以民得遂其生雖役之而不知勞也後世使民非復古道竭其力而傷其生由是怨咨興焉姑以今日言之河南山東并直隸軍民既緣河五窩燒輒又運江南所採材木自春及秋無有已時力既疲憊食且弗給總率者不體朝廷寬大之意又加之剝削殘暴人何辜焉為今之計宜令懸息輒之已境者材木之在途者運至餘皆停止姑使軍民寧家俟有大營建則優召至而力役可省矣上覽而嘉之命行在戶部兵部曰黃尚書所言三事有益於國家軍民其即計議行之勿視為虛文因降勅召福曰卿先朝老成盡心國事朕心所嘉

可叩馳驛還京特福請吉歸萊州焚黃也○戊戌行在都察院  
言監察御史姚無善巡按江西受人請託縱放有罪 上命謫  
山東煮鹽○己亥五隸保定府滿城等縣奏蝗主 上命行在  
戶部遣人往捕必蓋絕乃已○行在兵部劾奏會寧伯李英奏  
求西寧衛指揮李潛等五十一人隨從緣五十一人者皆隨駕  
官軍且舊例京師公侯伯皆無官軍隨從此屬違法宜下法司  
治之 上曰此見其無狀之心履霜之訓以防微也勿與亦不  
必罪

大明宣宗憲天崇道英明神聖皇帝 昭武寬仁純孝章皇帝實  
錄卷之六十五

大明宣宗皇帝實錄卷之六十五終

明宣宗章皇帝實錄卷之六十六

宣德五年五月庚子朔代府長史戴禮奏代王年老父病府中諸事初憑廣寧潞城諸王叢造今廣寧奉母外居潞城而下亦以婚禮出外雖王有二幼子在側皆未諸事此諸啓陳皆不見答臣等慮迎接勅勅及進表箋必至稽悞今世孫仕壻年已十八未嘗一見伏望勅諭代王俾世孫代理國事奉上撫下庶為無失 上是其言致書代王曰叔祖春秋高起處為勞府中諸事下人無所稟承令世孫仕壻已長可令代為發落望善教之使習趨正道又勅仕壻進學善事祖父及諸叔國事悉與長史計議啓祖王而行又勅長史戴禮等善輔世孫俾篤于忠孝云

○辛丑 命故山西都司都指揮同知蔣盛子興都指揮僉事劉興子敬俱襲金吾右衛指揮使○賜哈密忠順王卜答失里



所遣使臣指揮僉事速來蠻等三十五人綵幣表裏及絹有差  
命速來蠻賈勅及綵幣歸賜卜答失里○行在後軍都督府奏  
寧山衛指揮使李昭毀城樓以造私居私役旗軍歲割漆二千  
斤辦料豆八百石科各所銅錢六千三百斤占耕官軍屯田百  
餘頃收糧虛賣實收一萬餘石缺各屯子粒二萬餘石減尅軍  
糧五百石皆入已軍吏二人款奏之遣人追回皆杖款之請治  
其罪 上諭都御史顏佐曰為治之道賞善罰惡而已其惡如  
此不可不治即擒治如律○行在禮部言廣東都司遣鎮撫杜  
鑑送納降香二千斤虧一百八十斤請罪之仍責賠償 上曰  
朕常聞遠方輸京之物慮以不足取罪必增十四五以來此必  
京庫稱重之弊不罰償○壬寅行在都察院請差御史巡按福  
廷廣東 上命章梲陳洵因諭之曰御史出巡先須考察官吏

官吏守法然後百姓受福凡為惡有跡者易于懲治其有貪暴虐民而強辯飾詐及外視善柔心實險惡者家要明白究竟若徇私廢公媿媿姑息容惡長奸使百姓受害則尔罪均累等頓首受命○四川石柱宣撫司遣把事劉顯昌土魯番城番僧佛先等來朝貢馬○增置口北緣邊諸堡先是北邊自懷安西陽河至永寧四海治山口四十四處皆可通人馬每處守備官軍或百人或三五十人保安衛指揮李璟請益兵立堡以固守備

上命總兵官都督譚廣等審度廣秦其間三十九處宜益兵

立堡每處益兵五十人從之○夜有流星大如雞子色赤尾跡

彈

有光起軒轅西北行至濁○癸卯勅行在吏部曰朝廷誥勅本

用褒勉臣下盡心職事典奪皆誦適當凡應授誥勅官員未授

之先曾犯贓罪已經赦宥者悉免追奪若授誥勅之後犯贓罪

雖經赦宥皆進奪著為定例○賜朝鮮國王李禔刀劍銀幣等物 上嘉禔屢貢方物篤于誠敬故厚答之○賜廣西思明府土官族人黃明貴州貴竹長官司頭目宋禮及柳城等處頭目阿黑把失等鈔錄幣表裏反編有差○總兵官平江伯陳瑄言淮安西湖河岫乃牽挽舟舡往來通路比因風浪衝激岸多崩塌椿木不存淮安府滿浦五壩間廢已久其官吏壩夫俱無差役乞令守視西湖隄岫遇有損壞就令修治溢之○甲

甲字土局及  
空砂

節賜文武群臣扇及宴○乙巳行在兵部奏昨工部尚書黃福言天下都司宜令都指揮于所屬官員或在伍及替闌旗軍內每歲慎選智勇廉能一人禮送來京都府會官從公試驗果堪大用則用之宜如所言悉令選舉 上曰此言誠是天下未嘗無才但慮訪求未至耳然亦不可濫舉以寒責其令盡心訪舉

勿有遺才蔽匿不舉者罰若濫舉亦不恕○調山海衛左中二所并原調常山中護衛官軍之在永平諸衛者于遼東廣寧前後屯衛寄住仍命俟春暖築城屯種送總兵官都督巫凱奏也○丙午復行在錦衣衛指揮僉事蕭喜韓秀實職喜等初以匠藝得官有罪罰役至是宥之○賜廣西都康州土官知州馮斌思陵龍英養利忠州等州護印土官子章昌頭目趙義趙啓黃雄等鈔綵幣有差○監察御史金灑言淮安等處糧儲每歲收支動以百萬戶部掌遺官監臨令皆取回倉官橫斗管束不周因時作弊仍乞遣官監督為使又言郡縣官洪武間有政績顯著者朝廷遣使勞賚近年貪濁者多廉潔者少乞令按察司巡按御史詢察其實果有廉能者具奏亦加勞賚則賢否有別人皆知勸上嘉其言命行在戶部禮部行之○丁未命尾

刺順寧王脫歡所遣使臣脫火歹為都指揮僉事餘授官有差

上嘉脫歡之誠故授脫火歹等以官 命羽林前衛指揮使孫

觀等賫勅偕往賜脫歡犀甲綵帶等物及賜其屬渥克阿刺等

綵幣有差○陽武侯薛祿奏今口外開中藍糧請置開平衛廣

積倉副使一員從之○戊申 命都督僉事陳敬充總兵官率

領官軍于薊州永平山海等處備禦○命土魯番城僧佛先嗣

其故父法先之職為都細嘉其特來朝貢也○庚戌鄭王瞻埈

奏鳳翔城外四十里舊有安王竹園而韓王遣人守之願與府

中為牧地 上曰二王皆親朕無所厚薄當以遠近為斷韓王

在平涼去鳳翔遠且平涼多曠土宜畜牧竹園既鳳翔地當與

鄭王乃遣書諭韓王俾與鄭王○命故必力工瓦闌教王領真

已兒監歲之子緙兒加監已領占襲爵○孫甘衛行都司都指

揮使撒力加監歲奏年老乞致仕以其子星吉兒監歲代從之  
○壬子南京光祿寺奏供給安王宮眷合用尊牲請遣人買于  
直隸府縣 上謂行在禮部臣曰聞差使人出外先自索供給  
所費甚于官買但令移文有司支償買送不許遣人○彭城衛  
指揮甘雨勾軍河南以逃軍為由呼鎮平王胙城王及馬儀賓  
家火者索要玉繫腰絛環帽珠及金銀羅段行在刑部論兩罪  
當絞 上曰禮蹴路馬鬣有誅何況宗室朝廷至親今宗室家  
尚受其害况細民乎小人肆無忌憚當死但更審覆勿令有冤  
○巡按直隸監察御史余思寬劾奏永平都指揮僉事蕭欽縱  
放所部軍士不嚴守備致寇入境殺掠又不出兵追捕賊去之  
後始以三十餘人追至鏘山兵寡不敵退還後雖同內使馬真  
等追賊至雞林山下擒獲人馬亦難贖前罪 上曰聞雞林頗

從可贖前過姑宥之仍停俸三月○工匠有告內使韋宗盜官銅造鍍金器物與外人其制過于御用器者 上命付法司治之如律因諭侍臣曰洪武永樂間內府所貯錢糧內官內使纖毫不敢動雜東宮親王不得取用款用者必奏請今內官敢爾豈得不罪又曰近狀日用一木水架工匠飾以綵色又間貼金朕惡其華侈遂命易之而小人乃敢僭擬遂 命司禮監榜諭各監局有盜官物及僭分者事發處死知而不首罪亦如之○癸丑四川松潘祈命簇禪師出兒輪等表朝貢馬○公侯大臣徐景昌等奏會問應城伯孫傑徃直隸齊縣烙馬需要盱眙縣丞劉安等白金事皆實於律應流如例罰役贖罪復爵 上送之顧謂侍臣曰君子務德小人畏刑彼以前人功勳榮受爵祿當修德畏刑以圖保守今不修德亦不畏刑乃以貪贓獲罪將何

而目視人罰從薄示儆戒身如能改過庶幾長久○四川總兵  
官左都督陳懷多干預民事布政司按察司官稍有違悞輒加  
凌辱各道監察御史劾奏之上以懷出于行伍姑宥不問但  
以御史章示之且勅責之曰尔先朝舊人特命鎮守一方正  
當奉法循禮無驕無慢伴一方悅服乃為稱職夫布政司重方  
岳之任按察司受耳目之寄尔皆當以禮待若其所行違法止  
可卷聞生得擅自凌辱今各道監察御史劾奏尔罪果有之即  
尔違理行既違理何以服衆朕姑置不問尔宜自首毋蹈前過  
特封御史奏章付尔觀之自今尔專理軍機要務凡軍民訴訟  
悉歸所司且成憲有定不可不遵下人縱恣不可不治教之慎  
之用副朕委任之重○夜月掩房○乙卯封小興王志堞生母  
馬氏為懿簡王夫人以永興王奏乞名號故也○荆王瞻烟奏



府地窄隘請徙建昌府南城縣司獄司解舍于他所附城有閒田乞與本府為牧地從之○以兩朝實錄成陞纂修等官左春坊大學士兼翰林院侍讀學士曾榮為詹事府少詹事仍兼翰林院侍讀學士右春坊大學士兼翰林院侍講學士王英右春坊右庶子兼翰林院侍讀學士王直為少詹事英仍兼侍講學士直仍兼侍讀學士左春坊左諭德兼翰林院侍讀周述為左庶子仍兼侍讀侍讀李時勉錢習禮俱為侍讀學士侍講蔣驥陳循俱為侍講學士侍講蘭從善為司經局洗馬修撰劉永清邢寬胡種為侍講蔣禮為左春坊左中允編修周叙孫曰恭楊敬為修撰檢討王雄楊肅許彬周貴為編修五經博士陳繼為檢討典籍張理為行人司行人孔目沈寅為司經局正字行在四川道監察御史陳叔剛為翰林院修撰儒士鄒循為待詔生

員朱詮為侍書行在禮部郎中蔣暉行在吏部郎中程南雲陞  
從四品祿兼翰林院侍書行在吏部員外郎夏衡宣嗣宗為李  
部郎中參議潘文奎令致仕行在禮部主事張習王觀行在吏  
部主事蘇鑑戶部主事陳中俱為本部員外郎行在大理寺左  
寺副洪益中為左寺正右寺副丘宗楊鉉邵暹為寺正中書舍  
人蕭湘張益凌壽胡宜衡為左評事解禎期周崇厚王璜寇厚  
為右評事知縣萬節為左寺副教授丘錫為建昌府學教授陞  
正九品祿教諭梁蕪等為瞿州府學教授辦事吏翁選等十人俱  
為縣丞翰林院侍講余學夔當陞自陳老疾乞致仕從之。瓦  
刺乞兒吉思之地萬戶別別兒的差副千戶巴巴力等奏事至  
京賜綵幣表裏。賜四川石柱宣撫司把事劉顯昌及土魯番  
城番僧佛先等鈔綵幣表裏有差。行在兵部奏山海一衛軍

逃者二千六百七十二人管軍官不勾補例應降職者十五人  
應罰俸者一百六十五人悉具名聞 上曰邊衛備禦全仗軍  
將雖智勇絕出一人能禦幾賊今一衛軍亡者過半賊猝至何  
以禦之如例罪之不可貸也○丙辰以任滿考稱陞行在翰林  
院修撰曾鶴齡為本院侍讀檢討連智胡讓待詔周迪行在中  
書舍人朱祚俱為行在翰林院修撰典籍牛麟李錫為檢討行  
在中書舍人事行在四川道監察御史饒禮為浙江布政司左  
參政行在刑部山東清吏司員外郎何回為山西布政司右參  
議吏部驗封清吏司員外郎蕭榮為河布政司左參議擢進士  
龔錡為行翰林院編修錡與林震皆第一甲進士授官之日有  
疾至是疾愈如命之進士嚴恭陳悌魏淡邵宏吝孫泓監生韓  
偉張玉為行在監察御史恭交趾道宏吝廣西道偉四川道王

浙江道悌江西道浚河南道給事中蔣輔監察御史林賁沈敬  
左瑋孫欽布政司右參議李永年按察司副使謝孚親喪服闋  
命復職輔行在戶科賁行在福建道敬行在陝西道瑋行在廣  
西道欽南京廣西道永年廣東布政司孚陝西按察司復吳韞  
真定府獲鹿縣知縣陞正六品祿范永巢縣主簿陞正從八品  
祿皆以任滿其民奏乞留之故復之而加其祿黜行在廣東道  
監察御史蘇霖為浙江蕭山縣知縣山西道監察御史吳進為  
湖廣衡陽縣知縣陝西道監察御史侯紳為四川綿竹縣知縣  
山西道監察御史張琛為山西布政司都事霖以犯贓會赦進  
等以不任職故也○以南京浙江道監察御史陶圭為常州府  
武進縣學教諭圭以犯

賊會敵當黜自陳願為教職故有是命。行在都察院左僉都御史李濬言洪武中直隸及河南山西等處俱設預備倉儲隨時豐儉歛散得宜雖遇水旱民無饑餒近各處有司不能奉承德意致使倉儲俱廢倘年穀不豐貧民失所乞令所司如法修倉仍給官錢依時直收糶備用為便。送之。○丁巳雲南右甸生蒲頭目莽寒遣叔阿顏類來朝貢馬先是順寧府生蒲阿答卜等出沒為盜夷民不安雲南三司請發兵捕之。上謂兵部臣曰彼竊盜耳遽加兵是激其為亂且令黔國公沐晟遣人招撫不暇則用兵勦捕最。遂遣十戶陳愷阿干通事段保等往諭之。愷聞知阿答卜等所潛處徑往諭以。皇上不忍加兵之意莽寒等感悅以所屬五千戶向化願入朝貢阿答卜亦散遣其黨不復為盜氏得安居至是莽寒遣阿顏隨陳愷及阿干孫阿都魯

來朝貢馬○復應城伯孫傑爵初傑坐贓應流援例罰役以贖  
至是工部奏傑役滿遂命沒爵○行在太常寺少卿徐善淵以姦罪  
罷為民初刑部論應徒會有勅寬恤罪囚官犯徒流者俱罰役  
復職吏部奏擬善淵別用 上曰淫污之人他職亦不可用遂  
罷為民○戊午雲南貼吉里頭目都樂納蘭底兀刺頭目吞禿  
魯麓川平緬土官宣慰使思任發遣頭目刀門道等來朝貢象  
馬及金銀器皿方物○遼東安樂州千戶咬納來朝奏願居京  
自劾賜綵幣布帛仍 命有司給房屋器皿等物如例○行在  
兵部言近差內外官出外于經過站驛挾勢索取飲食等物非  
法考掠請令風憲官體訪犯者具奏罪之 上曰朕亦聞之其  
揭榜各驛禁約但有犯者令具名奏來不奏者同罪○辛酉勅  
總兵官陽武侯薛祿等曰既立城堡當用官軍戍守不可不豫

計如其處城堡湏用官軍幾何于何衛所定撰皆熟計以聞要當以近就近有益於國有利于軍必湏兩便乃為經久之計城堡軍工就行視煙墩有弊壞者皆修治如法○癸亥陞行在禮部郎中況鍾等九人為知府先是上聞除郡守悉由資格多不稱任甚至有貪蹟暴利者至是行在吏部奏郡守闕凡員上命行在六部都察院堂上官舉京官之廉能者用之于是吏部尚書塞義等舉鍾及戶部郎中羅以禮兵部郎中趙豫工部郎中莫愚戶部員外郎邵吳刑部員外郎馬儀陳本深監察御史陳鼎何文淵上擢鍾知蘇州以禮知西安豫知松江愚知常州吳知武昌儀知杭州本深知吉安鼎知建昌文淵知温州俾馳驛之任賜之初曰國家之改重在安民安民之方先擇守令朕臨御以來孜孜夙夜以保民為心而比歲四里之民鮮得

其所究其所自蓋守令匪人或恣肆貪剝削無厭或闖茸庸  
懦坐視民患相為蒙蔽不以聞致下情不上通上澤不下施  
今慎簡尔等付以郡寄夫方千里之民安危皆係于尔宜體朕  
心以保養為務必使其衣食有資禮義有教而察其休戚均其  
勞逸興利除弊一順民情毋徒玩愒母事苟簡毋為權勢所徇  
毋為奸吏所欺凡公差之人有違法害民者即具實奏聞所屬  
官員人等作奸害民即提解赴京尔亦宜奉法循理始終不測  
庶副朕之委任欽哉○賜四川松潘祈命籙禪師出鬼輪等鈔  
幣有差○初巡按河南監察御史嚴烜言開封懷慶等府秋糧  
運至京者八十餘萬石河南紅少皆于他處預備其費倍于納  
糧乞令于臨清倉輸納又彰德衛輝懷慶三府西北衝要之路  
驛使頻繁馬力不足其偃師縣首陽驛以東至永城縣太丘驛



一十七站新開道路俱設驛馬今無使客往來乞撥于彰德等  
府接應 上命行在戶部兵部議至是戶部兵部議奏河南惟  
陽南懷慶汝寧北等處糧宜于臨清倉納開封衛輝彰德稍  
近宜於德州倉納新開驛路馬匹撥彰德實便從之○甲子日  
生抱氣色青赤鮮明○乙丑陞黎花舊市柵為臨安衛中右千  
戶所先是黔國公沐晟以臨安地隣交趾時有寇盜奏起民兵一  
千選百夫長十八分領于黎花舊市五柵處之使與臨安官軍  
相兼守備至是十餘年其百夫長俱請冠帶及降印選立千夫  
長統之晟具以聞從之○置雲南廣益州及東山口巡檢司時  
中官雲仙還自雲南言金齒廣邑寨本永昌副千戶阿干所居  
干嘗奉朝命招生蒲五千戶向化今干令孫阿都魯同蒲首莽  
寒跋阿類詣京貢方物且乞于廣益置州使阿都魯伐己掌州

事以熟蒲并所括生蒲屬之又言阿迷州東山其地衝要夷條  
販鬻多經于此爾因蠻寇為患暫遣營長普覺往來巡捕非經  
久之計諸夷皆請置巡檢于東山口并請以普覺為巡檢事下  
行在兵部議兵部請覆勘其實上曰地在邊遠既是夷人慕  
化不必覆勘其悉從之遂命都魯為廣益州知州莽寒為同知  
首覺為東山口巡檢行在禮部鑄印給之○丁卯命永康侯  
徐安行在工部侍郎羅汝敷自張家灣抵直沽緣河提督運木  
勅令設法伴軍民商賈舟楫通行不相妨碍如何所衝決就督  
軍夫修築○賜廣西思明府土官族人黃儒貴州貴竹長官頭  
尤可加及柳城等處頭目阿黑把失等鈔綵幣表裏及絹有差  
○夜間流星大如雞子色青白尾踪有光起紫微垣內西北行  
至近濁○戊辰命故陝西行都司都指揮同知蔡成子之

福讓為羽林前衛指揮使府軍衛指揮使陶源子真指揮僉事  
馬金子勝燕山前衛指揮同知李信子智金吾左衛指揮同知  
任叡子理指揮僉事姜邁春姪參楊威子貴大興左衛指揮僉  
事許敬子誠燕山右衛指揮僉事盧清子榮通州衛指揮僉事  
李彬子威俱襲職金吾後衛指揮僉事黃得老疾 命以子銳  
代○豹坊勇士奏與民分居 上曰勇士在京師皆十餘年安  
得今尚無居此必民居寬好欲舍而就彼民艱難作一居尔欲  
徒得之耶民何罪尔何功錦衣衛指揮王節奏此人今有居在  
城中 上怒 命杖之一百以五百斤枷號令徹眾召六科給  
事中諭曰此曹敢輕易犯法者恃中官為之救解自今但中官  
傳朕言釋有罪人並須覆奏始行○四川大昌縣知縣徐子善  
奏洪武四年開設縣治初有民四百戶後因充軍死徙止餘一

百戶并入大寧縣永樂初仍復大昌縣重造籍冊不滿一百戶  
遂析丁多之家補之此年止有五十五戶內多單丁而生員吏  
典驛夫之役無人可充口多荒蕪稅糧失額乞如陝西漢中府  
沔縣事例發徙流人連家屬補奏為民以供徭稅上命行在  
刑部戶部議右侍郎施禮等奏請如所言以四川湖廣二布政  
司按察司見閩徒流人補從之○昏利有流星大如雞子色青  
白有光起軒轅西南行至游氣

大明宣宗憲天崇道英明神聖欽文昭武寬仁純孝章皇帝實  
錄卷之六十六

明宣宗章皇帝實錄卷之六十六

明宣宗章皇帝實錄卷之六十七

宣德五年六月庚午朔

上諭行在禮部臣曰聞西南諸蕃進貢海舟初到有司封藏人  
入奏俟有命然後開封起運使人留彼動經數月供給皆出于  
民所費多矣其令廣東福建浙江三司今後蕃船至有司遣人  
馳奏不必待報三司即同市舶司稱盤明注文籍遣官同使人  
運送至京庶省民間供饋○勅巡撫河南侍郎許廓及河南三  
司凡河南所屬郡縣宣德三年以前逃民所負租悉蠲免之其  
逃逸軍夫人匠皆免罪○辛未 上諭行在六部都察院臣曰  
朝廷差內外官出外公幹所至多有奸狡小人投托隨送因撥  
置害人而分受財物以十分計之差去者得一二彼得八九都  
察院即出示禁約仍令巡按御史按察司官體訪再有犯者就

擒解赴京處以重罪蓋因有司屢奏其弊故也○命雲南楚雄府已故土官知府高政女襲本府同知政初為同知永樂中來降時新仁宗皇帝監國嘉其勤誠特陞知府仍命子孫世襲同知政卒無子其妻承襲又卒其女奏乞襲知府上曰望考有成命令襲同知○行在戶部奏欵惟皇上係民圖治務在寬恤果頒詔勅蠲免天下逃民荒田稅糧及減輕官田租額令徵納之數減于往年宜撙節費用請除貴州雲南外其直隸沂州縣及湖廣等都司布政司按察司長史司堂上官俸米各月支三石首領官二石各衛所官太僕寺苑馬寺監運司提舉司府州縣及儒學官月支各二石衛所軍士有家屬者月支六斗無者支四斗五升老疾及紀錄切軍月支三斗生員月支五斗如此庶幾少有儲積上曰軍士艱難不可減官俸比開

家口多者皆不給其令六部都察院通政司翰林院議可否以  
聞于是尚書張本等議官俸已屬減支今難再減 上曰仕者  
俸薄何以養廉不減誠是○行在都察院奏宣府前衛指揮僉  
事王林守龍門關不嚴守備私令軍士出境捕鹿為寇所傷寇  
因入屯堡殺掠人畜鞠訊明白律當斬 上曰朕常戒邊將雖  
無寇時亦常如寇在目前日夜嚴備此人不遵朕言受改下人受  
害其道人械送宣府集將校斬以徇○ 上罷朝御武英殿與  
侍臣語及禮記月令 上曰古人為治之道大槩可見于此侍  
臣對曰是雜舉三代及秦事如勸農講武祭祀刑賞皆因之大  
務貴能順乎天時 上曰為治之道敬天勤民為本堯曆象日  
月星辰舜齊七政周協五律皆為民事計國家之政不以時修  
舉則漸至廢弛又如稱兵動衆不以其時則人受其敝月令大



意上觀天象下驗庶物以修改事耳又曰明堂之制不可考大抵為政貴有實惠及民○壬申廣西逸祥縣土官李成遣族人李安福餘等衛都指揮僉事安出遣指揮僉事咬納等來朝貢馬○夜有流星大如雞子彈色青白尾跡有光出七公西北行至紫微西蕃○癸酉琉球國中山王尚巴志遣使者阿蒲察都等來朝貢馬及方物○南京通政使掌國子監事陳璉親終服闋來朝 命復南京通政使罷掌國子監○初築獨石雲州赤城鵬鶚城堡完 上命兵部尚書張本往獨石興陽武侯薛祿議守備之方初祿曰一切邊事卿與本共熟籌之必有益於國有便于人可以經久至是本還上所議請以兵護送開平衛所印信及軍士家屬置于獨石等城堡且屯且守專以馬步精兵二千分為二班令都督馮興能之都指揮唐銘卡福各領一班自

帶糧料更番往來開封故城哨備其各城堡守備軍數則獨石  
千雲州赤城各五百鴟鴞三百俱于隆慶左右二衛調發如不  
足則以保安衛足之其山海懷來衛亦留守開平官軍悉全還  
衛本道奏自今犯罪充軍者悉遣往實新立城堡皆送之○夜  
有流星大如雞卵彈色青白有光起閣道西北行至文昌○乙亥  
上聞有人擅于天壽山近陵地畊種者勅守陵太監郁彬等  
嚴禁約之○命太子賓客兵部尚書張本兼掌行在戶部事○  
免直隸保定府易州來水縣渡業逃民凡百九十五戶宣德四  
年鹽糧一千二十餘石穀草二萬一千七百九十餘束○丙子  
罕東衛指揮僉事那欒遣僧亦刺失等來朝貢馬○陽武侯薛  
祿奏獨石城合用守備軍器及巡更銅牌銅鼓等件五命行在  
工部給之○置雲南孟緬長官司及滇灘木縛雷傍哈丘壠磨

孟倫五巡檢司時景東府奏所轄孟緬孟梳地方僻遠屢被外

寇侵掠樓乞併孟梳于孟緬設長官司授把事姜嵩為長官以隸

景東歲增貢銀五十兩又茶山長官司奏所轄夷民悉居深山

而滇灘當小茶山瓦高之衝寇常出沒人不能安通事段勝頗

曉道理能安人心乞以勝為巡檢置司于滇灘又南甸州奏先

被麓川宣慰司侵奪其地賴朝廷威力復之若不置官司以正

疆界恐侵奪未厭乞于木縛雷傍哈丘隴磨孟倫四處置巡檢

司以鎮之 上命行在吏部除官悉從所奏○丁丑賜琉球國

等處貢使阿蒲都察察等宴○戊寅遣太監鄭和等賫詔往諭諸

蕃國詔曰朕恭膺 天命祇嗣 太祖高皇帝 太宗文皇帝

仁宗昭皇帝大統君臨萬邦體 祖宗之至仁普輯寧于庶

類已大赦天下紀元宣德咸共維新爾諸蕃國遠處海外未有

聞知茲特遣太監鄭和王景弘等賚詔往諭其各敬順 天道  
撫輯人民以共享太平之福凡所歷忽魯羅斯錫蘭山古里滿  
刺加柯枝卜刺哇木骨都來喃渤利蘇門答刺刺撒溜山阿魯  
甘巴里阿丹佐法兒竹步加異勒等二十國及舊港宣慰司其  
君長皆賜綵帶有差○已卯遼東東寧衛女直指揮僉事亦失  
哈等來朝貢馬○行在兵科給事中李本言近者天下學校精  
選生徒定其額數府學六十八州縣學或四十人三十人教官  
亦宜減舊府設三員州縣止二員則官不冗濫庶不虛糜  
上謂尚書胡濙等曰教官不患冗患不得人耳○永平衛興州  
左屯衛及直隸河間府靜海縣各奏<sup>補</sup>蝗生尚書郎敢言比已  
遣官往捕 上曰遣官之際亦須戒飭頗聞往年朝廷遣人督  
捕蝗者貪酷害人不減于蝗卿等須知此弊是日晚出御製捕

蝗詩示教等曰蝗之為患此詩備矣卿遣人往捕當如救焚拯溺不可緩也詩曰蝗蝻雖微物為患良不細其生定著滋殄滅流匪易方秋禾黍成芄芄各生遂所忻歲將登吞息蝗已至害苗及根節而況葉與穗傷哉隴畝植民命之所係一旦盡于斯何以卒年歲 上帝仁下民詎非人所致修省弗敢忽民惠可坐視去螟古有詩捕蝗亦有使除患興養惠昔人論已脩拯民于水火鼎裁勿玩愒○庚辰行在戶部奏坤城回四者馬兒丁等朝貢至京輸米一萬六千七百六十石于京倉中鹽今者馬兒丁等欲還坤城言願以所納米獻官 上曰彼名為朝貢實務市易蓋回回善營利也其米亦費本遠方之人可償其直于是戶部計直當以布八千疋絹四千疋償之從之○辛巳起復鴻臚寺左寺丞周詮清理文官貼黃以詮嘗為吏部員外郎故

也○壬午置萬全都指揮使司時關外衛所皆隸後軍都督府  
上以諸軍散處邊境猝有緩急無所統一乃命于宣府立  
都司命都指揮使馬昇同知毛翔武興陞指揮使朱謙為都  
指揮僉事俱性治司事宣府等十六衛所皆隸焉○改雲南金  
齒軍民指揮使司于崖長官司隸雲南都司時長官刀美孟奏  
乞援大候長官司例陞于崖為州又奏其地近雲南都司而歲  
納差發銀于金齒衛路遠乞改隸雲南都司而輸銀于布政司  
為便上問行在吏部大候何以陞州對曰以歲納差發銀多  
故陞上曰祖宗設置已定不可易也但可改隸雲南都司而  
令于布政司納銀以便之○行在戶部奏昨貴州布政司言本  
庫見貯商稅等項鈔一千三十萬九千四百餘貫欲以准折官  
吏旗軍俸糧未經揀選難以支給請令先將有字貫成片者折

俸不堪用者聽秋行候淺之仍 命各處凡急缺鈔用者俱循是例

其有御史等官收鈔之處就令選揀不堪者燬之○行在兵部

尚書張本言今皇城四門進納諸物有侵奪多收之弊 上命

遣御史給事中禡盤如永樂故事庶幾漸革○癸未 命都指

揮使唐銘都指揮同知李信都指揮僉事張義卡福黃真任萬

全都司兼督屯守○行在戶部奏長蘆軍民多有販鬻私鹽者

請遣錦衣衛官及監察御史巡捕稅之○甲申朝使自西域還

及西域貢使至具言曲先衛都指揮散即思數率所部邀劫往

來使臣梗塞道路 上命都督僉事史昭光副總兵都督僉事

趙安克左叅將王或都督僉事為右叅將同太監王安王瑾率兵征之初

昭等曰曲先之人朝廷待之素厚今恃恩作過劫殺往來使臣

特命尔等率兵問罪若能改過順服宜撫綏之如復不悛忠等

即遣兵討之。○乙酉 命行在工部造 天地壇樂器以太常  
言歲久多敝故也。○賜扯兒禪等處奏事頭目末台等六人鈔  
及絲帶表裏金織銀衣等物有差。○行在戶部奏天下錢糧實  
徵之數多有違期不報或所報不明款編置勘合付各衙門合  
以實徵總數填寫明白遣該吏視費赴部查理近者限本年十  
月遠者十二月到部如限內不至或數目不明治其官吏罪自  
後俱循此例其各年開豁錢糧一體編發勘合令填繳以憑查  
勘後之。○初行在兵部尚書張本奏甘肅寧夏大同宣府糧餉  
皆出民力運輸所費浩大近數年來各處邊隅無警田未豐稔  
邊衛軍士一切用度多以穀粟請遣人典總兵鎮守官會議被  
處應用布帛等物戶部差人運去依價收糶每處或十萬石二  
三十萬石歲以為常則民力可省邊儲可充 上從之令遣官



馳解其各處守將計議以聞至是武安侯節亨寧陽侯陳懋都督譚廣劉廣言甘肅寧夏缺絲綿布絹棉花大同宣府缺布絹棉花茶鹽及農器犁鐮等物如運至依期<sup>特</sup>易換為使戶部邊請以折糧絲綿布絹棉花及收買農器在官茶鹽遣人送<sup>送</sup>至陝西委叅政陳琰山西委叅政樊鎮口外委戶部郎中王良等專理其事從之○曉刻月犯十二國秦星○丙戌哈密忠順王卜答失里遣指揮僉事捨黑馬黑麻打刺罕滿刺哈密者帖列山衛指揮僉事咬東土魯番城都督尹吉兒察徑撒都等來朝貢馬○命行在戶部揭榜禁戒中官人等不許官舡夾帶私鹽貨物○造萬全都指揮使司印及銅牌○丁亥賜雲南麓川平緬宣慰使思任發等所遣頭目刀門道等三百七十六人貼吉里頭目都樂納蘭盧兀刺頭目吞克魯等鈔綵幣表裏裝衣紗羅絹

布有差○赤城脩禦都指揮汪貴奏赤城新設城堡守備合用  
銃砲火藥金鼓旗號等項 上命行在工部悉給之○修正陽  
門橋梁○戊子 上諭左順門諭尚書張本等曰軍官調衛本  
以示懲然彼既久居其處知地利識人情若有緩急調度不難  
終非新授官可比今後凡當調而果任事精當者別具以聞○  
命行在工部修北京城隍祠○召掌湖廣都司事後軍都督府  
同知鄭銘還京先是 上以湖廣都司官多缺 命銘掌司事  
至是聞其老故召還尋 命致事○設雲南金齒軍民指揮司  
騰衝州置土官知州一員時騰衝守禦千戶所土官副千戶張  
銘言本所地方遠在極邊麓川宣慰思任廢不時仇殺驚擾夷  
民乞設州治置官吏典騰衝守禦千戶所相兼鎮撫庶得其民  
安業 上從之就以銘為騰衝州知州○修築直隸隆慶州城

時陽武侯薛祿言隆慶城周圍四里年久頽壞用銀四萬五日  
可完請就以官軍修理 上從之○行在都察院右都御史顏  
佐奏水軍右衛倉官宋忠應改調其所收糧舊侵欺一萬四千  
五百餘石戶部郎中黃玘受忠賄免盤量事發鞠訊明白玘律  
當絞 上從之曰交盤糧米本以防奸前人更事多立法詳審  
惟當遵守而行彼用賂求免正是有弊官至五品乃見利忘身  
臨刑雖悔何及哉○己丑置萬全都司經歷司經歷一員都事  
一員司事斷事司事斷事司事吏員各一員司獄司獄一員○行在戶部奏自儀  
真瓜州北至臨清河水淺濇舟行爭歧至有傷人命者請于各  
洪閘及人烟輻輳之處令法司官一員監視遇有爭歧就治之  
上命行在刑部遣主事都察院遣御史各一人滿歲則更事  
輕即決遣若干人命重事則奏來○福建長汀縣學教諭陳啟

宗言伏親戶部頒降榜文不許阻滯鈔法至今鈔未通行臣切  
思米布諸物俱產民間而福建諸郡戶口鹽鈔折收糧米鈔皆  
不用以臣所見宜有變通如汀州所積糧可有一百餘年之用  
汀州衛所積有十餘年之用而每歲又收藍糧蓄積愈多天下  
府州衛所大縣相同宜令在外有司軍衛扣算倉糧有十年以  
上者鹽糧盡令折鈔歲徵秋糧亦折鈔三分如此則鈔可通糧  
不陳腐 上是其言 命行在戶部稽覈天下各府縣衛所所  
積倉糧多寡再議以聞○庚寅遣中官祭中雷之神○賜琉球  
使臣阿蒲察都等十四人廣西平祥縣土官族人李安福餘衛  
指揮僉事咬紉等鈔幣及金織襲衣有差○革山西澤州碗子  
城小寨見清化鎮守關軍時給事中李本言澤州至清化鎮止  
一百二十里其間既有橫望巡檢司而懷慶衛又撥軍于碗子

城小寨兒清化鎮三處守闕無益而擾民遂命革之○日下  
生承氣一道百刻又生右珥皆黃赤鮮明○辛卯命都督僉  
事方政充副總兵自開平獨石至長安嶺永寧往來巡備遇有  
倣急與總兵官都督譚廣相應援○壬辰副總兵堂城侯李賢  
等奏總兵官陽武侯薛祿有疾上謂侍臣曰祿孜孜為國雖  
老猶盡心邊事遂命中官金滿同御醫沈以潛以藥配柱視之  
仍賜勅勞問○車兒綽頭日莫台伯蘭火者阿魯火者三人未  
歸奏願居甘州自効命莫台伯蘭火者為指揮僉事阿魯火  
者為副千戶賜冠帶仍命陝西行都司于甘州左衛帶支月  
俸○癸巳行在戶部奏宣德三年以前各處逋欠桑穰尚多今  
勅書蠲免逋負而未及此上曰非獨各于桑穰蓋思慮偶未  
及也其悉免之○甲午行在戶部奏洪武中徵收稅糧布絹皆

有定制近年人民奸狡官吏容縱布絹造不如法糧多粗糶且  
往往送納過期請以舊制申明榜示違者加倍追徵罪及官吏  
俾知所做 上曰此有定例其申明之加倍追之不可行○行  
在戶部奏四川仙泉等一十八井中納鹽糧例先是四川富順  
縣民秦仙泉等并洪武年間撥與鹽井衛中納永樂中總兵官  
費璫因邊衛缺糧奏將鹽井衛停中撥與建平交州二府并涼  
州衛納糧供給今皆停止乞補京倉間中事例一體召商中納  
命行在戶部定例議以每引納米五斗送之○乙未鄭王瞻埈  
奏長史王淪典寶趙彝侮慢 上素知淪正直必所言有進王  
者遂併彝不問但勅淪等修省盡誠輔導王所為或有未當宜  
從容以導匡正王又奏秦府護衛既調去素其所種鳳翔府政  
山等縣忠田今莫刈以俟命 上語行在戶部臣曰此其意欲

得之難于明言令陝西都司布政司覆勘果是謾衛葉田即與

王若有違碍其實以聞○賜罕東衛指揮僉事那灤所遣僧亦

刺失等鈔綠幣表裏金織襲衣等物有差○仍遣齊初文綠幣賜那灤等日差右珥色黃赤

鮮明○丙申朝鮮國王李祐蒙賜世子冠服遣陪臣文貴等奉

表貢方物謝恩○丁酉調金吾左衛指揮僉事王壽任金吾前

衛指揮僉事金吾右衛指揮僉事王光先任金吾後衛指揮僉

事○賜東寧衛女直指僉事亦失哈必赤等鈔綠幣表裏

襲衣羅緞布繡等物有差○以木邦宣慰使罕門法麓川平緬

宣慰使思任發及緬甸宣慰使莽得刺各貢象馬方物遣中官

李處文雲仙等齎勅賜之冠帶綠帶金織襲衣綠綵等物時思

任發莽得刺皆奏罕門法侵占其地掠其人畜勅總兵官黔國

公沐晟及都司布政司按察司等官曰麓川緬甸皆言木邦侵

掠土地人民爾歲宜遣官兵都布按三司堂上官各一人同奉  
成文雲仙等姓諭如所言皆實悉令退還自今各安分保境無  
相侵犯如其不服奏來處治○土魯番城都指揮僉事愛鬼着  
兒所部舍人哈因虎里等烏思藏闡化王所部養卜魯都指揮  
僉事工哥爾監藏遺來者人三扎思雲札烏必刺哈等皆奏願  
居京自効 命為所鎮撫賜冠帶金織襲衣絲幣銀鈔鞍馬仍  
命有司給房屋器皿等物如例○戊戌日生暈色青赤

大明宣宗憲天崇道英明神聖欽文昭武寬仁純孝章皇帝實  
錄卷之六十七



明宣宗章皇帝實錄卷之六十七

明宣宗章皇帝實錄卷之六十八

宣德五年秋七月己亥朔享

太廟○遣中官祭司門之神○夜有流星大如盃色赤有光起  
天市垣內西南行止房散○庚子撒馬罕等處頭目兀魯伯米  
兒咱等遣使臣卜顏火力等來朝貢方物○辛丑 命故金吾  
前衛指揮使費聚子潤羽林前左衛指揮使江興子勝指揮同知  
劉保弟宣俱襲職羽林左前衛指揮僉事梅俊老疾 命其子成  
代之○行在戶部奏凡盜賣官糧者皆應陪償今戶部雖追而  
各倉無所稽考恐久遂埋沒宜置立精微文簿令戶部自今為  
始犯人應追米數每月附註庶有可稽如輸半年不輸補者具  
奏裁處從之又奏忠義右衛等倉中盜客商所納粟米多粗糙  
耗碎若比精粳每斗耗什二三除依商人盜糧例每石加二斗

其先納粗糲者請罪之以示儆懲 上曰已加收者勿罪未加收

者悉令補納仍出均禁約再犯者罪之○行在兵部奏南北二

京直隸衛所屯田無官總督 上命都指揮同知崔忠都指揮

僉事趙榮督北京直隸衛所都指揮僉事宋斌黃恭督南京直

隸衛所又奏都指揮僉事韓鎮言陽武侯薛祿調陞慶左右二

衛官軍八百二十九人之在永寧備禦者悉往獨石等處守備

緣永寧路通外境今調去二衛官軍守備密務請留之事下兵

部議今議得獨石等處尤為要地所調官軍當以半往仍留半

于永寧庶兩無所失從之○提調山海衛都指揮僉事袁亮言

本衛左甲二千戶所官軍二千二百八十一人隨居家屬四千

十六人今調遼東新設衛分守備軍士有離析失業之嘆而本

處閭閻缺人驟倍請免調發行在兵部言山海見存全伍十所

中左二所常調蓋所奏非出亮意皆奸吏所為請究治之

上曰安土重遷人之常情但新置衛不可無軍其令各軍家屬不願往者仍于山海居住所司不許侵擾餘不必究○癸卯勅侍郎許廓及河南布政司按察司聞河南流民補已復業然家產雖析之後生理尚艱且體念下情再加寬恤凡復業小民饑窘者免二年租稅見在人戶應納稅糧近水者輸於彰德衛輝遠者于附近官倉輸納庶免勞費○賜朝鮮國貢伎文貴等宴○甲辰斬廊州妖人中妖數府軍前衛軍逃至寧州自稱王居士假佛法以禍福惑眾州民被其誑誘襄樂巡檢司執之解京師上命行在都察院鞠訊得實斬于市○乙巳湖廣忠愍安撫司把事曠呼可宜倚送等及前大王師壁洞忠義軍民宣慰司舍人牟鑑前龍渠宣撫司舍人鄧文前石金管坪等河長官

司舍人冉墨達送南木答等來朝貢馬及方物○設萬全都司  
永寧衛倉置副使一員○賜朝鮮國使臣文貴等哈密使臣捨  
黑馬黑麻及打刺罕滿刺哈密等者帖列山衛指揮僉事咬東  
等土魯番城都督尹吉兒察任撒都等練帶表裏絹布襲衣有  
差○遼東總兵官都督命尹巫愷奏六月虜寇再犯境官軍追捕被  
寇殺傷十三人虜掠男婦十有五人馬牛八十有餘都指揮劉  
斌失機悞事請治其罪 上曰倘禦失機罪皆當死前寬宥止  
罰俸令遊玩弛勒愷等凡失機官旗皆杖之降充軍令常勝備  
再犯必斬○太白晝見○丙午瓦剌順寧王脫歡使臣泛人沙  
班等二人奏願居京自効 命為百戶等官賜冠帶金織襲衣  
練帶銀鈔棉布鞍馬仍 命有司給房屋等物如例○行在戶  
部奏山西陝西各衛所軍士冬布近因支給不敷應給棉布四

匹三匹者二匹折鈔二匹者一匹折鈔陝西每匹鈔三錠山西  
每匹五錠例有不同宜<sup>俱</sup>從陝西之例 上曰布一匹價豈止  
三錠軍士艱<sup>難</sup>但當倍<sup>價</sup>值共之安可從省其依山西例給之未  
年當預計蓄積盡給棉布○夜羽流星大如盃色赤光燭地起  
七公西南行至濁○丁未<sup>行</sup>陞在吏部文選司郎中鄭誠為本部  
右侍郎兵部武選司郎中吳璽為行在戶部右侍郎翰林院侍  
講學士蔣驥為行在禮部右侍郎行在兵部職方司郎中柴車  
為本部右侍郎行在刑部浙江司員外郎蔣勉為本部右侍郎  
刑科都給事中賈諒為行在都察院右副都御史兵科都給事  
中徐初為行在大理寺卿廣西道監察御史吳訥為南京都察  
院右僉都御史○巡按浙江監察御史杜時奏會稽知縣陳皞  
以妄解軍丁罪應徙縣民二百餘人告言皞為政廉平才任幹

濟新解軍丁本實蓋奸人誣其妄解恐以罪去百姓失望布政使

司艾瑛等亦言疎廩勤得民心 上謂行在刑部臣曰縣官有

才德者良民之幸奸民之不幸御史布政司所奏如此尔即與

鮮明○日午左珥色黃赤鮮明○戊申代王世孫任瀝奏姊妹

俱當婚娶而無居室 上命行在工部為擇地營建○四川茂

州守臣進瑞麥有一莖三穗五穗者時 太廟之側產嘉禾有

一莖四五穗至六七穗者不可勝計行在禮部臣請率百官表

賀 上曰瑞麥嘉禾固是豐年之慶但朕以菲德居位且比來

四方屢奏水旱可言賀耶然產于 太廟側實 天典 祖宗

神靈之所敷佑昔周人貽我來牟之詩必歸于先公之德

上帝之命朕何德以致此其勿賀○雲南狼窩縣下江甯巡檢

司故土官巡檢何名子護等貢馬奏請襲職○行在通政司右

奏議何懷輝言通州張家灣至北京中途花園等處每有強盜劫掠甚至殺傷人命請于人烟稀少之處或六里或十里設冷舖置兵巡捕上命行在錦衣衛差能幹官領校尉緝捕若假禽賊為名擾人者治罪不宥○日生暈色黃赤鮮明昏刻月犯房南第二星月在下○己酉占城國王占己的賴遣正副使通沙帕麻叔等來朝貢方物○行在都察院右都御史顧佐奏戶部言儀真瓜洲淮安呂梁徐州濟寧臨清公私舟舡往來交錯阻塞河道漕運不便奏請遣御史等官巡視禁約今儀真等處俱有御史監收課鈔就令通行巡視瓜洲淮安呂梁三處請令刑部各遣官一員遇有犯者同御史依律鞠治從之○上安聞其侍臣論高周得天下之道侍臣曰湯武順天應人除暴安民功加于時德垂後裔所以天下歸之傳之子孫歷世長久



上曰天命所歸蓋非偶然唐虞之時契敷五教百姓親睦后稷教民稼穡天下享其利至湯放桀武王伐紂遂有天下誠以先世功德在民篤生聖哲用集大命有不可辭者于其子孫享國長久亦惟仁義道德足以培植之也○庚戌春刻月犯箕西北星月在上○壬子命監察御史熊翼往陝西等處巡捕自京差遣之人之為民害者初御史于謙言京師所差官旗人等往陝西諸處公幹經過之地需求凌虐官吏軍民不勝其苦請禁約究治上然其言故有是命○江西按察司秦橫海等衛千戶文莊等領旗軍以公用為名斬伐袁州府分宜縣民納稅山木及奪商人已買之木莊等出入鳴金為號肆其兇威掠民家財震驚鄉村攬擾商旅所得木三萬餘根又皆賣財入已請治其罪上諭右都御史顧佐等曰朝廷號令屢戒官軍安分而

違犯者不已固是武人但知貪利亦由風憲之臣不能振舉法  
度縱其無所忌憚其令巡按御史回按察司官鞠治如律○癸  
丑以明月中元道衛王瞻垸祭長陵獻陵○直隸河間府  
景州奏州民三百三十二戶歲歉缺食已給官倉粟三百九十  
二石賑濟○甲寅直隸無為州奏貧民缺食已發預備倉穀一  
萬七千五百三十七石賑濟俟秋成運官○廣東潮州衛奏指  
揮同知賴啓以廢得官滋肆酷虐累犯遇赦怙終不悛近無故  
杖殺總旗擅受民訟肆意誅求又擅調官軍下鄉擾民其惡日  
深請治其罪上命行在都察院追逮鞠治因曰軍官世襲本  
以報功渠不念其祖父得之之難而一旦傾覆之良可嘆也○  
乙卯陝西岷州衛奏所轄西固城千戶所地連疊州離本衛四  
百餘里路險山深素無驛站猝有警急聲息難通請于高山利

便之處置烽埃設砲就令把截官軍瞭望警報庶幾不悞送之  
○丁巳改福建邵武府通判周仕迪為河南開封府通判掌祥  
符縣事仕迪先任祥符縣知縣九年陞邵武通判河南左布政  
使魏源言祥符人民衆多庶務繁冗必得能官乃不悞事新任  
知縣景綬不任繁劇前知縣周仕迪頗有才識處事公平民多  
信服今陞福建邵武府通判伏望召回仕迪改作本府通判仍  
掌祥符縣事庶幾縣得其人民不失所送之召新任者還京○  
土魯番城頭目都督僉事尹吉兒察奏率家屬來朝願居京師  
以圖報効 上嘉其誠從之賜金織文綺襲衣 命行在工部  
典居第什器等物戶部給俸祿○行在吏部郎中趙新自江西  
還言臨清河道窄狹往來舟楫阻滯廣積倉納糧民舡離倉灣  
船負米上倉甚艱乞遣官會平江伯陳瑄于倉東南開月河泊

舡于河北置壩一所則車舡往來皆便又言今西河民舡俱計料收鈔而官舡及運糧舡一槩徵納民力既艱宜加蠲免

上諭行在戶部臣曰二事皆利于民間河置壩令平江伯計議用人力多少即及時興功舡載官物及杖糧者俱免收鈔○順天府奏請修葺厲壇送之○上視朝始御左順門謂行在戶部臣曰人情皆欲安居誰肯棄業他徒只緣有司不善撫恤橫徵暴斂致其如此比聞彰州強賊皆是逃民罪雖可誅情亦可憫推原其始責在有司尔即榜示各處戒約務存寬恤若有擾害致其逃亡者必罪不貸○戊午貴州安順等州上官同知阿寵等違犯事楊保等貢馬○巡按直隸監察御史余思寬言張家灣兩河多有逋逃軍民工匠或潛匿人家或為盜賊宜遣人密察捕遺治上謂行在戶部曰避躑出者無辜豈人情所欲必

有不得已者可揭榜示之令十日內凡逃逸者許自首軍匠還  
從民還原籍限外不首者治罪若非逃逸而于河岍生理者聽  
○庚申以任滿考官陞行在工料給事中彭璫為浙江布政司  
右叅議擢進士李在修吳晟監生許義劉慶泰俊為南京監察  
御史在修俊浙江道晟廣西道義江西道睿貴州道復趙恂山  
西都司經歷吳祥河南嵩縣知縣朱宗才雲南姚安軍民府檢  
校羅益恭貴州水西驛驛丞恂等以任滿當陞調以其吏民奏  
乞留之皆從之而陞其祿恂陞從五品祥正六品宗才益恭從  
九品調山西道監察御史費觀于南京廣東道山東布政使童  
謨于廣西布政司山東按察副使郭振于陝西按察司湖廣按  
察副使陳鑑于山東按察司陝西按察僉事李瑒湖廣按察僉  
事文獻俱于山東按察司廣西按察僉事龔鈺于廣東按察司

皆以親終服闋也。澤湖廣布政司右叅政楊敬為江西上饒縣知縣。按察司僉事方恢為汀州府武平縣知縣。江西道監察御史顧達為湖廣應山縣典史。敬恢以不勝任達以不達改體故皆降之。○辛酉宥赤城倭禦都指揮僉事汪貴罪先是虜寇入赤城潘家莊屯殺虜人口貴奏百戶張勝失防禦請罪之。

上曰貴所任何事而妄罪于勝。命行在兵部移文詰之。至是貴奏請伏罪命姑宥之。○松潘衛指揮吳瑋有罪伏誅瑋守松潘大肆貪虐激變番人致掠官軍四十餘人又索總旗豹皮不得杖殺之千戶張禎等欲訴之官瑋執其叔及旗軍之欲訴瑋者皆拷掠至死禎等遂告之四川道御史論瑋應斬。上命公保伯五府六部都察院大理寺錦衣衛六科給事中會問還奏瑋皆升伏。上曰死有餘責矣。命輒于市籍其家。○太保陽武侯薛

祿辛祿山東膠州人起卒伍從 太宗皇帝靖內難首建奇功  
累陞後軍都督府都督僉事永樂六年陞都督同知八年從 車駕  
北征進榮祿大夫右軍都督府右都督兼左軍都督府事時四  
方選至幼軍數萬悉命隸祿訓練十五年建北京宮殿 命董  
營繕加奉天禧難推誠宣力武臣特進榮祿大夫柱國封陽武  
侯食祿千五百石追封三代皆侯爵賜誥券二十一年扈從北  
征還奉命討平湖州叛寇二十二年復扈從北征還 仁宗皇  
帝嗣位加太子太保子孫世襲侯爵奉 命巡北邊通虜寇雲  
州率兵追至大松嶺斬獲甚衆事聞賜勅嘉獎遣中官及鴻臚  
卿即軍中勞之加歲祿五百石洪熙元年佩鎮朔大將軍印率  
師巡北邊宣德元年庶人高煦反 車駕親征 命祿為前鋒  
先二日圍其城罪人既得留撫綏城中軍民明年秋從 車駕

巡邏出會州解后虜寇塞下與戰敗之遂鎮薊州永平四年率  
師護兵餉開平者再五年春復佩鎮朔大將軍印巡邏至鳳凰  
嶺遇虜逆戰斬其渠寇盡收其家口孳畜陞太保居三月奉  
命城永寧赤城獨石皆從祿所言也祿平居無事未嘗忘危每  
計邊務言之亶亶或謂其瑣屑者終不為變蓋其志奉國惟恐  
不盡為將勇智兼備常沈事籌畫用心之至以夜繼日故所向  
成功未嘗敗北間一二臨陣中矢石叢創赴關有進無退其率  
師所紀律嚴明秋毫無犯而撫恤士卒人人歸心若董繕作規  
制有方力不煩費功率堅久人亦罕及焉其董築城之後竣事  
將歸以疾聞上遣中官以御醫往視且賜勅諭勞至京猶力  
疾入見上慰諭再四既歸第日賜醫藥遣中官臨問至是卒  
訃聞上震悼遣官賜祭迨封郵國公謚忠武命有司治喪



凡喪葬之儀皆優厚蓋特恩云○壬戌行在戶部奏各處倉糧多有欺弊請遣官於京城新舊大倉直抵臨清淮安徐州等處巡視一應事宜俱從區畫遇有姦弊具實奏聞又各處倉廩收受之時宜別委官監都度督幾關防嚴密出納分明宿弊可革

上命行在戶部侍郎王佐同內官李德巡視負外郎楊貞內官梁谷監督○癸亥雲南彌勒州故土官知州者克子樊習等貢馬○上視朝罷御左順門謂侍臣曰郡縣守令所使安民者若賢否混淆無所激勸則中才之士皆將流而忘返吏部以進退人才為職亦未聞有所甄別何也因賜勅諭之曰今天下府州縣官有賢能清正忠君愛民超出群類者亦有不才貪酷壞法害民衆所怨惡者爾吏部即行各布政司按察司巡撫監察御史令體審明白賢能者從實具名奏聞不才者明其所犯送

赴京來務在公當毋或徧徇以昧是非之正欵哉○昏刻有流  
星大如鷄彈色赤尾跡有光起閣道西北行至內階○甲子中  
都留守司奏留守左衛指揮陳鑑赴京操備逼取軍糧二千五  
百石科率各軍材料私役軍匠一百三十七人修蓋私宅及隱  
占逃軍侵用屯軍小麥刻害無厭請治其罪 上命行在都察  
院逮問因曰武官操備自是其職豈當剝削軍士以充無厭之  
欲宜窮治之○免安慶民歲運鹽鈔赴北京時安慶府知府楊  
希孟言民間食鹽鈔初貯本府官庫後送納南京今未免糜費已  
有通負今運赴北京路遠費多是以連年虧欠今年鹽鈔乞仍  
收本府官庫支用為便 上諭行在戶部臣曰在外府庫亦是  
朝廷積蓄就令貯彼不必運赴北京○陝西岷州衛軍民指揮  
司奏洪武初設衛治歷年既久四門城樓倉庫鹽場館驛鋪舍

皆禁今當修葺請于所屬岷州借撥民丁興守城軍士候農隙  
用工從之○夜有流星大如盃色赤有光起卷舌東南行至天  
節○乙丑行在吏科給事中富敬有罪當杖罰役以贖先是  
旨三法司十三道御史六科給事中會審獄囚敬與烏審既吏  
持成案詣敬請署名敬忿御史不躬請署擲案于地吏言案具  
聖旨御史遂劾奏其不敬下法司治故坐杖云○行在禮部右  
侍郎蔣驥卒驥字良夫浙江錢塘人由進士授行人永樂初預  
修高廟實錄陞翰林院檢討修永樂大典為副總裁 仁宗  
皇帝即位陞左春坊左司直郎 上即位陞翰林院侍講同考  
禮部會試者二預修 兩朝實錄書成賜白金文綺陞侍講學  
士未幾又陞禮部右侍郎視事幾二旬得疾遽卒遣官賜祭  
命有司治葬○五鼓有流星大如鷄彈色青白尾跡有光出正

南雲中南行至雲中。丙寅賜撤馬兒罕等處使臣卜顏火力等綵幣金織紵絲襲有差。巡按浙江監察御史都司按察司以考察浙江諸衛軍職事實以聞。上曰武夫雖難盡責以廉然貪刻害軍亦不可縱果有犯者亦須懲治庶使知戒。黜監察御史王璉為吏初理巡按遼東勅理同遼東都司山東按察司及鎮守總兵官廉察所轄軍職歲否璉違命專擅召人告訐多所誣枉又多挾私從馳驛馬事聞。命行在都察院鞠之論杖一百運執贖罪還職。上曰挾勢作威以枉為直豈可復任御史其謫邊衛充吏。○行在都察院奏鎮江府安港口巡檢劉昇巡江遇蘇州府常熟縣富民過達舟泊沙岬舟重載而操舟止兩人誣為強盜反接之悉掠所載物又毆死操舟者一人其一人不死昇畏事覺即以強盜送刑部又使同謀者以所掠財

賂刑部司獄楊慶等使盜殺之以滅口員外郎沈暈等亦不詳致死之由輒聽出屍皆應問罪上諭行在都察院臣曰巡檢為劫盜誣平人刑部不能明白枉直又聽獄吏交通枉殺人此豈復有法度令巫治之不可縱惡○丁卯四川建昌衛瀘沽馬驛土官驛丞楊興祖廣東德慶州金林等鄉狂人盤奴愛等來朝貢馬及方物○命陝西都司都指揮僉事戴旺甘肅守備掌肅衛事都指揮僉事嚴肅任陝西行都司事命故金吾左衛指揮使杜剛子斌襲職○賜湖廣忠路安撫司把事驢呼可宜備送及前大王獅壁洞忠義軍民宣慰司舍人牟鑑前龍渠宣撫司舍人郎文前石金管坪等洞長官司舍人冉墨達送南木答等鈔綵幣表裏有差○行在太醫院判韓叔暘奏醫士逃逸及丁憂服滿不起者七百餘人屢催皆不至乞令各處巡按御史

督有司械繫送京 上諭之曰爾以醫士得官烏獸尚念群爾  
獨忌我彼逃與違限亦必有不得已者但令

禮部移文趣之不必委御史○戊辰副總兵都督僉事方正言  
邊務便宜四事其一原調往獨石官軍二千人內款以四百人  
分葺雲州赤城守備其二款以原選宣府分班開平哨備官軍  
一千人半存獨石半還宣府依期更代其三于原選開平一千  
人內留千戶楊洪所領五百人往來獨石禽捕虜寇于萬全都  
司撥有馬者五百人補之其四獨石等四處守備官軍三千三  
百人內款選一千人隨從哨備 上悉從之○行在刑部都察  
院奏罪囚應運轉者已送工部今以貧乏不能運轉仍送運法  
司未有定議 上命同工部議擬以聞至是議奏雜犯死罪職  
官吏典人材醫士僧道民人發終身炒鐵或掘站監生生員發  
煩難衙門永充吏將軍力士校尉軍及餘丁發邊境充軍立功  
有功復原從無功止終本身徒流罪將軍力士校尉軍及餘丁

各依年限准雜工滿日復原役餘官吏人等依年限炒錢攤站  
滿日為民杖罪准工十月笞罪准工五月滿日各還職役寧家  
軍職官依行在工部先奏准事例運磚執未完及全不運者限三  
月再不完應死罪者發獨石充軍立功徒流罪降一等杖罪住  
俸半年笞罪住俸三月復職若逃應死罪者發邊查東衛充軍徒流  
罪降二等杖笞罪皆依律杖罪住俸半年笞罪住俸三月復職  
若發充軍逃者處死今後問擬犯人審其無力運磚者請令雜  
犯死罪准雜工五年徒流罪各依年限准工杖罪准工十月笞  
罪准工五月滿日各還職役寧家棧之

大明宣宗憲天崇道英川神聖欽文昭武寬仁純孝章皇帝實

錄卷之六十八



明宣宗章皇帝實錄卷之六十八終

大明宣宗章皇帝實錄卷之六十九

宣德伍年八月己巳朔日當食陰雨不見行在禮部尚書胡濙等以為即同不食請率羣臣上表賀上不許周初羣臣曰古者人君所謹莫大於天戒日食又天戒之大者惟能脩德行政用賢去抑而後當食不食朕以菲德嗣承祖宗大統政理未洽民生未遂上累三光祗懼惟甚可比於是歎傳不云予君子之過也如日月之食焉過也人皆見之更也人皆仰之今以陰雨不見得非朕昧於有過而然歟况離明照四方陰雲所蔽有限京師不見四方必有見者比之不食天可欺乎朕尚圖修省以仰答天意尚賴爾羣臣匡其不逮其止勿賀○夜分流星大如盃色青白尾跡有光出營室南行至羽林軍○庚午遂初都指揮原旺王肇舟從容判哈仍誑奴兒干部司撫恤軍民又勅

諭以兒于海東蒙阿里吉列廷恨古河黑龍江松華江河連江等處野人預日哥本阿囊哈奴等令皆受節制。賜雲南浪穹縣下工簡巡檢司土官舍人何護等鈔有差。巡按直隸監察御史余思寬言剴州以東衛所軍士差占者多一軍養馬有五六疋至七八疋者勞苦特甚宜興減省。上命所司計議行在兵部言山海迤西子邊營堡二十餘處步卒五千餘人今止秋草宜暫分與畜養就令騎操候來春再議從之。○辛未上御左順門謂行在工部尚書吳中等曰今秋氣已半邊地早寒開平等處官軍且預與皮夾袂帽令都督府差人運去不可後時。○山東布政使石執中奏按察使虞信不迎勅書不赴京朝覲信亦奏執中朝覲枉道回家提督七種不妻祭政恭議止妻都事行在都察院請皆提問。上曰方面官互濫檢相評如小

人謹爭亡大臣體不可不治士申貴州小平伐等長官司吏目  
孫節等違頭日何若等貢馬口湖廣按察司奏五閩衛指揮倪  
善趙興各懷私心不顧大體凡有公事不肯和平計議動輒  
羊文書稽滯至有一事累月間而不行者請皆治其罪 上諭  
右都御史顧佐令按察司俱治之又謂佐曰同僚有兄弟之誼  
當情意相孚可否相濟譬如同舟行車雖衆論不齊但款舟車  
可行而已何必爭競此輩皆膠於私意以致妨廢職務若倉猝  
變夷有警不能協和何以濟事故不可不治以示懲也○癸酉  
副總兵都督方政奏獨石赤城鷓鴣備禦官軍有患病者無醫  
治療 上諭行在禮部至曰朕恒念邊軍勞苦况有疾乎其令  
太醫院給以遺醫士二人生療半年一更○乙亥罕末衛指揮  
僉事加南遣僧家藏馬思藏大國師釋迦也失之徒養答兒等

貢馬○丙子命豐城侯李賢奉化伯滕定往來永寧衛陞慶州  
提督修理城垣○丁丑遣少傅工部尚書兼謹身殿大學士楊  
榮釋真先師孔子○修北京德勝門外橋闌○戊寅祭 太社  
太稷○昏刻有流星大如盃色青白尾跡有光出羽林軍東  
南行至濁○己卯雲南金齒哥住孟養軍民宣慰司同知刀玉  
賓四川思囊兒金牌等簇土官阿思等貢馬○陞廣東布政司  
右叅政吾紳為行在禮部右侍郎實授叅政段氏為南京戶部  
右侍郎按察副使成均為南京刑部右侍郎調工部尚書黃福  
為行在戶部尚書同尚書郭甯張本計議屯田事湖廣布政司  
右叅議沈定親終服闋調山東布政司○賜占城國使臣通沙  
怕麻叔等鈔珠幣表裏金織紵綵襲衣及絹有差賜其通事和  
阿媽等冠帶仍命齋初及文錦絲幣歸賜其國王○夜

庚字玉行  
圖不抄

大如孟色赤尾跡有光出壘壁障東南行至濁口庚辰賜貴州  
安順州及小平伐長官司把事楊保頭目阿若等雲南彌勒州  
故土官舍人樊習等四川建昌衛瀘沽馬驛土官驛丞楊興祖  
等廣東德慶州徭人盤奴愛等鈔絲幣表裏襲衣有差○昏刻  
有流星大如孟色青白有光起須女東南行至游氣○辛巳詔  
旌表節婦李氏等五人李氏永平府撫寧縣民姚斌妻夫下年  
少子幼值時凶荒人多流徙李日饑貧守喪育子胡氏寧國府  
宣城縣民朱景振妻蚤喪夫一子統五月貧甚乞鄰里助以葬  
夫躬紡績為生李氏宣城縣民曾全保妻邵氏高郵州民陳奇  
妻俱年二十喪夫尚孤子孝養舅姑周氏良鄉縣民魏成妻商  
生一子成得疾且殆嚙之曰爾年少我死以子屬我妻呂氏爾  
可別適周曰為妻可更二主也成卒與呂氏同室居執妻禮甚

謹鄰婦憐之勸改嫁周氏誓片之後呂氏卒以禮祔葬夫墓始  
終守志不易事聞俱誣其門曰貞節○朵甘衛故指揮使阿奴  
子若奴人靈威贊善王喃葛監藏已藏卜遣劄十戶奴奴星吉  
等貢馬及方物○行在兵部尚書張本言居庸關及東西關口  
六十五夜初以隆慶左右二衛官軍分守今二衛軍士分守獨  
石赤城兩居庸各關缺守者多紫荆關獲裏之地有官軍九百  
餘人又有金坡鎮巡檢司官兵宜令鎮守居庸關指揮芮勛及  
紫荆關指揮趙得往視諸關口緩急量撥軍士分守 上是其  
言○行在都察院奏請分遣監察御史二十三人照刷內外諸  
司卷牘從之○修獨石新城等處烟墩時開平備禦都指揮唐  
銘奏獨石新城及長寧平成一處烟墩損壞 上曰此皆豐城  
侯李愔等用工苟且持贖等往築永寧隆慶城遂降勅責之且

命二城工畢仍往獨石修築務極完固以蓋前愆○廣東海陽縣碧洲村倭賊登岸劫掠居民潮州衛巡捕指揮同知鄭禎等與黃岡巡檢不能禦賊都司布政司請治禎等罪上命姑記其過如再有失必罪不貸仍令被劫之民徙居城廓○癸未夜月食○甲申上罷朝謂吏部尚書郭遵等曰東漢之初竇融保河西以孔奮為姑臧長姑臧最富既奮獨以潔廉自守衆皆笑之謂異身處脂膏不能自潤光武知之及融率官屬入朝即擢奮為武都郡丞以旌之夫激揚清濁為治之道使清濁無別何以勸懲天下光武即位未幾舉卓茂又舉孔奮東漢多循良吏以此由也今天下未嘗無廉潔士卿宜為朕甄別以聞朕當有以旌之若人有善而不知則為善者息矣○自刻有流星大如鷄彈色青白有光起危東南行至游氣客星見南河東北尺



餘色青黑。○乙酉遣官祭歷代帝。上諭鴻臚寺臣曰少傅

楊士奇年老有疾趨朝或後不及就班者德勿有言。○湖廣施

南宣撫司土官宣撫覃遜遣舍人黃昌前池着洞長官司等衛

門故土官長官向鐵鍾子海棟等貢馬及方物。○夜有流星大

如盃色青白光燭地起天津後有三小星隨之西北行至游氣

炸散。○丙戌祭太歲風雲雷雨嶽鎮海瀆山川等神。○遣官祭

旗纛之神。○命行在兵部右侍郎王驥禮科給事中姜士儀為

正副使持節開五關衛副千戶郝真妹為江夏王妃選百戶趙

顯女為鎮國將軍美壞夫人陽曲縣民張鶴女為鎮國將軍美

竣夫人命即靖王長女先化郡主配安陸衛指揮王崇之叔維

第。二女穀城郡主配湖廣都指揮僉事魯曾之子信。第三女南

漳郡主配京山縣民周韻寧。化王長女浮山縣主配太原前衛

千戶曹英之孫詳第六妹定襄縣主配濟源縣主簿駱子安之  
子善命雄等皆為儀賓賜之誥命。○陞禮部右侍郎李琦為湖  
廣左布政使鴻臚寺卿徐永達為湖廣按察使刑科給事中方  
祖方為楚府左長史調湖廣按察使李素於福建按察司。○陞  
行在錦衣衛指揮僉事樞肅為湖廣都司指揮僉事。○上罷朝  
御文章殿學士楊溥等侍詔及治民事曰民之休戚係乎庶官  
之賢否何術可盡得其人溥對曰嚴為舉稍考課不惠不得上  
曰近代有罪舉主之法大抵全才者少明此者或不明於彼善  
拙者或不善於終而一言薦之豈能保其終身故亦難乎舉之  
者矣大抵欲得賢才當厚教養之法教養有道人才能出若但  
貴效於薦舉考課之間益求十一於千百也漢董仲舒言素不  
貪士而欲求賢譬猶不琢玉而求文采此誠知今之論於今但

當崇學重教。○丁亥周王有燬奏第十八妹將成婚未有居室  
府中舊屋欲移置於外以居之緣無工匠命行在工部以三百  
人與之。○行在工部尚書吳中言良鄉以南至滁州舊蒔殿每  
身補葺勞費不少請令有司陶瓦以覆命供粟隙徐為之。○南  
京刑部右侍郎成均奏換州舊積糧少今換州等衛衙門官并  
下西洋旗軍缺糧支給宜從刑部奏准例以蘇松常鎮四府間  
過囚人贖罪米暫於本處官倉取貯以備支給從之。○順天府  
尹李庸奏本府廟學殿無損壞聖賢塑像多剝落 上命重修  
飾之。○戊子南京江西道監察御史張楷劾奏刑部尚書趙班  
侍郎俞任言曠職濼官今部所繫強盜貝福全者覆奏待決乃  
詐病死相驗瘞之其後復出強劫又有蘇州富民過達者安港  
地檢司圖其財証作強盜械送刑部而私賂獄官獄卒縊死於

獄皆由班等忘縱所致今該司官吏皆已違問班等亦當罪之

上覽奏怒曰縱有罪殺爾無罪豈可恕也既又曰班等歷事

先朝今旨老夫其召之來令都御史熊璜兼理刑部○己丑唐  
王瓊燼奏儀賓張鉉父壯從軍南陽乞免其役從之○夜月犯  
五車○庚寅遣行在吏部郎中趙新刑部郎中劉澤榮華工部  
郎中張琰禮部員外郎吳政等經理屯田先是尚書黃福言諸  
於濟寧以北衛輝真定以南近河之地役軍民十萬人屯種積  
糧以充國用 上命行在戶部兵部議至是太子太師郭甯尚  
書張本等言於緣河屯田甯便宜自鳳陽淮安以北及山東河  
南北直隸近河二百里內通舟楫處擇荒閒田地以五萬頃為  
率發附近軍民五萬人耕之民則驗丁册合官給以牛仍支官  
錢收買農器如此則軍民樂於用力但山東近年旱飢流民初

獲故業官軍亦多有差役宜先遣官往同有司按視田地以俟開墾 上從之遂遣新等經理仍命福總其事既而奉等惑于人言今軍民各有常業若復分撥點差未免勞擾不以聞於上事竟不行○日生右珥色青赤鮮明夜客星見南河旁如彈丸大色青黑凡二十有六日滅○辛卯行在吏部奏蘇州知府况鍾言本府民蓄事冗稅糧浩大乞再增府縣佐二各二員緣前巡撫竊松大理寺卿熊榮奏乞添官專督稅糧已增設府縣佐各一員今難再增 上曰蘇松事雖繁洪武永樂間官不增設何嘗不辦蓋官在得人苟不得人反為民蠹不可增設○壬辰置宛平沙河站倉昌平縣山口倉大使各一員時順天府尹李庸言二處自永樂中多積軍儲每歲戶部委辦事官監守更替不常支銷不明多有虧折宜設官專任其事 上是其言命

行在吏部即除大使各一員禮部鑄印給之。○癸巳賜少傅工部尚書兼謹身殿大學士楊榮誥命加封其三代及妻。○兀者前等衛女直指揮僉事阿剌充等未朝貢方物。○賜湖廣施南宣撫司舍人黃昌及前池着洞長官司故土官子何海棟等靈藏贊善王所遺副千戶汝奴星吉及朵甘衛舍人若奴八等烏思藏番人養答兒等罕東衛僧滾藏等金齒寄住孟養軍民宣慰司土官同知刁玉賓等四川思囊兒金牌等簇土官阿思等對綵幣表裏金織紵絲襲衣有差。○巡按福建監察御史方端奏漳州府龍溪縣海寇登岸殺人掠財巡海指揮楊全領軍不救全又受賄人賄賂縱性琉球販鬻請治全罪。上諭右都御史顧佐等曰官軍巡海本防外寇亦防小人出境交通此輩不能防盜而又縱盜令御史治之如律。○江西按察司副使石

璞言按察司舊置僉事分蒞各道照刷文卷分理詞訟比來多因差委不得專理致訟者越訴事須追問淹延歲月移文督促案牘愈煩乞令僉事專于所分之道往來巡歷遇有訴訟即為追理或有營造軍需之務亦俾之催督其歲輸糧稅只令布政司府州縣官催運為宜 上曰洪武中有定制只如舊行之○夜有流星大如盃色赤光燭地起稜河西北行至蜀○甲午四川建昌衛土官指揮使安均遣犯事張五十湖廣施南宣撫司前順化等安撫司故土官安撫旺踵子墨言送雲南富州等衛門故土官知州沈絰經子政及族人沈即安等來朝貢馬○行在吏部奏戶部尚書蕭禧事府庶事黃福九載任滿 上命復職○行在都察院奏巡按江西監察御史劉伯大嘗以同行監生林冕用原給米買綿布虧備罪之今冕告伯大枉道還寧國

府涇縣又受內使轎乘等物請罪之 上從之周諭右都御史  
顧佐等曰古云無諸己然後非諸人已身不正而歎正人得乎  
凡任風憲必以潔己為先○乙未命故行在羽林左衛指揮同  
知王興子雄有軍左衛指揮僉事樊榮子遠襲職○兼堂行在  
戶部事兵部尚書張本言天下人民圖初俱入版籍給以戶帖  
父子相承徭稅以定近年各處間有災傷人民乏食官司不能  
撫恤多致流徙朝廷累免差徭諭令復業而頑民不遵者多官  
吏里甲或徇私情或受賄賂為之隱蔽請嚴禁令責限回還仍  
依先行榜例如每丁種有成熟田地五十畝之上已告在官者  
准令寄籍有在百里之內或百里之外分房耕種原籍徭賦不  
誤者或遠年迷失鄉貫見在吾住未經附籍者所在有司勘實  
書籍送部查考其不遷者同藏匿之家俱然所在衛所承充也



軍若軍衛屯所容隱者逃民杖充屯軍容隱之人依隱蔽逃軍  
例發邊衛該管官吏旗甲里鄰徇情容隱者俱依前榜例論罪  
若逃軍詐為逃民者亦許限內自首復役限外不自與蔽匿者  
俱治罪 上曰愚民玩法固當治且與約限三月違者罪之○  
巡按陝西監察御史梁幹奏山西等處軍士赴京操備所經之  
地假宿人家住住逼其供給薪水稍有不從輒肆箠擊又縱馬  
騷蹂踐應祀壇場祠廟及民間木豆粟麥所過百姓怨苦皆由  
將校不嚴約束亦有出其縱容分得微利者今又當操備時  
乞嚴禁約幹又奏舊制所在建按察分司專為風憲分巡而設  
比來他官催督公務住住假宿其中及所催督文移有妄作風  
憲抄索而行者有于其中肆情縱恣貪饕淫穢靡所不為污辱  
風憲皆乞禁約

上諭行在都察院臣曰御史所言二事皆切要其速揭榜禁止  
有犯者今所在有司具實奏未處治○鎮守右庸閣指揮芮勤  
言德勝關以東虎峪口至貫兒嶺口皆可通人馬乃天壽山後  
路俱無城堡宜築塞

上諭行在工部曰豐城侯李賢方脩永寧城俟其工畢就令率  
軍夫往各關口相地勢築塞○丙申湖廣五開衛平茶十戶所  
軍朱海妻劉氏一產二男一女命有司如例給賜○設雲南府  
道紀司置都紀副都紀各一員○雲南孟養軍民宣慰司土官  
同知刀玉賓奏伯父刀木且原任宣慰司使為土官刀木浪所殺  
據有其地後蒙朝廷遣官訪求王賓授以同知又阻于緬甸土  
官不得已寄居金齒二十餘年今孟養地方又為麓川宣慰思  
任發所據乞遣人送回本土以圖報效

上命行在禮部遣之還而命點圓公沐晟理之。○夜有流星如  
如盃色落光燭地起梗河西北行至濁。○初貴州烏羅府知府  
嚴律已言所屬迤古谷意二長官司長官石各野等聚衆出沒  
銅仁平頭羌橋等處誘脇蠻賊石難娘并單子坪長官司吳畢  
即等作耗招撫不服緣其地與鎮溪面陽諸蠻接境恐相扇為  
亂請調官軍土官分據其地絕其糧道且捕且撫事平之後宜  
置衛所處司以守之。事聞下行在兵部議。先是兵部請移文總  
兵官都督蕭校及貴州三司巡按御史勘實就令相機撫捕及  
應否設兵守鎮待報而行從之。

上從之。○山東都指揮僉事辛顯卒。顯秦州秦安縣人。累官至  
陝西臨洮衛指揮僉事。永樂二十二年陞山東都指揮僉事。洪  
熙元年領軍于淮安。隸總兵官平江伯陳瑄。遷種宣德元年春。

命同山東按察司副使郭振往未提督臨清等處河道開垣至  
是年訃聞賜祭子銘襲山東濟南衛指揮僉事○夜有流星大  
如鷄輝色赤有光出天圍西南行至濁口丁酉日上生背氣一  
道色青赤鮮明

大明宣宗憲天崇道英明神聖欽文昭武寬仁純孝章皇帝實  
錄卷之六十九



大明宣宗章皇帝實錄卷之七廿

宣德五年九月己亥朔給廣靈潞城山陰襄垣靈江五王歲祿各二十石米對中羊羔支○免直隸永平河間廣平三府所屬州縣及河南開封府屬縣民人去年水災田地三千三百四十五頃五十餘畝應納稅糧一萬七千四百十五石有奇穀草九萬八千三百二十餘束○庚子海西失里木等衛女直指揮同知木哈連既里河等衛女直指揮同知孫保等遵東自在等州女直指揮僉事馬兒孫等來朝貢馬及方物○辛丑以任滿考最陞河南布政司右叅政史翼為山西右布政使行在河南道監察御史王綱為山西布政司左叅議行在浙江道監察御史王哲為山東布政司左叅議調山西布政司右叅政王登為山東布政司右叅政○萬全都指揮使馬昇奏耕設都司未有治所

請以宣府前衛為之而以故都督馬興居第為宣府前衛從之  
○壬寅屢王綸請入朝復書曰為治之道親親為先予自嗣位  
以來夙夜惟念務隆愛敬今宗室中尊屬者叔祖賢德者叔祖  
且素厚愛於予者亦惟叔祖景運門綢繆猶存於心朝夕弗忘  
而恒思一見者也顧以叔祖春秋高藩屏重未敢勞動遠未難  
屢承簡牘厚意勤切亦未能如命今孔讓未承喻懇懇援禮與  
情言之詳備感佩感佩何以克當蓋叔祖之歆未見亦如予心  
之歆見叔祖至親相愛無不同也去年之書已略述鄙意但僕  
國事從容專遣人奉迎也○行在工部言昨平陽王言年妹長  
成款為婚娶而無居第今計造第宅六所每所正序及東西二  
廂舍門樓小入通九十間命侯農陳興工○巡按湖廣監察御  
史陳博言洪武永樂中設科取士不拘名數比來欽定解額務

得真才不許濫選若教官滿九年仍依舊數計其功績為難乞  
興量減 上命廷臣議之行在吏部尚書郭璉禮部尚書胡濙  
等官上議曰教官考滿以舉人多寡為陞降教授舊例舉人九  
名為補職四名為平常不及四名為不補職今定五名為補職  
三名為平常不及三名為不補職學正舊例六名為補職三名  
為平常不及三名為不補職今定三名為補職二名為平常不  
及二名為不補職教諭舊例三名為補職二名為平常不及二  
名為不補職今定二名為補職一名為平常訓導舊例三名為  
補職二名或一名為平常今定一名為補職不及者皆為不補  
凡補職者陞平常者職如故不補者降從之○大右府奏濬縣  
縣廩生命即督民捕盜毋緩○免山西絳州稷山縣夏稅時稷  
山縣奏宣德三年春旱宿麥不收所逋夏稅未納今民艱食上



司徵稅峻急乞賜矜憫 上命行在戶部除其稅○癸卯夜有  
流星大如雞潭色青白有光起五車東行至濁○甲辰命故羽  
林左衛指揮僉事盧真子榮襲職○昏刻有流星大如雞潭色  
亦有光出紫微東蒿西北行至天樞○乙巳賜四川建昌衛把  
事張五十等雲南富州土官舍人沈即安等湖廣前順化安撫  
司故土官安撫子墨言送等兀者前等衛女直指揮僉事阿刺  
先等鈔幣表裏有差○更定在外罪因贖罪例除真犯外文職  
官吏犯賊者送京師如律交治軍職犯死罪者令納米贖罪畢  
日送京師調衛非贖罪則不分輕重俱令納米畢日還職役初  
寧陽侯陳懋言寧夏邊城當廣儲蓄乞令山西河南陝西罪囚  
輸米贖罪三法司定議除真犯死罪外餘令輸米以贖旱日文  
職官吏犯徒流并雜犯死罪俱罷俸籍為民受贖及犯死罪者

發北京所屬為民杖罪應降罷者如律降罷吏改撥答罪各還職役至是巡按山西監察御史林英奏在京見問官吏惟犯贓者依律餘皆運磚以贖畢日復其職役今在外依贖米之例則官吏不犯贓者比在京例加重犯贓者比在京例減輕

上遂命三法司定議至是議上悉從之○江西瑞昌縣奏今年五月來人民饑窘已發預備倉穀五千六十八石賑濟俟秋成還官○夜有流星大如盃色青白尾跡有光起北斗魁東北行至游氣○丙午榮澤縣主辛主未寧王有光長女嫁儀賓譚學計開遣中官賜祭命有司治喪葬○陞行在吏部郎中趙新為吏部右侍郎兵部郎中趙倫為戶部右侍郎禮部員外郎吳政為禮部右侍郎監察御史于謙為兵部右侍郎刑部員外郎曹弘為刑部右侍郎趙府長史周忱為工部右侍郎總

督稅種新江西倫浙江改湖廣譙河南山西弘北直隸府州縣及山東忱南直隸蘇松等府縣先是

上謂行在戶部臣曰各處稅糧多有逋慢督運之人火能盡心效民猾胥為弄滋甚百姓徒費倉廩未充宜得重臣往蒞之於是命大臣薦舉遂舉新等以聞志陞其官分命總督賜勅諭曰今命爾往總督稅糧務區畫得宜使人不勞困輸不後期尤須撫恤人民扶植良善遇有訴訟重則付布政司按察司及巡按監察御史究治輕則量情責罰或付郡縣治之若有包攬侵欺及盜賣者審問明白解送京師敢有沮撓捏事者皆具實奏聞但有便民事理亦宜具奏爾須公正廉潔勤謹詳明夙夜無懈毋恭毋刻庶副朕委任之重欵哉○行在後軍都督僉事沈清言未寧衛城臨邊地公廨軍營俱未建士卒散處域池空虛請令都指揮韓鎮督未

作之以使守備仍令副總兵都督方政董其事從之。○巡撫傅  
卽成均奏撥松嘉湖等府春夏雨澤調均至六月禾皆茂盛秋  
成有望。上謂侍臣曰朕所憂者四方旱澇况蕪松等郡諸國用  
所資今其地雨澤及時良快朕心但未知他處何如耳。○夜有  
流星大如鷄彈色赤尾跡有光出參旗南多行至濁。丁未重  
陽節賜文武羣臣宴。既又特賜太師英國公張輔京官文武三  
品以上及學士宴。○上以歲登甚樂出御製詩賜羣臣且命諸  
學士和於是進和章者人賜鈔二十鈔。○天全六畜招討司奏  
舊額歲辦馬茶五萬斤二年一次運赴岷門茶馬同易馬今戶  
部令再辦芽茶二千二百斤山深地瘠茶多枯死艱於採辦乞  
減其數。上謂行在戶部曰邊民當寬以撫之悉免馬茶止全  
辦芽茶。○夜有流星大如盃色赤光燭地起女牀西北行至雲

中炸散又有流星大如雞彈色青白有光出昴南行至雲中曉  
列太白犯軒轅左角星○戊申有獻歷代紀年圖者 上覽既  
顧侍臣曰唐之後不五十年天下五易主生民之禍極矣周世  
宗英武觀其進取之暴制治之心足以平定天下而亦享年不  
永何也侍臣對曰帝王之興自有天命非人謀所反 上曰國  
家創業垂統貴有根本三代以下若漢高帝掃除秦苛以濟蒼  
生唐太宗革隋敝政以致太平其規模皆弘遠所以傳之子孫  
皆長久若後周之主稱兵為逆劫掠京城曾無佳濟之功室家  
先覆而世宗以養子躡之欲其崇祀長久得乎宋太祖陳橋之  
變一號令之間杖毫無紀極主民於淪溺革故李之兵禍子孫  
享國與漢唐同久若蓋有仁厚為之根本豈偶然哉○上諭兼  
掌行在戶部事兵部尚書張本曰聞各處細民多困有司失於

撫字及富豪之家施貸取息過虐以致貧窘流移外境既招獲業獨負祖免更徭以優恤之尚慮貪墨官吏并豪民仍前肆害爾戶部榜示天下嚴禁約之并勸諭親鄰同里之人協助調恤有機害之者罪之。命闡化王使臣伴刺麻烏都指揮僉事賜之冠帶。行在戶部奏長蘆鹽運司所屬石碑等場在永平府境內離河路遠積鹽數多宜減例召商中納每引止輸米三斗又山東運司信陽等場所積之鹽亦多自今鹽課每引折收闊綿布一疋今運送登州官庫以備遼東一用上曰此亦變通之法但恐折布寬丁難辦其移文山東布政司計議若於民無損則可行。直隸真定府隆平縣奏七月雨潦傷下田木稼。昏到有流星大如雞彈色青白尾跡有光出外界南行至濁月犯壘壁陣西第二星月在下五鼓有流星大如雞彈色赤尾跡

有光出北平魁東北行至迎濁口廣成上臨朝謂尚書張公等曰昨觀都督山雲奏訪察廣西所屬軍官其中能事者雖多然廉公而能者十有一二貪婪而能常者八九蓋武夫悍將唯知好利不矜業已恤軍保守名爵今當正其賞罰使廉能者加勉貪暴者知戒庶幾軍政修明遠人獲安口土魯番城回回撒都等言河衛七直指揮同知打牙等未朝皆奏稱居京自效命撤都等二人為百戶各賜冠帶金織紫衣綵幣銀鈔鞍馬仍命有司給房產器皿等物如例口省山東曹縣知縣范希止罪今復職希正在曹縣得民心有姦吏詐取民財縱火延燒公廨希正執之下獄械送京師姦吏誣希止以他事被逮縣民八百餘人訴於行在通政司言本縣累年正官有廉而無能者有能而不廉者希止廉能公勤寬平止大嚴約吏卒愛恤人民纖毫無

取不一歲間政簡訟息今為姦吏所誣此吏欺公玩法蠹政害  
民通邑所慮布止彼<sup>被</sup>違之日民人老少莫不流涕如失慈母若  
不為伸寃枉恐被誣陷通政司以聞時侍郎許鄭過曹縣民老  
者一百五十餘人懇訴于廟與前新同郭移行在吏部吏部亦  
具以聞時行在刑部方奏布正不應徑解姦吏赴部論以違制  
上曰聽民之言布正君子其徑解赴部蓋欲急去惡耳君子  
不足論其小過即遣復職以慰其民姦吏令刑部嚴治之布正  
蓋伸淹之後云○免山西公西縣夏稅時縣奏宣德三年夏<sup>歷</sup>墜  
少兩秋初早霜麥木皆無收今秋糧已免徵而夏稅難辦上  
命行在戶部併免之○辛亥襲封衍聖公彥<sup>孔</sup>縉奏闕里惟樂及  
樂舞生<sup>冠</sup>服<sup>服</sup>敝壞命所司修治○陞山東布政司左叅政劉中  
敷為本司左布政使戶<sup>部</sup>外郎劉登為山西布政司右叅議



○免直隸揚州逃民一千二百二十九戶去年今年所欠鹽糧米二千二百八十一石秋糧三百八十五石穀草五萬八束唐縣復業民一千二百九十五戶今年稅糧二十七百七十石有奇穀草四萬三十一百六十餘束○增崇明沙戍兵初行在工料給事中彭璟言崇明沙四面皆海止有一十戶所先周傳魁為患調鎮海鎮江一衛軍士十餘人助守民得以安切見鎮海衛瀕海當自為守鎮江衛相離稍遠往來不便宜遣歸別於崇明縣清出軍士及棧州等衛鄰近收操軍士選精壯者千人增官統領以固守備 上從之遂令造崇明沙守禦千戶所即增置戍兵一千一百二十人除百戶十人領之○罪人嚴暲伏誅暲初為南京御史數受賅監察御史劉弘道奏點之暲賂行在都察院左都御史劉觀得復職又受賅曲法縱肆不檢淫蕩無

度右都御史顧佐劾御史之貪法無耻者十數人而體為首俱  
滿為吏於遼東各衛體不受役潛逃至京仍造詞脅取財物  
上命三法司鞠之奏體所犯應死都御史顧佐又貪體切憾已  
謀款加害今在京師蹤跡詭秘切慮早夜出入倉猝道路不能  
防之上命戮於市○士子四川董卜韓胡宣慰使响噶遣子  
奔卜刺麻實思以僧結等來朝貢馬及方物○湖廣元陵縣奏  
民間納稅山場俱產杉木比者商賈買山轉鬻砍伐幾盡及至  
官所需材乃勞民遠役請下有司禁止商販以備後用上不  
從顧謂侍臣曰天生五材民並用之今惟款奉承官府而廢民  
生業朕不取也○免山東濰縣稅糧時維縣奏民三千四百七  
戶流移外境田土荒蕪今初招撫復業宣德三年四年逋負夏  
稅表五千三百六十四石秋糧一萬九十一百八十六石有奇

請折收鈔 上謂行在戶部臣曰流徙初歸生意未遂其所通  
欠盡免之○直隸鉅鹿縣會六月苦雨漳河泛溢衝決堤堰瀕  
河低田皆被災 上命行在戶部臣曰凡被災傷處皆覆勘除  
其租○癸丑勅總兵官平江伯陳瑄增修淮安徐州倉所用材  
木於南京抽分場及緣河所積官木內用時 上聞淮安徐州  
收穫多露積非經久之計故有是命○琉球國中山王尚巴志  
遣使臣住期已那遼東都指揮僉事金聲野木河衛指揮同知  
朶多大嵩衛鞬官指揮同知馬撒蓋副千戶脫台等來朝貢馬  
及方物○甲寅陞北京國子監博士汪奉許子謨為翰林院檢  
討仍理博士事時行在吏部言舊例國子監官九載考滿者但  
獲職增俸奉等已經三考應復職 上曰國子監官有例復職  
固是優待儒者但他官九載俱陞職學官獨不陞乎遂陞奉等

為翰林院檢討仍理博士事又曰若教官中有學術才識出眾者尤當不拘資格拔擢勿謂儒者不可用○擢監生楊英為南京刑科給事中楊信民為行在工科給事中張紀為行在刑科給事中復陳宗淵行在中書舍人及輝行在河南道監察御史調行在工科都給事中文郁於行在兵科行在禮科給事中郭泰於行在吏科行在戶科給事中郭顯於行在工科廣西按察副使張周中於山東按察司浙江按察僉事張約於山西按察司四川按察僉事曾鼎於廣東按察司福建按察僉事周常於河南按察司皆以親終服闋也復白亨直隸廣平府通判陞從五品祿亨任滿例當陞以其民奏乞留之故有是命黜行在山東道監察御史劉翥為河內縣知縣湖廣道監察御史何澄為平遙縣知縣以不勝職任也○乙卯 車駕巡遊郊命豐城侯

李賢行在兵部尚書張夔右都御史顧佐等居守命成國公朱  
勇曰朕今巡視近郊爾與太監劉順提督大營官軍嚴肅守衛  
謹慎關防一應軍務公同計議而行是日駐蹕西湖之東○夜  
有流星大如雞卵色赤尾跡有光出於西南行至雲中○已未

青白有光此星入雲中○戊午夜有流星大如雞卵色

車駕還京師○朝鮮國王李禔遣陪臣李岐等貢方物謝恩  
初朝鮮民白隆等十七人泛海市鹽因風漂至上閩之謂行  
在禮部臣曰十七人皆死而得生即送還本國遂給道里費遣  
之且賜齋祠至是遣岐等來謝○賜海西失里木等衛女直指  
揮同知木哈連阮里河等衛女直指揮同知孫保等遵東自在  
等州女直指揮僉事馬兒孫等鈔綵幣表裏及布有差○行在  
兵部尚書張夔奏總兵官寧陽侯陳懋言寧夏備禦官軍缺馬  
騎博今議於北京行太僕寺先給二千匹候春於御馬監再

給從之。○庚申涿州灤城蘆溝有韃軍殺人劫財事聞。上命

行在錦衣衛指揮張信往督所在軍衛捕之士戍刺竹頭目納

達刺達使臣阿老丁等未朝貢馬。○行在江西等道監察御史

汪景明等劾奏成安侯耶晟建平伯高遠扈蹕郊外不奏先歸

夜叩德勝門而入徑回私第。○總旨偷安請正其罪命下錦衣衛

獄。○總兵官寧陽侯陳懋奏寧夏軍儲皆仰給陝西今西安延

慶等府稅種免徵寧夏軍食不足請以陝西三司及所屬罪囚

應陝西安府倉納米贖罪者改發於寧夏衛倉庶使軍食給足

命法司議。○○成有延運人如延慶等處編地起人元西面行是也癸亥撤刺兒衛指揮同知卜也哈叱河衛指揮倉

事忽失八古里河衛指揮倉事。○今加等未朝貢馬。○烏思藏

闡化王遣來使臣孫竹奏願看京自效命為所鎮撫賜金織襲

衣綵幣鈔布仍命有司給房屋器皿等物如例。○直隸冀州奏

本州及所屬新河縣今年八月久雨不止河水漲溢淹沒民田  
八十二頃有奇山西應州奏八月嚴霜殺穀顆粒無收命行在  
戶部悉免其租○甲子廣寧衛舍人朱真妻何氏一產男女三  
人命給賜如例○湖廣都司都指揮同知黃榮等奏先奉勅蒞  
屬衛官軍往廣西聽調及總兵官都督山雲坐調武昌及武昌  
左二衛軍各五十人臣與都指揮僉事魯曾共議都司所治城  
內只二衛路當要衝差遣繁多每衛各減留十五人而於茶陵  
衛多調十人衡州衛多調二十人以足其數今武昌衛十戶吏  
紀告經歷王瓚都事焦達那移軍士按察司如紀所告生瓚等  
罪緣調軍皆臣二人斟酌增損瓚達實不與知請罪臣等上曰  
幕官職治文書何與調疾命釋之榮等且不問○鎮守泚州都  
指揮使李達奏泚州大嶺山路通河州而去泚州城遠畜寇往

往潜伏其間窺伺搶掠請于大嶺山北增設關堡以鎮軍二十人守備從之。乙丑行兵部尚書張本言宣德四年太僕寺及北京行太僕寺孳生馬騾駒六萬七千五百九十九匹例當印記。上命駙馬趙輝永康洪徐安往監之。行在都察院奏金吾前衛軍士應得宣德三年四年冬夏布至今年五月方奏給之。請治衛官稽緩之罪。上從之。召在廷武臣諭之曰朝廷慮軍士貧難故令及時給之。管軍官當先時舉行。庶下人得用此輩安享俸祿。上不體朝廷之意。下失衆人之望。已命都察院罪之。爾等當以軍士為心。勿踵斯弊。國法不爾貸也。○廣東始興縣奏本縣久荒官民僧地田山塘二百三十頃九十八畝無人承佃。稅糧七百九十六石有奇。乞興除豁。上命行在戶部覆實除之。○曉刻熒惑犯靈中星。○丁卯以明日元節遣衛王



賸延榮 長陵 獻陵○賜奉使撒馬兒罕等處還京鎮撫馬  
黑麻迭力月失等十一人銀鈔絲帶表裏紗羅綾紬等物仍陞  
馬黑麻迭力月失為指揮僉事餘陞秩有差○罷統州燒造磁  
器初行在工部奏遣官燒造白磁龍鳳文器皿畢又請增燒 上  
以勞民費物遂命罷之○行在中軍都督府奏比者直隸金山  
衛言蔡廟港舊立營寨烽墩屢被海濤衝決欲遷於高岸命臣  
等同行在兵部計議宜令防倭都指揮張翥審度若果可遷就  
發軍修築 上然其言○鎮守洮州都指揮使李達奏遣軍跋  
馬巡哨請運漢中府所貯茶五萬斤往洮州市馬從之

大明宣宗憲天崇道英明神聖欽文昭武寬仁純孝章皇帝實  
錄卷之七十

大明宣宗章皇帝實錄卷之七十一

宣德五年冬十月戊辰朔享太廟○遣中官祭司井之神○武功中衛軍李伍妻單氏一產二男一女命給賜如例○己巳賜朝鮮琉球二國貢使宴○賜四川董卜韓胡宣慰使喃葛所遣子奔卜刺麻賈思八僧結等絲幣表裏紵絲製衣等物有差特喃葛奏乞致事請以長子額僧象次子治民人上從之遣鎮撫沈羽等齎勅及文錦絲幣金織紵絲製衣往賜喃葛命其長子班丹也失為刺麻次子充羅俄監繫代為宣慰使○充直隸鎮江府金壇縣民宣德三年水災官民田租一萬六千九百五十六石有奇馬羊一萬九百二十四匹○行在戶部奏慶成王堯威根宜羅王有庶長子既與一品冠服當月給祿米八十石請於太原府分州所屬支給又奏各處諸邑課程鈔除雲南四

川貴州存留本處其直隸府州兩廣福建俱解赴京京師鈔所  
從出而天下所收者又歸於京物重鈔輕沮滯不行况兩廣福  
建距京萬里起運甚艱今後惟附近京師御史所收者送納內  
府其餘於所在官司收貯凡內外大小文武官折俸鈔及買辦  
物料價值約量所收多寡分派就彼放支庶鈔法流通官民兩  
便 上皆從之○鳳陽中衛指揮周渙培剋軍糧逼取白金軍  
吏不堪繫之詣闕陳訴至直沽渙伺間解繫逸入京舍指揮盧  
春家言款訴都督陳恭楛移 皇陵樹及私役軍為成國公朱  
勇祖塋建享堂令春以告勇且云得銀即止不訴勇以聞 上  
命執渙春付都察院至是都察院請逮勇及恭 上曰勇勲臣  
其可為小人所誣不問恭亦未可罪更察其實以聞○巡視邊  
關監察御史劉教言自山海衛境內黃土嶺至薊州衛迤西諸

團頭凡二十二營每營官軍多者七八百人少者五六百人遇有疾病志無醫藥每七兩營置醫一人官給藥餌徃未治療從之。巡按雲南監察御史杜琮奏土官有犯例應奏請提問奉以寬待之而蠻夷恃恩愈益縱肆每犯罪即以進貢為名遷延避匿或巡歷鄉村橫歛無厭人多受害請如流官例立品以上奏請六品以下聽巡按御史按察司提問庶革茲歎。上以其奏示法司且諭之曰蠻夷不可以中國之治治之時所言過矣其循祖宗成憲毋改。○浙江湖州府趙登和府奏同知李迪嗜酒猖狂蔑棄禮法或衣褻服袒裸公堂每事任己不肯從公。上謂都御史顧佐曰褻慢無禮之人豈可使佐郡今巡按御史治之。○庚子命行在尚寶司丞蔣先禮科給事中武達為正副使持節封寧王第四子盤柱為新昌王同金吾後衛指揮鑾黜女為

宜春王妃尚寶司少卿俞敬戶科都給事中卜禎為正副使持節同靖州衛千戶張勝女為江川王妃寶慶衛所鎮撫徐果女為廣通王妃寶慶衛千戶沈瑄妹為陽宗王妃○巡撫河南工部侍郎許廓奏各處逃民久不獲業近蒙寬恩令於所在入籍然有已居十餘年者耕種甚廣賦役不供宜令有司取勘凡居五年之上而戶有三丁者取一丁不及三丁令朋合一丁編定班次輸流赴京充雜役每年<sup>十</sup>一更再逃則編流充軍庶使民知所懼 上諭行在戶部臣曰民逃為避役耳方今入籍豈可遽役庸之言勿聽○辛未免直隸鎮江府丹徒縣民淪沒大江田一十頃六十畝<sup>稅</sup>糧○辦監察御史王紹賊罪先是都察院<sup>御史</sup>劉觀與書吏莊彥琦交通受罪人蔡琳金出其罪令紹具文書遣寧家時彥琦受琳金多於觀事覺彥琦指言紹亦分受金下

獄紹訴寃 上命三法司辨之至是右都御史顧佐等辨紹實  
不分金惟不應從觀指使應杖罰役復職從之○湖廣都司奏  
荊州右衛指揮同知程賓領軍操備違王禽賓杖之有傷王又  
與民人李彥芳等押至飲酒其家又數引兵圍逼三庶人宅欲  
加害 上遣勅諭王令其戒謹毋縱肆背理以招物議○饒州  
府餘干縣民張守文詐為龍虎山道士稱奉密旨往雲南兩廣  
以化緣為名體訪事情雲南按察司執之以聞 上曰自古小  
人造偽惑衆皆託釋道以售姦命行在都察院窮治之○日上  
生背氣一道色青赤鮮明○士申遼東撒乂河衛指揮同知長  
加等未朝貢馬○山西布政司叅議王僞有罪謫充軍僞以替  
公務至沁州索取州官財物又於公宇挾妓宴飲事覺 上命  
杖之陰濁石充軍○夜有流星大如碗色青赤光燭地起中台

東北行在北斗魁散○癸酉琉球國中山王尚巴志遣使者魏

古渥制四川石柱宣撫司把事向添林湖廣前點南道宣慰司

故土官宣慰使覃國欽子宣等來朝貢馬及方物○賜山東大

嵩衛韃官指揮同知馬撒蓋副千戶脫台野木河衛指揮同知

朵多等鈔絲幣表裏等物有差○初行在戶部言山西歲納大

同宣府秋糧負欠者多請令布政司官量徵土物赴邊糴米輸

納至是山西布政司上轉輸事宜六條一山西歲納大同宣府

之糧宜徵民間所產有度邊境所宜用若布絹綿花茶鹽農器

等物估其時直十分減二運赴邊上令掌收糧官辨驗酌量市

米上倉一運物於大同宣府糴米上倉雖便然難盡糴於一處

宜於應朔蔚州渾源附近大同宣府常豐之處初置集場塌房

委官平糴轉運赴倉一歲年負欠之糧未經蠲免者先徵十分

之四收其土物如例赴邊報米納足一撥糧之處宜有斟酌平陽太原澤潞殷賓州縣俱徵物貨赴邊吉隰近山硤瘠民力艱難宜存糴米五分納於隣境衛所其餘徵收物貨貯於布政司官庫陸續運去易米輸納一大同宣府官軍除操備守邊之外餘丁尚多宜從各衛勸實督令屯種戡收子粒儲備備用一邊衛軍士及合查調未備禦者月糧宜支本色其餘官旗俸糧宜估價折與布絹等物則軍民兩便事下行在戶部會官議以為可從但集場塌房宜待事有效時設置上從之○總兵官平江伯陳瑄言運糧官軍例以九月終休息修船南京中郟留守司直隸衛所船於淮安修山東等都司船於臨清修湖廣江西浙江都司皆回原衛修俱全有司給材料乞如何遣教又言往年俱選能幹精壯官旗管運軍船俱集餽運易完比因河淺轉



漕額艱原選官祺賄求他役來者皆老疾幼弱不能銜束軍士  
乞勅巡按御史布政按察二司及原漕運都指揮凡軍多衛分  
選舉指揮二員軍少者一員其十戶下皆選能幹之人運糧軍  
士亦選精壯者悉限明年正月至淮安備運為便又言自臨清  
至安山河道春夏水淺舟難行漳秋西南舊有汶河通汴朝廷  
嘗遣官修治過水小時於金龍口堰水入河下注臨清以便漕  
運比年缺官遂失水利漕運竇難乞仍其舊 上命行在戶部  
悉從其言○山西按察使張政言所屬府州縣官有當考滿而  
任內稅糧未完淹久不能赴部難以作缺鈔注多妻雜職指署  
人不聽從豈能集事亦慮各處皆然乞勅吏部凡天下官三年  
六年滿者俱全赴部給由回任所欠稅糧立限追徵不完者如  
律究問九年考滿者就便鈔注任內錢糧完足方許給由展官

無曠職事無廢祀。上謂尚書郭璠等曰：「事貴適宜，若必俟糧完然後赴考，則曠職廢事多矣。宜從其言。」免四川筠連縣民納茶時筠連縣知縣蔣永亨言：「宣德二年，縣民所納課茶已收二萬五百五十斤，在官為作耗，蠶人燒毀，令茶戶賠納尚欠二千三百餘斤。今訴貧難乞蠲免。」上謂行在戶部曰：「茶已納在官，為賊所燒，豈可復徵？邊民宜加存恤，其悉免之。」有晚刻榮感祀上將。○甲戌，賜琉球國使臣住期已那等綵幣表裏。有差仍遣齋勅及鈔二萬一千七百六十錠歸賜其王。○巡按山東監察御史陳毅言：「遼東新設軍遠衛軍士，初至未經屯種，倉無糧儲，衣食不足，都督臣朝奏請以定遠衛諸所軍士各布分借與軍遠之軍糧糧食，用然所借有限，終非常法。莫若將遼東都司官吏軍餘犯罪者除重罪解京外，其徒流杖苔定納米等第

運於寧遠贖罪則軍士可以少濟俟下年屯種秋收則止。上  
然其言仍命行在戶部兵部都察院議定以聞。○日生左右珥  
色青赤鮮明。○乙亥平陽王系圭奏母妃傅氏薨遣官賜祭命  
有司治喪葬。○賜朝鮮國使臣李岐等綵幣表裏金織紵絲襪  
衣有差。○巡按直隸監察御史白圭奏徐州碭山豐沛三縣六  
七月以來雨潦為患倉沒田稼。○初陝西漢中府奏本府所屬  
共一三州縣止有四十七里民少役繁金州南鄭諸縣多開田  
乞徙山西陝西四川附近州縣丁多之民以實其地。上謂行  
在戶部曰人情安土遷之殆社其與。○六部議至是議奏天下郡  
縣人民版籍已定產業有恒若遽遷之他鄉不無驚擾不可遽  
從之。○遼東衛指揮同知皇甫斌以禦虜寇力戰死斌鳳陽壽  
州人先任興州屯衛指揮同知遼東都指揮臣凱薦其才改遼

海衛為人志勇有智畧遇警急不避險艱身先士卒至是虜寇  
犯邊領軍禦之至宻城東峪與寇遇交戰自旦及晡試氣愈銳  
戰愈力以矢盡死子弼從戰以身衛父亦死一時同死者三萬  
衛千戶吳貴百戶吳聚遼海衛百戶七觀貴河南汝州人聚鳳  
陽泗州人觀廣德州人三人在軍中皆剛勇善戰每兵出必當  
先鋒至是皆從試戰以矢盡死然其所殺傷虜甚多虜亦退却  
事聞 上命有司褒恤○丙子 上以農事既畢將巡近郊勅  
豐城侯李賢部督張昇兵部尚書張本都察院右都御史顧佐  
等居守曰朕今巡飭邊備特命爾等守北京大小之事須措置  
得宜遇有警急機務同太監楊瑛等計議允當隨即施行仍差  
人馳奏○勅太監楊瑛林景芳李和等守皇城內外凡內府各  
監局等衙門內官內使俱從管束一應事務與豐城侯李賢等

同心計議毋漏執已見以誤事機○是日 車駕發京師 駐

蹕王河諭成國公朱勇等曰今農收雖畢而木稼在場民間公

私之費皆出於此扈從官軍不許入民家有所求索違者處以

重刑其中令各營悉知之○昏刻月犯壘壁陣西第五里五鼓

有流星大如碗色赤光燭地起即將東南行至五諸侯炸散○

丁丑 駐蹕龍虎臺命軍士皆先出關命光祿寺賜扈從官酒

饌晚召英國公張輔成國公朱勇尚書蹇義學士楊士奇楊榮

金幼孜楊溥至帷中間郊外民事及邊備論議久之命尚膳賜

輔等酒饌 上親酌酒飲之既而諭之曰卿等皆昧爽先度關

道中見聞有當言者勿隱○戊寅 車駕度居庸關駐蹕岔道

遣使齎勅諭太監楊瑛林景芳李和少監孫進保等曰朕已率

師出關爾等宜恭謹承事 聖母皇太后務竭勤誠不許纖毫

怠忽。○夜有流星大如雞彈，色赤，尾跡有光，出狼星旁西南行，至濁。○己卯，臘于金道，遣中官進鹿充于皇太后，且奏十一日出居庸關，天日晴和，隨行將士皆悅，農務俱畢，木稼有收，邊備亦修，關外軍民亦頗足給。皆聖母仁恩所度，庶無煩。聖念○初，恭順侯吳克忠、遂安伯陳英、武進伯朱冕、太監劉順等循例出境燒荒，上諭行在工部尚書吳中曰：「今雖晴暖，然關外氣候旦暮不一，宜預備軍士衣鞋，其即遣人馳往北京運來給之。」○庚辰，駐蹕金道。○辛巳，駐蹕懷來。○壬午，駐蹕雷家站，召學士楊士奇、楊榮、金幼孜、楊溥諭曰：「明日度雞鳴山梁道險隘，車騎湊聚，難進，卿等慎之，寧緩勿求速也。」遂賜果茗，從容問曰：「唐太宗過此，非征遼時乎？」衆對曰：「然。」上曰：「太宗恃其英武而勤遠，若然，此行所喪亦不少。」衆曰：「太宗後亦悔之，憫忠闇。」

所以建也其事則後世帝王之鑒戒 上笑曰因論此山遂及  
太宗又問此山崩於順帝時人率謂元下之徵卿等以為何如  
衆對曰順帝自是亡國之主雖山不崩國亦亡 上曰此言正  
合朕意昔聖帝明王之世未嘗無災異大抵國之存亡繫其君  
德之仁與不仁而已○癸未 駐蹕宣府之泥河總兵官都督  
譚廣入謁 上勞之曰卿 祖宗時宿將自守邊以來邊境無  
事皆卿之功簡在朕心未嘗忘也遂賜金織文綺衣一襲鈔五  
千貫又諭廣曰扈從將士敢違法擾人者悉繫以未晚召蹇義  
楊士奇金幼孜諭之曰朕明日前行兩程至洗馬林卿三人皆  
年高不任驅馳可暫留宣府朕往復只五日即同歸矣又命行  
在吏部刑部都察院太常寺及六科給事中等官皆留宣府命  
楊榮楊溥胡濙吳中等扈從○甲申 駐蹕老鴉站○乙酉

駐蹕洗馬林工部運軍士衣鞋至是北京。上命尚書吳中等即日散給。丙戌駐蹕洗馬林。上親歷城堡營壘徧閱士馬鎧甲旗幟皆補。上意大悅。召見諸帥咸加賜勞。丁亥駐蹕洗馬林遣勅諭太監楊瑛林景芳李和等曰朕十八日至洗馬林親歷城堡閱視兵備咸畢以二十一日旋師二十五日至京爾等宜敬謹奉侍。聖母皇太后不得出城迎接。是日臘。晚。上御帷殿楊榮等皆侍。上問人君馭世之權何者為重榮對曰命德討罪二者是也。上曰二者天下之公器人君持主之耳若舜擊十六相誅四凶而天下悅服此以天下之好惡為好惡也齊威王封即墨大夫以萬家而烹阿大夫齊國大治此不以左右之好惡為好惡也故爵賞刑罰至公無私然後能服天下侍臣咸叩首曰誠如。聖諭。戊子。回鑾駐泥



河○己丑 駐蹕泥河命都督郭義沈清及太監表琦率軍士  
留宣府等處圍獵諭之曰非以為禽也慮鷹兔知朕遂京或為  
違憲如遇有警爾等協同備禦不可輕忽仍戒士卒不許擾人  
違者一體治罪○庚寅 駐蹕懷來○夜有流星大如碗孟色青  
白光燭地出墳墓西行至濁炸散○辛卯 駐蹕岔道○壬辰  
車駕至京師○夜止鼓有流星大如雞擘色青白尾跡有光  
出北河北行入雲中○癸巳賜撒剌兒衛指揮同知卜也哈屯  
河衛指揮僉事忽失八古里河衛指揮僉事必全加等及刺竹  
頭目使臣阿老可等絲幣表裏有差○浙江按察使林頌奏考  
覈郡縣官貪污及無能者金華府知府錢潤等十七人 上命  
行在吏部照罰如例○河南南陽府奏七月初旬驟雨連日山  
水泛漲衝決河岸漂流人畜廬舍滄沒農田粟穀豆皆以無收

命行在戶部優恤。○甲午雲南總兵官黔國公沐晟奏奉勅撫諭鹽井衛土官千戶刺馬非遷所侵掠永寧府土地人民已令都督同知沐昂勒兵諭以禍福令遵依勅旨志已歸還事安民安。上曰蠻夷作過常事服則舍之。○巡按湖廣監察御史朱鑑奏茶陵衛指揮喻成領軍捕賊賀麻哥等而私與賊通受賊銀五百餘兩妄執平民為賀林哥殺以徇衆而賀麻哥實在為害未已。上諭右都御史顧佐等此與叛逆同死有餘辜令御史丞問之。○廣東海面衛指揮黃瑀專兵勦黎寇初違邇不進養寇縱恣及進不親督戰致官軍敗績巡按御史陳訥奏請罪之。上曰軍官職在捕寇遇小寇已怯不進見大寇當如何其令御史及按察司鞠之果實必殺不貸。○萬全都司奏所轄衛所一十六處皆是臨邊今缺官二百四人慮緩急乏使令

上謂行在兵部尚書張本等曰官軍守邊雖有總帥亦須裨校  
得人乃能成功宜卽選擇除授○江西彭澤縣奏縣民缺食已  
給官倉穀一十八百六十四石賑濟○夜有流星大如雞彈色  
青白尾跡有光出土司空房南行至濁又有流星大如盃色赤  
尾跡有光起奎西北行至營室○乙未瓦剌等處頭目猛哥不  
花等遣使臣 顏帖木兒沙州赤斤蒙古二衛都督因即未等  
遣舍人阿魯火者等來朝貢駝馬○浙江於潛縣奏縣民五百  
五十七戶之食已給官倉穀五百五十五石賑濟○直隸廣平  
府成安縣及大名府內黃縣奏六七月天雨連綿河水漲溢淹  
沒官民田地苗稼無收上命行在戶部蠲其田稅 上退御文  
華殿謂侍臣曰水旱災傷世恒有之若專言人事所致免湯之  
時亦不免若專言天道洪範庶徵實不乎五事畢竟君道當修

其在己不可奪之於天侍臣對曰亦貴國家素有備也 上曰  
國家有備尤不若百姓有備侍臣對曰 聖諭誠富昔齊桓公  
出見老而饑寒者命賜衣食老人曰賴賜一國之饑寒者公曰  
寡人之廩府安足以周一國老人曰君不奪農時不奪菽麥則  
一國之人皆有衣食此正合 陛下之旨 上又曰朕常愛唐  
太宗言凡營衣食以不失時為本夫不失時者唯人居簡靜可  
致若兵戈屢動土木不息而欲不失時豈可得也此誠名言  
上又曰堯九年之水湯七年之旱非聖人能救恤百姓無恤美  
口丙申夜有蓬星色白如粉絮見外屏南漸東南行經天倉天  
庾凡八日始滅

錄卷之七十一

大明宣宗憲天崇道英明神聖欽文昭武寬仁純孝章皇帝實

大明宣宗章皇帝實錄卷之七十一終



千把大砲三百箇 上命減半給與仍命行在工部別造手把  
銃給之 廣西總兵官都督僉事山雲奏廣西潯州平樂等府  
蠻賊屢出劫掠調指揮僉事魯義等領兵追捕斬賊首四百五  
級歸所虜男婦三十九人人奏自宣德三年至宣德五年征勦  
廣西柳州慶遠等府忻城馬平等縣叛蠻斬首七千四百十九  
級歸男婦一千五百三十五人給運親家 副總兵都督方政奏  
開平備禦官軍分爲兩番自齋糧料今當啓行而覘知虜寇有  
在峇古川極黎山者去開平不遠恐爲所襲請發附近軍夫一  
萬人運糧料而以騎兵護送行在戶部言今年春夏以來自開  
平來者並言無寇盜北邊將設詞欲變更番之例以動民耳  
上曰今天氣寒洩寇虜南駕之時不可執一令方政會郎中  
王良再議果當防護即撥軍與之 曉刻災惑犯左執法 廣

子勅行在都察院副都御史賈諒行在錦水衝指揮王裕叅議黃翰同奉御張義興安住江西巡視軍民利病凡軍衛有司官吏及富豪大戶姦民強盜爲軍民害者體實擒拿輕者就彼發落重者連家屬解赴京師仍戒諒等務公勤廉謹毋徇情往法縱釋有罪及濫及無辜 監察御史沈敬等劾奏行在後軍都督僉事張廩盜官木及甄瓦役軍匠創造私居請寘於法 上曰武夫無識辜宥之 河南左布政使魏源奏本司織染局歲造段匹皆用所屬府州縣人民稅絲自永樂二十一年至宣德四年因民逃徙適召稅絲二萬二千五百二十兩遂致紵絲五百六十三匹未納今蒙恩蠲免宣德三年以前逃民稅糧其未納段匹無絲織造乞一體蠲免 上謂行在工部尚書吳中曰絲既無徵又在赦前其悉免之 夜心流星大如盃色赤光燭



地起叅旗西南行至天苑辛丑 上以天氣已寒勅罷遣緣河  
運木軍夫候來歲春暖赴役 雲南浪穹縣把事趙保貴州都  
坪峨異溪蠻夷長官司長官黃勳遣頭目羅海金等貢馬 賜  
兀刺女直貢使宴 壬寅兵部郎中劉文勇奏已招撫漢中府  
漢陰等縣逋逃軍民三百七十五戶男婦一千五百七十七人  
沔縣等處逃軍流民七十八戶男婦三百三十五人軍俱發附  
近漢中衛帶管民於各縣寄籍其中有願為原籍原衛者皆已  
發遣初陝西巡按御史言軍民逃萃於此者衆故遣文勇往招  
撫之 昏刻有流星大如盂色赤光燭地出壘壁陣西行至濁  
五鼓有流星大如雞禪色赤尾跡有光出軫東南行入雲中  
癸卯給郢府光化郡主及儀賓王雄歲祿共八百石乾城郡主  
及儀賓魯信向障郡主及儀賓周頤如之平陽府靈石縣主及

儀賓高遜歲祿共六百石文水縣主及儀賓曹祥定襄縣主及  
儀賓駱善如之俱於南京米羨支湖廣沅陵縣有惡虎為  
民患勅總官都督蕭授及湖廣都司捕之上因諭行在吏部  
尚書郭璉曰古之守令有善政者蝗不入境虎自渡河今沅陵  
有虎患其有司之政可知即移文成飭之使之脩政弭患則固  
勝於人力也 琉球國中王尚巴志遣使者郭伯茲每等來  
朝貢馬及方物 命行在戶部上魯番來歸都督僉事尹吉兒  
察月俸視山後人例於北京米鈔各半支給 以馬政不飭下  
太僕寺丞宋載劉璧錦衣衛獄 甲辰修鳳陽皇城內奉天等  
門及外廊 賜龜東撒叉河等衙指揮同知長加等詠幣表裏  
這帽等物有差 昏刻有流星大如雞毬色青白有光出天國  
由行入雲中又有流星大如雞毬色青白有光出天國 有光出天國

至天因 乙巳朝鮮國王李禔遣陪臣鄭淵等貢馬及方物賀

皇太子千秋節 賜琉球國使臣魏古渥制等鈔綵幣表裏

有差 修天津三衛倉 行在兵部奏山西按察司言各衛所

軍士赴京備操往來多無馬驢屯軍多缺耕牛今山西三司及

有司軍衛罪因所輸贓寄有牛馬驢騾請以給軍每歲終具數

違行在兵部及山西太僕寺庶幾官民兩便如之 南京地震

丙午賜四川石柱宣撫司把事向添林等湖廣前黔入道宣

慰司故土官舍人覃宣等鈔有差 丁未嘉河等衛女直指揮

同知劉隆加等來朝貢方物 賜瓦剌等處使臣卜顏帖木兒

沙州赤斤蒙古等衛舍人阿魯火者屯河衛指揮同知土罕忽

喜愛衛指揮幹黑等鈔幣表裏有差 戊申 皇太子千秋節

免賀禮 夜有流星大如碗色赤光燭地出文昌西北行入紫

微垣內散又有流星大如鷄彈色青白尾跡有光起天社東南行至濁 庚戌賜貴州都坪峨吳溪蠻夷長官司頭目羅海金雲南浪穹縣記事趙保等鈔有差 都督沈清奏神機營新補官軍一萬餘人多不練習請如舊法操演本營原設十五司每司都指揮一員總之指揮一員提調止存都指揮二員其新選任事指揮亦不練習乞命行在兵部選能幹老成都指揮指揮總督提調庶得操練有方 上命神銃手擇日於教場內操演所缺官兵部選補行在兵部奏令各都司按察司及巡按監察御史採察軍職廉能練達者令其任事餘有老疾年幼不堪用者請旨處置 上曰軍旅之事非老幼殘疾之人所堪其年幼襲職者令食祿令本衙所應襲舍人操習三年之後可用令管事老習者以子孫代其子孫亦如年幼襲之例未出幼者如例

優給無嗣者令食祿優閒以終其身 罷松花江造船之役初

命遼東運糧造船於松花江將遣使往奴兒干之地招諭至是

總兵官都督巫凱奏虜寇犯遼 上曰虜規知遼實故來鈔掠

命悉罷之 萬全都指揮使馬昇奏開平衛進 皇太子千秋

筵及今五六次當各專遣官不當共遣一人齎進請治守禦指揮之罪 上

諭行在禮部臣曰邊衛武臣守禦為重此不足治 四川寧川

衛指揮僉事陳忠等往嘉眉州捕賊獲其八人皆受賂縱之而

執平民拷掠誣之為盜逼取賄賂又縱之按察司請罪之 上

曰縱真盜而誣平民貪暴如此豈知有國法罪之如律 曉列

有流星大如盃色青白有光起星宿西南行至游氣 辛亥行

在三法司奏長安東西安北安四門倉官陳紀等掌支上直

官軍食米冒官軍軍五百七十餘人姓名多支米二千四百一十

石入已當斬 上從之語侍臣曰養口腹而喪身小人之愚也  
壬子楚王孟烷遣儀賓魏寧長史<sup>揚</sup>振泰府中三護衛願留  
一衛請以二衛歸朝廷 上覽奏謂尚書張本等曰楚王安分  
循禮朕所素知故厚待之比屢有小人告訐朕灼之其非皆置  
不問今何疑而請歸護衛乎本對曰楚王為人雖 陛下所知  
然人有煩言王亦不得不慮曾參殺人皆此類今請歸護衛蓋  
欲示簡靜以杜讒邪乃其深計遠慮 陛下從之所以保全之  
也 上慨然良久曰王不可缺侍衛今三衛官軍未必皆足其  
令王任意選留充足一衛其餘如王所言受之於是賜寧振各  
鈔六百錠金織紵絲衣一襲遣新建伯李王都督任禮齋書復  
于王曰叔自嗣封以來安分守禮恪遵先上之訓朕所素知比  
雖有小人告府中事蓋已灼知其妄故置不問朕承 祖宗大

位萬念宗親惟務保全豈彼姦邪所能離間今得奏尤見叔深  
存遠慮欲杜後來謾邪之口朕思之至再故勉從所言持遣新  
建伯李玉都督任禮侍郎崇車齋書奉復任叔選留一衛有不  
足者聽於二衛中選擇補足其餘調來北京備用以順承雅意  
於是改武昌中護衛為武昌護衛調左護衛於東昌改為東昌  
衛右護衛於徐州改為徐州左衛置經歷司衛昌皆如例 行  
在戶部奏在京文武官吏旗衛等宣德五年以前折支俸鈔請  
悉於原籍官庫給之從之 雲南總兵官黔國公沐晟奏元江  
軍民府土官知府那忠被賊刀正刀龍等焚其廨宇及經歷司  
印信今獲刀龍刀洽解京乞如永樂故事發遣東安置以警邊  
夷從之命行在禮部鑄經歷司印給之 癸丑賜琉球國使臣  
郭伯茲等鈔絲幣表裏綿布有差 命刑部尚書趙珰右侍郎

俞士吉致仕先是監察御史劾奏班仕吉年老怠事其屬姦弊  
紛出不能防範遂舉其不法二事請罪之行在吏部亦以為言  
上曰二人皆先朝所用今老矣聽令致事其別選人任刑部  
行在刑部李文正言北京糧餉皆出江南各衛軍士轉運不息  
有遇河凍不得還家者有至家未及一月復就道者經年奔馳  
在外豈無父母妻子之念乞自儀真至張家灣傍水每程擇高  
阜之地築城堡設衛所給與印信置行都司如舊管屬而令原  
運官軍或全家或分房赴堡居住丁力多者授以近處閒地俾  
之耕種則父母妻子亦得相聚而安於轉運矣昔唐劉晏緣水  
置倉轉相受給其法亦便願 陛下勅群臣議可否而行之  
上命公侯伯尚書侍郎都御史議時以衆論不一事遂寢 江  
西按察司奏贛州衛指揮張俊領軍三百赴茶陵捕盜俊擅逼



贛州府造鑼鍋帳房等物事屬違法 上曰從來命將出師鑼  
鍋帳戶官軍自備今軍未動已違法害民其出境縱暴可知命  
如法治之 甲寅廣東瓊山縣故土官知縣許志廣子才儋州  
宜倫縣故土官知縣黃傑苟子慶未朝首方物 召山東按察  
合事韓璽及給事中卜謙初 上出閣時 太宗皇帝命翰林  
儒臣纂述故事選國子生語音明正者日侍左右講說璽謙預  
焉後皆授給事中至是謙以家艱去璽陞外任 上念之俱召  
還 賜朝鮮國使臣鄭淵等綵幣表裏有差 行在戶部奏違  
束納米賄罪例時巡按御史陳絳言違束新設寧遠等衛所倉無  
儲粟宜將遼東都司所問罪囚納米續罪以給軍食 上命行  
在戶部議請除真犯死罪解京其餘雜犯死罪納米二十石流  
罪一十五石徒五等自十二石至八石每等減一石杖五等自

六石至四石每等減五斗管五等自三石至一石亦遞減五斗  
限三月之內赴寧遠等衛倉納足官吏無力納米者如例解京  
軍人餘丁就彼決遣從之 巡按河南侍郎許廓奏招撫開封  
等府逃民一十一萬五千六百餘戶復業 上命行在戶部令  
有司加厚撫恤免其徭役一年 開平衛指揮同知方敏于景  
請襲父職 上諭行在兵部臣曰敏昔守赤城夫機致邊人爲  
虜寇所害不許復曰後有類敏夫機者其子孫雖應襲亦不與  
襲著爲例 直隸松江府奏太倉衛千戶下瑾以捕盜爲名率  
亡賴軍民二百餘人執金鼓器仗不經官司越入上海縣鄉村  
民皆驚走並掠取財物又縱火焚民廬舍積聚 上謂都御史  
顧佐等曰軍民各有統屬何敢侵越橫加暴害置官軍本以衛  
民今其所爲何異寇盜其令巡按御史治之如法 乙卯朝鮮

國王李杻遣陪臣金因等來朝貢方物 直隸蘇州府知府況  
鐘以經歷傳得貪賊害民執送京師 上命行在都察院治之  
因語侍臣曰知有一郡之表率而行之自廉始鍾必能持廉能  
持廉而後能去貪知府能去貪則屬官之貪者必自斂矣 丙  
辰兀者左衛女直指揮僉事柳溫哥等來朝貢方物 命雲南  
右布政使曹端致仕端陝西華人云自知縣歷刑部郎中凡再謫  
復起陞前職端為政寬平及是三考年七十故令致仕 太子  
太保陳國公朱勇奏山西緣邊鎮西等衛近偏頭關見調其官  
軍千人在京操備潞州等衛官軍赴京代鎮西等衛官軍還守  
本等節不表正五年分令免操備關鎮備入京州軍行  
備庶幾兩便都督同知劉昭奉洮州岷州河州藍州臨洮鞏昌  
六衛屯種皆是陝西都司委官提督山路遠不能周歷請令  
鎮守洮州等衛都指揮李達后能劉永汪壽苗旺各就近兼管

歲終如例比較皆從之 直隸徽州府黟縣奏已發預備倉穀  
二千六百五十八石有奇借貸饑民俟秋成還官 南京都察  
院右僉都御史嚴升卒升字仲升直隸繁昌縣人白進士授蜀  
之青神縣知縣調巫山縣一以誠心愛民所至有賢名永樂初  
下詔求賢用薦陞江西按察司僉事坐累左遷順慶府同知改  
吏部考功郎中在職六年澹靜自守而勤於職務 仁宗皇帝  
副位選遷廷臣尚書蹇義舉陞<sup>升</sup>大理寺右少卿升沉毅剛果執  
法明慎奉命清理軍政蘇州諸郡舊俗<sup>最</sup>猾肆姦誣平民為兵者  
多升至行之以公明民莫有受誣者調都察院右僉都<sup>御史</sup>與都  
御史邵紀同心蒞政屏黜不肖風紀用張升清素儉約雖顯庸  
飲食衣服無異寒士而風裁嚴峻不可犯云 丁巳賜嘉河衛  
女直指揮同知劉隆加等綵幣表裏等物有差 戊午監察御

史劉教奉山海隆慶綠山關口皆置官軍防守而所在烟墩又  
令有司添設民夫守瞭或七八人或五六人實勞民力乞革去  
為便 上諭尚書張本等曰凡軍以衛民民以給軍各有常職  
何得虛勞民力以妨農功即令罷遣民夫一委軍士守瞭○已  
未哈密忠順王卜荅失里遣使臣脫脫帖木兒及都指揮僉事  
拜拜兀馬兒等來朝貢馬 調戶部右侍郎改民為南京刑部  
右侍郎陞給事中御史等官薛廣等二十五人為知府廣河南  
懷慶府許侃廣西太平府李本梧州府汪本貴州思州府張謹  
思南府富教廣東高州府王瑩肇慶府李順陝西臨洮府監察  
御史李驥河南河南府李奇雲南大理府賴瑛臨安府戶部郎  
中徐鑑廣東瓊州府李興廣州府刑部郎中傅佐山東濟南府  
吏部員外郎蔡祥陝西延安府禮部員外郎許敬軒福建汀州

府光祿寺丞李郁湖廣長沙府刑部主事徐孔奇浙江嚴州府  
鄭瑤寧波府大理寺正王昇江西撫州府寺副張瑛貴州鎮遠  
府司務王恕銅仁府國子監學正陳顏廣東惠州府知州湯昭  
山西太原府先是刑在吏部言各府知府多缺上命大臣簡  
拔中外之賢能者任之得廣等二十五人遂皆陞用賜初給驛  
悉如況鍾等起復重慶府知府梁用任舊職因以父喪去官民  
思其政詣闕奏乞復之故有是命命故金吾右衛指揮使曹  
俊子廣燕山右衛指揮僉事趙斌子昇通州衛指揮僉事姜勝  
子禎俱襲職永清右衛指揮僉事雷信年老命其子正代故  
金川石泉縣池河巡檢司先是陝西三司及巡按御史奏石泉  
縣東接漢陰西連洋縣地多山溝適逃軍民住往叢匿鈔掠行  
跡及採斲私茶池河正當要害之處若立巡檢司則逃亡之徒

不為民害亦免私茶之弊命行在兵部下三司覆勘至是皆以  
為便遂設巡檢司置巡檢一員 行在兵部奏隆慶左右二衛  
言副總兵都督方政每衛調取官軍一千百人往獨石等處守備  
緣二衛官兵先已調雲州等處若再調發則隆慶地方守備不  
足今考二衛軍數除選調外各處屯守官軍及謫發充軍者尚  
多請令副總兵方正於隆慶左右及保安衛官軍調三千人住  
獨石等處更番守備其輪次日月從方政處置又奏總兵官都  
督山雲言廣西武宣守禦千戶所城也低窪瘴厲持甚原伍官  
軍一千五百八十二人今存四十七人請如雲所言仍請湖廣總司以軍衛有司以罪因應充軍者益之力雖守備乞以法司問  
發充軍罪囚益之如不足請益以廣西附近州縣清出軍士  
皆從之 庚申八月哇國王楊惟西沙遣通事八致宗教及村主  
八致麻抹等來朝貢方物 巡按監察御史熊翼奏陝西莊浪

銜遞運所至甘肅甘泉遞運所一十八處每所舊設甲軍一百一十名車一百一十輛過來軍士逃亡大半車亦不備多悞遞送有將他處遞運車越過七八程者中途半死車壞人苦不勝乞自今凡逃亡死絕果無勾者與之豁除而以法司問完雜犯死罪囚人補役遞送 上命行在兵部覈實果事故無丁者依洪武中例於陝西三司及所屬以應發囚人補之若遞緊要之令經過衛所撥軍協助但將軍車越送勞人者罪之 巡按浙江監察御史杜時奏會稽餘姚二縣夏秋旱田苗無收民人饑困金華市浦江二縣有寇出沒劫掠命行在戶部遣官馳傳賑濟都察院移文令有司捕盜 山東都指揮使衛清奏往年所領操練馬軍一千人已取赴京令臣選補至今七年其騎射亦已精熟近成國公朱勇奏請以綠海在京操備步軍代之改為步卒



兩夫所長虛勞訓練乞仍其舊命信在兵部按閱如果精壯即從所言 曉列太白犯鍵閉 壬戌廣西按察僉事王愷奏近例在外諸司吏典凡犯笞杖罪俱贖鈔改撥今照刷大小衙門文卷如有稽遲失錯僉書吏典准律笞罪類決杖罪紀錄若依今例改撥姦猾之徒必有就易避難乘機作弊者請勅法司會議凡犯私杖從今例其私罪應笞及公罪應笞杖者皆免改撥依律科斷 上謂三法司官曰私杖從今例亦非良法卿等其會議以聞法司議奏請凡照刷諸司文卷事干遲錯若漏報卷籍官吏應公私笞罪及公杖罪者皆依律決罰選職役如錢糧埋沒刑名違枉有所規避者仍依律照例發遣從之 曉列太白犯鍵閉 癸亥賜廣東瓊山縣故土官舍人許才宜倫縣故土官舍人黃慶等鈔幣表裏及衣 浙江左布政使黃澤言民者

國之本財者民之心理財固在於有道而為國莫切於愛民  
皇上屢降勅書愛恤生民惟恐一人不得其所而民之利病猶  
恐未盡上聞竊見浙江所屬溫處二府平陽盤水等七縣銀冶  
自永樂間至今遣官開辦七縣歲額銀共八萬七千八百兩以  
十年計之通八十七萬八千兩而各場所產礪石有僅足額課  
者有不足者有礪盡絕者開辦之官督令坑首治夫陪納不敢  
稍失歲額陪課之民富者至於貧困貧者至於逃亡他處坑冶  
其害亦然伏乞 皇上廣愛民之仁暫停坑冶之役則民得以  
遂其生矣 上覽其言命行在戶部曰此弊朕何由知其遣官  
往同三司及巡按御史辨銀課官審實其弊或減額或罷役不  
可重困百姓甲子賜朝鮮國使臣金因等綵幣表裏有差 以  
明日冬至遣衛王瞻埏祭 長陵 獻陵 乙丑冬至 上御

正朝受賀大宴文武群臣及四夷朝使 皇太后 皇后免文  
武群臣命婦朝 丙寅賜元者左衛女直指揮僉事柳溫等  
幣表裏等物有差 旻列獎或犯進賢

大明宣宗憲天崇道英明神聖欽文昭武寬仁純孝皇帝實  
錄卷之七十二

明宣宗章皇帝實錄卷之七十二終

大明宣宗章皇帝實錄卷之七十三

宣德五年丁卯朔日生左右珥色黃赤鮮明 戊辰 上謂行

在吏部尚書郭璉等曰朕以用人之柄付卿卿當為朕擇才昨

郡守多缺乃命廷臣共舉古之當斯任者必勤於訪問有得即

錄之故官不乏才呂蒙正之夾袋虞允文之材館錄是也自今宜

留意璉等皆頓首 昏刻有流星大如盃色青赤光燭地起離

宮西北行至右旗散夜有流星大如斗色赤光燭地出畢東北

行至濁 庚午給長安嶺并獨石等處守關口臺墩軍士胛襖

袴鞋 辛木昏刻月犯壘壁陣口壬申瓦輶刺順寧王脫歡遣千

戶演克等烏思藏必立工瓦番僧刺麻桑竹阿些兒等來朝貢

馬 賜哈密忠順王使臣脫脫帖木兒拜拜兀馬兒等綵幣表

裏納布有差 癸酉賜爪哇國通事八致宗敬村主八致麻抹

等鈔綵帶表裏襲衣等物有差 甲戌臘節賜文武羣臣宴  
乙亥夜南京地震 戊寅賜朝鮮國及撒馬兒罕瓦剌等處貢  
使宴 賜烏思藏必立工凡番僧刺麻朵竹阿吡兒等綵帶表  
裏紵絲絹布襲衣等物有差 庚辰祀忽兒衛女直指揮同知  
失里併加雙城衛女直頭目阿桑加等來朝貢方物 命兀刺  
順寧王脫歡使臣演克篤都指揮同知卜顏帖木兒為指揮同  
知賜冠帶及綵幣表裏紵絲等物有差仍命指揮使孫觀齋勅  
同往賜脫歡等綵幣表裏 置順天府通三河縣峪口之官莊  
楊家橋張家莊三馬房倉各設大使一員 行在兵部尚書張  
本言自永樂二十二年至宣德五月年終京衛官軍領馬一十九  
萬三千八百餘匹逐年倒死累蒙恩宥見在之數五不從一應  
追償者一萬九百二十餘匹請令以十人為率義和朋合均出

價值每月共買一匹還官果無力者行原籍家屬追買及查軍民所養種馬虧欠五萬四千八百四十餘匹亦令每十戶朋合買陪庶數軍民皆便 上命文武大臣議英國公振輔等議宜從本年朋合不可拘不人數以二年為限買完其民間談陪者如義和事例可令一縣或一里共買勿拘十戶官軍於本衙所本隊伍共買或於原籍買償者皆可從 上曰朋合買者以三年為期官軍行原籍買償不免煩擾不可行 先夕大雩是日早朝罷 上示羣臣喜雪之詩優賜嘗雪宴蓋久未雪至是大雪盈尺 上喜而成詩群臣遂進和章 上親閱視擇其有警戒之意者別錄之而為之序曰宣德五年冬久未有雪蓋冬雪消毒沴殄遺蝗滋茂宿麥迨冬不雪民心則憂民之心朕之心也乃十有二月己卯之夕大雪深尺編于遠邇民心以喜民之喜

朕之喜也制七言古詩一章以寫志且賜群臣觀之群臣各進和章朕親閱其詞不為溢美而有相警之義者命錄之得若干首嗚呼二氣和則雨澤降氣嚴沍則雨凝為雪雪降於冬則植物滋榮於春雪而應候民之利也其為喜也固宜然古之明君未嘗因一事之順適而忘致警於其德其臣亦未嘗因一事之順適而忘致警於其君唐虞三代之世皆然也三代而下為君始有矜大之心為臣始有諛悅之說其不為此者蓋寡矣此治之所以弗古若也吾以涼薄之德嗣祖宗大業為天下生民之主恒懼不免負荷而所望於群臣之戒警輔翼者惟日不足今是詩之副予所望者哉十一二詩曰人之好我示我周行吾安得不表章之以朝夕自益哉 辛巳立春順天府官進春 上御正朝受之文武群臣行賀禮遂賜宴 寧王權奏有疾求醫

命釋良醫張榮起復良醫李宗潤皆呈馳復職仍遣書問王疾  
榮宗潤皆寧府良醫榮先生事逮繫都察院宗潤以親喪去官  
至是上聞王疾政有是命復山東布政司左叅政郭良右  
叅政陳士啓左叅議李寅職先是上命山東三司各委堂上  
官如永樂中例提督七種良等避事不行委知事陳忠往事覺  
應杖俱罰役復之士午考郎兀衛指揮同知連苦等來朝貢  
方物旌表孝子錢敏及節婦王氏等五人敏廬州府舒城縣  
人幼喪父家貧立學事母至孝及中進士乞還鄉侍母母患瘡  
躬侍湯藥未嘗離側母沒廬墓三年有司以聞詔旌其門曰孝  
行王氏保定府東廩縣民李友諒妻任氏應天府上元縣區閻  
苟妻馮氏上元縣民楊真保妻白氏徐州沛縣民良伯奴妻俱  
年少喪夫守節不嫁奉養舅姑終身訓育孤子有成趙氏河南



太康縣生員劉敬妻敬克貢入太學以疾卒一子才三歲家貧甚趙氏年少誓守節力耕織以養舅姑有姑子凡四十餘年其志益堅事聞旌其門曰貞節 置山東濟寧州仲家淺闢設闈官一員 復李信遵化縣知縣陞正六品祿時信以秩滿順天府尹李庸言信持身端謹蒞政公平吏民信服奏乞留之 上謂行在吏部臣曰畿內縣令必須得人可從所奏令復任而加其祿 遼東總兵官都督僉事王凱奏黠賊百餘人入闡原境內又賊四十餘人劫掠紫河等屯備禦都指揮郭溶遣指揮吳禎等哨探遣都指揮佟答剌哈等率兵捕擊佟答剌哈遇賊遁禎遇賊與戰被傷還調都督指揮夏通同都督王真追賊皆不及而還其都指揮郭溶佟答剌哈等官俱應治罪 上遣勅責凱曰此皆爾平昔不能規畫守備之方故在下者皆放肆不循

猶令其鄂溶佟答刺哈等俱責死罪狀罰俸五月如再失機不貸其遇賊先回者治如律戰死者優贍其家被傷者善撫恤之

甲 日生左右珥色黃赤及上生冠氣抱氣隨土背氣色清赤皆鮮明夜月化軒轅大星有流星大如鷄桴色亦有光出參南行至濁 乙酉行在戶部言諸司積弊當清理者凡三事一  
比年各布政司府州縣科徵諸物不量人戶多寡物之輕重緩急地之遠近難易官執偏見吏徇私情受賄受囑任意妄為以一科十為害百端及撥定倉糧遠近失宜那移作弊公私不便今後科徵諸物并撥倉糧宜令各司府州置立文簿正官收掌凡有所科布政司同按察司定奪府州縣同正佐首領官定奪上司并巡按御史按部者常加考察如有不公即為究治仍令府州以所派數目如簿錄申布政司半年類造文冊送部查考

直隸州縣若有不公許親臨上司巡按御史一體考察一兩  
廣福建<sup>四川</sup>湖廣等處距京師往復一萬餘里或八九千里而解布  
絹一二疋皮一二張物料三五斤鈔不及五三十錠者徒費民  
力今後各處起運諸物除急切進用并金銀不拘多寡起解外  
其餘諸物若滿舟車者官與舟車俾經手人管解若不滿舟車  
止解該管上司覓貯或按季或半年差有職人員管解官與脚  
力裝送收受者不許刁蹬解送者不許侵欺若州縣官吏果有  
別項差使<sup>赴</sup>進京及與司府相離寫遠道路不順願徑解至者俱  
從其便一在京在外倉庫斗級庫子鹽場掣掣所工脚稱子有  
經年不替者有充當二三次四五次以上者有無籍營充及冒  
名代充者縱有良民新役亦被教誘為非欲行內外凡斗級庫  
子工脚稱子取勘其數若又在官為害者究治如律若所收錢

糧支銷未盡問斷明白另項記名守支單日罷去若有自首改  
正者免其罪恃頑不首為他人首發者軍及餘丁調邊遠民發  
附近衛所充軍倉庫等衙門先將見役之人看役年月及當過  
次數開冒充等項緣由造冊開報今後僉點務選殷實良善之  
民每年終造冊中繳上司以備查考若官吏受賂仍點無籍之  
徒事覺一體治罪命大臣議可行者行之 監察御史林英言

天下都司設衛事司專理刑獄已有定制而各衛所及守禦千  
戶所設鎮撫以理刑獄撫鎮武人多不諳文移不通律意甚至  
有不識一字者刑獄往往委之於吏及識字軍致是非不明獄  
因淹滯冤枉者多乞今天下衛所援都司衛事司之例別設一  
員專理刑獄或選諳法律者授以經歷吏目協理刑獄庶免淹  
滯之患 上曰別設官非舊典但宜擇人用之 直隸蘇州府

況鍾奏長洲等縣民朱阿狗等一千二百一十人告言前蒙清  
理軍伍而同知張徽承順御史李立之意凡軍戶已絕者務令  
推尋同名同姓及疎遠族屬并承繼產業之人補役加以酷法  
勒令充軍比之所降軍政條例實爲冤枉又累奉勅合發回阿  
多等六百八十二人所告亦同反與廢勘多係另籍民戶如蒙  
別遣公正御史給事中重與審勘果是軍者仍發充軍否則改  
止爲民 上謂行在兵部尚書張本等曰朝廷愛恤軍民本同  
一體刻薄之輩徇私妄作以致紛紛如此其令侍郎成均重與  
勘審從實分別以聞 直隸保定府定興縣奏連年蝗澇田穀  
不收徭役頓煩人民逃竄今已招復業者六百八十五戶未復  
者二百七十五戶蓋糧馬草皆未輸納乞與蠲除從之 日生  
背氣一道色青赤鮮明 丙戌迤北躔艱完者不花答孩帖木

兒等五人未歸命為百戶等官賜冠帶金織襲衣絲幣銀鈔錢  
馬仍命有司給房屋器皿等物如例 朱子 成國公言舊時五軍每  
軍步騎二萬人後調大同等處備用今五軍總有五萬七千餘  
人而神機諸營比舊亦少扈從征調不足於用請令行在兵部  
如舊取補 上命兵部於京衛選士卒過十萬隸五軍訓練因  
諭勇曰古人用兵雖有成法然以應變不窮為奇蓋可教若坐作  
進退擊刺之方至於隨機制敵開闔往來使人不可測度此在  
兵法之外卿等聞朕更當讀書觀古良將方畧融會於心自然  
有得蓋 上善用兵每出田號令嚴明行伍整肅不可犯昔  
太宗皇帝嘗試詢用兵之法 上應對如流 太宗皇帝顧謂  
侍臣曰朕自 太祖皇帝時帥兵清沙漠後復以兵靖內難歷軍  
中三十餘年容敵勇怯及其虛實進退遲速審度而行乃能制

勝此孫未嘗經戰陣所衛多合朕意言因諭 上曰朕所用將士

皆老矣今天下雖無事然安不忘危爾雖知兵亦必訓練有素

乃獲萬全 行在大理寺奏舊例犯偷盜攬納等罪皆充軍按

律凡偷盜官畜產常人盜倉庫錢糧盜內府財物及官物者皆

應絞斬比常偷盜攬納為尤重於今例乃止罰役而已輕重不

論請皆從充軍例發遣 上曰斷獄須論情實若當重而輕則

人易犯法當輕而重則人為不平宜從一例然尤須審詳詳勿致

失當 山西和順縣知縣宋杰奏縣在太行山中土瘠石頑風

氣寒早不宜二麥桑棗粟穀蕎麥累被霜隕連歲無收人民乏

食逃徙他所逋負宣德二年稅糧請循恤民事例每糧一石折

收鈔五十錢賫或小綿布三匹運納直隸平定州守禦千戶所及

本縣官庫收貯折支官吏俸從之 丁亥勅副總兵都督方政

開平衛撫恤新軍初獨石置城堡移開平衛於其中而命政領  
兵守之凡罪人<sup>死</sup>者皆有死發本衛充軍至是勅政等曰獨  
石新軍初皆犯法當朕不忍殺之故令充軍近聞管軍者悉貪  
暴武夫謂其初來必挾重資遂欲奪之無則橫加虐害多致逃  
竄死亡孤朕寬宥之意爾等善加撫恤凡官旗有肆貪虐者必  
罪之時遼東諸衛亦有宥死發充軍者初總兵官巫凱亦如之  
亦斤蒙古衛止千戶朶兒只遜等遣舍人把都麻等貢駝馬  
柳城萬戶阿黑把失等十六人來朝奏願居京自放命阿黑把  
失等五人為副千戶等官賜金織襲衣綵幣鈔布有差仍命有  
司給房屋器皿等物如例行在兵部右侍郎王驥言自湖廣還  
道經九江安慶其衛所官俱以屯種事被繫缺官理事 上曰  
軍官守城為重可以一事而盡執之于命巡按御史止究管屯



者除責罪狀令復職他衙有犯亦准此例值登聞鼓給事中年  
高奏重囚二十七人以姦盜當決擊鼓訴冤切詳各犯臨刑畏  
死煩瀆朝廷不可宥 上曰登聞鼓之設正以達下情何謂煩  
瀆自今凡死囚擊鼓訴冤者必如例錄情詞以進令法司與辯  
若蒙蔽及阻違罪直鼓者 行在浙江道監獄御史張駿以淹繫罪  
囚下獄初浙江臨海縣民告土豪一家父子叔侄同惡下海通  
番及殺人等罪駿移文逮治縣惟械送一人餘同惡者悉逃匿  
駿必欲悉至而後鞠之歷四年未鞠其家以淹繫訴 上謂右  
都御史顧佐曰浙江非甚遠提人對理一年不至二年必至何  
為四年不至亦不以奏其淹繫者不死於獄亦幸矣命下駿於  
刑部徵責浙江按察司及府官縣不督捕逃匿者罪又命佐及刑  
部凡一應罪囚待對未結證者悉錄以聞 昏列有舍譽星見

如揮九大色黃白光潤甚見九州旁凡旬有五日成 戊子土  
魯番城指揮僉事猛哥帖木兒等三十八人來朝奏願居京自  
效賜金職襲衣綵幣鈔絹綿布仍命有司給房屋器皿等物如  
例 神武衛指揮使馮洪奏今年正月以西安中護衛軍士置  
本衛駐定州創造營房未能悉備每軍與閒地五十畝俱無耕  
牛農器種不及時近皆缺食乞優免今年子粒 上諭行在戶  
部臣曰新置衛軍士遠來未有產業屯糧須免之 己丑行在  
刑部都察院奏前日奏請決重囚中有訴枉者奉旨令三法司  
再審緣諸犯皆累經詳審應決之人今又有詞請令公侯伯及  
文武大臣近侍官會審從之 四川按察僉事王慶敬奏自洪  
武中荷蒙恩授職風憲奉公守法不敢為非昨承行在都察  
院委問永通盜課大使劉謙所奏冤枉事既已從公決斷姦頑

之徒誣臣有賊緣臣素守朴惡實無汙濫今年老昏瞶恐致偏害又恐無賴小人假石誣熾乞勅公廉之官重別勘問庶得明白上令巡按御史詳覆務盡公道果其年老令赴京師夜北京地震庚寅土魯番城都指揮僉事也先帖木兒來朝貢馬增置行在光祿寺大官珍羞掌醢良醞四署丞各二員監事各一員從本寺言收支錢糧供應事繁故也行在兵部尚書張本言先奉旨取外衛所帶操軍士一萬人分隸親軍專令守衛上直今各衛官不能撫恤致有逃者亦有違例別差及私役者請遣官點視上命監察御史給事中同守門內官點閱又言天下軍職缺所鎮撫然百戶員多請通行中外折有鎮撫急缺先令多餘百戶暫掌闕報注調如無百戶令合所旗軍共舉年深能幹總旗署事候三年謀其當否然後授職上從之論

之曰若所舉不稱令巡按監察御史按察司執而罪之 行在  
戶部奏山西陽曲縣逃民張福等百餘人皆復業初鎮守山西  
都督李謙奏福等逃居大隗寨遣人招諭特險不下請發兵捕  
之 上曰民逃豈其所欲必耕差頻煩爲有司逼迫故耳加之  
兵則傷其主但令府縣招撫免其徭役彼必來歸遂令太原府  
招之至是復業 辛卯陝西寧夏衛土官指揮同知韓當道驢  
岷州衛刺麻堅東扎等來朝貢馬 禿都河衛頭目阿隆加來  
朝奏願居京自放命爲百戶賜冠帶金織襲衣綵幣鈔布仍命  
有司給房屋器皿等物如例 復撫寧衛右中前三千戶所之  
在香河三河薊州者還本衛從都督陳景先所奏也 行在兵  
部尚書張本言內外衛所旗軍例免餘丁一人以供正軍其有  
三五丁十丁以上者宜履實令隨營差遣隱漏及託故者罪知

上從之 壬辰哈密中順王卜答失里遣使臣迭力迷失亦  
力把里歪思王忠使臣亦思刺麻失等貢馬及玉石等方物 命  
故金吾前衛指揮僉事楊得子茂襲職 賜把忽兒等衛女直  
指揮同知夫里併加等雙城衛女直頭目阿桑加等綵幣表裏  
等物有差 行在兵部奏比者有言京衛軍士多潛匿在外及  
為官豪之家隱占本部承命委官同監察御史六科掌科給事  
中竅實其數已行備冊進呈令覆勘得其間又有隱瞞漏妄之  
弊其衛所官吏宜令法司逮問 上命姑錄其過悉令改正  
巡按監察御史梁軫言陝西寧夏等衛洪武間設儒學止置教  
授一員專教軍職子弟諸百將傳武臣大誥以為講武保身之  
策永樂間將軍亦遣子入學一如府州縣講讀經書應舉亦嘗  
得人以資任用然文廟未有祭祀生徒亦無擾免徭役之例乞

令與府州縣同學同命御史按察司出巡之日依例考覈則人  
知所激勸文風可振而邊俗丕變矣 上命行在禮部悉循定  
制 曉刻月掩心宿 癸巳以都督龔傑子亮為府軍前衛指  
揮指揮僉事食祿不視事亮嘗以舍人隨侍故特優之 總兵  
官都督僉事史昭等同太監王安等征曲先還初昭等兵至曲  
先散即思先遁其黨答答不花等率眾迎敵昭等縱兵繫之殺  
傷甚眾獲答答不花及男女三百四十餘人馬駝牛羊三十二  
萬有奇至是奏至 上賜勅獎勞仍命昭守西寧命叅將都督  
趙安送所俘獲詣京師 雲南霽江軍民府奏浪滄江寨蠻者  
保等聚眾劫掠村寨總兵官黔國公沐晟行三司委官撫諭不  
服行在兵部言請再令晟遣官及雲南三司堂上官詣其地撫  
諭果不服就相機勦捕從之 甲午益實等衛指揮僉事木當

加及餘福<sup>餘</sup>衛韃官都指揮僉事安出指揮同知杜里忒泰寧  
衛指揮僉事把禿不花等貢馬 陞北京國子監博士黃胤宗  
助教郭俊為翰林院檢討仍理博士助教事行在浙江道監察  
御史張曾為太僕寺丞行在河南道監察御史徐訓為雲南按  
察司副使授進士上一寧吏部稽勲司主事食其祿令於內府  
授小內使書行在翰林院編修鍾英浙江道監察御史王縉紳  
浙江按察司僉事張昱皆親喪服闋命瑛縉紳復職昱調山東  
按察司復周義高州府通判賈麒乾州知州俱陞正五品祿皆  
以任滿百姓奏乞復職也然監察御史鄒傑為蘇州府崑山縣  
知縣劉清為濟南府鄒平縣知縣楊志為江西南城縣知縣右  
有賢為河南新蔡縣知縣皆以不勝職任也 鎮守山西都督  
李謙言偏頭關隘口止有官軍五百人守備及反溝村黃川樓<sup>備</sup>

子寨三堡每處亦止有官軍五百餘人尋因虜賊犯境已增官軍一千人冰凍之時於黃河垂守冰解回衛今境外屢報聲息請備大同邊衛事例添撥神銃手於灰溝村三堡防守庶警急易於策應待冰解回原衛所從之命行在工部別造手把銃給之 乙未湖廣散毛宣撫司遣把事黃能施南宣撫司遣把事譚試強等貢方物 以赤斤蒙古衛千戶朵兒只遜可見即等遣人貢駝馬陞朵兒只遜可見即俱為指揮僉事百戶來古魯為副千戶賜綵幣表裏布差 丙申朝鮮國王李禔遣陪臣趙貫等貢馬○賜考郎兀衛指揮同知速苦等綵幣表裏等物有差 夜有流星大如鷄釋色赤尾跡有光出翼東南行至濁

大明宣宗憲天崇道英明神聖欽文昭武寬仁純孝章皇帝實錄卷之七十三





大明宣宗章皇帝實錄卷之七十四

宣德五年閏十二月丁酉朔 上省郊祀牲 夜有流星大如

鷄彈色青白尾跡有光出軫東南行入庫樓曉刻辰星化建星

戊戌文武群臣以合巽星見上未賀時行在欽天監奏合巽

星見九斗星傍如彈丸大今候至十月其色愈黃白光潤謹按

占書曰人君施孝德興禮樂而人民和悅夷狄奉化外國來朝

則合巽星見於是群臣上表稱賀賀畢 上諭群臣曰未辭稱

道過實朕甚愧之今海內粗安皆由 天地 宗祖廟垂佑 聖

母皇太后訓教及群臣匡輔所致朕何德也書曰儆戒無虞

詩曰夙夜敬止朕及卿等相與飭勸罔有怠心庶幾共保福祿

永遠 昏刻有流星大如鷄彈色青白亦有光出東南雲中東行至

濁五鼓有流星大如鷄彈色青白亦有光出狼星旁南行入雲中曉

刻辰星犯建西第三星。○己亥賜赤金蒙古衛舍人把都麻等  
絲幣表裏等物。陝西山丹衛指揮僉事鄭鉉等四人奏邊事  
賜鈔及金織衣紵絲衣絹衣有差。庚子朝鮮國王李禔遣陪  
臣崔士儀等貢馬及方物賀正旦。直隸大明府開州知州丁  
鏞奏本州新安等里人民一千二百三十四戶逃徙他所雖已  
招復業者八百九十八戶其田土荒蕪子粒無收稅糧馬草不  
能辦納命悉免徵。夜有流星大如鷄稗色赤有光出參旌南  
行至濁。辛丑行在兵部尚書張本言浙江松門衛所附近清  
出軍士皆是當遠方補五年久埋沒者朝廷一其跋涉難艱許  
隸近衛今不思効力固報且亡逸冢宜悉送平江伯陳瑄  
發邳州衛帶管運糧以警其餘。上從之。直隸蘇州府奏宣  
德元年至四年所欠秋糧乞依洪熙元例折鈔行在戶部言蘇

州自永樂二十年至洪熙元年欠糧三百九十二萬石有奇宣  
德四年九月蒙恩寬恤令折收鈔及布絹至今未足若又准所  
言該糧七百六十餘石古因家用度不足宜遣人同侍郎周忱  
嚴限催徵并遠問其官吏 上曰蘇州糧多固難辦若罪其官  
吏則事愈廢但可青限催徵其折收再議 壬寅罷徵直隸大  
名府魏縣逃民九百九十戶山西浮山縣逃民一千七百六十  
四戶稅糧 南京監察御史李安言各處糧長皆殷實之家以  
永充之故習於豪橫威制小民妄意徵求有折收金銀段匹者  
有每石徵二石者有准折于女畜產者任情費用或縱恣酒  
色或輾轉販買營私有餘輸官不足稽其逐年稅糧完者無幾  
宜禁革以便民命行在戶部計議施行 鎮守山海等處都督  
僉事陳政奏腹裏州縣用民夫守瞭乃洪武間所設昨皆放遣

歸農請如舊制為便 上謂尚書張本曰舊時未置兵守故用  
民今朕已有憂分敬敢妄言其移文責之 癸卯賜朝鮮國等  
處貢使宴 陞行在戶部左侍郎李景為本部尚書 甲辰造  
北和寧王阿魯台遣使臣脫火歹火者阿力等來朝貢駝馬  
夜有流星大如碗色赤光燭地起軒轅西南行至柳 乙巳撒  
馬兒罕頭目兀魯伯米兒咱遣使臣卜頗剌法兒等來朝貢方  
物 賜朝鮮國使臣趙貫等綵幣表裏有差 有言和寧王阿  
魯台遣人朝貢其部屬多依緣邊近地者遂勅邊將嚴為之備  
日 生左右珥色<sup>黃</sup>赤又上生背氣一道色青赤鮮明 丙午  
給寧化王府鎮國將軍美壕美壕歲祿各千石米鈔中半兼支  
浮山縣主及儀賓章鍾歲祿六百石內米四百石麥二百石曲  
人縣主及儀賓周旭如之 安定王亦攀冊遣使臣朵兒只失

加定衛國師賞竹領真等未朝貢馬 監察御史孫泓等奏行  
在府軍衛指揮傅全等私役軍士按月取財不令守衛上直請  
罪之 上曰親軍專備守衛私役已不可况又取其財罪可逃  
乎命逮治如律 昏月犯五車五鼓有流星大如鷄彈色赤  
尾跡有光出文昌西北竹至濁 丁未 上御奉天門諭行在  
戶部臣曰恤民必有實惠若惠民無實非恤下之誠比者郡縣  
間有水旱稅糧多欠積歲既久未能輸官有司催徵逼迫而民  
愈困四方奏逃亡逋賦者皆以此故朕聞之則然其宣德三年  
以前民欠糧稅悉令折收鈔與布絹爾戶部定議務得其中無  
虧於民戶部議以十分為率三分折閏布三分折閏絹四分折  
鈔 上曰如此雖善但布絹闊幅者亦難得宜只直民間所常  
用者依時價收之則民易辦庶幾民受實惠 迨北難阻土化

台脫台上來未歸奏願居京自効皆命為所鎮撫賜冠帶金織  
襲衣<sub>以</sub>帶銀鈔綿布鞍馬仍命有司給房屋器皿等物 行在  
戶部奏甘肅寧夏大同宣府獨石永平等處俱邊境要地民糧  
艱於轉輸比年雖召商中鹽途程險遠趨中者少供用不敷宜  
暫許各處寓居官員軍餘有糧之家各納米豆不拘資次淮浙<sub>在</sub>  
等處支鹽其中納定例甘肅寧夏大同宣府倉淮浙河東鹽每  
引米四斗山東福建鹽三千河間長蘆鹽三千五升四川廣東  
鹽二千五升永平府倉淮浙長蘆河東鹽每引四斗五升山東  
福建鹽三千五升四川廣東鹽二千五升獨石城倉淮浙長蘆  
鹽每引三千河東鹽二千五升山東福建四川廣東鹽俱二千  
從之 四川松潘衛軍民指揮使司奏略匪諸簇執難戈判別  
至三寨番民糾同烙雞耳別生番劫掠居民殺傷軍士命行在

兵部移文總兵官都督陳懷及四川三司各委官體實調兵勒  
捕 戊申朝鮮國王李禔遣陪臣金乙賢等貢方物 工部吏  
盜官麻繩八十斤行在三法司擬於律應斬 上曰論律固於律  
難恕論物則殺之過重可宥死罰輸作 庚戌巡撫浙江侍郎  
成均奏海鹽縣民言縣地並海舊置石嵌土岸延袤二千四百  
四十餘丈以備水患比因風潮衝激壞者一千一百餘丈有兵  
雖嘗仿築然舊石為水所啣皆剝弊無廉隅暫用累砌終不堅  
故今計議於舊岸內別砌石岸而存其舊者以為外障庶可久  
遠乞如洪武中令嘉興湖州蘇州紹興等府發夫匠協助為使  
上從之命侯農隙興工 江西廬陵吉水二縣耆民建言永  
克糧長怙勢害民如徵夏稅一圓不及一石而甲首十人各科  
綿布一匹又折使用綿布五匹至二十陪有餘若徵秋糧每石



加倍以上又徵使用十五匹後以官府支費為名每甲首一人

紆存

科銀二兩甚至在鄉強占灌田陂塘阻遏水利民多怨苦皆因  
永克之故行在通政司以聞 上曰初謂永克權長可以利民  
事久弊生乃至如此其令巡撫副都御史首諒治之 辛亥行  
在羽林前衛指揮使黃福初選充圍子手把總以額外被選懷  
忿自溺死事聞 上顧侍臣歎曰人用舍進退各有命君子則  
知安命彼雖退而官職如舊何至自戕此古所謂鄙夫也歟  
癸丑賜土魯番城都指揮僉事也先帖木兒鈔緜幣未裏 江  
西按察副使李綸有罪謫戍遼東綸先為監察御史與都御史  
劉觀子輻游蕩宿娼及受海鹽縣豪民白金一百五十兩黃金  
五兩文綺二十餘匹出其殺人之罪至是事覺行在都察院以  
聞 上命追所受贓及舊給勅命發戍遼東邊衛 甲寅夜有

流星大如鷄，輝色青白，有光起天廟東北，行至濁。乙卯命指

揮李崇等四十九人總督五軍神機諸營，又命指揮毛禮等五十

七人為之副。先是五軍神機諸營缺官，命成國公朱勇等推舉

至是以崇等名聞。上命皆仍舊職，往任其事。命故遼東都

指揮僉事張山子忠、梁為羽、林前衛指揮使山西都指揮使僉事薛興子賢、梁為金吾

右衛指揮使金吾右衛指揮僉事孟泉、姪剛、金吾左衛指揮僉

事曹旺子興俱襲職。順天府奏初奉旨發密雲等縣民丁三

千餘人助修密雲中衛城附近山場，又令其民供官用薪炭，悉

免雜役。而密雲中衛仍索民丁修城，修成之工已什完七八，乞

勅密雲鎮守都指揮蔣貴令罷諸縣修城民丁，止以密雲中後

二衛軍丁完城，從之。丙辰，保安王志炯奏請以前陝西都指

揮使陳棟故宅為洛川縣王居第。上謂行在工部尚書吳中

曰宗室之親朕豈吝惜但陳懷功臣若尚有親屬居其中而遽奪之不可其令陝西布政司按察司覆勘米空則與之 丁

己浙江處州府麗水縣知縣陳九鼎奏本府知府李達以私鈔二百貫抑民買牛皮二十張民益鈔三千貫買納又以其家所

畜小羊豕充祭祀每羊豕一索民白金三兩又民告縣主簿李

孟麟取受糧長財物達<sub>略</sub>交購不行不可以爲府止 上諭右都

御史顧佐曰知府爲諸縣表率縣官不才者當治之若不能自

治豈能治人今以貪黷爲縣所奏甚可恥也其令按察司執而

罪之 戊子夜北方有蒼白雲二道長三丈餘時有流星大<sub>如</sub>碗

色青白尾赤有光出太微西垣西南行至濁 己未行在都察<sub>并知</sub>

院上獄囚提人待對及照勘年久未至之數 上覽之諭之曰

此皆由爾等怠忽致無辜淹繫之久其間豈無已死者堂上官

姑記過其各司各道原問官吏一年未完結者許更移文促之

二年不完者責稽延狀三年不完者罰俸五月四年不完者執而罪之在京

五府及各部首領官吏并在外方面與及首領官吏官吏以文書

至日為始一年不完責稽延狀二年不完罰俸五月三年不完

執而罪之衡所府州縣官吏亦以文書至日為始一年不完罰

俸五月二年不完執而罪之若所提之人及照勘之人文已起發

而中途遷延不至罪坐差提管解之人爾等即移文中外使皆

知之縱今仍怠慢不完及遷延不即至者皆舉奏治罪不宥

夜有派星火如盃色赤尾跡有光起奎東北行至滯氣 庚申

趙王高燧有疾奏至遣中官以御醫盛啓東馳驛往視上諭行

在兵部尚書張本日前者詔書凡民年七十之上及篤廢殘疾

者許一丁侍養令思各處取軍其中豈無獨子而父母老疾者

若令遠役則父母不免失所令有司勸實應充軍之人而父母年七十之上及篤廢殘疾者許於附近衙所充軍又諭行在工部尚書吳中曰近已停營造各處工匠在京者量存其半餘悉遣回俾如例輪班 賜造北和寧王貢使宴 廣西總兵官都督僉事山雲奏留貴州都司官軍於廣西更代操備時貴州都司言貴州累有苗寇欲取為廣西官軍雲以廣西潯州大藤等峽處山徭恃險為害出沒不時若不加兵守備切慮來隙侵犯上語尚書張本曰二處皆有寇而廣西為劇宜聽雲暫留 四川都司布政司按察司奏松潘盜賊尚橫屢出捷為永州已縣劫掠先是按察司劾奏總兵官都督陳懷酣飲廢事 上以為飲酒人情常事但違乃無警可恕遂寢不問至是聞賊屢出降勅責懷曰朕命爾總鎮一方須盜息民安乃為稱任今番寇縱

橫人受其害皆由爾耽酒不理軍務養成其患勅至即誅殄寇  
毋縱醜類遺害邊方辛酉四川總兵官都督陳懷奏四川嘉定

州捷為縣宣化驛糧賊聚黨綠河劫掠已調兵往捕未復餘黨  
逃入深山負險抗敵殺傷官兵上曰陳懷總兵在外小寇不能

戢可恥遂初懷同四川三司設法擒捕過時不獲罪有所歸

夜派星有大如雞稗色青白尾跡有光出軫南行至濁士戊慶

王楸奏欲孛家遂居寧夏如永樂洪熙故事往來於韋州游畋

上復書從之

巡按直隸監察御史張琦奏所考太平府會

賊閻草葦同知党睿等五人上謂都御史顧佐等曰比聞御史

考官亦有以好惡為進退者卿夙憲之長宜詳審之必有實跡

乃可黜罰甲子河南歸德州知州李志言歸德唐忠臣張巡

許遠死節之地故睢陽有協忠廟祀巡遠雷萬春南霽雲賈賁

姚問宋元以來俱命守臣祭之國朝未有祭祀無以勸獎忠良

上曰此不可闕命禮部定祀儀請以巡遠居正南霽雲等四

人配享從之命翰林撰祭文有司每歲以春秋仲月祭 乙丑

歲暮享 太廟 以明日止旦遣衛王瞻埏謁告 長陵 獻

陵 遣官祭五祀及旗纛之神 五鼓有流星大如碗色青白

尾跡有光出文昌西北行至濁 是歲天下戶口戶九百七十

七萬八千一百一十九口五千一百三十六萬五千八百五十

一田地四百四萬六千八百八十頃二十八畝田賦米麥三十六十

一萬八百九十八石絲一十七萬九千六百二十八斤綿二十

三萬四百四十斤有奇絹九萬四千一百三十八匹布一十二

萬九千八百四十七匹綿花二十四萬二千二百三十四斤折

色鈔七萬七千三百九十一錠雜課鈔四千四百七十四萬七

十錠米麥七萬九千七百六十一石銀六千二百九兩銅二千二百九十九斤鐵五十二萬九千七百五十七斤布二百八十三匹鹽課鹽五百四十萬三千九百五十引有奇折色鈔二十九百五萬七千二十二錠米六十七萬一千八百五十一石綿布七萬四千五百九十三匹茶課茶六十一萬一千七十二斤折色鈔一萬五千一百六十四錠屯田子粒八百四十三萬二百一十七石有奇採納金四百兩銀三十二萬二百九十七兩水銀五千七百三十四斤硃砂一千四十六斤石綠三十一萬二千六百斤雜黃一百九十七斤有奇漕運北京米麥豆五百四十五萬三千七百一十石歲免天下官田等項稅糧計米麥七十四萬六千一百四十四石鈔四百九十八錠綿一百二斤有奇



大明宣宗憲天崇道英明神聖欽文昭武寬仁純孝章皇帝實  
錄卷之七十四

大明宣宗章皇帝實錄卷之七十四終